

Holy Bible

Aionian Edition®

Bondei Bible

AionianBible.org

The world's first Holy Bible untranslation

100% free to copy and print

also known as “ The Purple Bible ”

Holy Bible Aionian Edition ®
Bondei Bible
Language: Bondei
Tanzania (Northeast)

Creative Commons Attribution ShareAlike 4.0 International, 2018-2026

Source text: eBible.org

Source version: 8/7/2026

Source copyright: Creative Commons Attribution ShareAlike 4.0

The Word for the World International, 2025

Formatted by Speedata Publisher 5.9.2 (Pro) on 8/31/2026

100% Free to Copy and Print

TOR Anonymously and <https://AionianBible.org>

Published by Nainoia Inc, <https://Nainoia-Inc.signedon.net>

All profits are given to <https://CoolCup.org>

We pray for a modern Creative Commons translation in every language
Translator resources at <https://AionianBible.org/Third-Party-Publisher-Resources>
Volunteer help and comments are welcome and appreciated!

Celebrate Jesus Christ's victory of grace!

Preface

Bondei at AionianBible.org/Preface

The *Holy Bible Aionian Edition* ® is the world's first Bible *un-translation*! What is an *un-translation*? Bibles are translated into each of our languages from the original Hebrew, Aramaic, and Koine Greek. Occasionally, the best word translation cannot be found and these words are transliterated letter by letter. Four well known transliterations are *Christ*, *baptism*, *angel*, and *apostle*. The meaning is then preserved more accurately through context and a dictionary. The Aionian Bible un-translates and instead transliterates eleven additional Aionian Glossary words to help us better understand God's love for individuals and all mankind, and the nature of afterlife destinies.

The first three words are *aiōn*, *aiōnios*, and *aiōdios*, typically translated as *eternal* and also *world* or *eon*. The Aionian Bible is named after an alternative spelling of *aiōnios*. Consider that researchers question if *aiōn* and *aiōnios* actually mean *eternal*. Translating *aiōn* as *eternal* in Matthew 28:20 makes no sense, as all agree. The Greek word for *eternal* is *aiōdios*, used in Romans 1:20 about God and in Jude 6 about demon imprisonment. Yet what about *aiōnios* in John 3:16? Certainly we do not question whether salvation is eternal! However, *aiōnios* means something much more wonderful than infinite time! Ancient Greeks used *aiōn* to mean *eon* or *age*. They also used the adjective *aiōnios* to mean *entirety*, such as *complete* or even *consummate*, but never infinite time. Read Dr. Heleen Keizer and Ramelli and Konstan for proofs. So *aiōnios* is the perfect description of God's Word which has *everything* we need for life and godliness! And the *aiōnios* life promised in John 3:16 is not simply a ticket to eternal life in the future, but the invitation through faith to the *consummate* life beginning now!

The next seven words are *Sheol*, *Hadēs*, *Geenna*, *Tartaroō*, *Abyssos*, and *Limnē Pyr*. These words are often translated as *Hell*, the place of eternal punishment. However, *Hell* is ill-defined when compared with the Hebrew and Greek. For example, *Sheol* is the abode of deceased believers and unbelievers and should never be translated as *Hell*. *Hadēs* is a temporary place of punishment, Revelation 20:13-14. *Geenna* is the Valley of Hinnom, Jerusalem's refuse dump, a temporal judgment for sin. *Tartaroō* is a prison for demons, mentioned once in 2 Peter 2:4. *Abyssos* is a temporary prison for the Beast and Satan. Translators are also inconsistent because *Hell* is used by the King James Version 54 times, the New International Version 14 times, and the World English Bible zero times. Finally, *Limnē Pyr* is the Lake of Fire, yet Matthew 25:41 explains that these fires are prepared for the Devil and his angels. So there is reason to review our conclusions about the destinies of redeemed mankind and fallen angels.

The eleventh word, *eleēsē*, reveals the grand conclusion of grace in Romans 11:32. Please understand these eleven words. The original translation is unaltered and a highlighted note is added to 64 Old Testament and 200 New Testament verses. To help parallel study and Strong's Concordance use, apocryphal text is removed and most variant verse numbering is mapped to the English standard. We thank our sources at eBible.org, Crosswire.org, unbound.Biola.edu, Bible4u.net, and NHEB.net. The Aionian Bible is copyrighted with creativecommons.org/licenses/by/4.0, allowing 100% freedom to copy and print, if respecting source copyrights. Check the Reader's Guide and read at AionianBible.org, with Android, and with TOR network. Why purple? King Jesus' Word is royal and purple is the color of royalty! All profits are given to CoolCup.org.

History

Bondei at AionianBible.org/History

06/21/75 - Two boys, P. and J., wonder if Jesus saves all and pray.
04/15/85 - Aionian Bible conceived as B. and J. pray.
12/18/13 - Aionian Bible announced as J. and J. pray.
06/21/15 - Aionian Bible birthed as G. and J. pray.
01/11/16 - AionianBible.org domain registered.
06/21/16 - 30 translations available in 12 languages.
12/07/16 - Nainoia Inc established as non-profit corporation.
01/01/17 - Creative Commons Attribution No Derivatives 4.0 license added.
01/16/17 - Aionian Bible Google Play Store App published.
07/01/17 - 'The Purple Bible' nickname begins.
07/30/17 - 42 translations now available in 22 languages.
02/01/18 - Holy Bible Aionian Edition® trademark registered.
03/06/18 - Aionian Bibles available in print at Amazon.com.
09/15/18 - Aionian Bible dedicated as J. and J. pray again.
10/20/18 - 70 translations now available in 33 languages.
11/17/18 - 104 translations now available in 57 languages.
03/24/19 - 135 translations now available in 67 languages.
10/28/19 - Aionian Bible nursed as another J. and J. pray.
10/31/19 - 174 translations now available in 74 languages.
02/22/20 - Aionian Bibles available in print at Lulu.com.
05/25/20 - Illustrations by Gustave Doré, La Grande Bible de Tours, Felix Just.
08/29/20 - Aionian Bibles now available in ePub format.
12/01/20 - Right to left and Hindic languages now available in PDF format.
03/31/21 - 214 translations now available in 99 languages.
11/17/21 - Aionian Bible Branded Leather Bible Covers now available.
12/20/21 - Social media presence on Facebook, Twitter, LinkedIn, YouTube, etc.
01/01/22 - 216 translations now available in 99 languages.
01/09/22 - StudyPack resources for Bible translation study.
01/23/22 - Volunteers celebrate with pie and prayer.
02/14/22 - Strong's Concordance from Open Scriptures and STEP Bible.
02/14/23 - Aionian Bible published on the TOR Network.
12/04/23 - Eleēsē added to the Aionian Glossary.
02/04/24 - 352 translations now available in 142 languages.
05/01/24 - 370 translations now available in 164 languages.
08/05/24 - 378 translations now available in 165 languages.
08/18/24 - Creative Commons Attribution 4.0 International, if source allows.
10/20/24 - Gospel Primer handout format.
11/24/24 - Progressive Web Application off-line format.
01/28/25 - All profits are given to CoolCup.org.
03/12/25 - 382 translations now available in 166 languages.
06/21/25 - 468 translations now available in 230 languages.
09/01/25 - 538 translations now available in 291 languages.
08/31/26 - 539 translations in 291 languages with 9,609,899 verses.

Table of Contents

NEW TESTAMENT

Matayo	11
Maliko	38
Luka	55
Yohana	84

APPENDIX

Reader's Guide
Glossary
Maps
Destiny
Illustrations, Doré

NEW TESTAMENT



Yesu akamba, "Tate, waekee kwa viya khawamanya wagoado."

Naho wakapangana magwanda yakwe kwa kuyatoeya kula.

Luke 23:34

Matayo

1 Kitabu cha mazina ya wantu wa kolwa da Yesu Klistu mwana Daudi mwana wa Ibulahimu. **2** Ibulahimu nekamvyaa Isaka na Isaka akamvyaa Yakobo na Yakobo akamvyaa Yuda na wanduguze. **3** Yuda akamvyaa Pelesi na Zela, ambao mami yao nee ni Tamali, Pelesi akamvyaa Eziloni na Hesiloni akamvyaa Alamu. **4** Alamu akamvyaa Aminadabu na Aminadabu akamvyaa Nashoni na Nashoni akamvyaa Salimoni. **5** Salimoni akamvyaa Boazi, na mami yakwe Boazi nee ni Lahabu, na Boazi akamvyaa Obedi, na mami yakwe Obedi nee ni Luti, na Obedi akamvyaa Yese. **6** Nae Yese akamvyaa Seuta Daudi. Daudi akamvyaa Selemani, mami yakwe Selemani ni yuda ekuwae mkaza Ulia. **7** Selemani akamvyaa Lehoboamu na Lehoboamu akamvyaa Abiya na Abiya akamvyaa Asa. **8** Asa akamvyaa Yehoshafati na Yehoshafati akamvyaa Yolamu na Yolamu akamvyaa Uzia. **9** Uzia akamvyaa Yosamu na Yosamu akamvyaa Ahazi na Ahazi akamvyaa Ezekia. **10** Ezekia akamvyaa Manase na Manase akamvyaa Amoni na Amoni akamvyaa Yosia. **11** Yosia akamvyaa Yekonia na wanduguze. Kisingi cha kusamizwa kwa Wayahudi kuita si ya Babeli. **12** Bada ya kusamizwa na kuita mwe si ya Babeli, Yekonia akamvyaa Shealiteli na Shealiteli akamvyaa Zelubabeli. **13** Zelubabeli akamvyaa Abiudi na Abiudi akamvyaa Eliakimu na Eliakimu akamvyaa Azoli. **14** Azoli akamvyaa Sadoki na Sadoki akamvyaa Akimu na Akimu akamvyaa Eliudi. **15** Eliudi akamvyaa Eliazali, na Eliazali akamvyaa Matani na Matani akamvyaa Yakobo. **16** Yakobo akamvyaa Yusufu muume da Malia ekuwae mami yakwe da Yesu etangwaye Klistu. **17** Naho kuvokea Ibulahimu adi kubua kwa seuta Daudi, nee kuwa na vivyazi kumi dimwe na nne, naho tangia Seuta Daudi hadi Wayahudi wekudoigwaho kuita Babeli nee kuwa na vivyazi kumi dimwe na nne. Naho kuvokea kisingi wekusamizwaho adi kuvyaigwa kwa Yesu Klistu nee kuwa na vivyazi kumi dimwe na nne. **18** Naho kuvyaigwa kwa Yesu Klistu nekuwa ivi, Malia mami yakwe ekuwaho kaombwa na Yusufu. Akini kisingi khawazati kuteguana akaoneka ana ifu kwa udaho wa Muye wa Muungu. **19** Kwaviya Yusufu, ekuwaye akunda kumtegua Malia nekawa mntu yedi, khelukunda kumgea soni hemeso ya wantu, ivyo akakunda kumbada kwa sii. **20** Ekuwaho akamamakhanya mbui iyo, mndima wa uko uwanga kwa Muungu wa Zumbe akamwawiiya mwe sozi, nakumwamba “Yusufu mwana Daudi wesekuogoha kumdoa Malia atende mkazio mana kenua ifu kwa udaho wa Muye wa Muungu. **21** Endaavyae mwana kigosi na wendaumwekhe zina da Yesu, kwa viya

yee nee mwendae awaohoe wantu wakwe kulawa mwe mavigaviga yao.” **22** Naho aya yose yalawiiya ili iiganie ida mbui ya Zumbe ekugombekayo kwembokea kwa muoni wa Muungu **23** “Kauwa mvyee mwenye kiwaa endaenue ifu. Na kuvyaa mwana kigosi, nae endaetangwe Imanueli” mana yakwe, “Muungu hamwe na swie.” **24** Naye Yusufu ekwenukahoe mwe usisiza akagosoa inga mndima wa uko uwanga kwa Muungu wa Zumbe ekumwambavyo, akamdoa mkaziwe adi kaya. **25** Akini khelukonana nae adi Maliamu ekuvyaaho mwana kigosi. Na Yusufu akamwekha zina da Yesu.

2 Yesu kavyaigwa mwe mzi wa Betilehemu phande ya Uyahudi, kisingi cha ugookezi wa Seuta Helode. Ekuvyaigwaho du, wamanyi wa ntoondo kulawa awiyo da zua wakabua mzi wa Yelusalemu, **2** wakauza, “Yuhahi mwana, mwekuvyaigwa, endaeawe Seuta wa Wayahudi?, Kwaviya tiyona ntoondo yakwe yekulawiiyaho awiyo da zuwa na swie teza kumvika.” **3** Seuta Helode ekuyategeeza ayo, yee na wantu wose wa mzi wa Yelusalemu wakatozwa ni maatu. **4** Naho akawetanga hamwe, waviki wakuu wose na wahinyi wa miko ya Muungu ekumwekwayo Musa akawauza, “Klistu avyaigwa hahi?” **5** Wowo wakamtambaisa, “Avyaigwa mwe mzi wa Betilehemu, uko Uyahudi.” Inga muoni wa Muungu ekuandikavyo, **6** “Wee Betilehemu si ya Uyahudi, Wee khio mdodo katu mwe mizi mikuu ya si ya Yudea Kwaviya aho hako endalawiiye Seuta mwendae awagookee wantu wangu wa Isilaeli.” **7** Aho Helode akawetanga kandani awo wamanyi wa ntoondo akawauza, asa kisingi ida ntoondo yekulawiiyaho. **8** Naho akawaagiya waite mwe mzi wa Betilehemu akawamba, “Hitani mkasunguumanye kwa vitana mbui za mwana uyo, mkabinda kumanya mbui zakwe niyeteani mbui zakwe na miye niite nikamvike.” **9** Wekubindaho kumtegeeza seuta, awo wamanyi wa ntoondo wakahauka, wakaongweewa na ida ntoondo wekuiyonayo awio da zua adi hantu hada hekuwaho yuda mwana, **10** Wenye umanyi wekuonaho ida ntoondo igooka nawo wakawa na nyemi muno. **11** Wakengia mda nyumbani, wakamwona yuda mwana hamwe na Malia mami yakwe wakakinta mavindi, wakamvika. Naho wakavugua sanduku na kulavya funge zao, zahabu na ubani na mzi kwaajii ya wana wekwetangwao manemane. **12** Iyo wakauya mwe si yao kwa sia ntuhi, kwaviya Muungu nee kawahaza mwe sozi wasekuuya kwa Helode. **13** Wamanyi wa ntoondo wekuhaukaho mndima wa uko uwanga kwa Muungu wa Zumbe akamuawiiya Yusufu mwe sozi akagombeka, “Hauke, mdoe mwana hamwe na mami yakwe mnyikie Misili. Mwekae

uko adi nendaho nikugombeke vituhu, kwaviya Helode aondeza kumkoma uyu mwana.” 14 Iryo, Yusufu akenuka, akamdoa mwana hamwe na mami yakwe wakahauka na kio akaita Misili. 15 Akekaa uko hadi Helode ekuuyaho na nyuma mbui iyo igosoka inga ekwambavyo Zumbe kwa sia ya muoni wakwe iiganie, “Khimwetanga mwanangu kulawa Misili.” 16 Helode ekumanyaho wada wamanyi wa ntoondo wantiia akakimwa muno. Akaagiya wana wose wa gigosi wa mzi wa Betilehemu na mizi yose yekuwayo hehi yakwe, kuvokea mwana wa msi umwe adi myaka miidi wakomwe. Bada ya kumanya mbui izo kulawa kwa wada wamanyi wa ntoondo. 17 Nee yekuiganiaho mbui yekugombekwayo kwa sia ya muoni Yelemia, 18 “Mgutio wa ndio na mabwaimbo vitegeezeka uko Lama. Laheli awaiya wana wakwe, Nahodu khakunda kugewa moyo kwaviya wose wakomwa.” 19 Helode ekuuyaho na nyuma mndima wa uko uwanga kwa Muungu wa Zumbe akamuawiya Yusufu mwe sozi kuda Misili, 20 akamwamba, “Enuka! Mdoe mwana hamwe na mami yakwe, uuye vituhu mwe si ya Isilaeli kwaviya wada wekukundao kumkoma mwana uyo khawana ugima vituhu.” 21 Naho Yusufu ekwenukaho, akamdoa mwana hamwe na mami yakwe akauya mwe si ya Isilaeli. 22 Akini Yusufu ekusikiaho kuwa Alikelao mwanawe da Helode nekawa seuta wa si ya Yudea hantu hatati yakwe akaogoha kuita uko. Naho bada ya kumezwa mwe sozi akaita phande za Galilaya, 23 akasamia mwe mzi wetangwao Nazaleti. Nee ivyo yekuiganiavyo mbui zekugombekwazo kwa sia ya Waoni wa Muungu, “Endaetangwe mntu wa Nazaleti.”

3 Misi ziya Yohana Mbatiza keza akibiikia mwe nyika ya Yahudi na akigombeka, 2 “Mhitukieni Muungu na mbade mavigaviga yenu kwamana useuta wa uwanga kwa Muungu uhehi.” 3 Yohana uyu ni yuda mwekutamwiwaye na muoni Isaya ekwambaho, “Mgutio wa mntu wetanga mwenyika ‘Mgosoeanyi Zumbe sia yakwe Nyooshani myemboko yakwe.’” 4 Yohana nee kavaa gwanda dekufumwado kwa mazoya ya mnyama etangwae ngamia na mkwiji wa babu mwe kigudi. Khande yakwe neiwa sige na woki. 5 Naho wantu wakamtimia kulawa mzi wa Yeluselemu, na phande zose za Yahudi na mizi ya khandakhanda ya zigizigi da mazi da Yolodani. 6 Nawo wakagombeka mavigaviga yao na kubatiizwa mwe zigizigi da mazi da Yolodani. 7 Akini ekuwaonaho Mafalisayo na Masadukayo wangi wamwezea wakunda kubatiizwa, nee awamba, “Nywie uvyazi wa nyoka! Nindai mwekuwahaza mguuke maya yezayo?” 8 Naho oneshani kwa ntendwa zenu kuwa mumhitukia Muungu na kubada mavigaviga inga mti uvyao matunda matana. 9 Naho msekumamakhanya mwe mioyo yenu na kweamba

tinae tate ni Ibulahimu. Kwaviya nawamba kwei Muungu adaha kuyagoso maiwe aya yawe wana wa Ibulahimu. 10 Na hoyu diikwa kae mwe mazindo ya miti ivyo kia mti wesaokuvyaa matunda matana wendausengwe na kwasigwa mwe moto. 11 Mie nawabatiiza kwa mazi kwaviya mhituka na kubada mavigaviga. Akini mwe mgongo wangu eza yee mwenye udaho kusima miye, ambae khikundigwa katu kwenu sabana zakwe. Yee enda awabatiize kwa Muye wa Muungu na kwa moto. 12 Ana kiheo mwe mkono wakwe, nae endaahagie hantu ha kuhetea, na kukusanya ubosi wakwe na kuuika mwe taa na mafusi endaayoke moto wesaokukomeka.” 13 Naho kisingi icho Yesu akalawa mzi wa Galilaya akabua mwe zigizigi da mazi da Yolodani akamtimia Yohana ambatiize. 14 Akini Yohana akaemea akamba, “Mie asa nemkundigwa nibatiizwe na weye, na weye weza aha hangu nikubatiize!” 15 Yesu akamtambaisa, “Eka iwe ivyo isasa, kwaajii inu nee vyeivyo tikundigwavyo kugosoa yada akundayo Muungu. Aho Yohana akazumiya.” 16 Yesu ekubindaho kubatiizwa akalawa mwe mazi, uwanga kwa Muungu kukavuguka nae akoona Muye wa Muungu ukaseeya inga sua na kugooka uwanga yakwe. 17 Naho mgutio kulawa uwanga kwa Muungu ukagombeka, “Uyu nee mwanangu nimkundisae, anieteaye nyemi kuhu.”

4 Naho Yesu akegalwa na Muye wa Muungu adi he kiwawe na kugeezwa na ibiisi. 2 Bada ya kwekaa misi makumi mane kwehiniza kuda kio na musu na kisiikizi akaumwa ni saa muno. 3 Aho mgeezaka akamwezea, na akagombeka, “Ukawa wee ni Mwana wa Muungu yaagiye maiwe aya yawe mabumunda.” 4 Yesu akamtambaisa, “Iyandikwa mwe Maandiko ya Muungu, ‘Mntu khadaha kwekaa du kwa mabumunda, Iya kwa kia mbui agombekayo Muungu.’” 5 Naho ibiisi akamdoa adi Yeluselemu mzi wa Muungu akamuika uwanga ya mnaa wa Nyumba ya Muungu, 6 akamwamba, “Ikawa wee ni Mwana wa Muungu, etambike asi kwaviya iyandikwa mwe Maandiko ya Muungu ‘Muungu endaawaagiye wandima wakwe wa uko uwanga weze, Wendawakudoe mwe mikono yao, Usekweza kweumiza muundi wako mwe iwe.’” 7 Yesu akatambaisa, “Naho iyandikwa mwe Maandiko ya Muungu, ‘Usekumgeezaka Zumbe, Muungu yako.’” 8 Naho ibiisi akamdoa adi uwanga ya muima wekulehao, akamwonyesha seuta zose za inusi na ukuu wakwe. 9 Akamwamba, “Ivi vyose nendankweke inga ukanikintia mavindi na kunivika.” 10 Aho Yesu akamwamba, “Hauke ibiisi! Iyandikwa mwe Maandiko ya Muungu ‘Wendaumvikie Zumbe Muungu yako na kumgosoea ndima yee ikedu!’” 11 Aho, ibiisi akambada, na wandima wa uwanga uko kwa Muungu wakamwezea

na kumwambiiza. 12 Yesu ekusikiaho Yohana Mbatiza kagewa mwe kifungo akaita mwe si ya Galilaya. 13 Yesu khekwekaa Nazaleti iya kaita kwekaa Kapelinaumu mzi wekuwao hehi na tondoo da mazi da Galilaya mwe miyaka ya si ya Zabuloni na Nafutali. 14 Iganie ida mbui ya uwoni wa muoni Isaya inga ikugombekavyo. 15 "Si ya Zabuloni na si ya Nafutali Kwe sia ya kwembokea tondoo da mazi phande ya Yolodani na Galilaya si ya wantu wesawokuwa Wayahudi! 16 Wantu wada wekwekaa mwe kiza. Wauona ung'ao mkuu. Naho wekwekaa mwe si ya kiza na kuogoha ufe, Ung'azi uwezea." 17 Kuvokea kisingi icho, Yesu akavoka kubiikia akagombeka, "Hitukani na mbade mavigaviga yenu kwamana useuta wa uwanga kwa Muungu uhehi." 18 Kisingi Yesu ekuwaho enda khandakhanda ya tondoo da mazi da Galilaya neawaona wandugu waidi walowa samaki, Simoni etangwae Petulo na Andulea ekuwaye nduguye, newawa wakazitambika nyavu zao mwe mazimshindo kwaviya wowo newawa walowa. 19 Naho Yesu akawamba, "Nitongeani na miye nendaniwagosome nywie mnietee wantu inga walowa waetavyo samaki kaya." 20 Aho wakazibada nyavu zao na wakamtongea. 21 Ekuita hemeso, akawaona wandugu watuhu waidi Yakobo na Yohana wana wa Zebedayo. Awo newawa mwe ngaawa hamwe na tati yao Zebedayo nee wakagosa nyavu zao. Yesu akawetanga, 22 ahoaho wakaibada ngaawa hamwe na tati yao, wakamtongea Yesu. 23 Yesu nekawa akaita kia hantu mwe mzi wa Galilaya, uku akahinya mwe nyumba ya kukintania Wayahudi na kuwaabikia Mbui Yedi za Useuta wa Muungu na kuhonya kia mbai ya matamu yose wekuwayo nayo wantu. 24 Mbui zakwe zikaambazwa phande zose za si yose ya Siliya. Wekutozwao na matamu mbaimbai na suuba na wenye mazaiko na wagwao mtwi na wekuhooawo, naye Yesu akawahonya. 25 Mazumwezumwe makuu ya wantu kulawa mzi wa Galilaya na mzi wa Dekapoli na Yelusalemu na Yudea na phande ya Zigizigi da mazi da Yolodani wose wakamtongea.

5 Yesu ekuyaonaho mazumwezumwe ya wantu akakwea kwe muima akekaa. Wahina wakwe nao wakambasa, 2 nae akavoka kuwahinya. 3 "Wenda wawe na nyemi wada wantu wamanyao kuwa wamkunda Muungu mwe wekazi wao, Mana useuta wa uwanga uko kwa Muungu ni wao 4 Wenda wawe na nyemi wada wekuwao na hovu, Mana awo wenda wahongezwe. 5 Wenda wawe na nyemi wada wahuhusi, Mana wendawahokee si ambayo Muungu ekuwaikiyo kiaga endaawekhe. 6 Wenda wawe na nyemi wada wenye saa na khiu ya kugosoa akundavyo Muungu,

Kwaviya wenda weguswe. 7 Wenda wawe na nyemi wada wenye mbazi, Kwaviya wenda wafiwe mbazi. 8 Wenda wawe na nyemi wada wenao moyo mtana, Kwaviya awo wenda wamwone Muungu. 9 Wenda wawe na nyemi wada waetao uivanisi, Kwaviya awo wenda wetangwe wana wa Muungu. 10 Wenda wawe na nyemi wada wasuumizwao kwaajii ya kugosoa viya akundavyo Muungu, Kwaviya Useuta wa uwanga uko kwa Muungu ni wao. 11 "Mwenda muwe na nyemi nywinywi wantu wendaho wawabee na kuwasuumiza na kuwagombeka ya ufayimi wa mbai yoyose kwa uhokho kwaajii ya miye. 12 Muwe na nyemi muno kwaviya funge yenu ni kuu uko uwanga kwa Muungu. Iyoy nee wekuwasuumizavyo waoni wa Muungu wekuwaaho kisingi khamzati kuwaaho. 13 "Nywie ni munyu wa inusi. Akini munyu ukaza umwiye wakwe khaidahika vituhu kuvuza umwiye wakwe, iya kwasigwa chongoi na kujatwa ni wantu. 14 "Nywie ni ung'azi wa inusi! Mzi wekuzengwao uwanga ya muima khaudaha kwefisa. 15 Naho wantu khawawasha taa na kuigubika na nyungu iya waiika uwanga ya kintu cha kuikia taa iyo, ili iwamuikie wantu wose weumo mwe nyumba. 16 Viyaviya mng'ao wenu na uwamuike wantu, naho waone ntendwa zenu ntana, wamtogoe Tati yenu ekuwaye uwanga uko kwa Muungu. 17 "Msekumamakhanya sheza kuiyusa miko ya Musa na mahinyo ya waoni iya ncheza kuiganiza. 18 Kwaviya nawamba kwei, adi aho mbingu na inusi zendazemboke, khahana katu hantu ekuwaho hadodo he miko ya Musa yendayo iuswe adi yose yaiganie. 19 Naho mntu yoyose mwendaabade kutongea na kuwahinya wantu ivyo, endaetangwe mdodo muno mwe Useuta wa uwanga kwa Muungu, iya mntu azigosoae na kuzihinya, uyo endaetangwe mkuu mwe Useuta wa Uwanga uko kwa Muungu 20 Nawagombeka, mwakundigwa muitongee vyedi muno miko ya Muungu kusima viya wekugosavyo wahinyi wa miko ya Musa na Mafalisayo, ama khivyo khamna mwengie mwe Useuta wa uwanga uko kwa Muungu. 21 "Mtegeza wantu waaho kae wekwembigwavyo, 'Usekukoma! Na mntu yoyose endaeakome endaaumiwe.' 22 Akini miye nawamba, yoyose amkimae nduguye wa gigosi hambu wakivyee akundigwa aamuiwe. Na ambae ambea nduguye endaegalwe he mkonga. Amwetangae nduguye, 'Mhezi' akundigwa engie mwe moto wesao kukomeka. (Geenna g1067) 23 Ukegaa malavyo yako uwanga ya ingo na ahoaho ukamanya khamwevana na nduguyo, 24 bada malavyo yako he meso ya ingo, na uwite ukevane na nduguyo, nee uuye ulavye malavyo yako. 25 "Evana na mmasa yako kinyio kisingi mke siai hamwe nae uku mwaita he mkonga, uyo mmasa yako asekweza akakubiza kwa

muamua nae muamua akakwekhia kwa maasikai na kugewa mwe kifungo.” 26 Kwa kwei nakwamba khunaulawe umo adi uihe hea ya kisiikiizi. 27 “Mtegeeza kuwa wantu nee wembigwa, ‘Usekugosoa ukianga.’ 28 Akini miye nawamba, endaeamkauwe mvyee kwa kumtamiya endaawe kagosoa nae ukianga mwe moyo wakwe. 29 Ziso dako da kuume dikakutenda ugosoe mavigaviga diuse ukadase hae. Ni ebae kwaza kimamo kimwe cha mwii wako kusima mwii wako wose utambikwe mwe moto wesao kukomeka. (Geenna 91067) 30 Na inga mkono wako wa kuume ukakutenda ugosoe mavigaviga usenge na uwase hae. Ni ebae hako kwaza kimamo kimwe cha mwii wako, kusima mwii wako wose utambikwe mwe moto wesao kukomeka. (Geenna 91067) 31 “Naho igombekwa kuwa, ‘Mgosi yoyose ambadae mkaziwe, akundigwa amwekhe bauwa ya kubadana.’ 32 Akini miye nawamba mgosi yoyose khakundigwa kumbada mkaziwe kwa masa yoyose, iya kwa mbui ya ukianga du, akini ambadae mkaziwe kwa masa yoyose amtenda mkaziwe awe mkianga na mgosi yoyose endaeamtegue yuda mvyee mwekubadwa agosoa ukianga. 33 “Naho mtegeeza wekwembigwavyo wantu wa kae kuwa, ‘Inga ukaika kiaga chako kwa Muungu wakundigwa ukiiganize.’ 34 Iya miye nawamba mwesekuaha katu iwe uwanga kwa Muungu, kwaviya uwanga kwa Muungu ni kigoda cha Useuta wa Muungu, 35 naho msekuahia inusi, kwaviya nee hantu hakwe Muungu hakuikia miundi, naho kwa Yelusalemu kwaviya ni mzi wa Seuta Mkuu. 36 Naho usekuaha kwa mtwi wako kwaviya khudaha kugosoa hata fii mwenga iwe size hambu yekung’aayo. 37 Ukagombeka, ‘Eehe, naiwe eehe’ Na ukagombeka, ‘Khio kwei naiwe khio.’ Chochose kitendesacho chalawa kwa yuda ibiisi. 38 “Mtegeeza nee igombekwa, ‘Ziso kwa ziso, zino kwa zino.’ 39 Iya miye nawamba, usekuiha masa kwa mntu ekukugosoeaye mafyaimi. Mntu akakutoa kofi funda da kuume, mhituiye na dakumoso. 40 Mntu akundae kukwegaa mwe mkonga na kukunda kukudoeya shati dako mbadie adoe na koti dako. 41 Mntu akakushuutiza kwenu fuushi dakwe kilomita mwenga, wee wenue kilomita mbii. 42 Akuombezae mwekhe, akundae kukuazima kintu usekumuemeeya. 43 “Mtegeeza kuwa nee igombekwa, ‘mkundise mmbuya wako na umkime mmasa yako.’ 44 Akini miye nawamba, wakundiseni wamasa wenu na kuwavika wada wawasuumizao nywie, 45 ili mdahe kuwa wana wa tati yenu mwe uko uwanga kwa Muungu kwaviya yee aditenda zua diwekhe mng’ao wakwe kwa wantu wafyaimi na wantu wedi, na viyaviya fua yanya kwa wantu wamkundisao Muungu na wantu wesaokumkundisa Muungu. 46 Mkawakundisa du wada wawakundisao ivi

mwendamwekhigwe kintu yani? Kwaviya watozao ushuu nao wagosoa ivyoivyo! 47 Inga mkasagua kugosoa yedi kwa wambuya wenu du ivi muwatendesa watuhu kintu chani? Kwaviya ata wantu wesao kummanya Muungu nao wagosoa ivyoivyo! 48 Naho mwesekuhungukiwa na kintu chochose inga Tati yenu wa uwanga kwa Muungu ambavyo khekuhungukiwa.

6 “Ekauweni mwesekugosoa inga wakundavyo wantu, ili wawatogoe. Kwaviya mkagosoa inga ivyo khamnampate funge kwa Tati yenu mwe uko uwanga kwa Muungu. 2 “Ivyo muwaambizavyo wakiwa, mwesekweambaza kwa wantu, inga wahokho wagosoaavyo mwe nyumba zakukintania Wayahudi na siai ili wantu wawatogoe. Kwei nawagombeka, awo wekhigwa kae funge. 3 Akini wee umuambizavyo mkiwa gosoa ivyo na mntu yoyose asekumanya. 4 Umuambiize mtu kwesiho mntu kumanya na Muungu endaakwekhe funge. 5 “Mvikaho msekugosoa inga wahokho, wowo wakunda kuvika wakawa wagooka mwe nyumba ya kuvika wayahudi na mwe sia phanda ili wantu wawakauwe. Kwei nawamba awo wekhigwa kae funge dao. 6 Akini wee uvikaho engia gati kwako vugaa uvi, naho umvike Tati yako esae kuoneka. Nae Tati yako aonae sii, endaakwekhe funge. 7 “Naho mvikaho, mwesekutamwiya ntamwiizi zesazo kuwa na mana inga wantu wesao kummanya Muungu, kwaviya wowo wamamakhanya wendawategeeze kwa ntamwiizi zao kuwa nyingi. 8 Naho mwesekuigana nao kwaviya Tati yenu amanya muyakundayo kabla khamzati kumwombeza. 9 Naho ivi nemkundigwavyo kuvika, ‘Tati yetu mwe uko uwanga kwa Muungu, Zina dako ditogolwe muno. 10 Useuta wako weze. Yada ukundayo yagosoke uko uwanga kwako Muungu na yagosoke mwe inusi 11 Utekhe khande yetu kia msi. 12 Utiekee masa yetu Inga swiswi tiwaekeavyo masa wamasa wetu. 13 Usekutigea mwe mageezo Akini utihonye na ibiisi kwaviya Useuta niwako na udaho na ukuu hata misi zose zesazo na kisiikiizi. Pepa.’ 14 “Kwaviya mkawaakea wantu masa yao na Tati yenu wa uko uwanga kwa Muungu endaawaekee na nywinywi 15 Naho mkesekuwaakea wantu masa yao na Tati yenu khanaawaekee nywinywi masa yenu. 16 “Mwehinizaho kuda khande, mwesekugosoa inga wabakha, wehituao kuwa wenye hovu na kunyafuisa vyeni vyao, ili wantu wawaone kuwa wehiniza kuda khande. Kwei nawamba wapata kae funge zawo. 17 Akini mwehinizaho kuda, esiseni mavuta mwe mitwi yenu na kusunta vyeni vyenu, 18 ili kwehiniza kwenu kuda kwesekumanyika na wantu watuhu, iya Tati yenu ekae hantu hasii, nae Tati yenu aonae sii endaawekhe funge zenu. 19 “Mwesekweikia kiikizo

hanu he inusi ambaho sondo na kutu, na wabavi wengia na kubawa. 20 Eikieni kiikizo uko uwanga kwa Muungu ambaho sondo na kutu khawadaha kubananga na wabavi khawadaha kuita kutua na kubawa. 21 Kwaviya hada cheiho kiikizo chako nee wendahouwe moyo wako. 22 "Ziso ni taa ya mwii. Inga ziso dako ni gima mwii wako wose wendaue mwe mng'ao. 23 Akini ikawa ziso dako khio gima mwii wako wose wendaue mwe kiza. Naho mng'ao wekuwao umo mwako ukawa kiza, umanye icho kiza ni chakutisa muno. 24 "Khahana mntu adahae kuwagosoeya ndima mazumbe waidi, kwaviya enda amgosomee ndima vitana zumbe yumwe na kumbea mtuhu. Khamdaha kumkundisa Muungu hamwe na vintu vingi." 25 "Ivyo nawamba, msekuwa na matumatu uwanga ya khande na vidomeo hambu mii yenu mvaeni, kwaviya kwekaa kwenu khakukauwiya khande du na mii yenu khaikauwiya magwanda. 26 Wakauweni wadege wa uwanga khawahanda na khawabonda na khawana khande mwe taa dodose. Hata ivyo Tati yenu wa uwanga awaisa. Tambe nywie khamna yombe kusima aho? 27 Nindai gatigati yenu mwenye maatu muno adaha kweongeza msi wa kwekaa kwakwe? 28 "Kwambwai mwepisha kwaajii ya magwanda? Kauweni maua ya mzituni yatamavyo, khayagoso ndima wala khayegosweeya magwanda yakwe. 29 Iya nawamba hata seuta Selemani mwenye na vintu vyakwe vyose khekuvahi kuvikwa vitana inga uwa dimweaho. 30 Naho ikawa Muungu ayavika ivi mani ya mwe minda ambayo ivyeo yaaho na kioi yasigwa mwe moto, Nywie wantu wenye uzumizi mdodo namba nywie enda awagosomee muno? 31 "Aho msekuwa na matumatu, 'Tendatideni? Tendatidomee mbwai? Tendativae mbwai?' 32 Kwaviya ayo yose yaondezwa na wantu wesaokummanya Muungu. Tate yenu wa uwanga amanya ati mwakunda vintu ivyo vyose. 33 Naho vokani kuuondeza Useuta wakwe, na kwekaa viya akundavyo Muungu na ayo yose mwendamwekhigwe na ngeeko. 34 Naho msekuwa na matumatu ya kioi, kwaviya kioi ina yakwe. Kiya msi ina suuba yakwe.

7 "Msekuwaamwiya watuhu, msekweza na nywie mkaamwiya. 2 Kwaviya mwendavyomuwaamwiye watuhu nee ivyo na nywie mwendavyomuamwiye, na kihimo kiakia muhimiacho watuhu nee icho mwendachomuhimiwe. 3 Kwambwai waona kibasi mwe ziso da nduguyo na ahoaho khuona basi mwe ziso dako? 4 Hambu wadaha viivihii kumwamba nduguyo 'Mwaya eka nikuuse iki kibasi mwe ziso dako kisingi wee mwenye una basi mwe ziso dako?' 5 Mhokho wee usa basi deumo mwe ziso dako naho ndiho wendaho udahe vitana kuusa kibasi mwe ziso da nduguyo.

6 "Msekuwekha makui vintu vya vyekuikwavyo kwajii ya Muungu wasekweza wakahituka na kuwakwacha naho msekuwawasia nguuwe lulu zenu wasekweza kuzijata. 7 "Ombezani nanywi mwendamwekhigwe, na ondezani nanywi mwendampate na ukon'te uvi na mwenda mvuguuwe. 8 Kwaviya mntu yoyose aombezae ekhigwa na aondezae apata na akon'tae uvi avugwiwa. 9 Tambe kuna yumweaho mwanawe akamwombeza bumunda enda amwekhe iwe? 10 Hambu akamwombeza samaki endaamwekhe mdudu? 11 Ikawa ninywi wenye mavigaviga mwamanya kuwekha wana wenu vintu vitana, haika Tati yenu mwe uwanga kwa Muungu endaawekhe vintu vitana muno kwa wada wamuombeza. 12 "Yoyose mkundayo wantu wawagosomee na nywie muwagosomee inga ivyo. Kwaviya inu nee miko ya Musa na mahinyo ya waoni wa Muungu. 13 "Engiani kwa kwembokea uvi msisii, kwaviya sia itayo umo mwe ubanasi ni phana, na sia ya kwengiia umo ni phana, na wembokeao sia iyo ni wangi. 14 Iya sia itayo mwe ugima ni sisii na uvi wa kwengiia ni msisii, ni wantu wachechedu wadaha kuiyona sia iyo. 15 "Muwe hae nao waoni wahokho wowo weza kwenu wakaoneka inga ngoto kwa chongoi akini kwa ndani ni inga makui makai ya mzituni. 16 Mwendamuwamanye kwa wayagosoayo inga timanyavyo mti kulawana na matunda yakwe. Ivi tambe wantu watunda zabibu mwe migunga hambu matunda yetangwayo tini mwe mbigii? 17 Iya mti mtana wavyaa matunda matana na mti mfyaimu wavyaa matunda mafyaimu. 18 Mti mtana khaudaha kuvyaa matunda mafyaimi na mti mfyaimi khaudaha kuvyaa matunda matana. 19 Kia mti wesao kuvyaa matunda matana wenda usengwe na kwasigwa mwe moto. 20 Ivyo mwendamuwamanye kwa yada wayagosoayo. 21 "Khio kia mntu anetangae 'Zumbe, Zumbe,' enda engie mwe Useuta wa uwanga kwa Muungu iya ni yudadu mgosoa yada ya Tate yangu wa uwanga. 22 Wantu wangi wendawanambe misi ida, 'Zumbe, Zumbe! Kwa zina dako tibiikia mbui zako na kwa zina dako tiwaavya mazaiko na kugosoa vihii vingi.' 23 Aho nenda nimwambe 'Nchekuamanya nywie katu haukeni aha hangu nywie mgosoa mavigaviga.' 24 "Ivyo kia mntu ategeezae mbui zangu na kuzigosoa aigana na mntu mwenye akii, mwekuzenga nyumba yakwe uwanga ya iwe kuu. 25 Fua ikanya, mazigizigi ya mazi yakamema na khusi khai ikeza ikatoa iyo nyumba. Akini khayokugwa kwaviya izengwa uwanga ya iwe kuu. 26 "Na yoyose ategeezae mbui zangu izi na akesekuzitozeeza, aigana na mntu mhezi mwekuzenga nyumba yakwe uwanga ya sanga. 27 Fua ikanya, mazigizigi ya mazi yakamema, khusi khai ikeza na kuitoa iyo nyumba nayo ikagwa, naho kugwa uko kuwa kukuu muno." 28 Yesu

ekubindaho kugombeka mbui iyo zumwezumwe da wantu wakahondomazwa na mahinyo yakwe. 29 Kwaviya nee kawa akahinya khio inga wahinyi wa maagiyo iya kahinya inga mwenye udaho.

8 Yesu ekuseeaho kwe muima na zumwezumwe da wantu dikambasa. 2 Nee eza mntu yumwe mwenye utamu wa nyoka khuu na akamkintia mavindi na kugombeka, "Zumbe ukakunda wadaha kuning'aza!" 3 Yesu akaunyoosha mkono akamdonta na kugombeka, "Nakunda, ng'azika!" Ahoaho mntu uyo akahona utamu wakwe wa nyoka khuu. 4 Naho akamwamba, "Kauwa, usekumwamba mntu yoyose, iya hita ukeonyeshe kwa mviki na kulavya malavyo inga akwambavyo Musa, na wantu wamanye kuwa kuhona." 5 Yesu ekuwaho engia mwe mzi wa Kapelinaumu, asikai mkuu yumwe akambasa, 6 na kumwamba, "Zumbe, mndima yangu kagona kaya ni mtamu wa kuhooa na ahuma muno." 7 Yesu akamwamba, "Hita nendaneze kumhonya." 8 Uyo mkuu wa asikai akamwamba, "Zumbe, miye khifaa weye wengie kaya hangu. Akini wee gombeka mbui du na mndima yangu endaahone. 9 Kwaviya hata miye ni mntu mkuu mwenye udaho mkuu, nena asikai asi yangu. Nikamwamba yumwe, 'Hita!' Nae aita na mtuhu 'Soo' Nae eza, naho nikamwamba mndima wangu, 'Gosoa kintu iki!' Nae agosoa." 10 Yesu ekusikiaho ayo akahondomaa, akawagombeka wada wantu wekuwao wambasa, "Kwei nawamba khizati kumwona mntu mwe si ya Isilaeli mwenye uzumizi inga unu. 11 Iya nawamba kwei wantu wangi wendaweze kulawa awio da zua na engiyo da zua naho wendawekae he ntafuno hamwe na Abrahamu, na Isaka na Yakobo mwe Useuta wa uwanga kwa Muungu. 12 Iya wada Waisilaeli wose wekukundigwao kuwa mwe Useuta uwo wendawasigwe chongoi mwe kiza, na uko wendawaiye na kuuma meno kwa usungu." 13 Aho Yesu akamwamba uyo asikai wa Kilumi, hita kaya na iwe inga wekuzumiavyo. Na mndima yakwe akahona saa idaida. 14 Yesu ekubuaho kaya kwa Petulo akamwona mkwewe da Petulo kagona mwe usazi, ana bomubomu kai. 15 Nee Yesu amdonta uyo mmaa mkono nee ahona, akenuka na kuvoka kumwembikia. 16 Yekubuaho guoni, wakamweeteya wantu wangi wekukwewao ni mazaiko, nae akayalavya ayo mazaiko kwa kugombeka mbui yakwe du, na wantu wose wekuwao watamu akawahonya. 17 Kagosoa ivyo ili yada ekugombekayo muoni Isaya yaiganie, "Yee mwenye kadoa unyonge wetu na akayenua matamu yetu." 18 Yesu ekuonaho zumwezumwe da wantu dimuikia bunga akawamba wahina wakwe waite phande ya kaidi ya tondoo da mazi. 19 Mhinyi yumwe wa miko akambasa na kumwamba, "Mhinyi

miye nenda nikutongee hohose wendako uite." 20 Yesu akamtambaisa, "Ukwii wana maphanga, wadege wana masasa, iya Mwana wa Mntu khana hantu hakuhumwiiza." 21 Yumwe wa wahina wakwe akamwamba, "Zumbe unekhe uhusa niite nikamzike tate." 22 Akini Yesu akamtambaisa, "Nitongee! Wabade wekuuyao na nyuma wawazike wekuuyao na nyuma wao." 23 Naho Yesu akakwea ngaawa hamwe na wahina wakwe wakahauka wose. 24 Na wekuwaho mwe tambo vuupuu mwe mazimshindo ikalawiya khushi khai hata mkubwadiso wa mazi ukavoka kugubika ngaawa, iya Yesu nee kagona usisiza. 25 Wahina wakambasa, wakamwenua wakagombeka, "Zumbe, tihoe tadagamia!" 26 Yesu akawatambaisa, "Kwambwai mwaogoha, nywie wantu wenye uzumizi mdodo?" Ahoaho akenuka akaiwakia ida khushi na mkubwaniso wa mazi twiyani, nee kwatwiya tui. 27 Wada wantu wakahondomaa na kugombeka, "Uyu ni mntu yevivih? Hata khushi na mkubwadiso vyamtegeeza!" 28 Yesu ekubuaho phande ya kaidi wa si ya Wagelasi na uko nekuwa na wagosi waidi wekuwao na mazaiko wakakintana nae, wowo nee walawiia mwe mbia. Awa nee ni wantu watisao muno, naho khahana mntu mwekudaha kwembokea sia iyo. 29 Wekukintanaho na Yesu nee wavoka kutoa vuzo, "Wakunda mbwai kwetu, wee Mwana wa Muungu? Kweza kutisuumiza kisingi kikundigwacho khakizati kubua?" 30 Hehi na hantu aho nee hawa na tintimo da nguuwe wakaiswa. 31 Nee ayo mazaiko yakamhembeeza Yesu, "Inga ukatilavya utibade tiwengie wada nguuwe." 32 Yesu akawamba, "Hitani." Aho wakalawa mwe wantu awo na kuwengiia wada nguuwe, nee tintimo da nguuwe. Dikaseeya mwe mpoomoko mkai wakengia mwe tondoo da mazi, nguuwe wose wakauya na nyuma mwe mazi. 33 Wada waisi wa awo nguuwe wakaguuka wakaita mwe mzi uko na kuwamba wantu mbui zose zekulawiiazo kwa wada wantu wekuwao wakwewa ni mazaiko. 34 Nee wantu wose mwe mzi uda wakalawa mwe mzi na kumbasa Yesu na wekumuonaho wakamwombeza ahauke mwe si yao.

9 Yesu akakwea ngaawa, akadumua ntondoo da mazi na kubua mwe mzi wa Kapelinaumu ekuwaho akekaa. 2 Aho wakamwetea mntu mwenye kuhooa mwii, kagonezwa mwe javi. Yesu ekuonaho uzumizi wao, akamwamba uyo mntu mwe kuhooa, "Ekhe moyo mwanangu! Kuekewa mavigaviga yako." 3 Naho wamwe wa wahinyi wa miko wakavoka kumamakhanya mwe mioyo yao, "Mntu uyu amdumua Muungu!" 4 Yesu akayamanya wamamakhanyayo, akamba "Kwambwai mwamamakhanya ufyaimi mwe mioyo yenu?" 5 Ni dihi dekuhuhado muno, kugombeka, 'kuekewa

mavigaviga, hambu kugombeka, gooka wende?’ 6 Naho, nakunda mmanywa Mwana wa Mntu ana udaho mwe inusi ya kuwaekea wantu mavigaviga.” Aho akamwamba uyo mntu mwekuhoowa, “Enuka, udoo javi dako uite kaya kwako.” 7 Yuda mntu ekuhoowa akahauka na kuita kaya kwakwe. 8 Zumwezumwe da wantu dekuwado hada, dikahondomaa na kuogoha, wakamtogoa Muungu ekuwekhae wantu udaho wa namna iyo. 9 Yesu akahauka hantu hada, na ekuwaho akaita zakwe, akamwoona mntu yumwe etangwae Matayo, kekaa mwe kazumba cha kuihiya ushuu. Nee, Yesu amwamba, “Nibase.” Matayo akenuka, akambasa. 10 Yesu ekuwaho kaya kwa Matayo kekaa ada khande, watoza ushuu wangi na wenye mavigaviga wakeza na kwekaa hamwe na Yesu na wahina wakwe. 11 Mafalisayo wekuonaho, wakawamba wahina wakwe, “Kwambwai mhinyi yenu ada khande hamwe na watoza ushuu na wenye mavigaviga?” 12 Yesu ekuwategeezaho, akawatambaisa, “Wantu wenye ugima khawakunda mganga, iya watamu du nee wakundao mganga. 13 Akini hitani, mkehinye mana ya mbui inu. ‘Nakunda mbazi khio ntambiko.’ Nchekweza kuwetanga wantu wedi iya wenye mavigaviga.” 14 Naho wahina wa Yohana Mbatiza wakamtimia Yesu, na kumuua, “Swie na Mafalisayo tehiniza kuda, kwambwai wahina wako khawehiniza kuda?” 15 Yesu akawatambaisa, “Ivi wekugonekwao kwe ndoza wadaha viivhi kutoa bwaimbo kisingi zumbe wa ndoza yuke hamwe nao? Havidaika! Iya kisingi chendakibue ambaho zumbe wa wiya endaho ausigwe gatigati yao, kisingi icho ndiho wendaho wehinize kuda. 16 “Wantu khawagea kilaka cha gwanda dihya mwe gwanda dekusakaayo. Kwa mana kilaka icho chendakitatie diya gwanda dekusakaayo, na hada hekututakaho endahagenyee. 17 Naho wantu khawageya divai mpya mwe mikwiji yekusakaayo, inga akatenda iyo iyo divai mpya yendaitatie iyo mikwiji na divai yendayetike na mikwiji iyo yendaibanike. Divai mpya yagewa mwe mikwiji ya babu mihya.” 18 Yesu ekuwaho akagombeka ayo, mkuu yumwe wa Wakiyahudi neabuwa, akamkintia mavindi na kugombeka, “Mwanangu ya kindee kauya kae na nyuma isasa ivi. Akini tite ukamwikie mkono, nae endatende mgima.” 19 Yesu akahauka akatongeanza nae, nao wahina wakwe wakamtongea. 20 Kisingi ichoicho, mmaa yumwe, mwekuwa na utamu wa mtuo kwa kisingi cha myaka kumi dimwe na mbii, nee amtongea Yesu kwa nyuma, akadonta msao wa gwanda dakwe. 21 Kwaviya nee kegombekea mwe moyo wakwe, “Nikadonta du gwanda dakwe, nendanihone.” 22 Yesu nee ahituka akamwona, akamwamba, “Ekhe moyo biti yangu! Uzumizi wako ukuhoaa.” Mmaa uyo akahona saa idaida. 23 Naho Yesu akengia nyumbani kwa yuda mkuu. Na

ekuwaonaho wantu wavuzia fiimbi na zumwezumwe kuu da wantu wakatoa bwaimbo, 24 akagombeka, “Haukeni aha! Mndee uyu khekuyua na nyuma, kagonadu.” Nawo nee wamseka. 25 Naho, zumwezumwe da wantu dekuuswaho, Yesu akengia mda ndani, akamtoza mkono uyo mndee, nae akenuka. 26 Mbui iyo ikaambazika mwe si ida yose. 27 Yesu ekuwaho ahauka hantu aho, matuntu waidi wakambasa na kutoa vuzo, “Mwana wa Daudi, utifiye mbazi!” 28 Yesu ekwengiaho nyumbani, wantu awo waidi wakamtimia, nae akawauza, “Ivi, mwazumiya nadaha kutenda mbui iyo?” Nao nee wantambaisa, “Eehe, Zumbe.” 29 Aho Yesu akayadonta meso yao, akawamba, “Naiwe inga mzuumiavyo!” 30 Meso yao yakagubulwa. Nee Yesu akawahaza muno, “Mwesekumwamba mntu yoyose mbui inu!” 31 Iya wowo wakalawa na kuambaza mbui zakwe Yesu mwe si ida yose. 32 Wantu wada waidi wekuwaho wakahauka, watuhu wakamwetea Yesu mntu yumwe mwekuwa mbubu naho kakwewa ni zaiko. 33 Ahoaho uyo zaiko dekulavigwaho, mntu uyo mwekuwa mbubu akavoka kutamwiya vituhu. Wantu wakahondomaa na kugombeka, “Mbui inga inu khaizati kulawiya kwa wantu wa Isilaeli!” 34 Iya Mafalisayo wakagombeka, “Ayaguusa mazaiko kwa udaho wa mkuu wa mazaiko.” 35 Yesu akavuiya mizi yose mikuu na phaamo zose, akahinya he nyumba ya kukintania Wayahudi na kubiikia Mbui Yedi za Useuta wa Muungu, na kuwahonya wantu matamu yose. 36 Na ekuwaonaho wantu, zumwezumwe kwa zumwezumwe, akawafiiya mbazi kwaajii newasokea muno na wenye maatumatu inga ngoto wesao kuwa na muisi. 37 Ivyo akawamba wahina wakwe, “Ubosi ni mwingi, iya wagozosi wandima niwacheche. 38 Ivyo mwombezeni mwenye uwo ubosi aagiiye wagozosi wa ndima wabonde ubosi wakwe.”

10 Naho Yesu akawetanga wahina wakwe kumi dimwe na waidi na kuwekha udaho wakulavya mazaiko na kuhonya matamu yose. 2 Mazina ya awo waagiwa kumi dimwe na mbii, Wabosi ni Simoni etangwae Petulo na Andulea nduguye na Yakobo mwana wa Zebedayo na Yohana nduguye, 3 Filipo na Batiomayo, na Tomasi na Matayo mwekuwa mtoza ushuu na Yakobo mwana wa Alifayo na Tadei, 4 Simoni ambae nekawa mtoanaji kwaajii ya si yakwe hambu zelote na Yuda Isikaliote mwekumhituka Yesu. 5 Yesu akawaagiya awo waagiwa kumi dimwe na mbii na kuwekha miagiyo inu, “Mwesekuita kwa wantu wesao kuwa Wayahudi, naho mwesekwengiye mwe mizi ya Wasamalia. 6 Iya hitani kwa wantu wa Isilaeli wekwagao inga ngoto. 7 Na mwiitaho bikiani ivi, ‘Useuta wa uwanga kwa Muungu uhehili!’

8 Wahonyeni watamu na wekuyao na nyuma wayuyuseni, na wasunteni wenye utamu wa nyoka na lavyeni mazaiko. Mwekhigwa bue na nywie lavyeni bue. 9 Mwesekudoa mwe mikwiji yenu zahabu, wala hea wala sensi za shaba. 10 Mwesekudoa mfuko wa ntambo wa kuombezea vintu siai, wala gwanda da hakiba nawala sabana wala ngoda. Kwaviya mgosozu wa ndima akundigwa ekhigwe maiho yakwe. 11 "Mkengia mwe mzi wowose mkuu hambu phaamo yoyose, ondezani mntu ambae akunda kuwahokea na ekaeni aho hake adi mwendaho mhauke hantu aho. 12 Mwengiaho mwe nyumba iyo ugusani wenyezi wakwe, na kuwamba, 'Uivanisa uwe nanywi.' 13 Inga waaho wantu wedi umo ndani mkawaombe Muungu awajaiye, ati khawana wawe awo wantu wedi Muungu khana awajaiye. 14 Inga mntu yoyose akaamea kuwahokea hambu kuwategeeza, naho mlawaho mwe nyumba iyo hambu mzi uwo kung'untani sanga ya mwe miundi yenu inga hazo kwao. 15 Kwei nawagombeka, msi wakuamuiwa mzi uwo wenda wekhigwe sugusa kuhu kusima ida yekwekhigwayo ya mizi ya Sodoma na Gomola. 16 "Isasa miye nawaagiya inga ngoto gatigati ya makui ya mziituni. Muwe na unyanyi inga nyoka na muwe wahuusi inga sua. 17 Ekaeni hae na wantu, kwaviya wendawamigiye na kuwegaa mwe mikonga, na wenda wamitoe ngoda mwe nyumba ya kukintania Wayahudi. 18 Mwendamwegalwe hemeso ya wagookezi na Maseuta kwaajii yangu, ili mdahe kuwagombeka wowo mbui zangu na kwa wantu wesao kuwa Wayahudi. 19 Naho wendahowawegae he mikonga msekuogoha mwendavyo mgombeke, kwaviya saa idaida mwenda mwekhigwe yakugombeka. 20 Kwaviya khio nywie mwendaomgombeke, iya ni Muye wa Muungu wa Tati yenu nee endaeagombeke umo mwenu. 21 "Ndugu endamhituke nduguye akomwe, na tate endaamhituke mwanawe, wana nao wenda wawahituke wavywazi wao wakomwe. 22 Wantu wose khawana wawakundise kwaajii yangu. Akini mwenda azizimize adi kisiikizi nee mwendaaholwe. 23 Wantu wakasumiiza mwe mzi unu guukani mzi mtuhu. Nawamba kwei, khamna mbindiize mizi yose ya wantu wa si ya Isilaeli hadi Mwana wa Mntu endaho eze. 24 "Mhina khadaha kumwemboka mhinyi yakwe, na mndima nae khadaha kumwemboka zumbe yakwe. 25 Yadahika mhina kuwa inga mhinyi yakwe na yadahika mndima kuwa inga zumbe yakwe. Ikawa wanetanga miye mkuu yenu Beelizebuli, Ivi nywie khawana wawetange mazina mafyaimi muno. 26 "Naho msekuwaogoha wantu awo, kwaviya kia mbui yekugubikwayo yendaigubulwe, na kia chekufiswacho chendakioneke. 27 Niwagombekayo nywie kandani myagombeke he wazo. Kiya niwanong'onezacho

nawakunda mkitamwiye kwa mgutio kiya mntu ategeeze. 28 Msekuwaogoha wada waukomao mwii, akini khawadaha kuukoma muye. Mwakundigwa kumwogoha Muungu adahae kudagamiza mwii hamwe na muye mwe moto wesao kukomeka. (Geenna g1067) 29 Wadege waidi wadodo watagwa kwa sensi mwenga ndodo. Akini ata yumwe aho kagwa asi kwesiho Tate yenu kumanya. 30 Hata ntaazia ya fii za mitwi yenu Muungu azimanya. 31 Kwa iyo msekuogoha nywie ni watana he meso ya Muungu kusima wadege wangi. 32 "Na yoyose mwendaye anizumiye hemeso ya wantu, miye nami nendanimzumiye hemeso ya Tate yangu wa uwanga kwa Muungu. 33 Iya yoyose mwendayeaniemee hemeso ya wantu, na miye nenda nimuemee hemeso ya Tate yangu wa uwanga kwa Muungu. 34 "Msekumamakhanya kuwa ncheza kueta uivanisa mwe inusi iya ncheza kueta khondo. 35 Kwaviya ncheza kueta kutokwevana kwa mntu na tati yakwe biti na mami yakwe, mkaza mwana na mame vyaa khawana wevane. 36 Na mmasa wa mntu ni wantu wakaya kwakwe. 37 "Amkundisae tate hambu mami yakwe kusima anikundisavyo miye, khadaha kuwa hamwe na miye na akundisae wanawe kusima miye, khadaha kuwa mhina wangu. 38 Mntu mwesaekuudoa mhamba wakwe na kunitongea khadaha kuwa mhina wangu. 39 Mntu akundae kuuhonya ugima wakwe endaawaze, akini endaeawaze ugima wakwe kwaajii yangu wenda wekhigwe. 40 "Na yoyose awahokea nywie anihokea miye. Na yoyose anihokea miye, amhokea yuda mwekuniagiya. 41 Na yoyose amhokeaye Muoni kwaajii ni Muoni, endaaohokee funge da Muoni. Na yoyose amhokeaye mntu agosoaye yada akundayo Muungu, endaeakhigwe funge idaida ambayo wekhigwa wada ambao wagosoa akundayo Muungu. 42 Nawagombeka kwei, yoyose mwenda amwekhe yumwe aho wa wadodo awa kikombe cha mazi ya pheho kwaajii ni mhina yangu, haika khana akose katu kwekhigwa funge dakwe."

11 Yesu ekubindaho kuwekha miagiyo wahina wakwe, akalawa aho, akaita kuhinya na kubiikia mwe mizi yao uko Galilaya. 2 Yohana ekuwaho mwe kifungo nee asikia mbui za Klistu, akawaagiya wahina wakwe, waite kumuiza, 3 weye nee yuda ezae, hambu timkauwiye mtuhu? 4 Yesu akawatambaisa, "Hitani mkamgombekee Yohana mbui mtegeezazo na kuziona, 5 matuntu waona, wesaokudaha kwenda wenda, na viziba wategeeza, na wenye utamu wa nyoka wasuntika na wekuuyao na nyuma wayuyuswa, na wakiwa wabiikiwa Mbui Yedi. 6 Endaawe na nyemi mntu yuda ambae khana maatu na miye." 7 Wada wahina wa Yohana wekuwaho wakahauka, Yesu akavoka

kugombeka na dia zumwezumwe kuusu Yohana, Mbatizi. Akawauza, “Mwekuitaho kuda he nyika, mwita kukauwa mbwai? Ivi nee mkakunda kuona inde dikasingiswa ni khusi? 8 Inga khivyo, mwiita kukauwa mbwai? Mwiita kukauwa mntu mwekwehasika magwanda matana? Wantu wehasikao magwanda inga ayo, wekaa mwe nyumba ya Maseuta. 9 Naho, mwita kukauwa mbwai? Muoni wa Muungu? Haika nawamba, nee mwiita kumuona mntu ekuwaye mkuu kusima muoni. 10 Uyo nee ambae mbui zakwe zindikwa mwe Maandiko ya Muungu, ‘Kauwa namuagiya mwagiwa yangu aniongweee, mwendayeagosoe sia he meso yako.’ 11 Nagombeka kwei mwa wantu wekuvyaigwao na wavyee, khazati kulawiya mntu mkuu inga Yohana Mbatizi, akini ambae ni mdodo muno mwe useuta wa uwanga kwa Muungu, ni mkuu kusima Yohana 12 Kuvokea kisingi cha Yohana Mbatizi adi isasa Useuta wa uwanga kwa Muungu wapatikana kwa nguvu, naho wantu wenye udaho wageeza kuudoa. 13 Kwaviya miko ya Musa na waoni wose na wazitamwiya mbui za useuta wa Muungu wendavyo uwe kwa kisingi iki. 14 Ikawa mwakunda kuzumia ido, yee Yohana nee uyo Eliya ambae waoni newawa wakagombeka endaeze. 15 Yee mwenye magutwi na ategeeze! 16 “Akini nikiiganiye na mbwai kivyazi iki? Kiigana na wana wekoo gwiyo, wawetangao wezwao na kuwagombeka, 17 ‘Nee tiwatoea ngoma na wala khamwekuvina, na titoa wiya za bwaimbo na wala khamwekuiya.’ 18 Kwaviya Yohana Mbatizi keza akehiniza kuda na wala kuidomea divai, nao wakamwamba, ‘Kakwewa na mazaiko.’ 19 Mwana wa Mntu keza, ada khande na kudomea, nao wakamwamba. ‘Mkauweni uyu ni mmeo, na ni mkozi, wambuya wakwe ni watoza ushuu na wenye mavigaviga!’ Ata ivyo unyanyi wa Muungu imanyika kuwa niyedi kulawana na ndima yakwe.” 20 Ndiho Yesu akavoka kuihaza mizi ida ambayo kaigosweeya vihii vingi kusima kutuhu, kwaviya wantu wakwe khawakubada mavigaviga. 21 Wendawakione wantu wa Kolozini! Wendawakione wantu wa Betisaida! Inga vihii vyekugosokavyo aha henu ati nee vigosoka kuda Tilo na Sidoni, wantu wakwe newavaa kae magwanda ya gunia na kwesisa mazeu na kuonyesha wabada mavigaviga. 22 Nagombeka kwei yendaiwe ihuha kwa wantu wa mizi ya Tilo na Sidoni kuzimiziza mwe msi wa kuamuiwa wa Muungu kusima aha henu. 23 Na nywie wantu wa Kapelinaumu, ivi wenda wenulwe adi uwanga kwa Muungu? Eehe, wenda useezwe adi si ya wekuyao nyuma, kwaviya inga vihii vyekugosokavyo aho hako inga nevigosoka mwe Sodoma mzi uwo neukeaho adi ivyeo. (Hadēs g86) 24 Akini nagombeka kwei, msi wakuamwiwa weye wenda wekhigwe sugusa

khuu kusima ya Sodoma. 25 Kisingi icho Yesu akagombeka, “Nakutogoa ee Tate, Zumbe wa uwanga na wa inusi, kwaviya kuwafisa wenye unyanyi na umanyi, na ukawagubwiya wana wadodo. 26 Eehe, Tate nee vyekukutamiavyo. 27 “Tate yangu kanekha vintu vyose. Khahana ammanyae Mwana iya Tate, nawala ammanyae Tate iya Mwana, na yoyose yuda ambae Mwana akunda kumgubwiya uyo endammanyae Tate. 28 “Soonni aha hangu nywie nyose muangadikao na kuzamiwa na mafuushi, na miye nendaniwahumwiize. 29 Mzumiye kuongoewa na miye inga viya njeku afungwaho nila kisingi cha kuima, mkehine kulawa kwangu, kwaviya miye niyedi naho ni mnyenyekevu wa moyo, na nywie mwenda mwekhigwe nyemi. 30 Kwaviya yendaiwe vihufu kwenu kwamana mahinyo yangu ni mahufu.”

12 Kisingi icho Yesu akembokea kwe minda ya uhemba msi wa kuhumwiiza. Aho wahina wakwe wakawa nasaa, kusenga uhemba, wakada khokhoo zakwe. 2 Mafalisayo wekuonaho ayo, wakamwamba Yesu, “Kauwa, wahina wako wagosoa mbui yesayokundigwa kugosoka mwe Msi wa Kuhumwiiza.” 3 Yesu akawatambaisa, “Khamzati kusoma ekugosoavyo Daudi hamwe na weziwe kisingi wekuwaho na saa? 4 Yee kengia mwe nyumba ya Muungu akada yada mabumunda yekuikwayo hemeso ya Muungu. Khio yee wala wada weziwe khawekukundigwa kuda yada mabumunda iya nee yakundigwa kuigwa na waviki wowodu ikedu. 5 Tambe khamzati kusoma mwe miko, Waviki wakuu newawa wakabananga miko ya Msi wa Kuhumwiiza nao khawamamakhanywa kuwa wana masa? 6 Iya nawagombeka kwei, aha yuaho mkuu kusima nyumba ya Muungu. 7 Inga nee mmanya mana ya mbui inu, ‘Nakunda mbazi nawala khio ntambiko.’ Khamwekuwa mkawaamuiya wantu wesaokukoa masa, 8 kwaviya Mwana wa Mntu nee Zumbe wa Msi wa kuhumwiiza.” 9 Yesu akahauka hantu aho, na kwengia mwe nyumba yao yakukintania Wayahudi. 10 Nekuwa na mntu yumwe mwenye mkono wekuhoao. Naho, wantu wakamuza Yesu, “Kulawana na miko yetu, ivi ni vitana kuohoa mntu Msi wa Kuhumwiiza? Wamuza ivyo wapate kumuamuiya masa.” 11 Yesu akawamba, “Ni ndai gatigati yenu mwenye ngoto yumwe, na yuda ngoto akengia mwe tubwi Msi wa Kuhumwiiza, ivi khanaamtoze na kumlavya? 12 Nakunda mmanye du, mntu ana yombe muno kusima ngoto! Aho ni vitana kugosoa matana Msi wa Kuhumwiiza.” 13 Naho akamwamba yuda mntu, “Unyooshe uwo mkono.” Akanyoosha, nao ukawa mgima inga uda mtuhu. 14 Aho, Mafalisayo wakalawa chongoi na kufanyanya wendavyowadahe kumkoma Yesu. 15 Akini Yesu ekumanyaho mamakhanyi zao, hantu hada

akahalawa. Wantu wangi wakamtongea, akawahonya watamu wose. 16 Akawaemeza wasekumwamba mntu mbui zakwe. 17 Ili yada ekwambayo Muoni Isaya yaiganie, 18 “Kauwa mndima yangu nekumsaguae, Mkundiswa wangu nitamiwae nae mwe moyo. Nenda niike Muye wangu, Nae enda aiyambaze miamuiyo kwa si zose. 19 Khana aete uhigano na wantu wala kutoa vuzo, Wala mgutio wakwe khauna utegeezeke siai. 20 Lasi dekuhondekado khanaadibonde, Wala utambi wa koloboi ufufutikao mosi khanaaukome Adi endaho atende uwamuiyo wa kwei ugooke wenye, 21 Na wantu wose wendawamkauwiye.” 22 Aho wantu wakamwetea Yesu mntu mwekuwae ni tuntu naho khadaha kutamwiya uku kakwewa ni mazaiko. Yesu nee amhonya ata akadaha kutamwiya na kuona. 23 Zumwezumwe dose da wantu dikahondomaa na kugombeka, “Ivi yadahika ikawa nee Mwana wa Daudi?” 24 Akini Mafalisayo wekusikiahio ayo, newamba, “Mntu uyu ayaguusa mazaiko kwa udaho wa Belizebuli mkuu wa mazaiko.” 25 Yesu, akawamanya mamakhanyo zao, akawamba, “Useuta wowose wekupanganikao vizumwezumwe vihiganavyo khaudaha kwekai, naho mzi wowose hambu kaya yoyose yekupanganikayo vizumwezumwe vihiganavyo khavina vigooke. 26 Ikawa Ibiisi amguusa Ibiisi mweziwe ahigana mwenye. Aho useuta wakwe wenda ugooke viivih? 27 Nywie mwamba ati naguusa mazaiko kwa udaho wa Belizebuli mkuu wa mazaiko. Awo wana wenu wayaguusa kwa udaho wa ndai? Kwaajii iyo wao nee wendao awaamuiye nywinywi. 28 Akini ikawa nayaguusa mazaiko kwa udaho wa Muye wa Muungu, aho mmanye Useuta wa Muungu ubua kae henu. 29 “Yadahika viivih mntu kwengia mwe nyumba ya mntu mwenye nguvu na kumhoka vintu vyakwe, kwesaho kuvoka kumzengeteza sigi uyo mntu mwenye nguvu? Akimzengeteza kae aho ndiho endahoadha kumhoka mai zakwe. 30 “Mntu yoyose mwese kuwa hamwe na miye ahigana na miye naho mtu yoyose mwesaekuika wantu hamwe na miye na kuwegaa kwa Muungu mtu uyo amwaganisa. 31 Kwaajii iyo nawamba, wantu wenda waekewe mavigaviga yao hamwe na kufuu zao, akini khawana waekewe mavigaviga ya kumbea Muye wa Muungu. 32 Nae agombekae mbui ya kuhigana na Mwana wa Mntu enda aekewe, akini yuda agombekae mbui ya kuhigana na Muye wa Muungu khana aekewe mwe si inu wala ida yezayo. (aion g165) 33 “Ukauweni mti uwe mtana na matunda yakwe yenda yawe matana na ugooeni mti kuwa mfyaimi na matunda yakwe yenda yawe mafyaimi, kwaviya mti wamanyika kwa matunda yakwe. 34 Nywie uvyazi wa mdudu mwadaha viivih kugombeka mbui ntana kisingi nywinywi wenye ni wenye mavigaviga?

Kwaviya mntu agombeka yada yekumemayo mwe moyo wakwe. 35 Mntu yedi ulavya mbui zedi mwe moyo wakwe na mntu mfyaimi hulavya mbui zakwe za ufyaimi kwe moyo wakwe wa ufyaimi. 36 “Iya nawamba, mwe msi wakuamuiwa wantu wenda wakundigwe kutambaisa kuusu kia mbui wekugombekayo. 37 Kwaviya kwayada ugombekayo wendautaziwe kuwa uyedi hemeso ya Muungu na kwa kugombeka wendauamuiwe.” 38 Wamwe wa wahinyi wa Miko na Mafalisayo wakamwamba Yesu, “Mhinyi takunda kuona ntangio kulawa kwako.” 39 Iya yee akawatambaisa, “Kivyazi chesacho kutama na cha ukianga chaondeza ntangio! Iya khakina chekhigwe ntangio iya ntangio wa Yona muoni wa Muungu. 40 Kwaviya inga Yona ekuwavyo mwe ifu da samaki etangwae Nyangumi, nee ivyo Mwana wa Mntu endavyoekae asi ya sanga kwa misi mitatu kio na musi. 41 Wantu wa Ninawi wenda wagooke msi wa kuamuiwa hamwe na uvyazi unu na kuwaamuiya, kwaviya wowo wayaeka mavigaviga kwa mabiikizi ya Yona, kauwa hanu yuaho ambae ni mkuu kusima Yona! 42 Maikia wa kusini endaagooke kisingi cha uamuiyo na kukiamuiya kivyazi iki, kwaviya yee kalawiiya kisikiizi cha inusi, kutegeeza umanyi wa Selemani, akeza kutegeeza mbui za umanyi wa Selemani na aha yuaho ekuwae mkuu kusima Selemani. 43 “Zaiko dimlawaho mntu, daangadika angadika mwe hantu hesiho na mazi dikoondeza hantu hakuhamwiiza akini kadipata, 44 aho egombekae mwenye, ‘Nenda niuiye ida nyumba yangu nekulawayo.’ Iya auyaho na kuibwiya ibue ihagiwa na kuhambwa vitana. 45 Aho, aita kuwaeta mazaiko mfungate wafyaimi kusima yee, nao wengia nakwekaa umo. Nae hali ya kisiikizi ya mntu yuda yatenda ya ufyaimi muno kusima ya bosi. Nee yendavyoiwe mwe uvyazi unu wa mavigaviga.” 46 Yesu ekuwaho atamwiya na zumwezumwe da wantu, mami yakwe na wanduguze wakabua na kugooka chongoi na kukunda kutamwiya nae. 47 Aho mntu yumwe akamwamba, “Mhinyi, mami yako na wanduguzo wagooka uko chongoi wakunda kutamwiya nawe.” 48 Yesu akamtambaisa, “Mmaa yangu nindai, na wandugu zangu ni wakina ndai?” 49 Ahoaho akenua mkono kwa wahina wakwe, akagombeka, “Awa nee mmaa yangu na wandugu zangu! 50 Mana yoyose agosoe akundavyo Tate yangu wa uwanga kwa Muungu, uyo nee kaka yangu na umbu dangu na mmaa yangu.”

13 Msi uwouwo Yesu akalawa mwe nyumba ida, akaita na kwekaa khandakhanda ya mazimshindo. 2 Zumwezumwe kuu da wantu wakamwekaiya bunga nee Yesu akakwea mwe ngaawa na kwekaa. Nawo wantu wose wakagooka khandakhanda ya mazimshindo, 3 nae Yesu

akatamwiya nawo mbui nyingi muno kwa misimo. "Tegeezani, muimi kaita kuhanda mbeyu. 4 Ekuwaho akahanda mbeyu mwe mnda, mbeyu ntuhu zikagwa khandakhandana ya sia, wadege wakeza na kuzida. 5 Ntuhu zikagwa hantu ha uwongo wekuwao uwanga ya iwe, ahoaho zikaoneka kuhota kwa kinyio. 6 Iya zua dekusomookaho, mitengea iyo ikahya na kwaviya mazindo yakwe khayokwengia asi muno, zikanyaa. 7 Mbeyu ntuhu zikagwa gatigati ya miwa, miwa iyo ikakuwa na kufintafinta ida mitengea. 8 Naho mbeyu ntuhu zikagwa he uwongo ntana, na mitengea yakwe ikavyaa khokoo makumi kumi na ntuhu makumi mtandatu na ntuhu makumi matatu." 9 Yesu akawamba, "Mwenye magutwi na ategeeze!" 10 Naho wahina wakantimia na kumuza Yesu, "Kwa mbwai wagombeka na wantu kwa misimo?" 11 Yesu akawatambaisa, "Muungu kawekha nywie udaho wa kumanya sii za Useuta wakwe, akini wowo khamwekwehigwa udaho wa kumanya ayo yose. 12 Mntu yeyose ambae amanya kuusu Useuta wa Muungu, Muungu endaamgoso kwevana muno, iya mtu esayekumanya ata kidodo, Muungu endaadoe ata kiya kidodo akimanyacho. 13 Nagombeka nao kwa misimo, kwaajii wakauwa niyagosoayo, iya wegoso khawaona, na wategeeza nihinyayo, iya wegoso khawava. 14 Yaigania kwao yada ekugombekayo muoni Isaya, 'Wantu awa wendawategeeze na kutegeeza akini khamnamnive; Kukauwa mwenda mkauwe, wala khamnamuone, 15 Kwaajii akii za wantu awa zihuuzuka Waziba magutwi yao Meso yao wayafumba. Ama khivyo nee woona kwa meso yao, Nee wategeeza kwa magutwi yao, Nee wamanya kwa akii zao, Na kunihutikia agombeka Zumbe na miye nee kiwahonya.' 16 'Mwenda muwe na nyemi nywie, kwaviya meso yenu, kwaajii yakauwa na magutwi yenu kwaajii ya tegeeza. 17 Kwei nawamba, Waoni wangi na wantu wedi watamiwa kuyaona yada mwekuyaonayo nywie, iya khwekuyaona, na nee watamiwa muno kutegeeza yada myategeezayo iya khawekuyategeeza. 18 "Naho tegeezani mana ya msimo wa yuda mntu ekuwaye ahanda mbeyu. 19 Mntu yoyose ategeezae mbui inu ya Useuta wa Muungu kwesiho kuva, aigana na zia mbeyu zekugwazo siai. Yuda Ibiisi eza na kumhoka kia chekuhandwacho mwe moyo wakwe. 20 Ida mbeyu zekugwiswazo mwe uwongo wekuwao uwanga ya iwe ni mntu yuda ategeeza Mbui ya Muungu na ahoaho huihokea kwa nyemi. 21 Iya kwaviya khana mazindo yenye udaho ndani yakwe, ida mbui yekaa kisingi kijihii. Ilawiiaho suuba hambu masuumizo kwaajii ya mbui iyo, yee afa maya. 22 Ida mbeyu yekugwayo mwe miwa ni yuda mntu ategeezae mbui, akini maangadiko ya inusi na usongeezi wa mai yaifintafinta ida mbui na kuigoso ya esekuvyaa

matunda. (aiōn g165) 23 Ida mbeyu yekuhandwayo mwe uwongo mtana ni sawa na mntu ategeezae mbui iyo na kuiva, nae avyaa matunda, makumi kumi mtuhu makumi mtandatu na mtuhu makumi matatu." 24 Yesu akawamba wantu msimo mtuhu, "Useuta wa uwanga kwa Muungu waigana na mntu mwekuhanda mbeyu ntana mwe mnda wakwe. 25 Iya wantu wekuwaho wagoni akeza mmasa wakwe akahanda ndago gatigati ya mnda wa uhemba, akaita. 26 Naho mbeyu zekuhotaho na mitengea ikakuwa na kuvoka kuvyaa, viyaviya ndago ikavoka kuoneka. 27 Wandima wa yuda mwenye mnda wakamwezea na kumwamba, 'Mkuu khwekuhanda mbeyu ntana mweunu mnda wako? Inu ndago ilawiiya hahi?' 28 Yee akawatambaisa 'Mmasa nee mwekutenda ivyo.' Wandima wakwe wakamuza, 'Ivi, wakunda tiite tikayang'oe?' 29 Iya akagombeka 'mwesekuita kuyaosa kwaviya kisingi muusaho mainde, mwadaha kuusa ndago hamwe na uhemba.' 30 Ekani uhemba na mainde vikue vyose hamwe adi kisingi cha ubosi. Kisingi icho nenda niwambe wabosi, wavoke kuika hamwe mainde, wayafunge matitamaita yokwe moto wakabinda waikwe hamwe na uhemba na kuika mwe taa." 31 Yesu akawamba wantu msimo mtuhu, "Useuta wa uwanga kwa Muungu waigana na mbeyu yetangwayo haladali ekuidoayo mntu yumwe, akaihanda mwe mnda wakwe. 32 Mbeyu iyo ni ndodo kusima mbeyu zose, akini ihotaho yawa mtenge mkuu kusima mitengea yose, naho yakuwa na kutenda mti mkuu na wadege wawezea mti uwo na kuzenga masasa mwe matambi yakwe." 33 Yesu akawagombeka msimo mtuhu, "Useuta wa uwanga wa Muungu waigana na hamila ekudoayo mvyee yumwe, akaihanganya mwe madebe yakwe maidi ya unga wa ngano na hindi, ata unga wose ukaumuka." 34 Yesu nee kawamba ayo zumwezumwe da wantu kwa misimo. Na khekuwamba dodose kwesiho misimo. 35 Ili mbui yekugombekwayo na Muoni iigania, "Nenda nigombeke nao kwa misimo, Nendaniyatamwiize yada yekufiswayo tangia kuumbwa kwa inusi." 36 Naho Yesu akadiaga dia zumwezumwe da wantu, akengia nyumbani. Wahina wakwe wakantimia na kumwamba, "Tisosoe mana ya uda msimo wa mainde za mwe mnda." 37 Yesu akawatambaisa, "Mhasi wa zia mbeyu ntana ni Mwana wa Mntu, 38 uda mnda ni inusi. Zia mbeyu ntana ni wantu wada ambao Useuta ni wao. Akini yada mainde ni wada wantu wa Ibiisi, 39 mmasa mwe kuhanda ida mainde ni Ibiisi, ubosi ni kisikiizi cha inusi wabondaji ni wandima wa uwanga kwa Muungu. (aiōn g165) 40 Inga viya muonavyo mainde yaikwavyo hamwe na kokwa moto, nee ivyo vyendavyo viwe mwe kisikiizi cha inusi. (aiōn g165) 41 Mwana wa Mntu enda awaagiye wandima wakwe

wa uwanga kwa Muungu wawaike hamwe wantu kulawa mwe Useuta wakwe, na wada wose wawatendao wantu wagosoe mavigaviga na wada wose wagosoa ubanasi, 42 na kuwatambika mwe tanuli da moto, na uko wendawaiye na kuuma meno kwaajii maumevu makai. 43 Naho wada wantu wekugosoyao yada yamtamiayo Muungu wendawang'ae inga zua mwe Useuta wa Tate yao. Mwenye magutwi na ategeeze! 44 "Useuta wa uwanga wa Muungu waigana na kiikizo chekufiswacho mwe mnda. Mntu yumwe ekuiyonaho akaifisa vituhu, akawa na kinyemi muno akenda kutaga vintu vyose ekuwavyo navyo, na akaugua uda mnda." 45 "Naho Useuta wa uwanga kwa Muungu waigana na mtabiashaa yumwe mwoondeza lulu ntana, 46 na ekupataho lulu mwenga ya hea nyingi muno, akenda kutaga vyose ekuwavyo navyo, akaigua ida lulu." 47 "Naho, Useuta wa uwanga kwa Muungu waigana na wavu wekwasisgwao na walowa samaki mwe mazimshindo, ukagwiya samaki wa kia mbai, 48 Wekumemaho, wantu wakaubuta adi khandakhanda ya mazimshindo, wakekaa na kuwasaguwa samaki watana na kuwaika mwe majumu yao na samaki wafyaimi wakasisgwa." 49 Nee ivyo vyendavyoviwe kisikiizi cha inusi, wandima wa uwanga kwa Muungu wendawalawiye, na kuwabahua wantu wafyaimi na wantu wedi, (aiōn g165) 50 nakuwasa awo wafyaimi mwe tanuli da moto. Uko wendawaiye na kuuma meno kwa maumevu makai. 51 Yesu akawauza, "Ivi, mbui izi mzimanya zose?" Wakamtambaisa, "Eehe." 52 Nae akawamba, "Nee ivyo, kia mhinyi wa miko ya Musa awaye mhina wa Useuta wa Muungu aigana na mwenye kaya alavyae kiikizo chakwe cha vintu vihya na vya kae." 53 Yesu ekubindaho kutamwiya misimo iyo akahauka hantu aho, 54 akaita mwe mzi wakwe. Uko akawa awahinya wantu mwe nyumba ya kukintania Wayahudi ata wakahondomaa, wakamba, "Uyu kaipata hahi akii nyingi ivi," wakauza, "Na udaho wa kugosoa vihii? 55 Uyu khio yuda mwana seemaa? Mami yakwe khio yuda etangwae Maliamu na wanduguze khio Yakobo na Yusufu na Simoni na Yuda? 56 Naho umbuze wose khawekaa hamwe na swie? Naho khayapata hahi aya yose?" 57 Wakamuemea. Iya Yesu akawamba, "Muoni atunywa na kia hantu kwesiho wantu wa mwe si yakwe na kaya kwakwe." 58 Nae khekugosoa vihii vingi uko, kwaajii ya kwesekuzumiya kwao.

14 Kisingi icho Seuta Helode ekuwae mgookezi wa si ya Galilaya nee kategeeza mbui za Yesu. 2 Akawagombeka wandima wakwe, "Uyo nee Yohana Mbatiza, ekuyuyukae, nee mana ana udaho wakugosoa mbui za vihii uumo mwakwe." 3 Helode nee kamgwiya Yohana Mbatiza

akamzengeteza minyololo na akamwengiza mwe geeza kwaajii ya Helodia mkaza Filipo nduguye da Helode. 4 Kwaajii Yohana Mbatiza kamwamba Helode, "Khio vitana kumdoa Helodia awe mkazio!" 5 Helode nee kakunda kumkoma Yohana Mbatiza, iya nee akawaogoha Wayahudi, kwaajii wao wenye nee wakamanya kuwa Yohana Mbatiza nekawa Muoni wa Muungu. 6 Ata yekubuaho sikukhuu ya kuvyaigwa kwakwe Helode, mwana kindee wa Helodia akavina hemeso ya wageni wekugonekwao. Adi Helode akatamiwa muno, 7 ata akaika kiaga kwa kuaha, "Nenda nikwekhe chochose wendacho uniombeze." 8 Uyo mndee nee kanchochewa kae na mami yakwe akamba. "Nekha mtwi wa Yohana Mbatiza mwe chano!" 9 Seuta Helode akaungumia mwe moyo wakwe akini kwaajii ya kuaaha kwakwe hemeso ya wada wageni wekuwao he ntafuno akaagiiya ekhigwe. 10 Helode akaagiiya mntu kuda mwe geeza Yohana mbatiza adumue mtwi. 11 Mtwi wake ukaetwa uikwa mwe chano, wakamwekha yuda mwana kindee, nae akamwegaiya mami yakwe. 12 Wahina wakwe Yohana Mbatiza wakeza mwe geeza na kuudoa mwii wakwe na kuugea mwe mbia. Wekubindaho wakaita na kumwamba Yesu. 13 Yesu ekusikiaho mbui ya Yohana Mbatiza akahauka hantu hada kwa ngaawa, akaita hantu hesiho wantu yee ukedu. Wantu wakamtimia kwa miundi kulawa mwe mizi yao. 14 Aho ekuseaho khandakhanda ya mazimshindo akoona zumwezumwe kuu da wantu, akawafiiya mbazi na akawahonya watamu wao. 15 Zuwa dekuswaho wahina wakwe wakambasa na kugombeka, "Hantu aha khahana wantu wekaisao aha na saa zemboka kae. Agana na awa wantu ili waite mwe mizi wakeguiye khande." 16 Yesu akawatambaisa, "Khawakundigwa kuhauka wekheni nywinywi khande." 17 Iya wao wakamtambaisa, "Tina mabumunda mashano na samaki waidi du." 18 Yesu akawamba, "Nieteyani hanu." 19 Akawakunda wantu wekai asi mwe mani. Yesu akayadoa yada mabumunda mashano na wada samaki waidi, akakauwa uwanga kwa Muungu, akavijaiya na kubendua yada mabumunda aho akawekha wahina wakwe ayo mabumunda na wada samaki, na wahina wakwe wakawekha wada wantu. 20 Wantu wose wakada na kweguta. Aho wahina wakadodoa phuguntio, na wakamemeza ngahu kumi dimwe na mbii. 21 Wantu wekudao ntaazia yao nee ni wagosi elufu shano kwesiho kutaazia wayee na wana. 22 Ahoaho Yesu akawamba wahina wakwe wengie mwe ngaawa waongoe na kuita phande ya kaidi ya tondoo da mazi, kisingi yee aagana na zumwezumwe da wantu. 23 Ekubindaho kuwaaga, akakwea mwe muima yee ukedu kuvika. Na yekubuwoho guoni yee nekekaa uko ikedu kidege, 24 kwa kisingi icho ida ngaawa

nee igatigati ya tondoo da mazi yakubwaniswa na mazi kwaajii khusi khai nee yaikindia ngaawa. 25 Kio, hehi na kucha, Yesu akawatimia wahina wakwe uku enda uwanga ya mazi. 26 Wahina wakwe wekumwonaho akenda uwanga ya mazi wakaogoha muno, wakagombeka, "Ni mzimu!" Wakatoa vuzo kwa ukeng'enta. 27 Ahoaho Yesu akagombeka nao, "Twiiani, ni miye, msekuogoha!" 28 Petulo akamwamba, "Zumbe, ikawa ni wee kwei, nambia nende uwanga ya mazi neze aho hako." 29 Yesu akamtambaisa, "Soo!" Aho Petulo akaseeya mwe ida ngaawa, akenda uwanga ya mazi na kumtimia Yesu. 30 Akini ekuonaho khusi khai akengiwa ni matu nae akavoka kudidimia mwe mazi, uku atoa vuzo, "Zumbe niohoe!" 31 Ahoaho Yesu akanyoosha mkono wakwe na kumtoza, akamwamba, "Wee mwenye uzumizi mcheche kwambwai kuwa na maatu?" 32 Nao wekwengiaho mwe ngaawa, khusi ikaeka. 33 Wose wekuwao mda mwe ngaawa wakakinta mavindi na kwemwenamia na kugombeka, "Ni kwei wee ni Mwana wa Muungu." 34 Wekubindaho kudumua tondoo da mazi, wakabua si ya Genesaleti. 35 Wantu wekummanyaho Yesu, wakaambaza mbui zakwe mwe si yose na mizi yekuwayo hehi na mzi uda, ivyo wakamwetea Yesu watamu wose. 36 Wakamwombeza awaekee wadonte msao wa nguo yakwe, na wose wekudontao wakahona.

15 Naho, Mafalisayo na wahinyi wa miko ya Musa wakabua kulawa Yelusalemu, wakamtimia Yesu na kumuiza, 2 "Kwambwai wahina wako khawapatiiza mahinyo tekuyahokeyo kwa waongoweezi wetu wa kae? Khawasunta inga mazweeya yetu yakundavyo!" 3 Yesu akawatambaisa, "Kwambwai nywie nanywi khampatiiza miko ya Muungu iya mwayabasa mahinyo yenu wenye? 4 Kwaviya Muungu kagombeka, 'Na mntu yoyose amtunye tati yake na mami yake na mntu yoyose amdumuae tati yakwe hambu mami yakwe, yakundigwa akomwe.' 5 Iya nywie mwahinya inga mntu akawa na kintu ambacho chadaha kumwambiiza tati yakwe au mami yakwe, iya akamba, 'Kintu iki ni cha Muungu,' 6 nywie wagombeka khudaha kumtunya tati yako kwa kumuambiiza kwa kumwekha kintu icho! Iyo nee mbeavyo Mbui ya Muungu kwa kutongea mahinyo yenu wenye. 7 Nywie wabakha! Muoni Isaya kaambiza vyedi kwenu nywinywi, 8 'Muungu amba Wantu awa wanitunya kwa ntamwiizi zao, Iya mwe mioyo yao wahae na miye. 9 Kunivika kwao khakuwaambiiza dodose, Kwaviya mahinyo wahinyayo ni wantu ni du wekuyagoayo wao yenye!' 10 Yesu akawetanga wada zumwezumwe da wantu, akagombeka, "Tegeezani, na mnive! 11 Kintu kimtendacho mntu asekuzumiiwa kuwa he meso ya Muungu khio via vyengiavyo mwe muomo, iya ntamwiizi zimlawazo mwe muomo. Iyo nee vimtendavyo

mntu asekuzumiiwa kuwa he meso ya Muungu." 12 Aho wahina wakambasa nakumwamba, "Ivi, wamanya kuwa Mafalisayo wakimwa muno wekutegeezaho mbui zako?" 13 Yesu akawatambaisa, "Kintu chochose ambacho Tate yangu wa uwanga kwa Muungu khekuhanda chendaking'olwe." 14 Wabadeni wenye, wowo ni matuntu na waongweeya matuntu. Inga tuntu akamwongoeya tuntu mweziwe, wose waidi wendawengiyi mwe tubwi. 15 Petulo akamba, "Tisosoe msimo uwo." 16 Yesu akawamba, "Hata nywie khammánya? 17 Ivi khammánya kuwa kia chengiacho kanwai chengia mweifu na kulavigwa chongoi na kuita nkii? 18 Iya mbui zilawazo kanwai zalawa mwe moyo na mbui izo nee zimtendazo mntu asekuzumiiwa kuwa he meso ya Muungu. 19 Kwaviya umo mwe moyo wa mntu kwalawa fanyanyi za ufyaumi na ukomaji na ukianga na kianga na ubavi na ugombekaji wa uhokho na kuwagombekea watuhu mafyaumi. 20 Ayo nee yamtendayo mntu asekuzumiiwa ni Muungu." 21 Yesu akahauka hantu hada akaita mwe si ambazo ni hehi na mizi ya Tilo na Sidoni, 22 Aho mvyee yumwe ekuwae ni mkanaani ambae nee kawa akekaa mwe si iyo akamtimia Yesu, nakutoa mgutio, "Zumbe, Mwana wa Daudi, unifiye mbazi! Mwanangu wa kivyee apishwapishwa ni mazaiko." 23 Iya Yesu khekumwandua mbui yoyose. Aho, wahina wakwe wakambasa Yesu, na kumwamba, "Umwambe aite kwaviya atibasabasa na kutitoeya vuzo!" 24 Yesu akamtambaisa, "Khiagiwa kwaajii ya wantu wa si ya Isilaeli wakwagao inga ngoto." 25 Iya yuda mmaa akeza na kukinta mavindi hemeso ya Yesu na kumwamba, "Zumbe, niambiize!" 26 Yesu akamtambaisa, "Khio vitana kudoa khande ya wana na kuwatambikia makui." 27 Yuda mmaa akamtambaisa, "Ni kwei Zumbe, akini hata makui yada phuguntio zigwiswazo kulawa he meza za mazumbe wao." 28 Aho Yesu akamtambaisa, "Mmaa uzumizi wako ni mkuu na itende inga wekukundavyo." Yuda mdee akahona kisingi ichoicho. 29 Yesu akahauka na kuita khandakhanda ya tondoo da mazi ya Galilaya. Aho akakwea mwe muima akekaa uko. 30 Zumwezumwe kuu da wantu dikamwezea, wakamwetea wantu wekuviao na matuntu na wekuviao miundi na mabubu na watuhu watamu wangi, wakawaika hemeso yakwe Yesu nae akawahonya. 31 Awo wantu wakahondomaa wekuonaho mabubu watamwiya na wekuviao miundi wenda na matuntu waona, wantu wakamtogoa Muungu wa wantu wa Isilaeli. 32 Aho Yesu akawetanga wahina wakwe akagombeka, "Nawafiiya mbazi wantu awa kwaajii wawa na miye misi mitatu, naho khawana khande. Khikunda kuwabada waite na saa, wasekweza kugwa msae siai." 33 Wahina wakwe wakamwamba, "Hantu hanu khahana wantu, tendatiipatie kuhi khande ya kuigania

wantu wose awa?" 34 Yesu akawauza, "Mnayo mabumunda mangahi?" Wakamtambaisa, "Tinayo mabumunda mfungate na visamaki vidodo naho ni vicheche." 35 Aho akawamba wada wantu wekae asi. 36 Akayadoa yada mabumunda mfungate na via visamaki vicheche, akamtogoa Muungu, akavibendua, akawekha wahina, nao wakawapangia wada wantu. 37 Wose wakada na kweguta. Wahina wakwe wakaika hamwe phuguntio vya vyekusigaavyo wakamemeza ngahu mfungate. 38 Awo wekudao nee wawa wagosidu elufu nne kwesaho kutaazia wavyee na wana. 39 Aho, Yesu akaagana na wada wantu akengia mwe ngaawa, akaita phande za Magadani.

16 Mafalisayo na Masadukayo wakamwezea Yesu, na kumgeza kwa kumwoombeza awagosoe ntangio kulawa uwanga kwa Muungu. 2 Akawatambaisa akawamba, "Ibuaho guoni mwagombeka, 'Hali ya hewa yendaiwe ni ntana kwaviya maangwi ni mekhundu.' 3 Na keokeo mwagombeka, 'Ivyee fua yendainye kwaajii ni yasize nahodu mazunde yatanda.' Naho nywie mwamany muno kusoma misimu na kuikauwa hali ya uwanga, iya khamanya ntangio zilawiiyazo kisingi iki. 4 Kivyazi cha wantu wabanasi na chesacho kuwa na uzumizi! Chakunda ntangio, akini khakina chekhigwe ntangio yoyose, iya ida ntangio ya Yona, Yesu akawabada, akaita." 5 Wahina wakwe wekubuah phande ya kaidi ya tondoo da mazi, wakakumbuka wajaa kudoa mabumunda. 6 Yesu akawamba, "Kauwani, na muiyemee hamila ya Mafalisayo na Masadukayo." 7 Akini wakauzana wowo kwa wowo, "Tambe agombeka ivyo kwakuwa khatekudoa mabumunda." 8 Yesu akamany yada wekuwayo watamwiya akawamba, "Nywie wantu wenye uzumizi mdodo! Kwambwai mwauzanauzana kwa kwesekuwa na mabumunda. 9 Ivi khamzati kuniva? Khamkumbuka nekubenduaho yada mabumunda mashano kwaajii ya wada wantu elufu shano? Mmemeeza ngahu nyingahi ya vyekusigaavyo? 10 Hambu yada mabumunda mfungate wekudao wada wantu elufu nne, nee mwiika hamwe ngahu nyingahi ya vyekusigaavyo. 11 Kwambwai mwavotwa kumanya miye nchekuwa nikatamwiya mbui ya mabumunda? Ekauweni na hamila ya Mafalisayo na Masadukayo!" 12 Aho wahina wakamany kuwa kawamba waemee khio hamila ya mabumunda, iya mahinyo ya Mafalisayo na Masadukayo. 13 Yesu ekubuah phande za Kaisalia Filipi, akawauza wahina wakwe, "Wantu wagombeka Mwana wa Mntu kuwa nindai?" 14 Wakamtambaisa, "Watuhi wamba ni Yohana Mbatizi na watuhu wamba ni Eliya na watuhu wamba ni Jelemia hambu yumwe wa Waoni." 15 Yesu akawauza, "Ivi, nywinywi mwambaze, miye nindai?"

16 Simoni Petulo akamtambaisa, "Wee nee Klistu, Mwana wa Muungu ekuwaye na ugima." 17 Yesu akagombeka, "Wenda uwe na nyemi Simoni mwana wa Yona, kwaviya khahana mntu yoyose mwekukugubwiya mbui inu, iya Tate yangu wa uwanga kwa Muungu ekukugubuiaye mbui izi. 18 Ivyo nakwamba, wee nee Petulo na uwanga ya iwe idi nendanizenge zumwezumwe da wantu wamzumiiyao Klistu, na udaho wa ufe khaunaudahe kudivota. (Hadēs 986) 19 Nendanikwekhe funguo za Useuta wa uwanga kwa Muungu, na dodose wendadoudivugae mwe inusi dendadiwe divugalwa uko uwanga kwa Muungu, na dodose wendado udivugue mwe inusi dendadiwe divugulwa uko uwanga kwa Muungu." 20 Aho akawaemeza wahina wakwe wasekumwamba mntu yoyose kuwa yee nee mwekusagulwa ni Muungu. 21 Tangia kisingi icho Yesu akavoka kuwamanyisa pwii wahina wakwe, kuwa nakundigwa niite Yelusalemu na uko nendanehigwe usuumizi mwingi kulawa kwa wadaa na Waviki wakuu na wahinyi wa miko na nendanikomwe, na msi wa ntatu nendaniyuyuke. 22 Aho Petulo akamdoa khandai akavoka kumwakia Yesu, "Zumbe isekuwa ivyo, mbui iyo khaina ikubwiye!" 23 Yesu akahituka na kumwamba Petulo, "Hauke he meso yangu, Ibiisi! Wee ukikindio changu. Moyo wako khaumamakanya yekuwayo ya Muungu iya ya wantu." 24 Aho Yesu akawamba wahina wakwe, "Mntu yoyose akakunda kunitongea yakundigwa eemee mwenye na audoe mhamba wakwe anitongee. 25 Kwaviya mntu akakunda kuuhonya ugima wakwe mwenye, endaawaze, 26 na mntu endae awaze ugima wakwe kwaajii yangu endaekhigwe. Ivi, mntu endaafaidike mbwai akekhiwa vintu vyose vya inusi uku akawaza ugima wakwe? Hambu mntu endaalavye kintu chani kiwe badala yakwe? 27 Kwaviya, Mwana wa Mntu endaeze na udeeko wa Tati yakwe hamwe na wandima wa uwanga kwa Muungu na aho ndiho endahoamwiihe kiya mntu kwa kadii ya ntendwa zakwe. 28 Nawamba kwei, wauko watuhu hanu ambao khawana wauye na nyuma kabla ya kumoona Mwana wa Mntu akeza mwe useuta wakwe."

17 Yekwembokaho misi mtandatu, Yesu akawadoa Petulo na Yakobo na Yohana nduguye akaita nao hadi uwanga ya muima uko nee wawa ikedu. 2 Wekuwaho uko Yesu akahituka cheni hemeso yao. Cheni chakwe kikang'ang'azika inga zuwa na magwanda yakwe yakang'ang'azika inga ung'azi. 3 Naho wada wahina watatu nee wawaona Musa na Eliya wakatamwiya na Yesu. 4 Aho Petulo akamwamba Yesu, "Zumbe, nivitana sie kuwa hanu! Ukakunda nendanizenge makumbi matatu. Dimwe dako na dimwe da Musa na kitudu cha Eliya." 5 Ekuwaho bado agombeka, zunde dekung'aado

dikawagubika, na mgutio ukategeezeka kulawa mwe dia zunde, "Uyu ni Mwanangu nimkundisae, nitamiwae nae, mtegeezeni yee." **6** Wahina wekutegeezavyo ivyo, nee wakagwa asi na kugonea maifu, wakaogoha muno **7** Yesu akawezea akawadonta, akawamba, "Gookani msekuogoha!" **8** Wekukauwaho uwanga khawekumwona mntu mtuhu, iya Yesu ikedu. **9** Aho wekuwaho waseeya mwe muima Yesu akawaemeza, "Wasekumwamba mntu mbui wekuonazo adi Mwana wa Mntu endaho ayuyuke." **10** Aho wahina wakamuza, "Kwa mbwai wahinyi wa miko wagombeka kuwa yakundigwa Eliya avoke kweza?" **11** Yesu akawatambaisa, "Ni kwei, yakundigwa Eliya avoke kweza na kuika vitana mbui zose." **12** Akini nawamba Eliya keza kae, iya wantu khawekumanya, iya wakamgosoeya mbui za ufaiimi inga wakundavyo. Viyaviya Mwana wa Mntu enda asuumizwe mwe mikono yao. **13** Aho awo wahina wakamany kuwa nee akawamba mbui za Yohana Mbatiza. **14** Wekudibwiiyaho vituhu dia zumwezumwe da wantu, mntu yumwe akamwezea Yesu na kumkintia mavindi, **15** akagombeka, "Zumbe mfiye mbazi mwanangu kwaviya agwa mtwi naho asumiya muno, maa nyingi agwa mwe moto na mwe mazi. **16** Kwiwaetea wahina wako iya khawekudaha kumhonya." **17** Yesu akawatambaisa, "Nywie wantu wa kivyazi iki chesacho kuzumiya, chekuatukacho! Nenda nekae na nyie adi ini? Nendaniwazimize ata ini? Mweteni hanu uyo mbwanga." **18** Aho Yesu akadiwakia ido zaiko nado dikamlawa yuda mbwanga akahona kisingi kia kia. **19** Aho wahina wakwe wakamtimia Yesu hantu kwesiho wantu, wakamuza, "Kwa mbwai sie khatokudaha kumlavya yuda zaiko?" **20** Yesu akawatambaisa kwaajii ya uzumizi wenu mdodo. Nawamba kwei, ati nee muwa na uzumizi inga khokhoo ya haladali nee mkawamba muima unu hauke aha uite hada, nao wendauhauke. Ivyo khahana mbui yoyose yesayokudahika kwenu. **21** Mbui inga inu khaidahika iya kwa kuvika na kwa kwehiniza kuda. **22** Yesu ekuwaho na wahina wakwe uko Galilaya akawamba, "Mwana wa Mntu enda alavigwe kwa wantu. **23** Nao wenda wamkome na msi wa ntatu enda ayuyuke." Wahina wakwe wakaungumia muno. **24** Yesu na wahina wakwe wekubuwaho Kapelanaumu, wadoa kodi he Nyumba ya Muungu wakamwezea Petulo na kumuza, "Wee, ivi mhinyi yenu khaiha kodi ya Nyumba ya Muungu?" **25** Petulo akatambaisa, "Eehe yee aiha." Aho, Petulo ekwengiaho mda ndani ya nyumba hata khazati kutamwiiya mbui, Yesu akavoka kumuza, "Simoni, wee waona viivhi? Maseuta wa inusi wadoa kodi kulawa kwa kinandai? Kulawa kwa wantu wa si yao hambu kwa wageni?" **26** Petulo akatambaisa, "Kulawa kwa wageni." Yesu akamwamba,

"Inga ni ivyo wenye si yao khawakundigwa kuiha kodi. **27** Iya khatikunda kuwasefua moyo, hita mwe tondoo da mazi ukatambike ndoano, samaki wa bosi endaeatozwe mgubue muomo wakwe wenda umbwiiye heya idoe ukaihe kodi yako na yangu."

18 Kisingi kiya wahina wakamwezea Yesu, na kumuza, "Nindai mkuu muno mwe useuta wa uwanga kwa Muungu?" **2** Yesu akamwetanga mwana mdodo na kumgoosa gatigati yao, **3** Aho akawagombeka, "Nawamba kwei, mkesekuhituka na kuwa inga wana khamnamwengiye katu mwe useuta wa uwanga kwa Muungu. **4** Kwaiyo mntu yoyose ajinyenyeekeshae inga mwana uyu, nee endae awe mkuu kusima wose mwe useuta wa Muungu. **5** Yuda amhokeye mwana kwaajii yangu, endaawe anihokea miye. **6** "Iya inga mntu yoyose mwendae amtende yumwe wa wadodo awa wanizumiiio agosoe mavigaviga, ni ebae mntu uyo azengetezwe iwe kuu da kubundugia mwe singo yakwe na kutambikwa mwe kina kilehacho cha mazimshindo. **7** Mmbwii yenu wantu wa Inusi inu kwaajii ya yada yaetayo wantu kugosoa mavigaviga! Mbui izo nlazima yawe aho, iya mmbwii yakwe mntu yuda ambae endaagosoe. **8** "Inga mkono hambu muundi wako ukakutenda kugosoa mavigaviga usenge na uwase hae. Ni ebae kwako kwengia mwe ugima kwesiho mkono hambu muundi, kusima kwasigwa mwe moto wesao kukomeka misi yose kwesiho kisiikizi ukawa na mikono miidi na miundi yako miidi. (aiōnios g166) **9** Na ziso dako dikakutenda ugosoe mavigaviga, ding'oe na kudasa hae. Ni ebae kwako kwengia mwe ugima ukawa na ziso dimwe kusima kwengia mwe moto misi yose kwesaho kukomeka ukawa na meso yako yose maidi. (Geenna g1067) **10** "Ekauweni, msekumbea wamwe wa wadodo awa. Kwaviya nawamba, wandima wao wa uko uwanga kwa Muungu, misi yose wahamwe na Tate yangu uko uwanga kwa Muungu. **11** Kwaviya Mwana wa Mntu keza kuohoa wada wakwagao. **12** "Mwaona viivhi? Mntu akawa na ngoto makumi kumi, akaga yumwe endatende viivhi? Ivi khana awabade wada makumi kenda na kenda kwe muima, na nakuita kumwondeza yuda yumwe mwekwaga? **13** Nawamba kwei endaho amuone, endaawe na nyemi nae uyo kusima wada makumi kenda na kenda ambao khawekwaga. **14** Ivyoivyo na Tate yangu wa uwanga kwa Muungu khakunda hata yumwe wa wadodo awa age. **15** "Nduguyo mkese kwevana, umbase na umhaze mkawa nywie waidi du. Akakutegeeza wendauwe nduguyo kumpata. **16** Ikawa ata khakutegeeza doa mtu yumwe hambu waidi, inga Maandiko yagombekavyo, 'kia masa yendayaonoke kuwa ni kwei kwa uvuhuzi wa wantu waidi

hambu watatu, masa yaumulwe.' 17 Akese kuwategeeza awo wavuhuzi waidi hambu watatu, wagombeke zumwezumwe da wantu wekumzumiiyao Klistu. Na inga khanaaditegeeze zumwezumwe da wantu wamzumiiyao Klistu na awe kwako inga wantu wesao kumanya Muungu hambu watozao ushuu. 18 "Kwei nawamba, mbui mwendazomzivugue mwe inusi zendazivugalwe na uko uwanga kwa Muungu, na mbui zendazomzivugae mwe inusi zendazivugulwe na uko uwanga kwa Muungu. 19 "Nawagombeke vituhu waidi gatigati yenu wakevana hanu he inusi kuusu mbui yoyose waiyombeza, Tate yangu wa uko uwanga endaagosoe mbui iyo. 20 Kwaviya hohose hada wakintanaho waidi hambu watatu kwa zina dangu, miye ni ahoaho gatigati yao." 21 Naho Petulo akamwezea Yesu na kumuua, "Zumbe, ndugu yangu akaendeeza kunikosea maa nyingahi na miye nimfiye mbazi? Hambu, ata maa mfungate?" 22 Yesu akamtambaisa, "Khhigombeka maa mfungate iya mfungate maa makumi mfungate." 23 Kwaivyo Useuta wa Muungu wadaha kuiganywa na seuta yumwe mwe kukunda kugosoa ntaazia ya hea na wandima wakwe. 24 Ekuvokaho kugosoa ntaazia zakwe mntu yumwe mwekuwa adaiwa vifuko magana kumi vya zahabu, akaetwa kwakwe. 25 Ekuvotwaho kuiha deni ido, ivyo seuta yake akakunda yee atagwe na mkaziwe atagwe hamwe na wanawe watagwe na vyose ekuwavyo navyo vitagwe ili dia deni diihwe. 26 Yuda mndima akakinta mavindi na kumhembeeza yuda seuta na kugombeka, "unizizimizie, nami nenda nikuihe deni dako dose." 27 Yuda Mkuu wa uyo mndima akamfiya mbazi na akamuekea deni dakwe dose akambada aite zakwe. 28 "Iya uyo mndima ekuwaho alawa chongoi, akakintana na mndima ekuwae amdoi nti makumi kumi ya madini yetangwayo feza. Akamfuntia na kumkeda kongomeo na kumwamba niihe kia nikudaiacho. 29 Yuda mndima mweziwe akakinta mavindi na kumhembeeza akagombeka, 'Naombeza unizizimizie, nami nendanikuihe deni dako dose.' 30 Akini akaemea na akamwegaa he kifungo hadi endahoihe ido deni. 31 Wandima weziwe wekuonaho ayo yekuawiiyo wakakimwa muno, nao wakaita nakumgombeka seuta yao kiya kintu chekulawiiacho. 32 Aho yuda seuta akamwetanga yuda mndima, akamwamba, 'wee ni mndima mfyaimi muno! Kuniombeza nikakufiia mbazi na miye nikakufiia mbazi deni dako dose.' 33 Ivi weye, khwekukundigwa kumfiia mbazi mndima mwezio inga nekukufiavyo mbazi? 34 Aho, uyo seuta akakimwa muno akamwekhiiza kwa asikai mageeza wamsuumize adi endahoihe deni dose." 35 Na Yesu akaendeeza kugombeka, "Tate yangu wa uwanga kwa

Muungu nee endavyoawagoswee ivyo inga kia yumwe yenu khana amfiye mbazi nduguye kwa moyo wakwe wose."

19 Yesu ekubindaho kutamwiia mbui izo, akahauka Galilaya akaita Uyahudi, phande ya zigigizi da mazi da Yolodani. 2 Zumwezumwe da wantu dikamtongea, nae akawahonya uko. 3 Mafalisayo wakamwezea, wakamuua kwa kumgeeza, "Vyafaa mgosi kumbada mkaziwe kwa masa yoyose?" 4 Yesu akawatambaisa, "Khamwekusoma mwe Maandiko ya Muungu kuwa Muungu mwe kumuumba mntu, kuvokea aho bosi kugosoa mgosi na mvyee, 5 na akagombeka, 'Kwaajii uyo mgosi endaabadane na tati yakwe na mami yakwe, na endaaungane na mkaziwe, nao awa waidi wenda wawe mwii umwe.' 6 Kwaivyo, wowo khio waidi vituhu iya ni mwii umwe. Ivyo ekukintanisacho Muungu mntu asekuhibahua." 7 Akini wowo wakamuua, "Kwambwai Musa katiagiya mvyee ekhhigwe bauwa na kubadwa?" 8 Yesu akawatambaisa, Musa kawekha uhusa kuwabada wavyee wenu kwaajii mioyo yenu itoga. Iya khayokuwa ivyo kuvokea aho bosi. 9 Na isasa nawambeni, yoyose ambadae mkaziwe kwesiho mbui ya ukianga na akategua mvyee mtuhu agosoa kianga. 10 Wahina wakwe wakamwamba, "Ikawa mbui ya mgosi na mvyee niivyo, ni ebae mtu asekutegua." 11 Yesu akawamba, "Khio wose wadaha kuhokea hinyizo idi, kwesiho kwa wada ambao Muungu kawaambiza kugosoa ivyo. 12 Kwaviya wauko mabunyenge wekuvyagwao na mami zao na wauko mabunyenge wekugosolwao na wantu na wauko mabunyenge wekwetendao kuwa mabunyenge kwaajii ya Useuta wa Muungu. Adahae kuhokea hinyizo ido na aihokee." 13 Wamwe wa wantu wakamwetea wana wadodo awaikie mikono na kuwawika. Akini wahina wakawawikia. 14 Yesu akagombeka "Waakeni awo wana weze hangu, naho msekukindia, kwaviya Useuta wa uwanga kwa Muungu ni wa wantu wekuwao inga wana awa." 15 Ekubindaho kuwaikia mikono nee ahauka hantu aho. 16 Mntu yumwe akamwezea Yesu akamwamba, "Mhinyi, nigosoe mbui yani yedi nekhigwe ugima wa misi yose kwesiho kisiikizi?" (aiōnios g166) 17 Yesu akamtambaisa, "Mbona waniua kuusu mbui yedi? Kuna yumwedu ambae ni yedi. Ukakunda kwengia mwe ugima toza aml." 18 Yuda mntu akamuua, "Amli ni zihizi?" Yesu akamwamba, "Usekukoma na usekugosoa kianga na usekubawa na wesekugombeka uhokho, 19 watunye tati yako na mami yako na mkunde mwezio inga wekundavyo mwenye." 20 Uyo mbwanga akamwamba, "Ayo yose khyatozeeza. Ivi khhihungukiwa na mbwai?" 21 Yesu akamwamba, "Inga ukakunda kuwa mwiganizi, hita ukatage vintu vyako vyose na izo hea ukawekhe wakiwa, nawe

wendauwe na kiikizo uwanga kwa Muungu, ukabinda soo unitongee.” 22 Yuda mbwanga ekusikiahoo ayo, akahauka kwa kuungumia kwaajii nekawa na vintu vingi. 23 Aho Yesu akawamba wahina wakwe, “Kwei nawamba indaiwe khavidahika muno kwa mwenye vintu vingi kwengia mwe Useuta wa uwanga kwa Muungu. 24 Naho nawamba ni vihufu ngamia kwemboka mwe ntundu ya singano kusima mwenye vintu vingi kwengia mwe Useuta wa Muungu.” 25 Wada wahina wakwe wekusikiahoo ivyo wakahondomaa muno wakauzana, “Nindai adahae kuoholwa?” 26 Yesu akawakauwa, akagombeka, “Kwa mntu mbui inu khaidahika, iya kwa Muungu mbui zose zadahika.” 27 Aho Petulo akagombeka, “Na swiswi tibada vyose takutongea, tinda tipate mbwai?” 28 Yesu akawamba, “Nawamba kwei, Mwana wa Mntu endahoekae mwe kigoda kikuu cha Useuta mwe inusi mphyu, nywinywi mwekunitongeo mnda mwekae mwe vigoda kumi dimwe na mbii mkaamuiya mbai kumi dimwe na mbii ya Isilaeli. 29 Kiya mwekubada nyumba yakwe, hambu ndugu yakwe hambu umbu dakwe hambu tati yakwe hambu mmaa yakwe hambu wanawe hambu mnda yakwe kwaajii yangu, endaahokee mamia na ngeeko, na kwekhigwa ugima wa misi yose kwesiho kisiikizi. (aiōnios g166) 30 Iya ambao ni wabosi wendawawe wa kisiiki na ambao ni wa kisiiki wendawawe wa bosi.

20 “Useuta wa uwanga kwa Muungu waigana na mntu mwenye mnda wa mizabibu, mwekulawa keokeo da mtungaihu kwaajii ya kuwekha waimi ndima mwe mnda wakwe. 2 Akevana nao kuwaiha sensi mwenga ya madini yetagwayo feza kwa msi umwe, nee awegaa mwe mnda wakwe wa mizabibu. 3 Akalawa mwe saa tantu da keo akawabwiiya wantu watuhu wagooka gwiyo, khawana ndima, 4 akawagombeka, ‘Hitani na nywie mkagosoe ndima mwe mnda wangu wa mizabibu, na miye nenda niwekhe kiya kikundigwacho kuihwa.’ 5 Nawo wakaita. Uyo mwenye mnda akalawa vituhu mwe saa mtandatu na saa kenda, akatenda ivyo. 6 Ata zua dekuswaho akalawa vituhu akawabwiiya wantu watuhu wagooka hada gwiyo. Aho akawauza, ‘Mbona mgooka hanu musi ngima kwesiho ndima?’ 7 Wakamtambaisa, ‘Kwaviya khahana mntu mwekutekha ndima.’ Nae akawamba, ‘Hitani na nywie mkagosoe ndima mwe mnda wangu wa mizabibu.’ 8 “Zua dekuswaho, uyo mwenye mnda akamwamba mgookezi wakwe, ‘Wetange wandima uwahihe maiho yao, uvoke na wada wekugosoao ndima mda wa kisiiki na uwabindizie wada wekuvokaho ndima.’ 9 Wada wandima wakeza wada wekugosoao ndima zua diswa kae wakahokea kia yumwe

maiho ya sensi mwenga ya madini yetangwayo feza. 10 Wada wa bosi wekubuahoo, wakamamakhanya wenda wekhigwe na ngeeko, akini hata wowo wakekhigwa sensi mwenga mwenga ya madini yetangwayo feza. 11 Wakahokea yada maiho na kuvoka kumng’ung’uzikia yuda mwenye mnda. 12 Wakamba, ‘Wantu awa weza guoni na wagosoa ndima kwa mda wa saa dimwe du, mbona kutiha sawa nao, kisingi swie tizizimiza ndima ngumu na zua kai?’ 13 Naho yuda mwenye mnda akamtambaisa yumwe aho, ‘Mbuyangu nchekukukonya kintu! Ivi, tambe khatwekana kuwaiha misi yose maiho ya sensi mwenga kwa msi umwe?’ 14 Doa kiya wekukundigwacho kuihwa na uite. Nakunda kumwekha uyu wa kisiiki inga nikukuihavyo wee. 15 Ivi khikundigwa kugoso kiya nikundacho na ni vintu vyangu mwenye? Hambu waona kinyuu kwa viya khiwa yedi?” 16 Yesu akabindizia kwa kugombeka, ‘Ivyo, wakisiiki wendawawe wa bosi na wabosi wendawawe wa kisiiki.’ 17 Yesu ekuwaho akaita Yeluselemu hamwe na wahina wakwe wangi, na wekuwaho siai akawadoa wada wahina wakwe kumi dimwe na mbii kuwegaa khandani na kutamwii nawo wowo ikedu, 18 “Tegeezani! Taita Yeluselemu na uko Mwana wa Mntu endaekhiizwe kwa waviki wakuu na wahinyi wa miko, nao wendawamuamuiye akomwe. 19 Wenda wamwekhiize kwa wantu wesao kuwa Wayahudi, nawo wendawambee na endaatigwe ngoda na kusuumizwa na kugong’ondewa he mhamba, iya bada ya misi mitatu endayuyuswe.” 20 Aho mkaza Zebedayo hamwe na wanawe waidi ambao ni Yakobo na Yohana wakamwezea Yesu, wakakinta mavindi hemeso yakwe na kumwombeza kintu. 21 Yesu akamuza, “Wakunda mbwai?” Uyo mmaa akamtambaisa, “Niikia kiaga wendaho wengie mwe Useuta wako, awa wanangu waidi nakunda wekae, yumwe phande yako ya kuume na mtuhu phande yako ya kumoso.” 22 Yesu akamtambaisa, “Khamanya mwaombeza mbwai. Ivi mwadaha kudomea kikombe iki cha usuumizi nendacho nidomee miye?” Wakatambaisa, “Tadaha.” 23 Yesu akawamba, “Kwei kikombe changu cha masuumizo mwenda mkidomee, iya kwekaa phande ya kuume hambu kumoso kwangu iyo khiyo ndima yangu kuwekha, mbui iyo wendawekhigwe wada wekuikiwao kae ni Tate yangu.” 24 Wada wahina watuhu kumi dimwe wekutegeezaho ayo, wakakimwa kwaajii ya awo ndugu waidi. 25 Ivyo Yesu akawetanga wose, na akawamba, “Mwamany kuwa wagookezi wa si ntuhi uwagookea wantu wao kwa nguvu na wakuu wao wawatumikisha wekuwao asi yao. 26 Iya kwenu isekuwa ivyo, na mntu akundae kuwa mkuu gatigati yenu yakundigwa awe mndima wa wose, 27 na akundae kuwa wa bosi gatigati yenu, akundigwa awe

mndima yenu. 28 Inga ivyoivyo, Mwana wa Mntu khakweza kugosoewa, iya kuwagosoewa na kuulavya ugima wakwe na ili wantu wangi waoholwe.” 29 Kisingi Yesu na wahina wakwe wekuwaho wakahauka mwe mzi wa Yeliko, zumwezumwe kuu da wantu dikamtongea. 30 Matuntu waidi wekuwao wekaa khandakhanda ya sia, wekusikahia kuwa Yesu emboka aho, wakatoa mgutio, “Zumbe, Mwana Daudi utifiye mbazi!” 31 Dia zumwezumwe da wantu dikawaagezea na kuwakunda wanyamae. Iya wowo wakatendesa kutoa mgutio, “Zumbe, Mwana wa Daudi utifiye mbazi!” 32 Yesu akagooka, akawetanga na kuwauza, “Mwaonda niwagoswee mbwai?” 33 Wakamtambaisa, “Zumbe, takunda meso yetu yagubuke.” 34 Yesu akawafiiya mbazi na kuyadonta meso yao, ahoaho meso yao yakadaha kuona, na wao wakamtongea.

21 Yesu na wahina wakwe wekubuahe hehi na Yelusalemu na kubua hantu hetangwaho Betifage mwe muima na Mizaituni, akawaagiya wahina wakwe waidi, 2 akawamba, “Hitani adi mwe mzi weiho hemeso yenu na aho mwendamumbiwe phunda kazengetezwa uzigi na mwanawe kazengetezwa uzigi khandai yakwe wavugueni mkawaete. 3 Inga mntu akawauza kwambwai mwawadoa phunda, mmwambe, Zumbe awakunda, na mwenye phunda endaawekhe kinyio.” 4 Mbui inu igosoka ili yada yekugombekwayo na Muoni wa Muungu yaiganyie, 5 “Wagombekeni wantu wa mzi wa Sayuni, Kauwa, Seuta yako akwezea! Ni mhuusi, nae eza akawa kekaa uwanga ya phunda, Mwana phunda.” 6 Iyo wada wahina wakaita wakagoso inga Yesu ekuwaagiavyo. 7 Wakamweta yuda phunda na mwanawe, wakatandika nguo zao uwanga ya phunda na Yesu akekaa uwanga yakwe. 8 Zumwezumwe kuu da wantu wakatandaza nguo zao mwe sia na wantu watuhu wakasenga matambi madodo dodo ya miti nayo wakayatandaza mwe sia. 9 Zumwezumwe da wantu wekuongoa na wada wamtongeo wakatoa mgutio, “Atogolwe Mwana wa Daudi! Ajaiwe uyo ezae kwa zina da Zumbe! Atogolwe Muungu uwanga!” 10 Yesu ekwengiaho Yelusalemu mzi wose wakawa na matumatu. Wantu wakawa wauzana, “Uyu ni nindai?” 11 Wantu mwe dia zumwezumwe wakagombeka, “Uyu ni Yesu, yuda muoni kulawa Nazaleti mzi wa Galilaya.” 12 Aho, Yesu akengia he Nyumba ya Muungu, na kuwaguusa wose wekuwao wakagua na kutaga vintu he Nyumba ya Muungu. Akazihitua meza za wada wekuwao wahitua hea, na vigoda vya wada wekuwao wataga sua. 13 Akawamba, “Iyandikwa mwe Maandiko ya Muungu, ‘Nyumba yangu indaiwe nyumba ya kuvika.’ Iya nywie mwiitenda phanga da wabavi!” 14 Wantu wekuwao matuntu na wekuviao wakambasa uko kwe Nyumba ya Muungu, nae

Yesu akawahonya. 15 Aho, waviki wakuu na wahinyi wa miko wakakimwa muno wekuonaho vihi ekugosoavyo Yesu hamwe na kuwategeza wana wekuwavyo walavya mgutio kwe Nyumba ya Muungu wakamba, “Atogolwe Mwana Daudi.” 16 Iyo wakamwamba, “Ivi, wategeza wambavyo?” Yesu akawatambaisa, “Eehe, nategeza!” Ivi khamzati kusoma Maandiko aya? “Kwa miomo ya wana wadodo na wateke, Muungu kawagoso wa mtogoe yee.” 17 Aho Yesu akawabada, akalawa chongoi ya mzi na kuita mwe phaamo ya Besania, na akagona uko. 18 Keokeo da mtungaihu Yesu ekuwaho auya mwe mzi neekawa na saa. 19 Akoona mtini khandakhanda ya sia, akautimia hehi, akini khekuaona tunda dodose iya manidu. Ahoaho akagombeka uda mtini, “Wesekuvyaa vituhu matunda misi yose!” Aho uwo mtini ukanyaa. (aiōn g165) 20 Wahina wakwe wekuonaho mbui iyo wakahondomaa, wakamuza, “Iwa viivhi mti unu wa mtini unyaa kinyio?” 21 Yesu akawatambaisa, “Nawamba kwei, inga mkazumiya na mkesekuwa na matumatu, mwadaha khio du kugosoa ivyo kwa yada yekugosokanayo kwa unu mtini, iya ata mkawamba muima unu halawe uketambike mwe mazimshindo, inda igosoke ivyo. 22 Na mkazumiya, dodose mwendado muombeze kwa kuvika, mwenda mwekhwige.” 23 Yesu ekwengiaho, he Nyumba ya Muungu wagookezi wa waviki na wadaa wa wantu wakamwezea ekuwaho akahinya na kugombeka, “Wagoso mbui izi kwa udaho wani, nae ni ndai mwe kukwekha udaho unu?” 24 Yesu akawatambaisa, “Na miye nendaniwauze mbui mwenga, mkanitambaisa, na miye nendaniwambe nagosoa mbui izi kwa udaho wani. 25 Ubatizi wa Yohana, ulawa kuhi? Ulawa kwa Muungu hambu ulawa kwa wantu?” Wakavoka kuuzana wowo kwa wowo, “Tikamba ulawa kwa Muungu, endatiuze, mbona khamwekumzumiya?” 26 Iya tikamba, “Ulawa kwa wantu, taogoha zumwezumwe da wantu kwaviya wose wammanya Yohana Mbatiza kuwa ni muoni wa Muungu.” 27 Kwaiyo wakamtambaisa, “Swie khatimanya.” Nae Yesu akawamba, “Wala na miye khina niwambie ni kwa udaho wani natenda mbui izi.” 28 “Nywie mwamamaakhanya viivhi? Mntu yumwe nee ana wana waidi wakigosi. Akamwamba yuda wa bosi, ‘Mwanangu, ivyeo hita kwe mnda wa mizabibu ukaiame.’ 29 Yuda mwana akamtambaisa, ‘Miye khina niite,’ bada ya mda akamamakhanya na akaita. 30 Nee yuda tate akambasa mwanawe mtuho akamwamba viyaviya. Yee akatambaisa, ‘Nenda niite Tate,’ iya khekuita. 31 Gatigati ya awo wana waidi ni yuhi mwe kugosoa kida ekukundacho Tati yao?” Wakamtambaisa, “Ni yuda wa bosi.” Yesu akawamba, “Watoza ushuu na wakiyanga wao wendawaongoe kwengia mwe Useuta wa Muungu.” 32

Kwaviya Yohana Mbatii za keza kwenu na kuwaonyesha sia yedi, iya khamwekumzumiiya, akini watoza ushuu na wakiyanga wamzumii. Nywie hata mwe kuonaho ayo, khamwekuhituka na khamwekuzumiiya. 33 Yesu akamba, "Tegeezani msimo mtuhu. Nee kuwa na mntu yumwe mwenye mnda wa mizabibu. Akadizengea buha na akafuka tubwi mda ndani da kukamwiiya divai, na akazenga mnaa. Naho akawekha waimi uwo mnda, na akatamba na kuita si ya hae." 34 Kisingi cha ubosi chekubuaho, akawaagiiya wandima wakwe kwa wada waimi wakadoe hantu ha ubosi wakwe. 35 Wada waimi wakawagwiiya awo wandima, yumwe wakamtoa na yumwe wakamkoma na mtuhu wakamtoa maiwe. 36 Uyo mntu akawaagiiya wandima watuhu, wangi na wangi kusima wada wa ntambo ya bosi. Wada waimi wakawagosweeya ya viyaviya inga wezwao wa bosi. 37 Kisikiizi akamwagiiya mwanawe kwao, uku amamaakhanya, na kugombeka, "Wendawamtunye mwanangu." 38 Iya wada waimi wekumwonaho ni mwanawe wakegombeka wowo kwa wowo, "Uyu nee mpazi na timkome na upazi wakwe tiudoe swie!" 39 Ahoaho wakamwagiiya na kumlavya chongoi ya uda mnda wa mizabibu na kumkoma. 40 Yesu akawauza, "Yuda mwenye mnda, endahoeze andaawatende mbwai wada waimi?" 41 Wowo wakamtambaisa, "Haika, endaaawakome na uda mnda enda awekhe waimi watuhu, wendao wamwekhe hantu ha ubosi kwa kisingi chakwe." 42 Yesu akawamba, "Khamzati kusoma mwe Maandiko yagombekavyo? 'Iwe wekumeado wazengi Isasa diwa iwe kuu da khandakhanda. Zumbe nee mwe kugosoa mbui inu, Nayo ni kiozo muno umu mwetu!' 43 "Nawagombeka," "Useuta wa Muungu wendausigwe aha henu na kwekhigwa wantu wa si ntuha wada wagosao yada yamtamizayo Muungu." 44 Yesu akaendee kugombeka, "Yee endaeagwe mwe iwe idi endaabondeke bondeke ntii, iya yuda dendaedimgwiye endaaahondeke muno." 45 Wagookezi wa waviki wakuu na Mafalisayo wekutegeezaho misimo iyo wakamanya nee akawagombeke wowo. 46 Wakoondeza sia ya kumgwiiya, iya wakaogoha zumwezumwe da wantu kwaviya wantu nee wamkauwa Yesu kuwa ni muoni.

22 Yesu akagombeka nao vituhu wada wantu kwa misimo. 2 "Useuta wa uwanga kwa Muungu waigana na zumbe yumwe mwekumgosoeya mwanawe ntafuno ya ndoza. 3 Akawaagiiya wandima na kuwetanga wekugonekwao weze kwe ndoza, iya wekugonekwao khawakukunda kweza. 4 Naho akawaagiiya wandima vituhu wawambe wada wekugonekwao, 'Isasa ntafuno iikwa kae khande. Na nyama za njeku na wesao kudahaa vitana kia kintu kiikwa kael!' 5

Iya wowo khawekupatiiza, wakahauka, yumwe kaita tanga kwakwe na mtuhu kwe biashaa zakwe, 6 na watuhu wakawagwiiya wakawatoa na kuwakoma. 7 Yuda Seuta akakimwa, akawaagiiya maasikai wakwe wakawadagamize wada wakomaji na kuubananga mzi wao kwa moto. 8 Aho akawamba wandima wakwe, 'Ntafuno ya ndoza itayali, iya wekugonekwao wakaemea kweza. 9 Hitani mwe baabaa na wowose wendao muwabwiiye wetangani weze kwe ndoza,' 10 wada wandima wakalawa na kuita mwe baabaa, wakawaika hamwe wantu wose, wafyaimi na wedi. Nyumba ya ndoza ikamema wageni. 11 "Seuta ekwengiaho kuwakauwa wageni akamwona mntu yumwe ambae khekuvaa gwanda da ndoza. 12 Seuta akamuiza, 'Mmbuya, kwengia viivih uku khuna gwanda da ndoza?' Yuda mntu khekua na dakugombeka. 13 Ahoaho Seuta akawamba wandima, 'Mzengetezeni sigi za mwe miundi na mwe mikono mkamwase chongoi kwe kiza, uko endaaie na kuuma meno.'" 14 Yesu akabindiiiza kwa kugombeka, "Wantu wekwetangwao ni wangi, iya wekusagulwao niwacheche." 15 Nee Mafalisayo wakahauka na kuita sia ya kuteganya wendavyo wamgwiye Yesu kwa ntamwiizi zakwe. 16 Aho wakawaagiiya wahina wao hamwe na wahina wa kizumwezumwe cha Mahelode. Wakamuiza, "Mhinyi, tamanya wee ni mntu yedi na wahinya sia ya Muungu ya wantu kugosoa yekuwayo yedi, kumwogoha mntu yoyose kwamana ya ukuu wakwe na ukuu wakwe kwako khio kintu. 17 Haya tambie wee waona viivih? Ni vyedi kumuiha ushuu kwa seuta mkuu wa Lumi hambu tisekumuiha?" 18 Yesu akamanya nteganyi zao za ufyaimi akawagombeka, "Nywie ni wahokho, kwambwai mwanigeeza kwa kunihaga? 19 Nionyeshani iyo sensi iihayo ushuu." Nawo wakamwekha sensi mwenga. 20 Ahoaho, Yesu akamuiza, "Cheni na magondo aya ni ya ndai?" 21 Wakatambaisa, "Ni seuta mkuu wa lumi." Aho Yesu akawamba, "Ya seuta mkuu wa lumi mwekheni seuta mkuu wa lumi na ya Muungu mwekheni Muungu." 22 Wekusiahyo iyo nee wahondomaa, wakambada wakaita. 23 Msi uwowu wamwe wa Masadukayo wagombekao wekufao khawayuyuka vituhu wakamtimia Yesu. 24 Na kumwamba, "Mhinyi, Musa kagombeka mntu inga akategua na akauya na nyuma na khekubada mwana, yakundigwa nduguye antegue uyo mvyee mwekufiwa ni mgosi, ili ampatie wana. 25 Hanu hetu nee kuwa na wandugu mfungate. Wabosi kategua nee auya na nyuma na khekujaiwa mwana, akadoigwa ni nduguye uyo mvyee mwekufiwa ni mgosi. 26 Vikagosoka iyoivyo kwa ndugu wakaidi na wantatu, adi wose mfungate. 27 Bada ya ndugu ao wose kuuya na nyuma na yuda mvyee nae akauya na nyuma. 28 Wendaho ubue uwo msi wa uyuyuko wendaho

wayuyuke mvyee uyo endaawe ni mkaza ndai wamwe wa wada wandugu mfungate? Kwaviya wose mfungate nee wamtegua.” 29 Yesu akawatambaisa, “Nywie mwaga kwaajii khamanya Maandiko ya Muungu wala udaho wa Muungu. 30 Kisingi wantu wendaho wayuyuke khawana wategulwe wala kutegua, iya wendawawe inga wandima wa uwanga kwa Muungu. 31 Iya kwa ida mbui ya wantu kuyuyuka tambe khamzati kusoma yada ekuwagombekayo Muungu? 32 ‘Miye ni Muungu wa Iblahimu na Muungu wa Isaka na Muungu wa Yakobol’ Yee khie Muungu wa wekuuyao na nyuma, iya ni Muungu waugima.” 33 Yada mazumwezumwe ya wantu yekutegeezaho mahinyo yakwe wakahondomazwa muno. 34 Mafalisayo wekusikiaho kuwa Yesu kawatwiiza Masadukayo, na wakakintana hamwe. 35 Yumwe wa Mafalisayo ambae amanya miko, akamuiza Yesu kwa kumgeeza. 36 “Mhinyi mwe miko ni amli ihi yekuwayo kuu?” 37 Yesu akamtambaisa, “Mkundise Zumbi Muungu yako kwa moyo wako wose na muye wako wose na kwa akii zako zose.” 38 Inu nee amli kuu na ya bosi. 39 Yakaidi yaigana na inu, ‘Mkundise mntu yoyose inga wekundsavyo wee mwenye.’ 40 Miko yose ya Musa na mahinyizo ya Waoni zizengwa na amli izi mbii.” 41 Kisingi Mafalisayo wekukintanaho hamwe, Yesu akawauza. 42 “Nywie mwaona viivihii kuusu klistu mwohozu? Yee ni mwana wa ndai?” Wakamtambaisa, “Yee ni mwana ya Daudi.” 43 Yesu akawauza, “Yadahika viivihii Daudi akaongweewa na Muye wa Muungu amwetange Klistu ni ‘Zumbi?’ Kwaviya kagombeka, 44 ‘Zumbi kamwamba Zumbi yangu, Ekaa he mkono wangu wa kuume Adi nendaho niwavote wamasa wako.’ 45 Akawa Daudi amwetanga Klistu ‘Zumbi’, yadahika viivihii Daudi kuwa mwanawe?” 46 Khahana mntu yoyose mwekudaha kumtambaisa Yesu mbui iyo, na kuvokea msi uwo khahana mwekudaha kugeeza kumuiza vituhu dodose.

23 Naho Yesu akawamba wada wantu wangi na wangi wekuwao aho, hamwe na wahina, 2 “Wahinyi wa Miko na Mafalisayo nee wekwekhigwao udaho wokusosa miko ya Musa. 3 Iyo tozani na mtongee dodose wendado wawagombekee. Iya mwesekutongea yada wayagosoayo, kwaviya wowo khawayatongea yada wayahinyayo. 4 Wadoa maafuushi yazamayo na kuwabadika wantu mwe mawega, akini wowo wenye khawakunda kuidon’ta hata kwa chaa wadahe kuyenua. 5 Wao wagosoacho mbui zao zose ili kwakweonyesha he meso ya wantu. Kwaviya wavaa kwenye vyeni vyao na mwe mikono yao nti kuu za babu ambavyo viandikwa miko ya Musa, na kuomeea mafundo mwe magwanda yao. 6 Wakunda kwekaa phasi za kutunywa

mwe ntafuno na vigoda vya kutunywa mwe Nyumba za kukintania Wayahudi. 7 Wakunda kuuguswa kwa kutunywa gwiyo na nakwetangwa na wantu. ‘Mhinyi.’ 8 Iya nywie wantu wasekuwetanga ‘Mhinyi.’ Kwaviya mhinyi yenu ni yumwedu, na nywie wose ni ndugu. 9 Nahodu mwesekumwetanga mntu yoyose ‘Tate’ hanu mwe inusi kwaviya Tate yenu ni yumwedu, mweuko uwanga kwa Muungu. 10 Naho mwesekumwetanga ‘Wagookezi,’ Kwaviya mgookezi yenu ni yumwedu nee Klistu. 11 Na mntu yoyose ambae akunda kuwa mgookezi, akundigwa awe awagosoeya ndima wenziwe. 12 Na mntu yoyose egosoaye kuwa mkuu Muungu enda amtende mdodo na yoyose etendae mdodo Muungu enda amtende mkuu. 13 “Mmbwii yenu, wahinyi wa miko na Mafalisayo mwekuwao wahokho! Uvi muuvugaa wa Useuta wa Muungu hemeso ya wantu. Nywie wenye khamwengia umo, naho khamuwabada watuhu wakundao kwengia wengie. 14 Mmbwii yenu wahinyi wa miko na Mafalisayo nywie wahokho! Mwada khande mwe nyumba za wayee wekufiwao ni wagosi, nywie mwetenda kuwa ni wedi mwavika kisingi kileacho. Kwaajii iyo mwenda mwekhigwe sugusa khai. 15 “Mmbwii yenu, wahinyi wa miko na Mafalisayo, wahokho! Mwatamba mwe mazimshindo na mwasanga khavu ili mmuhoe mntu esae kuwa Myahudi awe Myahudi mkabinda awatongea nywie, iya mkabinda kumpata mwamgosoawe mntu akundigwae kuita mwe si ya moto wesao kukomeka inga nywie wenye. (Geenna g1067) 16 “Mmbwii yenu, wagookezi matuntu! Nywie mwahinya, ‘mntu akaaha kwa Nyumba ya Muungu khio kintu, iya akaaha kwa zahabu yekuwayo mwe Nyumba ya Muungu kuaha kwakwe kwenda kumtoze.’ 17 Nywie matuntu wahezi! Kih ambacho ni cha mana muno, ni zahabu hambu Nyumba ya Muungu yekugosoayo iyo zahabu iwe ya Muungu! 18 Naho mwahinya mntu akaaha kwa ingo da kulaviya malavyo khio kintu, iya akaaha kwa funge ikuikwayo uwanga ya ingo, kuaha kwakwe uko kwamtoza. 19 Nywie matuntu kweikwei! Ni kih chekuwacho kikuu muno. Ni funge hambu ingo ambado dagosoa iyo funge iwe ya Muungu. 20 Kwaiyo mntu aahae kwa ingo da kulaviya malavyo, kuaha kwa ido ingo na vintu vyose vyekuwayo uwanga yakwe. 21 Na aahae kwa Nyumba ya Muungu, kaaha kwa iyo Nyumba ya Muungu na yuda ekaa ndani yakwe. 22 Na aahae kwa uwanga kwa uwanga kwa Muungu, aaha kwa kigoda cha kiseuta cha Muungu na kwa uyo ekaa uwanga yakwe. 23 “Mmbwii yao, wahinyi wa miko na Mafalisayo, wahokho! Mwawatoza wantu zaka ya mani ya halufu ntana, na binzali, na bwache, na uku mwabada mbui za miagiyo inga viya haki na mbazi na uzumizi. Aya nee asa mkundigwayo kuyagosoawe na mwesekujaa yada matuhu. 24 Wagookezi

matuntu! Mwalavya nisi mwe vyakudomeea, akini mwakhia ngamia! **25** "Mmbwii yenu Wahinyi wa Miko na Mafalisayo wahokho! Mwasunta kikombe na kalai kwa chongoi, iya ndani mwabada kumema vintu mwe kupatavyo kwa kuwahoka wantu na uchoyo. **26** Nywie Mafalisayo matuntu! Vokani kusunta kikombe ndani, na chongoi chendakiwe kisuntika. **27** "Mmbwii yao wahinyi wa miko na Mafalisayo nyie wahokho! Mwaigana na mambia yekusiswayo nchokaa ambayo kwa chongoi yakaulwa kuwa ni matana, akini umo ndani yamema mavuha ya vimba na kia namna ya usama. **28** Viyaviya kwa chongoi nywie mwaonekana kuwa ni wantu wedi, akini kwa ndani mmema uhokho na kia namna ya ufyaimi. **29** "Mmbwii yenu wahinyi wa miko na Mafalisayo, wahokho. Mwayazengea mambia ya waoni na mwayazengea na kuhamba mbia za wantu wedi, **30** nywie mwagombeka, inga nee tiwaaho kisingi cha wadaa wetu nee khatokutongea na mwe ukomaji wa waoni!" **31** Ivyo mwe semea wenye kuwa nywie ni uvyagwa wa wantu wekumao waoni. **32** Aya iiganizeni ndima ida wadaa wenu wekuivokayo. **33** Enywi uvyazi wa mdudu mwenye sumu! Mwendamdahe viivih kuhepa sugusa ya si ya moto wesao kukomeka misi yose kwesiho kiisikizi? (Geenna g1067) **34** Nee mana miye nawegaiya nyie waoni, wantu wenye akii na wahinyi, mwenda muwakome na kuwagong'ondea he mhamba na wamwe wao, na watuhu mwendamuwatoe ngoda mwe nyumba za kukintania Wayahudi na kuwaguusa kwa kia mzi. **35** Ivyo lawama yose inda iwapate kwaajii ya phome yose ya wantu wedi wa Muungu yekwetiwayo uwanga ya inusi, kuvokea phome ya Abeli ambae khekwa na hatia hadi ida ya Zakalia, mwana wa Balakia ambae mumkoma he Nyumba ya Muungu gatigati ya hantu hang'azi ha ingo. **36** Nawamba kwei, wantu wa kivyazi iki chendachekhigwe sugusa kwaajii ya mbui izi. **37** "Nywie wantu wa Yelusalemu! Nywie wantu wa Yelusalemu! Uwakomae waoni wa Muungu na kuwatambikia maiwe wada wose wekuagiiwao aha hako. Maa nyingahi khigeeza kuwaika hamwe wana wako kwangu, inga via nguku awatamiiavyo wanawe asi ya mawawa yakwe, akini khamwekukunda. **38** Kauwa Muungu endaaibade Nyumba yenu yenda ibomolwe na kubadwa ukiwa. **39** Nakwamba, khuna unikaue vituhu hadi kisingi wendaho ugombeke, 'Ajaiwe uyo ezae kwa zina da Zumbe.'"

24 Yesu akalawa he Nyumba ya Muungu, wahina wakwe wakantimia na kumwonyesha mazengo ya Nyumba ya Muungu. **2** Yesu akawamba, "Ni sawa, mwadaha kuyakauwa aya yose! Kwei nawamba, khahana hata iwe dimwe dendado disigae uwanga ya iwe tuhu, kia iwe

dendadibomolwe." **3** Yesu ekuwaho kekaa he muima wa Mizaituni, wahina wakwe wakantimia Yesu ili wawe ikedu, wakamuza, "Tambie, mbui izi zendazilawiye ini, na ni ntangio ihi ya kweza kwako na ntangio ya kisikiizi cha inusi ni mbwai." (aiōn g165) **4** Yesu akawatambaisa, "Kuwani meso mntu asekwatiya. **5** Kwaviya wangi wendaweze na wendawatumie zina dangu na kugombeka, 'Miye nee Klistu, nao wenda wawatiye wangi.'" **6** Mwenda mtegeeze mbui za khondo na ufukufuku wa khondo kauweni mweekuogoha, kwaviya aya yakundigwa yalawiye, iya kia kisikiizi chenye khakizati. **7** Wantu wa si mwenga wenda watoane khondo na wantu wa si ntuhu, wantu wa useuta umwe wenda watoane khondo na wantu wa useuta mtuhu. Kwendakuwe na saa na mizingizo mwe hantu mbaimbai mwe inusi. **8** Yose ayo ni inga usungu wa bosi wa kwefungua mwana. **9** "Naho mwenda muemewe na wantu na kuwasuumiza na kukomwa. Wantu wa Si zose wenda wawakime kwaajii kunizumia miye. **10** Naho wangi wenda wabade kuzumia kwao na wendawahitukane na khawana wakundisane katu. **11** Wendawalawiye waoni wangi wa uhokho, nao wenda wawatiye wantu wangi. **12** Naho ukundiso wa wantu wangi wenda uhungue, kwaajii mavigaviga yenda yawe yamema. **13** Na yoyose endaeagooke mwe untintimavu adi kisikiizi, uyo nee endaeaholwe. **14** Mbui Yedi ya useuta wa Muungu inda ibikiwe mwe inusi yose, ili wantu wose waimanye nee kisikiizi chendahocheze. **15** "Ivyo mwendaho muone mbui ya kutisa na dietado ubanasi, digooka he Nyumba ya Muungu inga ekugombekavyo muoni Danieli, ivyo kia asomaye na amanye mbui iyo." **16** Aho, wada wekaa Uyahudi waguukie he miima. **17** Yoyose mwe uwanga ya taa da nyumba yakwe asekuweya kudoa chochose kulawa mwe nyumba yakwe. **18** Ekuwae tanga asekuuya kaya kudoa gwanda dakwe. **19** Mmbwii yao wakina mmaa wekwenuao maifu na waokhesao misi iyo! **20** Ombezani Muungu kuguuka kwenu kusekuwa kisingi cha khusi hambu Msi wa Kuhumuiza. **21** Kwaviya kisingi icho chendakiwe na suuba kuhu ambayo khaizati kulawia kuvokea aho bosi wa inusi adi ivyeo, wala khakina kilawiye vituhu. **22** Iya Muungu kahunguza misi izo, inga khekugosoa ivyo khahana mntu ambae nee kaoholwa, na Muungu kazihunguza kwaajii ya wantu wakwe ekuwasaguwao. **23** "Kisingi icho mntu yoyose akawamba, 'Klistu, yuhanu!' Hambu 'Yuhada,' msekuzumiiya." **24** Kwaviya wendawalawiye wantu wetangao Klistu akini khio, naho wendawalawiye waoni wa uhokho. Wendawagosoe ntangio na vihii vikuu vya kudaha kuwaza, vikadahika hata wekusagulwao ni Muungu. **25** Kawani! Khibindiiza kuwahaza kae kabla mbui izo khazizati kulawia. **26** "Kwaiyo,

mntu yoyose akawamba, 'Klistu yuuko he nyika, msekuita.' Hambu wakagombeka, 'Klistu yuuko gati, msekuzumiya.' 27 Kwaviya inga umbauwa umuikavyo kulawa awiyo da zua adi engiyo da zua, nee ivyo vyendavyoviwe kweza kwakwe Mwana wa Mntu. 28 "Hada weiho mzoga, neaho wakintanaho tai. 29 "Maa misi iyo za suuba zendaho zembeke, Muungu endaadhitue zuwa kuwa kiza na mweenge nayo khaina ilavye mng'ao na ntoondo zendazigwe kulawa uwanga, viyaviya endaazisingise nguvu za uwanga. 30 Aho wenda uoneke ntangio ya Mwana wa Mntu uwanga kwa Muungu na wantu wose mwe inusi wenda watoe bwaimbo, wenda wamwone Mwana wa Mntu akeza uwanga ya maangwi ya uwanga kwa Muungu kwa udaho na ukuu mwingi. 31 Nae endaawaagiye wandima wa uwanga kwa Muungu uku watoa gunda divumado muno, nao wendawawaike hamwe wekusagulwao ni Muungu kulawa phande zose nne za inusi, kulawa kisikizi iki cha inusi adi kisikizi kituhu cha inusu. 32 "Mwehinye kulawa kwa mti wa mkuyu, muonaho matambi yakwe yamema mani, mwamanya kisingi cha fua kibua. 33 Ivyoivyo, mwonaho mbui izo zikagosoka mmanye kuwa Seuta yuhehi muno. 34 Nawamba kwei, wantu wa kivyazi iki khauna wembeke kabla ya mbui izo khazizati kulawiiya. 35 Uwanga kwa Muungu na inusi zendazembeke, iya mbui zangu khazina zembeke katu. 36 "Kwa mbui ya msi uda na saa ida khahana amanyae, ata wandima wa uwanga kwa Muungu wala Mwana, iya Tate ikedu nee amanyae msi uwo. 37 Inga yekuwavyo kisingi cha Nuhu, nee vyendavyoviwe kweza kwakwe Mwana wa Mntu. 38 Kwaviya kisingi icho, kabla ya mazi mangi kuigubika inusi, wantu neewawa wakada na kudomea, wakategua na kutegulwa, hadi Nuhu ekwengiaho mwe ida Safina. 39 Khawokumanya kuna mbwai hadi yada mazi mangi yekulawiiyaho, kuwakumba wose. Nee vendavyoviwe kisingi Mwana wa Mntu endahoeze. 40 Kisingi icho wantu waidi wendawawe tanga yumwe endaadoigwe na mtuhu endaabadwe. 41 Wavyee waidi wendawawe wakabunduga khande, yumwe endaadoigwe na mtuhu endaabadwe. 42 Ekauweni, kwaviya khamanya msi endahoeze Zembe yenu. 43 Iya mmanye mbui inu, inga mwenye nyumba ati nee kamanya msi mbavi endahoabue, nee akacheeza, wala khekuwa aibadie nyumba yakwe itulwe. 44 Viyaviya nanywi mwekae meso, kwaviya Mwana wa Mntu endaeze saa mwesayokuikauwiya. 45 "Nindai mndima mkwei na mwenye akii, ambae zembe yakwe endamwiike agooke weziwe na awekhe khande kwa kisingi chakwe? 46 Yendaawe vyedi mndima uyo ambae zembe yakwe endahoeze endambwiye agosoa ivyo. 47 Nawamba kwei, endamwiike mndima uyo agooke vintu

vyakwe vyose. 48 Inga mndima ni mfyaimi akegombeka mwe moyo, 'Zembe yangu endaacheewe kuuya,' 49 nae akavoka kuwatoa wandima weziwe, na kuvoka kuda na kudomea hamwe na wakozi, 50 zembe yakwe mndima uyo endaeze msi ambao mndima khamkauwiiya na saa ida ambayo khaimanya. 51 Endaamsuumize vifyaimi na kumwiika hamwe na wahokho. Uko kwendakuwe na ndio na kuuma meno kwa usungu.

25 "Useuta wa Muungu wendaugane na wandee kumi dimwe wekudoao taa zao, na wakaita kumhokea zembe wa ndoza." 2 Washano nee niwahezi na washano wawa wenye akii. 3 Wada wahezi wadoa taa zao, iya khawekudoa mavuta ya kuomeea, 4 Iya wada wenye akii wadoa taa zao na mavuta ya kuomeea mwe nchupa zao. 5 Kwaviya mteguzi kacheewa kweza, wada wandee wose wakasikha na wakagona. 6 "Kio kikuu kukawa na vuzo, 'Homgwiyo, homgwiyo! Mteguzi eza, hitani mkamhokee.' 7 Aho wada wandee wose wakenuka wakaziika vitana taa zao. 8 Wada wahezi wakawamba wada wenye akii, 'Tipangieni mavuta kwaviya taa zetu zafa.' 9 Akini wada wenye akii wakawamba, 'Khanayatatitoshie nywie na swiswi! Ni ebae mwiite kwa watagao mavuta mkague wenye!' 10 Aho wada wandee wahezi, wakaita kugua mavuta. Uku nyuma mteguzi akabua, na wada wekuwao watayali wakengia hamwe nae mwe nyumba ya wiya, na uvi ukavugalwa. 11 "Yekwembokaho ayo wada wandee watuhu wakeza, na kwetanga. 'Zembe, Zembe, tivuguiye uvi!' 12 Akini yee akawatambaisa, 'Nawamba kwei,' khiwamanya nywie." 13 Ahoaho Yesu akawamba, "Ekauweni, kwaviya khamanya msi wala saa. 14 "Naho Useuta wa Muungu inga mntu yumwe mwe kukunda kutamba, akawetanga wandima wakwe, akawekha vintu vyakwe. 15 Akamwekha kadii ya udaho wa kia yumwe, yumwe vifuko vya hea vishano na mtuhu vifuko vya hea viidi na mtuhu kifuko cha hea kimwe, na ahoaho akatamba. 16 Yuda mwe kwekhigwa vifuko vya hea vishano akazigosoea biashaa zikavyaa vifuko vya hea vishano ntuhu. 17 Viavia yuda mwe kwekhigwa vifuko vya hea viidi nazo zikavyaa vifuko vya hea vituhu. 18 Iya yuda mwe kwekhigwa kifuko cha hea kimwe, yee akaita akafuka tubwi na kuifukia kia kifuko cha hea ya zembe yakwe. 19 "Yekwembokaho kisingi kilehacho, yuda zembe wa wada wandima akauya, na kugosoa ntaazia nao. 20 Yuda mndima mwe kwekhigwa vifuko vishano vya hea akeza uku kaeta vifuko vishano vya hea zekuongezekazo. Akagombeka. 'Zembe kunekha vifuko vishano vya hea, kauwa kiongeza mituhu mishano.' 21 Zembe wakwe akamwamba, 'Vyedi

mndima yedi, nee kuwa yedi kwa vintu vicheche, ninda nikuike uwe mgookezi kwa vintu vingi. Soo ushiiki nyemi ya zumbe yako!' 22 Yuda mwekwekhigwa vifuko viidi vya hea mbii nae akeza. Akagombeka, 'Zumbe kunekha vifuko viidi vya hea mbii. Kauwa kieta vifuko vituhu viidi.' 23 Zumbe yakwe akamtambaisa, 'Kutenda vyedi muno mndima yedi na kuwa mzumiwa mwe mbui ndodo, nendanikuike kuwa yedi kwa vintu vingi. Soo ushiiki mwe nyemi ya zumbe yako!' 24 Naho yuda mndima mwekwekhigwa kifuko kimwe cha heya akeza na kugombeka, 'Zumbe, namanya kuwa wee ni mntu utogae, wabonda kwesiho kuhanda na kukisanya kwesiho kwetiya mbeyu. 25 Khikuogoha kwaza kifiko chako cha hea, na khiifisa kifuko kimwe cha heya yako mwe sanga. Doa kifuko kimwe cha heya yako.' 26 Zumbe yakwe akamwamba, 'Wee ni mndima mfyaimi na mbwa! Kumanya kuwa, miye nabonda hantu ambaho nchekuhanda, nadoa hantu ambaho nchekwetiya mbeyu. 27 Kukundingwa kuika kifuko cha hea kwa walavyao nyongeza, na miye mwe kifuko changu nee kipata nyongeza. 28 Haya mhokeni icho kifuko cha hea mkamwekhe yuda mwenye vifuko kumi. 29 Kwaviya mwena endaekhwige na ngeeko. Na yuda mwesena hata kia enacho endaahokwe. 30 Mtambikeni uyu mndima mfyaimi chongoi mwe kiza! Uko kundakuwe na ndio na kuuma meno kwa usungu.' 31 "Mwana wa Mntu endahoeze na ukuu wakwe na wandima wa Muungu wakawa hamwe nae, aho endaekae mwe kigoda chakwe cha Useuta na ukuu. 32 Wantu wa si zose wendawakintane hemeso yakwe, nae enda awaike wantu inga via mwiisi awaikavyo ngoto hantu hakwe na mbuzi hantu hakwe. 33 Aho endaawaike ngoto phande ya kuume na mbuzi phande ya kumoso. 34 Naho Seuta endaawambe wada wa phande ya kuume, 'Soon nywie mwekujaiwao na Tate yangu, hokeani Useuta mwekuiwao kae kuvokea kugosolwa kwa inusi. 35 Kwaviya nekhiwa na saa, mkanekha khande, na nekhiwa na khiu mkanidomeza na nekhiwa mgeni mkanihokea, 36 nekhiwa mwazi mkanivika magwanda na nekhiwa mtamu mkeza kunikauwa na nekhiwa mwe kifugoni mkeza kunivuiya.' 37 Aho awo wantu wedi wenda wamtambaise na kumwamba, 'Zumbe ni ini, tekukuonaho una saa tikakwekha khande hambu ukawa na khiu tikakudomeza mazi? 38 Ni ini tekukuonaho umgeni na swie tikakuhokea na tekukuonaho umwazi tikakuvika magwanda? 39 Na ni ini tikuona ukawa mtamu tikeza kukukauwa hambu wekuwaho mwe kifungo tikeza kukuvuiya.' 40 Nae Seuta endaawatambaise, 'Kwei nawamba, chochose mwekuwagosweado wamwe wa awa wandugu zangu mnigosweeya miye!' 41 "Ahoaho endaawambe wada wekuwao phande yakwe ya kumoso,

haukeni aha hangu, nywie mwe kubadiwao lazi, hitani mwe moto wa misi zose kwesaho kukomeka na wekuikwao kae kwaajii ya ibiisi na wandima wakwe! (aiōnios g166) 42 Kwaviya nekhiwa na saa khamwekunekha khande na nekhiwa na khiu khamwekunidomeza mazi; 43 Nekhiwa mgeni nywie khamwekunihokea, na nekhiwa mwazi khamwekunivika magwanda na nekhiwa mtamu khamwekweza kunikauwa, na nekhiwa mwe khiwa mwe kifungo khamwekweza kunivuiya." 44 Wowo wenda wamtambaise, "Zumbe, ni ini, tekukuonaho una saa na khiu, hambu ukawa mgeni na umwazi, na ukawa mtamu, na ukawa mwe kifungo, khatikweza kukuambiza?" 45 Nae endaawatambaise, "Nawamba kwei kiya mwekuemeavyo kumwambiiza yumwe wa wadodo awa mwemea kuniambiiza miye." 46 "Awa wendawaite kwe usuumizi wa misi zose zesazo kuwa na kisiikizi, na wada wantu wedi wenda waite kwe ugima wa misi zose zesazo kuwa na kisiikizi." (aiōnios g166)

26 Yesu ekubindaho kuwahinya ayo yose, akawamba wahina wakwe, 2 "Mwamanya kuwa bada ya misi miidi indaiwe ni sikukhuu ya Pasaka, na Mwana wa Mntu endaalavigwe ili agong'ondewe mwe mhamba." 3 Naho wagookezi wa waviki wakakintana hamwe kwe ukumbi wa Mviki Mkuu zina dake Kayafa. 4 Wakagosa nteganyi wendavyo wamgwiye kwa sii kwa unyanyi na kumkoma. 5 Iya wakamba, "Isekuwa kisingi cha sikukhuu ama khivyo kunda kulawiiye khumbizi kwa wantu." 6 Yesu ekuwaho Besania kaya kwa Simoni, mwekuwa na utamu wa nyoka. 7 Mvyee yumwe mwekuwa na nchupa ya iwe yetangwayo alibasta yenye mavuta yanukhiayo vitana ya yombe kuu, akamtimia hada Yesu ekwekaaho ada khande, na akamwetiya ayo mavuta mwe mtwi. 8 Wahina wakwe wekuonaho ayo wakakimwa na kugombeka, "Kwambwai taza hea ivi! 9 Mavuta aya nee yatagwa kwa yombe kuu, na hea izo wekhigwe wakiwa." 10 Yesu akamanya mamakhanyi zao, akawamba, "Kwambwai mwampisha uyu mvyee? Yee kanigosoeya mbui yedi. 11 Wakiwa mnao misi yose, iya miye khamna muwe nami misi yose. 12 Mvyee uyu kanitiya mavuta ili niwe tayali kwa maziko yangu. 13 Nawambeni kwei, hohose mweinusi ambaho Mbui Yedi yendaibikiwe, kintu iki ekugosoacho mvyee uyu chendakitamwiwe kwa khumbuso yakwe." 14 Naho Yuda Isikaliote, yumwe wa wada wahina kumi dimwe na waidi, akaita kwa wagookezi wa waviki, 15 akawamba, "Mwendamnekhe mbwahi nendahonimhituke Yesu kwenu?" Wakamtaazia ntii makumi matatu ya madini ya feza. 16 Kuvokea kisingi icho Yuda Isikaliote akaondeza phasi ya kumhituka Yesu. 17 Msi wa bosi ya sikukhuu

ya mabumunda yesayo kugewa hamila, wahina wakaita kwa Yesu na kumuiza, "Wakunda tikuikie kuhi khande ya Pasaka?" 18 Yee akawatambaisa, "Hitani mwe mzi kwa mntu yumwe, na mmwambe, 'Mhinyi amba kisingi changu kibua, mwe nyumba yako nakunda niide khande ya Pasaka hamwe na wahina wangu.'" 19 Wahina wakatenda inga Yesu ekuwaagiavyo, wakaandaa khande ya Pasaka. 20 Yekubuahoa guoni, akekaa asi hamwe na wahina wakwe kumi dimwe na waidi. 21 Wekuwaho wakada, Yesu akawamba, "Nawambeni kwei, yumwe yenu endanihituke." 22 Wahina wakaungumia muno, wakavoka kuuza yumweyumwe, "Ni miye Zumbé?" 23 Yesu akawatambaisa, "Agintae bumunda hamwe na miye mwe wiga nee endae anihituke. 24 Mwana wa Mntu aita zakwe inga Maandiko yagombekavyo, iya mmbwii yakwe mntu yuda amhitukae Mwana wa Mntu! Neeiwa ebae kwa mntu uyo inga khekuvyagwa." 25 Yuda Isikaliote ambae nee mwe kumhituka akamuiza, "Mhinyi! Ivi ni miye?" Yesu akamtambaisa, "Eehe weye mwenye kugombeka". 26 Wekuwaho wakada, Yesu akadoa bumunda akamtogoa Muungu, akadibendua akawekha wahina wakwe akamba, "Doani mde unu nee mwii wangu." 27 Akakidoda kikombe cha divai akamtogoa Muungu akawekha akamba, domeani wose, 28 "Inu nee phome yangu iyonyeshayo Agane dangu ni dakwei, phome yetiwayo kwaajii ya wantu wangi kwa kuwausia mavigaviga. 29 Nawamba, khina nidomee vituhu divai ya mzabibu adi msi uda nendaho nidomee mpyha hamwe na nywinywi mwe Useuta wa Tate yangu." 30 Wekubindaho kutoa wiya, wakahauka wakaita mwe muima wa mizeituni. 31 Aho Yesu akagombeka, "Kio cha ivyeo nywie wose mwendamniguuke kwaviya Maandiko yagombeka, 'Muungu endaa mtote mwisi na tintimo da ngoto dendadiangadike.' 32 Iya bada ya miye kuyuyuka nendaniwaongwee uko Galilaya." 33 Petulo akamwamba Yesu, "Wose wakakubada miye katu khinanikubade." 34 Yesu akamwamba Petulo, "Kwei nakwamba, kio iki zogoo khadizati kukema wendauniemee maa ntatu." 35 Petulo akamwamba, "Hata nikakudigwa niuye na nyuma hamwe nawe khinanikubade katu." Wada wahina watuhu wose wakatamwiiya viyaviya. 36 Yesu akaita hamwe na wahina wakwe adi hantu ekwetangwaho Getisemani akawamba, "Ekaeni hanu, miye naita kuvika." 37 Akamdoa Petulo hamwe na wada wana waidi wa Zebedayo, akavoka kuwa na usungu na uku aona kiyangayanga, 38 aho akawamba, "Nina usungu muno mwe moyo ata nihehi na kuuya na nyuma, ekaeni hanu na msekugona na muwe hamwe na miye." 39 Aho akaita mbee kidogo akagonea ifu, akavika akamba, "Tate yangu, usekutenda nengie mwe masuumizo yezayo isasa, khio inga

nikundavyo miye iya inga ukundavyo wee." 40 Akawatimia wada wahina akawabwiiya wagona, neamuiza Petulo, "Yaani khamwekudaha kucheeza hamwe na miye hata saa dimwe? 41 Msekugona iya vikani msekweza kwengia mwe mageezo. Kwaviya muye wakunda akini mwii unyong'onyea." 42 Akaita vituhu maa ya kaidi akavika, "Eee Tate yangu, ikawa khaidahika kuyembokea maasumizo haya makuu, naho ugosoe ukundavyo wee." 43 Akawatimia vituhu akawabwiiya wagona, kwaviya nee watozwa muno na usisiza. 44 Aho akawabada, akaita vituhu kuvika maa ya ntatu kwa mbui idaida. 45 Naho akawaitiya wada wahina, akawamba, "Mke mgonie na kuhumwiza? Kauwani, saa ibua na Mwana wa Mntu endaalavigwe kwa wantu wenye mavigaviga. 46 Erukani, titeni! Kauwani, eza yuda endaeanihituke." 47 Ekuwaho ake kugombeka, Yuda Isikaliote yumwe wa wada wahina kumi dimwe na waidi akabua, uku katongea na zumwezumwe kuu da wantu wenye malungu na mapaange wekuwao waagiwa na wagookezi wa waviki na wagookezi wa Wayahudi. 48 Yuda Isikaliote mwe kukunda kumhituka Yesu akawekha awo wantu ntangio, "Mntu uyo nendae nimuuguse kwa kumuumbatia uyo mgwiyeni." 49 Yuda Isikaliote akamtimia Yesu hehi akamuugusa, "Mhinyi nakuugusa!" Nee amuumbatia. 50 Yesu akamwamba, "Mbuyangu gosoa wekwezeado." Aho wada wantu wakamtimia nee wamfuntia na kumgwiiya Yesu. 51 Yumwe wa wada wekuwao hamwe na Yesu akasomoa tuni dakwe khuu, akamsenga gutwi mtumwa wa mviki mkuu. 52 Yesu akamwamba, "Vuza tuni dako mwe kisafuo, kwaviya yoyose atumiae tuni kwa kukoma wantu, endaaue na nyuma kwa tuni. 53 Ivi tambe khamanya kuwa nadaha kumwombeza uwambiizi Tate yangu akanietea mazumwezumwe kumi dimwe na mbii ya wandima wakwe wa Muungu? 54 Iya nikagosoa ivyo Maandiko ya Muungu yendayaigania viivihii?" 55 Kisingi ichoicho Yesu akadigombeka ido zumwezumwe da wantu, "Ivi mweza kunigwiiya kwa mapaange na malungu inga miye nibagaa? Kia msi nekhiwa he Nyumba ya Muungu nikahinya, na khamwekunigwiiya! 56 Iya aya yose yagosoka ili Maandiko wekuandikayo waoni yaigania." Nee wahina wose wakambada na kumguuka. 57 Wada wantu wekumgwiiyao Yesu wakamwegaa he nyumba ya mviki mkuu ekwetangwae Kayafa, wekukintanikaho wahinyi wa miko na wagookezi wa Wayahudi. 58 Petulo akamtongea kwa hae adi kwe ukumbi da mviki mkuu, akengia mwe buha da ida nyumba hamwe na wagoji adahe kukauwa mbui zendavyozilawiye. 59 Wagookezi wa mkonga na waviki wakuu wakaondeza uvuhuzi wa uhokho wadahe kumkoea masa Yesu ili wamkome. 60 Iya khawekupata

uvuhuzi wowose, etiho nee weza wavuhuzi wangi wa uhokho. Kisikiizi wakeza wavuhuzi waidi, **61** wakamba, "Mntu uyu kagombeka, 'Nadaha kuituwa Nyumba ya Muungu na kuizenga kwa misu mitatu.'" **62** Mviki mkuu akagooka na kumuza Yesu, "Wee khuna chakutambaisa kwa aya wagombekayo wantu awa?" **63** Iya Yesu yee khekundua dodose. Mviki mkuu akamwamba, "Nakuahiza kwa Muungu wa ugima, tambe ati wee nee Klistu, Mwana wa Muungu!" **64** Yesu akamtambaisa, "Inga wekugombekavyo miye nee uyo. Iya nawamba, kuvokea isasa mwendammuone Mwana wa Mntu kekaa phande ya kuume ya yuda mwenye udaho, akeza uwanga ya mazunde ya uwanga kwa Muungu." **65** Aho mviki mkuu akatatua gwanda dakwe akamba, "Kambee Muungu takunda wavuhuzi wani vituhu? Nywie wenye mtegeeza ekumbeavyo Muungu. **66** Nywie mwaona viivhi?" Wowo wakamtambaisa, "Akundigwa auye na nyuma!" **67** Ahoaho wakamswiya ovu mwe cheni na watuhu wakamtoa ngumi na watuhu vibao, **68** wakamwamba, ati wee nee klistu "Otea! Ni ndai mwekukutoa!" **69** Kisingi Petulo nekekaa chongoi he buha. Mndima yumwe wa kivyee wa Mviki Mkuu akamwezea na kumwamba, "Wee namba ne uhamwe na Yesu wa Galilaya." **70** Petulo akaemea hemeso ya wose akamba, "Khimanya wagombeka mbwai." **71** Ekuwaho akalawa he uvi, mndima mtuhu wa kivyee ekumwonaho, akawamba wada wekuwao hada, "Mntu uyu nekawa na Yesu wa Nazaleti." **72** Petulo akaemea vituhu kwa kuaha, "Khimanya mntu uyo." **73** Kisingi kidogo, wantu wekuwao hada wakambasa Petulo na kumwamba, "Ata wee, ni yumwe yao, kwaviya ata viya ugombekavyo kwakumanyisa." **74** Aho Petulo akavoka kweswiya ute na kweahiza na kugombeka, "Khimanya mntu uyo!" Ahoaho zogoo akakema, **75** aho Petulo akaikumbuka ida mbui ekwembigwayo ni Yesu, "Zogoo khadizati kukema wenda uniemea maa ntatu." Aho akalawa chongoi na akavoka kuiya kwa usungu.

27 Kwekuchaho wagookezi wa Waviki wose na waongoezi wa Wayahudi wakakintana vituhu ili wagosoe nteganyu wadahe kumkoma Yesu. **2** Wakamzengeteza phingu na kumwegaa kwa Pilato, mwekuwa mgookezi wa Kilumi. **3** Yuda Isikaliote mwekumhituka Yesu, ekuonaho Yesu kabindakae kuamuiwa, akamema usungu na akawavuzia wagookezi wa waviki wakuu zia ntii za makumi matatu ya madini ya feza. **4** Akawamba, "Khikoa masa kwa kumlavya mntu mweyekuwa na masa yoyose akomwe." Iya wowo wakamtambaisa, "Yatiambiiza mbwai swie? Ivyo umanye wee mwenye!" **5** Nee atambika zia ntii za madini ya feza he nyumba ya Muungu na kulawa chongoi na kuita

kwetungika. **6** Waviki wakuu wakadoa zia ntii za madini za feza wakamba, "Khaifaa kuika hamwe madini aya ya feza na madini yalavigwayo mwe Nyumba ya Muungu kwaviya ntii izi za madini ya feza zilavigwa kwaajii ya kumkoma mntu." **7** Wekubindaho kumamakhanya wakevana kugua mnda wa kiongo hawe hantu hauzisi ha wanyika. **8** Nee mana adi ivyeo mnda uwo wetangwa mnda wa phome. **9** Nee yaigania ida mbui yekwegombekwayo na Muoni Yelemia, kuwa, "Wakadoa ziya ntii za makumi matatu ya madini ya feza, yombe yekupangwayo na wantu wa Isilaeli, **10** wakaziguiya mnda wa kiongo, inga Zumbe ekuniagiavyo." **11** Yesu ekuwaho kagooka hemeso ya Pilato ekuwaye mgookezi wa Kilumi, akamuza, "Wee nee Seuta wa Wayahudi?" Yesu akagombeka, "Inga wekugombekavyo miye nee uyo." **12** Iya wagookezi wa waviki na wadaa wekumwahiavyo masa khekutambaisa mbui. **13** Ivyo Pilato akamuza, "Ivi khutegeeza mbui ambazo wazigombeka?" **14** Iya Yesu khekundua ata mbui mwenga, ata uyo mgookezi wa Kilumi akahondomaa muno. **15** Neiwa kawaida kisingi cha sikukhuu ya Pasaka mgookezi wa Kilumi awavugwiya zumwezumwe da wantu mfungwa yumwe wamkundae. **16** Kisingi icho nekuwa na mfungwa yumwe ekuwaye mntu mfyaimi, zina dakwe Balaba. **17** Ivyo wantu wekukintanikaho hamwe, Pilato akawauza, "Mwakunda ni wavugwiye yuhi gatigati ya awa waidi, Balaba hambu Yesu etangwae Klistu?" **18** Kagombeka ivyo, kwaviya kamanya wamueta kwakwe kwaajii ya kinyuu. **19** Pilato ekuwaho kekaa mwe kigoda chakwe cha kuamuiya, mkaziwe akamwetea bauwa inu. "Usekumgosoa kintu chochose mntu uyu yedi, na kwaviya ivyeo khisuumizwa muno mwe sozi kwaajii yakwe." **20** Iya waviki wakuu na wadaa wakawanchochea dia zumwezumwe da wantu wamwombeze Balaba aekewe na Yesu akomwe. **21** Pilato akawauza, "Gatigati ya awa waidi ni yuhi mumkundae niwavugwiye?" Wakatambaisa, "Balaba!" **22** Pilato akawauza, "Isasa mwaonda nimtende viivhi na Yesu mwetangwae Klistu?" Wose wakagombeka, "Agong'ondewe he mhamba!" **23** Pilato akawauza, "Kwa mbwai? Ni ufyaimi wani ekugosoa?" Wowo wakaendee kutoa mgutio, "Agong'ondewe he mhamba!" **24** Pilato ekuonaho kuwa khadaha kugosoa dodose na kwaviya khumbizi zavoka kulawiya, akadoa mazi na akasunta mikono hemeso ya dia zumwezumwe da wantu, akamba, "Mie khimo mwe mbui ya kumkoma mntu uyu, mbwii yenu wenye." **25** Wantu wose wakamba, "Kwa mbui inu tiigosoayo, Muungu na atekhe sugusa swie hamwe na wana wetu!" **26** Aho Pilato akawavuguiya Balaba kulawa he kifungo, na akagombeka Yesu atoigwe na ngoda yekwegosolwayo na

babu da kiboko, na akamlavya agong'ondewe he mhamba. 27 Wakamwegaa gati mwe nyumba ya ugookezi, na maasikai wose wakamzunguka. 28 Wakamhambua gwanda dakwe, wakamhasika joho dekhundu. 29 Wakagoso kintu inga khofia seuta yekugosolwayo na miwa wakamhasika mwe mtwi, wakamwiikia ngoda mwe mkono wakwe kuume. Wakakinta mavindi hemeso yakwe, wakambea kwa kumwamba, "Takuugusa Seuta wa Wayahudi!" 30 Wakamswiia ovu, wakadoa ida ngoda wekumwekhayo mwe mkono wakwe na kumtoa nayo mwe mtwi 31 Wekubindaho kumgosoeya ayo, wakamhambua dia gwanda na kumhasika nguo zakwe, na wakamwegaa kumgong'ondea mwe mhamba. 32 Wekuwahe wakaita kumng'ondea he mhamba wakamuona mntu yumwe zina dakwe Simoni, mwenyezi wa Kilene. Aho asikai wa Wakilumi wakamshuutiza kuudoa mhamba wakwe Yesu. 33 Wekubuahe hantu hetangwaho Goligota mana yakwe, hantu hafufu da mtwi, 34 wakamwekha divai yekuhanganywayo na nyongo. Iya Yesu ekuionjaho akaemea kuidomea. 35 Wakamgong'ondea he mhamba, naho nguo zakwe wakapangana kwa kuzitoea kula 36 Wakekaa, wakawa wamuinda. 37 Uwanga ya mtwi wakwe kwe mhamba nee kuikwa kibao chekuandikwacho, "Uyu ni Yesu, Zumbe wa Wayahudi." 38 Viyaviya mabagaa waidi nee wagong'ondewa kia yumwe na mhamba wakwe, yumwe phande ya kuume na mtuhu phande ya kumoso. 39 Wantu wekuwao wakemboka hehi na aho wakamdumua na kusingisa mitwi yao kwa kumseka na kugombeka, 40 "Wee kwevuna, wadaha kuitua Nyumba ya Muungu na kuizenga kwa misu mitatu! Inga wee ni Mwana wa Muungu, eohoe mwenye na usee mwenye kulawa aho he mhamba!" 41 Viyaviya, wagookezi wa waviki na wahinyi wa miko na waongoezi wa Wayahudi wakamhega na kugombeka. 42 "Kawaohoa watuhu, akini kweohoa mwenye khadaha! Ati yee ni Seuta wa wantu wa Isilaeli! Na asee mwe mhamba, na swie tenda timzumiiye! 43 Kamkauwiya Muungu, na isasa Muungu amwoohoe inga amkunda, kwaviya kagombeka, 'Mie ni Mwana wa Muungu.'" 44 Ata wada wahokaji wekugong'ondewao hamwe nae wakamdumua viyaviya. 45 Kuvokea saa mtandatu, musu adi saa kenda, si yose nenikiza du. 46 Yekubuahe saa kenda Yesu akaiya kwa mgutio mkuu, "Eloi, Eloi, Lama sabakitani?" Yaani, "Muungu yangu, Muungu yangu, mbona kunibada?" 47 Iya wantu wada wekugookao hada wekutegeezaho ivyo wakagombeka, "Amwetanga Elia." 48 Yumwe awo akaguuka na akadoa dodoki akadiginta mwe divai yekusasayo, akaiika uwanga ya lasi, na akamwekha adomee. 49 Watuhu wakagombeka, "Eka tikauwe ati Elia endaeze kumwoohoa." 50 Naho Yesu akaiya vituhu kwa mgutio mkuu na akauya

na nyuma. 51 Ahoaho pazia da Nyumba ya Muungu dikatatuka ntii mbii, kulawa uwanga hadi asi, na inusi ikazingiza na maiwe makuu yakabondekabondeka, 52 mambiya yakavuguka na wantu wa Muungu wakayuyuswa. 53 Bada ya kuyuyuka kwakwe Yesu, wakalawa mwe mambiya na wakengia mzi wa Muungu na wantu wangi wakawaona. 54 Yuda mkuu wa maasikai hamwe na weziwe wekuwao wakamuinda Yesu wekuonaho zingizo da inusi na zia mbui zekulawiiazoo wakaogoha muno na wakagombeka kwei, "Mntu uyu neekawa Mwana wa Muungu." 55 Hantu aho newaaho wavyee wangi wakamkauwa kwa hae. Awo nee wada wekumtongeo Yesu kulawa Galilaya wakamwambiiza. 56 Gatigati yao nee ni Maliamu mntu wa Magidala na Maliamu mami yao da Yakobo na Yusufu, hamwe na mami yao wana wa Zebedayo. 57 Yekubuahe guoni, akeza mntu yumwe mwenye vintu vingi zina dakwe Yusufu mwenyezi wa mzi wa Alimataya. Yee naye nekawa mhina wa Yesu, 58 akambasa Pilato akauombeza mwii wa Yesu. Aho Pilato akamba ekhigwe. 59 Yusufu akaudoa uda mwii akauzengeteza sanda yekung'aayo muno, 60 akauika mwe mbia dihya ekudisongoado mwe iwe kuu, akadoa iwe kuu na kudiika he uvi, na akahauka zakwe. 61 Maliamu mntu wa Magidala na Maliamu yuda mtuhu, newekaa kukauwa mbia da Yesu. 62 Kioi yakwe, yaani Msi wa Kuhumwiiza, Waviki wakuu na Mafalisayo wakambasa Pilato, 63 wakamwamba, "Mkuu tikumbuka kuwa, 'Yuda mtiizi katigombeka, kisingi khazati kuuya na nyuma, bada misu mitatu nendaniyuyuke.' 64 Kwaio agiia ido mbiya diindwe adi misu mitatu ili wahina wakwe wasekweza kumbawa, na kuwamba wantu kayuyuka. Uhokho hunu wa kisikiizi wendauwe wa ufyai muno kusima uda wa bosi." 65 Pilato akawamba. "Haya, mnao waindaji na waite mkadiinde mmanyavyo." 66 Ivyo wakaita na wagoji ili kudiinda dia mbia vitana, na wakaika alama mwe dia mbia na aho waika asikali wainde.

28 Wekwembokaho Msi wa Kuhumwiiza na yekubuwaho keo muno msi wa Jumapili. Maliamu mntu wa Magidala na yuda Maliamu mtuhu wakaita kudikauwa dia mbia. 2 Vuu puu, kukalawiiya zingizo kuu da inusi mndima wa Zumbe akaseeya kulawa uwanga kwa Muungu akaditongoosa dia iwe na akadekaiya. 3 Akoonekana inga umweko na nguo zakwe nezing'aa chwee. 4 Wagoji wa dia mbiya wakakama kwa ukeng'enta mkuu wakawa inga wekuuyao na nyuma. 5 Iya yuda mndima wa uwanga kwa Muungu akawamba wada wavyee, "Nyie mwesekuogoha! Namanya mwa mwondeza Yesu mwekugong'ondewa he mhamba. 6 Hanu khayuhu kwaviya kayuyuka inga ekugombekavyo. Soonu mhakauwe

hantu hekuwaho mwii wakwe ugonezwa. 7 Naho hitani kinyionyio mkawambe wahina wakwe kuwa kayuyuka na isasa awaongoeya kuita Galilaya, uko mwendamumwone. Aya miye khangombeka kae." 8 Awo wavyee wakahauka hada he mbiya uku wamema ukeng'enta na nyemi muno, wakaita uku waguuka wakawambe wahina wakwe mbui iyo. 9 Vuu puu, Yesu akakintana nawo akagombeka, "Mwaona vihi." Awo wavyee wakamtima na kukinta mavindi hemeso yakwe wakatoza miundi yakwe wakavika. 10 Nee Yesu awamba, "Mwesekuogoha! Hitani mkawambe wandugu zangu waite Galilaya na uko wenda wanione." 11 Kisingi wada wavyee wekuwaho wakaita zao siai, wamwe na wamwe wa asikai wekuwao wainda mbiya wakaita mwe mzi na kuwatamwiiziya wagookezi wa waviki kia kintu chekulawiiicho. 12 Awo wagookezi wa waviki kukintana hamwe na waongoezi wa Wayahudi na kugosoa nteganyi yao, na wakawekha wada asikai hea nyingi muno, 13 wakawamba, "Nywie mwenda mgombeke ivi, 'Wahina wakwe nee weza na kio, wakaudoa mwii wakwe kisingi swie nee tigona.' 14 Inga mbui izi zikambwiya mgookezi Pilato swie tendatigombeke nae na nywie khamnampate tatizo dodose." 15 Wada wagoji wakazido zia hea inga wekuhinywavyo. Mbui iyo ikaambazika gatigati ya Wayahudi hadi ivyeo. 16 Wada wahina kumi dimwe na mwenga wakaita Galilaya kwe uda muima inga ekuwaagiiavyo Yesu. 17 Akini watuhu newawa khawazumiya kuwa kwei nee ni Yesu. 18 Yesu akeza hehi na kuwamba, "Nchekhigwa udaho wose wa uko uwanga kwa Muungu na mwe inusi. 19 Hitani mkawagosoe wantu wa si zose wawe wahina wangu, mkawabatiiza kwa zina da Tate na da Mwana na Muye wa Muungu. 20 Wahinyeni kutoza miagiyo yangu nikuwekhayo. Na miye ni hamwe na nywie misi yose, adi kisingi cha kisikiizi." (aiōn q165)

Maliko

1 Inu ni Mbui Yedi ya Yesu Klistu, Mwana wa Muungu. 2 Ivoka inga yekwandikwavyo he kitabu cha muoni wa Muungu etangwaye Isaya, "Muungu akagombeka, 'Namugiya mndima yangu Akuongwee, endaye akugoswee sia yako.' 3 Mgutio wa mntu wetanga mwenyika 'Mgosoyani Zumbe sia yakwe Nyooshani myemboko yakwe.'" 4 Yohana mbatiiza kalawiya mwe nyika, akawabiikia wantu na kuwabatiiza na kuwamba, "Waeke mavigaviga na Muungu endaawaekee mavigaviga yao." 5 Wantu wose kulawa si ya Uyahudi na wada wa mzi wa Yelusalemu, wakambasa kumtegeeza Yohana na kubada mavigaviga yao, nee wabatizwa mwe zigizigi da mazi Yolodani. 6 Yohana kavaa gwanda dekugosolwado na mazoya ya mnyama mwetangwa ngamia, na mshipi wa babu mwe kigudi chakwe, naho khande yakwe ne nsige na woki. 7 Akawamba wantu, "Eza mntu kwe mgongo wangu mwenye udaho kusima miye. Naho miye khikundigwa ata kwenama na kuchopoa sigi za sabana zakwe. 8 Miye nabatiiza kwa mazi, akini yee endaawabatiize kwa Muye wa Muungu." 9 Misi ida Yesu akatimia kulawa Nazaleti mzi wa Galilaya, akabatizwa ni Yohana mwe zigizigi da mazi Yolodani. 10 Ahoaho ekulawaho mwe mazi, Yesu akaona uwanga kwa Muungu kuvuguka na Muye wa Muungu ukaseeya inga suwa uwanga yakwe. 11 Mgutio ukateggezeka kulawa uwanga kwa Muungu, "Uyu ne mwanangu nimkundaye, nitamiwaye naye." 12 Ahoaho Muye wa Muungu ukamuongoeeya kuita he kiwawe. 13 Akekaa uko kwa misi makumi mane, akageezwa ni Ibiisi. Kekaa uko hamwe na wanyama wa mzituni, naho wandima wa uwanga wa Muungu wamuambiza. 14 Yohana ekuikwaho mwe kifungo, Yesu akaita mwe si ya Galilaya, akabiikia Mbui Yedi ya Muungu. 15 Akagombeka, "Kisingi kibua, Useuta wa Muungu uhehi! Hitukani mzumiye Mbui Yedi!" 16 Naho Yesu ekuwaho akemboka khandakhandya ya tondoo da mazi ya Galilaya, nee awaona wavuvi waidi, Simoni na nduguye Anduleya, walowa samaki. 17 Yesu akawamba, "Nitongeani miye, nendaniwatende muwaete wantu kwangu inga walowa waetavyo samaki." 18 Aho wakazibada nyavu zao wakamtongea. 19 Ekuitaho mbee kidodo nee awaona Yakobo na nduguye Yohana wana wa Zebedayo. Wowo pia newawa mwe ngaawa yao, naho ne wakagosa nyavu zao. 20 Ahoaho Yesu akawetanga, wakambada tati yao Zebedayo mwe ngaawa hamwe na wandima wakwe na kumtongea Yesu. 21 Yesu na wahina wakwe nee waita mzi wa Kapelinaumu. Msi wekwezao wa Kuhumwiiza, Yesu akengia mwe Nyumba ya kukintania Wayahudi, nee

avoka kuhinya wantu. 22 Wantu wose wekumtegeezahoo nee wahondomaa kwa mahinyo yakwe, kwaviya khekuwa akahinya inga wahinyi wa miko, iya inga mntu mwenye udaho. 23 Mwe Nyumba ya kukintania Wayahudi akaawiya mntu yumwe mwekuwa na mazaiko, nee agutia, 24 "Una mbwai na swie, Yesu wa Nazaleti? Kweza kutidagamiza? Namanya wee u ndai? Wee ni Mntu Mtana wa Muungu!" 25 Yesu akadiwakia ido zaiko, "Nyamaa muawe mntu uyu!" 26 Dia zaiko dikamgea ugwa mtwi, akaiya kwa mgutio mkuu akamlawa. 27 Wantu wose wakahondomaa wakauzana, "Inu ivivih? Uwo ni mahinyo mahya? Kwaviya kwa udaho mntu uyu alavya mazaiko, naho yamtegeeza!" 28 Nee mbui za Yesu zikaambazwa mwe si yose ya Galilaya. 29 Wakalawa he Nyumba ya kukintania Wayahudi, wakaita mwenga kwa mwenga kaya kwa Simoni na Anduleya na Yakobo na Yohana wakaita hamwe nawo. 30 Naho mkwewe da Simoni ya kivyee nee yumwe usazi ni mtamu ana bombom kai, Yesu ekubuahoo wakamwamba mbui zakwe. 31 Yesu akatimia hehi yakwe, akamtoza mkono uyo mvyee, akamwenua na ahoaho homa ikamwekea. Akavoka kuwagosoeya ndima. 32 Guoni zua dekuswaho, wakamwegaiya Yesu watamu wose na wekukwewao mazaiko. 33 Wantu wose wa mzi uda wakakintana chongoi ya uvi. 34 Yesu akawahonya wantu wangi wekuwao na tamu mbaimbai na akaguusa mazaiko mangi. Naho khekuwaekea watamwiye kintu chochose kwaviya wammanya yee ni ndai. 35 Keokeo da mtungaihu, Yesu akalawa akaita hantu kwesaho wantu kuvika. 36 Simoni na weziwe wakaita kumondeza, 37 wekumwonaho wakamwamba, "Kiya mntu akoondeza." 38 Yesu akawatambaisa, "Titeni he mizi mituhu yahehi nikabiikie uko, miye ncheza kwaajii iyo." 39 Naho akaita si yose ya Galilaya, akabiikia mwe Nyumba ya kukintania Wayahudi na kuwaakia mazaiko. 40 Mntu yumwe mwekuwa na utamu wa nyoka akambasa Yesu, akamheembeza na kumkintia mavindi na kumwamba, "Ukakunda, wadaha kuning'aza." 41 Yesu akamwonea mbazi, akenua mkono wakwe na kumdonta. Nee amwamba, "Nakunda, ng'azika! 42 Ahoaho utamu wa nyoka ukamuekea yuda mntu, akang'azika." 43 Naho Yesu akamwamba aite kinyionyio na kumwamba, 44 "Tegeeza, usekumwamba mntu yoyose mbui inu. Akini hita ukeonyeshe kwa mviki, na kwaajii ya kung'aa kwako ukalavye mviko inga ekugombekavyo Musa koonyesha kuhona." 45 Akini yuda mntu akaita na akavoka kuambaza mbui izo kiya hantu, hata Yesu khekudaha kwengia mwe mzi wowose kwa kweonyesha. Nee ekaa chongoi kwesaho wantu, nee ivyo wantu wakambasa kulawa kiya phande.

2 Yekwembokaho misi micheche, Yesu akauya mwe mzi wa Kapelinaumu wantu wakateggeeza yukaya. **2** Aho wakeza wantu wangi na kumema hewazo adi kwe uvi. Yesu nee awabiikia mbui zakwe, **3** kisingi ichoicho wantu wane nee wabua wakamwenua mntu yumwe mwekuhooa, wakamwegaa kwa Yesu. **4** Kwaajii ya zumwezumwe da wantu dekumemado, khawekudaha kubua hehi na Yesu. Ivyo wakabovoa hantu ha chusi yekuwayo uwanga ya hantu ekuwaho Yesu, nee waseeza javi da yuda mwekuhooa. **5** Yesu ekuonaho kuzumiya kwao, akamwamba yuda mwekuhooa, "Mwanangu, kuekewa mavigaviga yako." **6** Wahinyi watuhu wa miko newawa mwe nyumba ida wekaa, wakamamakhanya mwe mioyo yao, **7** "Haikuka mbwahi ata agombeka ivi? Kamdumua Muungu! Khahana mdaha kuekea mntu mavigaviga iya Muungu ikedu!" **8** Yesu akamanya wamamakhanyavyo mwe mioyo yao nee awauza, "Kwa mbwai mwamamakhanya ivyo mwe mioyo yenu?" **9** Vyedi ni vihi, kumwamba mntu mwekuhooa, 'Kuekewa mavigaviga yako', hambu kugombeka, 'Enuka wetwike javi dako wende?' **10** Akini mmanyee Mwana wa Mntu ana udaho wa kuekea wantu mavigaviga yao mwe inusi." Nee Yesu amwamba yuda mntu mwekuhooa, **11** "Nakwamba, gooka, wetwike javi dako uite kaya!" **12** Ahoaho wantu wose nee wamkauwa yuda mntu akenuka, na kudoa kilago chakwe, akahauka. Wantu wose nee wahondomaa na kumtogoaa Muungu wakamba, "Khatizati kuona katu mbui inga inu!" **13** Yesu akaita vituhu khandakhanda ya tondoo da mazi ya Galilaya. Zumwezumwe da wantu dikambasa, nee avoka kuwahinya. **14** Ekuwaho akemboka, nee amwona Lawi mwana wa Alifayo, kekaa mwe kazumba ka kuihia kodi. Yesu akamwamba, "Nitongea." Lawi akagooka akamtongea. **15** Kisingi kwemboka Yesu nee kekaa mwe nyumba ya Lawi, akada khande. Watoza ushuu na wada wagosoa mavigaviga nee wakambasa Yesu, na wangi wao wawa wekaa hamwe na wahina wakwe. **16** Wamwe wa wahinyi wa miko, wekuwao Mafalisayo, wekuonaho Yesu ada hamwe na wagosoa mavigaviga na watoza ushuu, nee wawauza wahina wakwe, "Kwambwai ada na watoza ushuu na wagosoa mavigaviga?" **17** Yesu ekuwateggezaho, nee agombeka, "Wantu wesao kuhuma khawakunda mganga akini wamkundao ni wada wahumao. Nchekweza kuwetanga wedi, iya wenye mavigaviga." **18** Kisingi kimwe wahina wa Yohana mbatiiza hamwe na wahina wa Mafalisayo nee wehiniza kuda. Naho wantu wakeza wakamuza Yesu, "Kwambwai wahina wa Yohana na wa Mafalisayo wehiniza kuda, akini wahina wako khawehiniza kuda?" **19** Yesu akatambaisa, "Wantu wekugonekwao kwe wiya wadaha viivih kwehiniza kuda ikawa zumbwe wa wiya yu

hamwe nao? Khawadaha kwehiniza kuda wakawa hamwe na zumbwe wa wiya. **20** Akini kisingi chendakibue zumbwe wa wiya endaho ausigwe gatigati yao, aho wendawehiniza kuda. **21** "Khahana mntu msenga kilaka kihya na kukibwikabwika mwe nguo yekusakaayo, inga akatenda ivyo iko kilaka kihya chendakitatue nguo yekusakaayo, naho yendaibanike muno. **22** Naho khahana wantu wageayo divai mhya mwe mikwiji ya babu yekusakaayo, inga wakagosa ivyo divai yendaitatue mikwiji ya babu, na divai hamwe na mikwiji ya babu yendaibanike. Divai mhya yagewa mwe mikwiji mhya." **23** Msi umwe wa Kuhumwiiza, Yesu na wahina wakwe wekuwaho wemboka mwe minda ya uhemba, wekuwaho wakenda wahina wakwe wakavoka kusenga uhemba. **24** Mafalisayo wakamuza Yesu, "Kauwa, ni viivih wagosoa mbui ziemewazo kugosoa Msi wa Kuhumwiiza?" **25** Yesu nee awatambaisa, "Khamzati kusoma ekugosoavyo Daudi hamwe na weziwe kisingi wekuwaho na saa?" **26** Yee akengia mwe Nyumba ya Muungu akada yada mabumunda yekuikwayo hemeso ya Muungu. Mbui inu igosoka kisingi cha Abiazali, nekawa Mviki Mkuu. Na ni waviki wowodu wakukundigwao wade mabumunda ayo, akini Daudi kada na kuwekha na weziwe." **27** Naho Yesu akawamba, "Msi wa Kuhumwiiza uikwa kwaajii ya wantu na khio wantu kwaajii ya Msi wa Kuhumwiiza. **28** Ivyo Mwana wa Mntu ana udaho ata wa Msi wa Kuhumwiiza."

3 Naho Yesu akengia vituhu mwe Nyumba ya kuvikia Wayahudi, nemuwa na mntu mwekuhooa mkono. **2** Umo wantu watuhu wakamgoja amhonye mntu uyo Msi wa Kuhumwiiza ili wadahe kumuahia masa. **3** Yesu akamwamba uyo mntu mwekuhooa mkono, "Soo aha gooka hemeso ya kia yumwe." **4** Naho akawauza, "Kulawana na miko yetu takundigwa kugosoa mbwai Msi wa Kuhumwiiza? Kuohoa ugima au kukoma?" Akini wowo khawekuandua dodose! **5** Aho Yesu akawafuiya meso kwa maya, akaugumia, kwaajii ya mioyo yao itogayo. Naho amwamba yuda mntu, "Enua mkono wako!" Naye akenua mkono wakwe, ukatenda mgima vituhu. **6** Ahoaho Mafalisayo wakalawa chongoi, wakakintana hamwe na kizumwezumwe cha Helode wakaondeza sia ihi wendayo wamkome Yesu. **7** Yesu hamwe na wahina wakwe, wakahauka na kuita khandakhanda ya tondoo da mazi. Na zumwezumwe da wantu kulawa si ya Galilaya dikambasa, **8** wekusikiaho mbui zose ekugosoazo, zumwezumwe da wantu dikamwezea kulawa Uyahudi na Yelusalemu na Idumea na si zose zekuwazo awio da zua da zigizigi da mazi Yolodani hamwe na wada wa hehi wa si ya Tilo na Sidoni. **9** Yesu akawamba wahina wakwe wamuikie ngaawa

kwaviya wantu wasekumfintafinta. 10 Kwaviya ne kawahonya watamu wangi, na watamu wose ne wamfintafinta wadahe kumdonta. 11 Na kia mwenye zaiko ekumuonaho Yesu, aketambika ahosi hemeso yakwe na kugombeka, "Wee ni Mwana wa Muungu." 12 Akini Yesu akayaemeza kwa ukai yada mazaiko yasekuwamba wantu kuwa yee ni ndai. 13 Yesu ne akwea kwe kiima akawetanga wada ekuwakundao ne wambasa. 14 Naho ne awasagua wantu kumi dimwe na waidi na akawetanga waagiwa, wekae naye awaagiye kubiikia wantu, 15 na wawe na udaho wa kulavya mazaiko. 16 Aho kumi dimwe na waidi wekusagulwao ni awa, Simoni mwekwehigwa zina da Petulo, 17 Yakobo na kakie Yohana wana wa Zebedayo, Yesu akawekha zina Boanege mana yakwe, "Wantu wa tuntumo." 18 Andulea na Filipino na Batolomayo na Matayo na Tomasi na Yakobo mwana wa Alifayo na Tadayo na Simoni mtoanaji wa si yakwe. 19 Yuda Isikaliyote mwekumhituka Yesu. 20 Naho Yesu akauya kaya na zumwezumwe da wantu dikakintana vituhu, ata Yesu na wahina wakwe khawekupata phasi ya kuda khande. 21 Nduguze wekusikiaho mbui iyo wakenda kumdoa kwaajii wantu ne wamba, "Ana kiau." 22 Wamwe wa Wahinyi wa Miko kulawa Yelusalemu wakamba, Kakwewa Belizebuli! Mkuu wa mazaiko awalavya wantu mazaiko kwa udaho wa mkuu wa mazaiko. 23 Yesu akawetanga, akagombeka nao kwa simo, "Ibiisi adaha viivih kumguusa Ibiisi mweziwe?" 24 Inga wantu wa useuta umwe wakatoana khondo wenye kwa wenye, useuta wendaugwe. 25 Wantu wa kaya mwenga wakesekwevana kaya iyo yendaidagamie. 26 Kwaivyo useuta wa Ibiisi ukepanga vizumwezumwe khaudaha kwekaisa iya wendaudagamie. 27 "Khahana mntu adahae kwengia mwe nyumba ya mntu mwenye mdundugo na kuvidoa vintu vyakwe, avoke kutoana na kumzengeteza juda mntu mwenye mdundugo nae akamvota endaadahe kuvidoa vintu vyakwe." 28 "Kwei nawamba, wantu wadaha kuekewa mavigaviga yao hamwe na kumbea Muungu." 29 Akini mntu agombekaye yesayokutama kwa Muye wa Muungu khana aekewe katu, endaawe na mavigaviga ya kae na kae. (aiōn g165, aiōnios g166) 30 Yesu kagombeka ivyo kwaajii wantu watuhu ne wamba, "Ana mazaiko." 31 Mami yakwe da Yesu na wanduguze wakabua aho, wakagooka chongoi wakamwagiya mntu kumwetanga Yesu. 32 Zumwezumwe da wantu diwa dekaa aho wekaa bunga. Naho wantu wakamwamba, "Kauwa mami yako na wanduguzo wauko chongoi, wakwetanga." 33 Yesu akawatambaisa, "Mmaa na wandugu zangu ni wakina ndai?" 34 Aho akawakauwa wada wantu wekuwao wekaa bunga akamba, "Awa ne mmaa yangu na wandugu zangu! 35 Mntu yoyose agosoaye

akundavyo Muungu, uyo ne kaka yangu na umbu dangu na mmaa yangu."

4 Yesu ne avoka vituhu kuhinya khandakhanda ya tondoo da mazi ya Galilaya. Zumwezumwe da wantu wangi dikaika bunga naho akengia mwe ngaawa na kwekaa, wantu wose wekaa mwe sanga khandakhanda ya tondoo da mazi. 2 Akawahinya mbui nyingi kwa simo, na mwe mahinyo yakwe akawamba. 3 "Tegeezani! Mntu mhanda mbeyu kenda kwetia mbeyu." 4 Ekuaho aketia mbeyu ntuhu zigwa khandakhanda ya sia ne wadege weza wakazida. 5 Ntuhu zikagwa mwe iwe kwesiho na sanga, zikahota aho, kwaviya sanga nee ncheche. 6 Zua dekulawaho mbeyu ziya zikanyaa, kwaviya mazindo yakwe khayokuwa na udaho. 7 Mbeyu ntuhu nezagwa mwe miwa, ida miwa neyakua na kuzifintafinta ziya mbeyu naho khazokuvyaa. 8 Na mbeyu ntuhu zikagwa mwe sanga ntana, ne zakua na kuvyaa vitana, mwenga makumi matatu na mwenga makumi mtandatu, na mwenga makumi kumi. 9 Yesu akagombeka, "Mwenye magutwi na ategeeze." 10 Yesu ekuwaho ikedu wamwe wa wada wekumtegeezao hamwe na wahina wakwe kumi dimwe na waidi ne wambasa na kumuza kua ekutamwiacho kwa simo. 11 Yesu akawatambaisa, "Nywie mwekhegwa kumanya sii zose za Useuta wa Muungu, akini kwa wada weuko chongoi wenda wembigwe kua kintu kwa simo, 12 ili, 'Wakaue kwei, akini wasekuona Wategeeze kwei, akini wasekumanya. Ama khivyo ne wamhitukia Muungu, wakaekewa.'" 13 Naho Yesu akawauza, "Nyie khamanya msimo unu? Mwadaha viivih kumanya simo tuhu?" 14 Mbeyu ihandwayo na mntu ahandae mbeyu ni mbui ya Muungu. 15 Wantu watuhu ni inga viya mbeyu zekwetiwazo siai. Ahoaho wategeezaho ida mbui ya Muungu, Ibiisi eza na kuiusa mwe mioyo yao. 16 Wantu watuhu nao ni inga mbeyu zekwetiwazo mwe maiwe. Ahoaho wategeezaho mbui ida wakaihokea kwa kinyemi. 17 Akini khaviwengia nakuwa na mazindo mwe mioyo yao. Mbui ida yekaa kwa misi micheche na kisingi cha suuba kikalawiya, ahoaho mntu uyu hufa maya. 18 Wantu watuhu inga mbeyu zekugwazo he miwa. Uwo ni msimo wa wada wekutegeezao ida mbui, 19 akini maatu ya mwe inusi na utiizi wa mai, na kukunda muno vintu vingi zikawengia mwe mioyo yao, zafintafinta ida mbui ya Muungu na kuvota kuvyaa matunda. (aiōn g165) 20 Akini watuhu inga mbeyu zekwetiwazo he sanga ntana. Aho wategeeza ida mbui ya Muungu, wakaihokea na kuvyaa matunda watuhu makumi matatu, watuhu makumi mtandatu na watuhu makumi kumi. 21 Yesu akaendee kuwamba, "Uwo wantu wadaha kuwasha koloboi na kwengiza nyumbani

na kuigubika kwa biga au kuika mzungui? Aah! Waiika uwanga na kiango. 22 Naho kintu chochose chekufiswacho chenda kioneke, na chochose chekugubikwacho chenda kigubulwe. 23 Mwenye magutwi ya kutegeeza na ategeeze!" 24 Naho akamba, "Tegeezani vitana kwa kia mtegeezacho! Miko idaida mtumiayo kuamuiya watuhu, Muungu enda azitumie kuamuiya nywie, nayo ata kai muno. 25 Kwaviya mwena endaamemezewe, na mwesena endaahokwe kiya kidodo enacho." 26 Yesu akaendee kugombeka, "Useuta wa Muungu inga yezayo mntu ahanda mbeyu mwe mnda. 27 Kio agona, musu yu meso na kisingi icho mbeyu yahota na kukua yee mwenye khamanya vyekugosokavyo. 28 Kwaviya sanga yenye yagoso mimea kukua na kuvyaa, uvoka kulavya zani teke, naho dakua suke na kulawiya uhemba wekudahayo. 29 Uhemba ukabinda kudahaa, mntu uyo adoa nyengo na kuvoka kusenga, kwaajii kisingi cha ubosi kibua." 30 Naho Yesu akagombeka, "Tiuganye na mbwai Useuta wa Muungu? Tiutamwiie kwa simo zih? 31 Waigana na mbeyu ya haladani, ambayo ni ndodo kwesima zose zihandwazo mwe inusi. 32 Akini ikabinda kuhandwa, yahota na kutenda ziti kuu kwesima yose mwe mnda. Naho matambi yakwe yawa makuu hata wadege wa uwanga wazenga masasa yao mwe matambi yakwe." 33 Yesu akawabiikia mbui zakwe kwa simo tuhu nyingi inga izo, akatamwiiana nao kadii wekudahavyo kumanya. 34 Khekutamwiya nao chochose iya kwa simo, akini ekuaho hamwe na wahina wakwe ikedu akawamba kia kintu. 35 Msi udauda, guoni Yesu akagombeka na wahina wakwe, "Titeni phande ntuhu ya tondoo da mazi." 36 Aho wakabada dia zumwezumwe da wantu, wahina wakwe wakengia mwe ngaawa ekuwayo Yesu. Viyaviya ngaawa ntuhu zikambasa. 37 Khusi khai ikaawiya, mkubwaniso wa mazi ikatoa ida ngaawa, nayo ikavoka kumema mazi. 38 Yesu ne yunyuma ya ngaawa, naho kagonea mwe kigonea, wahina wakwe wakamwenua na kumwamba, "Mhinyi kwa mbwai khutipatiiza khuona inga tinda tiuye na nyuma?" 39 Yesu akenuka na kuiwakia ida khusi na kuyamba mawimbi, "Nyamaa! Twiia!" Ahoaho khusi ikaeka, ne kwatwiya tui. 40 Yesu akawauza wahina wakwe, "Kwa mbwai mwaogoha? Khamzati kuzumiya du?" 41 Naho wakaogoha muno, wakauzana wenye, "Uyu ndai? Hadi khusi na mawimbi vyamtegeeza!"

5 Yesu na wahina wakwe wakabua phande ya kaidi ya tondoo da mazi ya Galilaya mwe si ya Wagelasi. 2 Ahoaho Yesu ekuseeaho mwe ngaawa akakintana na mntu yumwe mwenye mazaiko kaawiya he mambia. 3 Mntu yuda ne akekaa kwe mambia na khahana mntu mwekudaha kumtoza

na kumzengeteza minyololo. 4 Maa nyingi wamzengeteza kwa phingu mwe mikono na minyololo mwe miundi, akini kia maa akadaha kuidumua iyo minyololo na izo phingu, naho khahana mntu mwekudaha kumumeza. 5 Msi na kio ne akekaa mwe mambia na kwe miima akagutia na kwesengasenga na maiwe. 6 Ekumuonaho Yesu kwa hae, akamguukia, akamwenamia. 7 Akamba kwa mgutio mkuu, "Una mbwai nami?, Yesu Mwana wa Muungu mwe uko uwanga muno! Nakuhembeza kwa zina da Muungu wesekunisuumiza!" 8 Akagombeka ivyo kwaviya Yesu nekawa kamwamba, "Ee zaiko mlaweni mntu uyu!" 9 Aho, Yesu akamuua, "Zina dako ni ndai?" Ne amtambaisa, "Zina dangu ni hindoo kwaviya ti wangi." 10 Naho akamhembeza Yesu asekuwaguusa mwe si ida. 11 Hehi na aho ne kuwa na tintimo kuu da nguuwe uisi he mpoomoko wa muima. 12 Aho mazaiko yada yakamhembeza Yesu na kumwamba, "Tegae tikengie kwa wada nguuwe." 13 Naye akayekha uhusa, aho yada mazaiko yakamlawa mntu yuda, yakawengia wada nguuwe. Tintimo dose ido da nguuwe ne diwa elufu mbii dikaseeya mwe uda mpoomoko mkai dikengia mwe tondoo da mazi. 14 Waisi wa wada nguuwe, ne waguuka na kuambaza mbui ida mwe mizi na mwe minda. Wantu wakaita wakauwe yekulawiyo. 15 Ne wantimia Yesu, wakammbuiya mntu yudayuda mwekuwa kakwewa na hindoo da mazaiko kekaa asi, kavaa nguo, na akii zakwe zimuiya, wantu wose wakaogoha. 16 Na wada wekuonaho mbui ida ne wawamba wantu watuhu, chekulawiacho kwa yuda mntu mwekuwa na mazaiko hamwe na mbui za wada nguuwe. 17 Aho, wantu wakamhembeza Yesu alawe mwe si yao. 18 Yesu ekuwaho akwea mwe ngaawa yuda mntu mwekuwa na mazaiko akamhembeza waite wose. 19 Akini Yesu akamweemeza, naho akamwamba, "Hita kwenu kaya kwa wanduguzo ukagombeke yada yose Zumbe ekukugosoeavyo na kukufiia mbazi." 20 Aho yuda mntu akaita na kuvoka kubiikia Dekapoli mana yakwe ni si ya mizi kumi dimwe, mbui zose Yesu ekumgosoeavyo. Wantu wose wakahondoma. 21 Yesu akaita vituhu phande ya kaidi ya tondoo da mazi kwa ngaawa. Zumwezumwe da wantu dikammemea hemeso yakwe, naye ne kagooka khandakhanda ya tondoo da mazi. 22 Aho akeza mntu yumwe etangwa Yailo yumwe wa wakuu wa Nyumba ya kuvikia Wayahudi, ekumuonaho Yesu akakinta mavindi hemeso yakwe. 23 Akamhembeza akamba, "Mwanangu wa kivyee mdodo ni mtamu yu hehi na kuuya na nyuma. Nakuhembeza tite ukamuike mikono yako adahe kuhona na aendee kwekaa." 24 Aho, Yesu akahauka hamwe naye. Wantu wangi wakamtongea Yesu na kumfintafinta kia phande. 25 Aho ne hawa na mvyee yumwe

mwekuwa na utamu wa mtuo kwa kisingi cha myaka kumi dimwe na miidi. 26 Mvye uyo ne kaangadika muno kuita kwa waganga wangi. Na etiho kaza mai zakwe zose, akini khekuaona ebae, iya kaendee kuwa mtamu muno. 27 Naye uyo mvye ne kasikia mbui za Yesu ne ahenya gatigati ya dia zumwezumwe da wantu. Akamlawiya Yesu kwa nyuma na kudonta nguo yakwe. 28 Kwaviya ne kegombeke mwe moyo wakwe, "Nikadonta nguo yakwe, nenda nihone." 29 Ahoaho utamu wa mtuo ukanyaa, akeona mwe mwii wakwe kahona utamu wakwe. 30 Ahoaho, Yesu akamanyia udaho umlawa. Neahitukia dia zumwezumwe da wantu na kuwauza, "Nndai mwekudonta nguo yangu?" 31 Wahina wakwe wakamtambaisa, "Wooona wantu wakufintafinta, naho wauza ni ndai mwekukudonta?" 32 Akini Yesu akakauwa phande zose amwone nndai mwekumdomonta. 33 Aho yuda mvye akamanyia yekumlawiya, akeaviiza, akakama kwa kuogoha, aketambika asi hemeso ya Yesu, na kugombeka yose yekumlawiya. 34 Yesu akamwamba, "Mwanangu kuzumiya kwako kukuhonya, hita kwa utivu naho utende mgima." 35 Yesu ekuwaaho agombeka, ne weza wantu kulawa kwa Yailo mkuu wa Nyumba ya kuvikia Wayahudi, wakamwamba, "Mwano kauya na nyuma kae, kwambwai wampisha mhinyi?" 36 Akini, Yesu khekuaanduwa wekugombekacho nee amwamba yuda mkuu wa Nyumba ya kuvikia Wayahudi, "Usekuogoha, wee zumiya du." 37 Yesu khekukunda mntu yoyose amtongee, iya Petulo na Yakobo na Yohana nduguye Yakobo. 38 Wekubua ho mwe nyumba ya Yailo, Yesu ne aona wantu waketambikatambika asi wakiiya na kutoa bwaimbo. 39 Yesu ne engia gati, na kugombeka, "Kwa mbwai mwetambikatambika na kuiya? Mndee khekua na nyuma, kagona." 40 Akini wowo wakamseka. Aho akawalavya wose chongoi, akamdoa tati yakwe na mami yakwe da yuda mwana na wahina wakwe watatu, wakengia mwe chumba wekumwikacho yuda mndee. 41 Naho akamtoza mkono, na kumwamba, "Talita, komu," Mana yakwe "Mndee mdodo nakwamba enuka!" 42 Ahoaho mndee yuda akagooka, na kuvoka kuita. Mndee yuda ne kawa na myaka kumi dimwe na miidi. Aho wantu wakahondomaa muno kwa dekulawiado. 43 Akini Yesu akawaemeza wasekugombeka kwa mntu yoyose ida mbui. Naho akawamba wamwekhe khande yuda mndee.

6 Yesu akalawa hada, akaita mwe mzi wakwe na wahina wakwe ne wamtongea. 2 Msi wa Kuhumwiiza wekubua ho, akavoka kuhinya mwe Nyumba ya kuvikia Wayahudi. Wantu wangi wekumtegeezao wakahondomaa wakauza, "Uwo mbui izi kazilavia kuhi? Ni udaho uhi ekwekhiwao? Naho agosoa viivihhi tangio izi? 3 Uwo uyu khii yuda seemaa,

mwana Maliamu, wanduguze ni Yakobo na Yusufu na Yuda na Simoni? Na maumbuze wekaa ahaaha hetu?" Wantu ne wawa na matumatu nae. 4 Yesu akawamba, "Muoni wa Muungu akundwa kia hantu iya mwe si yakwe na kwa wanduguze na kaya kwakwe khakundwa." 5 Khekugosoa tangio zozose hada, iya akaiika mikono kwa watamu wacheche, ne awahonya. 6 Yesu akahondomaa muno, kwaviya wantu khawokuzumia. Naho Yesu neaita mizi ya hehi, akahinya wantu. 7 Akawetanga wada wahina kumi dimwe na waidi, akavoka kuwaagia waidiwaidi. Ne awekha udaho wa kuguusa mazaiko. 8 Akagombeka, "Msekudoa kintu chochose mwe ntambo yenu iya ngoda du. Msekudoa khande, mkwiji wala hea. 9 Vaani sabana, akini mwesekudoa gwanda tuhu." 10 Vituhu akawamba, "Kaya yoyose mwendayo mhokewe ekaani umo na msekusamasama kuita kaya tuhu hadi mwendaho mhauke mwe mzi uwo. 11 Hantu hohose wantu wendawo wawaeme kuwahokea au kuwategeeza, haukeni aho na kung'untani sanga ya mwe miundi yenu inga hinyo kwao." 12 Awo wakahauka na kuwabiikia wantu wamhitukie Muungu. 13 Wakaguusa mazaiko mangi na kuwasisa mavuta ya mizaituni watamu wangi na kuwahonya. 14 Naho, Seuta Helode ekutegeezaho mbui izi kwaviya togoo za Yesu ne ziambazwa kia hantu. Wantu watuhu ne wakagombeka, "Yohana mbatiiza kayuyuka kulawa mwe wekufao, ne mana udaho wa kugosoa vihii wagosoa ndima." 15 Wantu watuhu wakagombeka, "Uyu ni Eliya" Na wantu watuhu ne wagombeka, "Uyu ni Muoni wa Muungu inga yumwe wa Waoni wa Muungu wa kae." 16 Akini Helode ekusikiaho akagombeka, "Uyu ni Yohana mbatiiza! Nekumsengae mtwi, tambe kayuyuka!" 17 Aho bosi Helode mwenye kakunda Yohana Mbatiza agwiwe na aikwe mwe kifungo. Helode katenda ivyo kwaajii ya Helodia, mvye uyo ne nimkaza Filipu, nduguye Helode. 18 Kwaviya Yohana ne kamwamba Helode, "Khio vitana kumdoa mkaza nduguyo." 19 Aho Helodiya akakimwa muno na Yohana na akakunda kumkoma, akini khekudaha kumkoma. 20 Helode ne akamuogoha Yohana kwaviya kamanya Yohana ni mntu mtana na yedi, ivyo akamkindia asekumoma. Helode kakundisa kumtegeeza Yohana, akini ekumtegeza ho, akahungumia muno mwe moyo wakwe. 21 Msi umwe Helodia akapata phasi kisingi cha sikukhuu ya khumbuso da kuvyaigwa kwakwe Helode. Helode kawagosoea ntafuno wadaa waongoezi na wakuu wa mahindoo hamwe na wagookezi wose wa Galilaya. 22 Aho mwana kivyee wa Helodiya akengia akavina, akawatamiza muno Helode na wageni wakwe. Seuta Helode akamwamba yuda mndee, "Niombeza dodose ukundado, nami nenda nikwekhe."

23 Naho akamwahiiya, "Chochose wendacho uniombeze, nenda nikwekhe hata ntii ya useuta wangu." 24 Aho uyo mndee akalawa kumuza mami yakwe, "Niombeze mbwai?" Mmaa yakwe akamtambaisa, "Ombeza mtwi wa Yohana Mbatiza." 25 Yuda mndee akamuuiya seuta kinyionyio na kumwombeza, "Nakunda unekhe isasa mtwi wa Yohana Mbatiza mwe chano." 26 Seuta akoona usungu, akini kwaviya ya kuaha kwakwe na kwaviya ya wageni wose wekuwao mwe ntafuno, khakudaha kumuemee. 27 Aho seuta akamwagiya asikai kueta mtwi wa Yohana Mbatiza. Asikai akaita akamdumua mtwi Yohana Mbatiza. 28 Yuda asikali akaueta mtwi mwe chano, akamwekha yuda mndee, na mndee naye akamwekha mami yakwe. 29 Wahina wa Yohana Mbatiza wekusikahia mbui ida, ne waita wakaudoa mwii wakwe wakagea mwe mbia. 30 Wada waagiwa wakauya wakakintana hemeso ya Yesu na kumwamba yose wekugosoayo na kuhinya. 31 Yesu akawamba, "Titeni swie ikedu kwesiho wantu mkahumwiize" kagombeka ivyo kwaviya ne hana wantu wangi, wekuwao wabua aho na kuhauka hata Yesu na wahina wakwe khawokudaha kuwa na phasi ya kuda khande. 32 Aho wakahauka wowodu kwa ngaawa na kuita kwesiho wantu. 33 Akini wantu wangi wakawaoona wakaita naho wakawamany. Ne wantu kulawa kia mzi wakaguuka na kuongoa kubua ekuako aita Yesu na wahina wakwe. 34 Yesu ekuseeaho mwe ngaawa, ne aona zumwezumwe da wantu, akawafiba mbazi, kwaviya ne wawa inga ngoto wesao kuwa na muiisi. Akavoka kuwahinya mbui nyingi na nyingi. 35 Wahina wakwe wakambasa Yesu wakamwamba, "Hantu aha nihe kiwawe na zua daswa. 36 Wabade wantu awa waite mwe minda na mwe mizi ya hehi, wakague khande." 37 Akini Yesu akawatambaisa, "Wekheni nywie khande." Ne wamuza, "Khuona inga tendatikundigwe tiwe na mshahaa wa mntu wa miongo minane idahe kugua mabumunda na kuwekha wantu wade?" 38 Yesu akawauza, "Mna mabumunda mangahi? Hitani mkakuwe." Wekumanyaho, wakamwamba, "Kuna mabumunda mashano na samaki waidi." 39 Aho Yesu akagombeka na wahina wakwe wawaike wantu vizumwezumwe na kwekaa asi he mani. 40 Ne wekaa mwe vizumwezumwe vya wantu makumi kumi na vizumwezumwe vya makumi mashano. 41 Naho Yesu akadoa yada mabumunda mashano na wada samaki waidi, akakuwa uwanga kwa Muungu, akavijaiya, ne abendua yada mabumunda na kuwekha wahina wakwe wawapangie wantu. Na wada samaki waidi wawapangie wose. 42 Wantu wose ne wada na kweguta. 43 Wahina wakwe wakadodoa phugutio za vyekusigaavyo vya mabumunda na samaki wakamemeeza ngahu kumi dimwe na mbii. 44

Wekudao ida mikate ne wawa wagosi elufu shano. 45 Ahoaho Yesu akawamba wahina wakwe wakwee mwe ngaawa wamuongoee kuita Betisaida, phande ya kaidi ya tondoo da mazi, kisingi yee aaga zumwezumwe da wantu. 46 Ekubindaho kuagana nao, ne aita mwe muima kuvika Muungu. 47 Yekubuaho guoni, ngaawa ne igatigati ya tondoo da mazi, akini Yesu ne awa ikedu mwe sanga khavu. 48 Aho akoona wahina wakwe mwe ngaawa wakepisha kwa kutoa makasia, kwaviya ne wakahigana na khusi. Hehi na kucha, Yesu akawabasa wahina uku enda uwanga ya mazi, akakunda kuwemboka. 49 Akini wekumuonaho akenda uwanga ya mazi, ne wammamakhanya ni mzimu, wakakema. 50 Kwaviya wose wekumuonaho ne waogoha muno. Ahoaho Yesu akagombeka nao, "Twiiani msekugoha! Ni mie!" 51 Naho akengia mwe ngaawa wekuwamo na khusi ikatwiya, wahina wakwe ne wahondomaa muno. 52 Kwaviya ne khawazati kumanya mana ya yada mabumunda wekudao wantu elufu shano. 53 Wakemboka phande ya kaidi ya tondoo da mazi wakabua mwe si ya Genezaleti, aho ne wagea kigomogomo. 54 Wekulawaho mwe ngaawa, wantu naho wakamanyia Yesu. 55 Naho wakaita kinyionyio mwe si yose, wakawenua watamu mwe vilago vyao ne wamwegaiya Yesu, hohose hada wekutegeezaho yuaho. 56 Kia hantu Yesu ekubuaho, mwe mizi na mwe minda, wantu ne wawaika watamu wao wazoi, Wakamhembeeza wadon'te du msao wa nguo yakwe, na wose wekumdontao nee wahona.

7 Wamwe wa Mafalisayo na Wahinyi wa Miko wekuwao walawa Yelusalemu ne wakintana hemeso ya Yesu. 2 Wakoona wamwe wa wahina wa Yesu wada khande kwa mikono yao kwesiho kusunta inga ikundingwavyo na Miko ya Wayahudi. 3 Mafalisayo na Wayahudi wose watozeeza mahinyo wekuyahokeayo kwa wadaa wao, khawada khande yoyose hadi wasunte mikono yao vitana kubua mwe kiko. 4 Naho khawada chochose kulawa gwiyo hadi wasunte mikono. Viyaviya watozeeza mahinyo matuhu wekuhokeayo kuvokea kae, inga viya wasuntavyo vikombe na nyungu na via vya shaba. 5 Aho wada Mafalisayo na Wahinyi wa Miko wakamuza Yesu, "Kwa mbwai wahina wako khawatongea mahinyo ya wadaa? Iya wada khande kwesiho kusunta mikono?" 6 Yesu akawatambaisa, "Muoni Isaya ne koona kwei kwenu nywie wabakha inga viya ekugondavyo, Muungu kagombeka, 'Wantu awa wanitegeezwa mwe miomo yao, iya mioyo yao ihae na mie. 7 Naho wanivikia buwe, kwaviya mbui wazihinyazo ni miagiyo ya kiuntudu wakigombeka ayo ni mahinyo ya Muungu!' 8 'Nyie mwabada Miko ya Muungu na kutongea miagiyo ya wantu.' 9 Yesu akatendesa

kugombeka, "Nyie mwadaha kuiemea kwa unyanyi Miko ya Muungu kwaajii ya kutongea mahinyo yenu! 10 Mana Musa kagombeka, "Wategeenzi tati zenu na mami zenu naho mntu yoyose amdumuae tati yakwe au mami yakwe yakundigwa akomwe." 11 Akini nywie mwahinya, inga mntu mwenacho kintu kidahacho kumwambiiza tati yakwe au mami yakwe, akini akamba kintu icho ni 'Kolobani' yani ni funge kwa Muungu. 12 Naho kheshuutiza vituhu kumwambiiza tati yakwe au mami yakwe. 13 Ivi ne mbeavyo mbui za Muungu, kwaajii ya mahinyo mhokezanayo. Naho mwagosoa mbui nyingi inga izi." 14 Yesu ne awetanga vituhu zumwezumwe da wantu, akawamba, "Nitegeezani nyose, mmanyee." 15 Khakuna kintu chengiacho kwa mntu kidahacho kumtenda aseukundigwa na Muungu, akini kilawacho ndani ya mntu nee kintendacho mntu aseukundigwa na Muungu. 16 Mwenye magutwi ya kutegeeza na ategeeze! 17 Ekubadaho zumwezumwe da wantu na kwengia kaya, wahina wakwe wakamuza mana ya msimo uwo. 18 Yesu akagombeka, "Hata nywie khamna umanyi? Khamanya kintu kimwengiacho mntu kulawa chongoi khakidaha kumtenda mntu aseukundigwa hemeso ya Muungu, 19 kwaviya khachekumwegia mwe moyo wakwe iya mwe ifu, naho chalawa chongoi mwe mwii." Kwa kugombeka ivyo, Yesu kauusu khande zose ziigwe. 20 Akatendesa kugombeka, "Kimlawacho mntu ndani yakwe ne kintendacho aseukundigwa hemeso ya Muungu. 21 Kwaviya mwe moyo wa mntu kwalawa mbui zesazo kutama, na ukianga na ubavi na ukomaji, 22 na kiana na choyo na ubanasi na utiizi na umeo wa mai na kinyuu na kuba na kibui na ubahau. 23 Mbui zose izo zalawa mwe moyo wa mntu na kumtenda aseukundigwa hemeso ya Muungu." 24 Yesu akahauka aho na kuita mwe si ya hehi na mzi wa Tilo. Uko akengia mwe kaya mwenga na khakukunda mntu yoyose ammanyee, akini khakudaha kwefisa. 25 Aho myee yumwe kawa na mwanaye wa kindee mwekuwa na zaiko, ekutegezavyo mbui za Yesu akeza hada na aketambika asi hemeso ya Yesu. 26 Myee yuda khekua Myahudi, iya nee ni mwenyezi wa Silofoinike mwe si ya Siliya. Aho akamheembeza Yesu amlavye mazaiko yuda mwanawe. 27 Akini Yesu akamtambaisa, "Eka wana wegute, kwaviya khio vitana kudoa khande ya wana na kuwasia makui." 28 Yuda myee ne amtambaisa, "Zumbe" ni vitana, "Akini hata makui nayo yeaho asi ya meza yadaha kudodoa phugutio za khande vyekusigazwavyo." 29 Naho Yesu ne agombeka, "Kwaajii ya kutambaisa ivyo, hita kaya, naho wenda umbwii mwanao zaiko dimlaw!" 30 Aho yuda myee akauya kaya na kumbwii mwanawe kagona mwe usazi na dia zaiko dimlaw kae. 31 Yesu ne alawa mwe

mihaka ya mzi wa Tilo akemboka gatigati ya Sidoni akaita Dekapoli mana yakwe si ya mizi kumi, kwembokea tondoo da mazi ya Galilaya. 32 Aho wakamwegaiya mwenye kisita kikai na kiziba, wakamheembeza amuiikie mikono. 33 Yesu akamuusa mwe dia zumwezumwe da wantu, akamgea vyaa mwe magutwi ya yuda mntu, ne aswa ovu mwe vyaa vyakwe na kumdonta mwe ulimi wakwe. 34 Naho akakauwa uwanga, akatoa mhezemuko akamwamba, "Efata," Mana yakwe, "Vuguka." 35 Ahoaho magutwi yakwe yakavuguka na ulimi wakwe ukaegea na kuvoka kutamwiiya vitana. 36 Yesu ne awaemeza wantu wasekumwamba mntu yoyose mbui izo. Akini ekuwamezavyo ne watendesaho kuziambaza mbui izo. 37 Wantu wose wakahondoma muno, wakagombeka, "Kagosoa yose matana kawajaiya viziba kutegeeza na mabubu kudaha kugombeka!"

8 Kisingi icho, zumwezumwe da wantu dikakintana vituhu, na khawekuwa na khande. Aho, Yesu akawetanga wahina wakwe akawamba, 2 "Nawafiiya mbazi wantu awa kwaviya wawa na mie kwa misi mitatu, naho khawana khande. 3 Nikwabada waite kaya kwesaho kuda wenda wagwe msae siai, kwaviya watuhu walawa hae." 4 Wahina wakwe wakamuza, "Hanu he kiwawe tendatikundigwe tipatie kuhi mabumunda ya kuwegusa wantu wose awa?" 5 Yesu akawauza, "Mna mabumunda mangahi?" Wakamtambaisa, "Tina mabumunda mfungate." 6 Aho Yesu akawamba wantu wekae asi, akayadoa yada mabumunda mfungate, akamtogoa Muungu, akayabendua yada mabumunda, akawekha wahina wakwe wawapangie wantu, ne wawapangia. 7 Naho kuwa na samaki wacheche. Yesu akamtogoa Muungu, na kuwekha wahina wakwe wawapangie wantu viyaviya. 8 Wantu wose wakada, na kweguta. Ne wahina wakwe wakadodoa phugutio za khande za vyekusigaavyo na kumemeeza ngahu mfungate. 9 Naho wekudao khande wabua wantu elufu nne, Yesu akabadana nao. 10 Ahoaho akakwea ngaawa hamwe na wahina wakwe na kuita mzi wa Dalumanuta. 11 Wamwe wa Mafalisayo wakambasa Yesu na kuvoka kutambaisana nae. Wakamgeza, wakakunda agosee tangio koonesha kuwa udaho wakwe walawa uwanga kwa Muungu. 12 Akini Yesu akoona usungu mwe moyo wakwe akagombeka, "Ni kwambwai wantu wa uvyazi unu wakunda tangio? Kwei nawamba khahana tangio zozose zendazo mwekhigwe uvyazi unu." 13 Aho akawabada na akakwea vituhu ngaawa, akavoka ntambo ya kuita phande ya kaidi ya mazimshindo. 14 Wahina wakwe wajaa kudoa mabumunda ya kuiganyia. Ne wawa na bumunda dimwe mwe ngaawa. 15 Yesu

akawaemeza, “Kauwani muno, na mwekae hae na hamila ya Mafalisayo na hamila ya Helode.” 16 Wahina wakavoka kuuzana, “Agombeka ivi kwaviya khatina mabumunda.” 17 Yesu kamanya ayo ne awamba, “Kwambwai mwauzana mbui ya kwesekupata mabumunda? Nyie khamanya au khamna umanyi? Kwambwai mioyo yenu yatoga? 18 Mna meso akini khamdaha kuona? Mna magutwi akini khamdaha kutegeeza? Khambukhua? 19 Kisingi kiya nikubenduaho yada mabumunda mashano na kuwekha wantu elufu shano? Mdoao ngahu nyingahi za phugutio za khade za vyekusigaavyo?” Wahina wakatambaisa, “Ni ngahu kumi dimwe na viidi.” 20 Yesu akawauza, “Na hada nikubenduho yada mabumunda mfungate na kuwekha wantu elufu nne wakada, mdoao ngahu nyingahi za phugutio za khande za vyekusigaavyo?” Ne wantambaisa, “Ni ngahu mfungate.” 21 Aho akawauza, “Khamzati kumanya?” 22 Yesu akabua mzi wetangwao Betisaida hamwe na wahinyi wakwe. Uko wantu wakamwegaiya mntu tuntu, wakamheembeza amdonte. 23 Yesu akamtoza mkono yuda tuntu na kumlavya chongoi ya mzi. Akamswiia ovu mwe meso, akamwiikia mikono kwe meso na kumuuzua, “Wadaha koon chochose?” 24 Yuda tuntu akakauwa na kugombeka, “Naona wantu wakenda inga miti yendayo.” 25 Naho Yesu akamwiikia vituhu mikono yakwe mwe meso ya yuda tuntu, naye yuda mntu akafua meso, ne meso yakavuguka, koon kwakwe kukamuuiya akoon kia kintu pwii. 26 Yesu akamwamba aite kaya na kumuemeza, “Naho usekwengia mwe mzi.” 27 Naho Yesu na wahina wakwe wakaita mwe mizi ya hehi na Kaisalia Filipi. Wekuwohio siai Yesu akawauza wahina wakwe, “Wantu wamba mie ndai?” 28 Wakamtambaisa, “Watuho wamba wee ni Yohana mbatiiza, watuhu wamba u Eliya na watuhu wamba ni yumwe wa Waoni wa Muungu.” 29 Yesu akawauza, “Na nywie mwamba mie ndai?” Petulo akagombeka, “Wee ne Klistu.” 30 Naho Yesu akawaemeza wasekugombeka kwa mntu yoyose mbui zakwe. 31 Naho Yesu akavoka kuwahinya wahina wakwe, nlazima Mwana wa Mntu ekhigwe usuumizi mwingi na kuemewa na wadaa na Waviki wakuu na Wahinyi wa Miko. Enda akomwe, akini mwe msi wa ntatu enda ayuyuke. 32 Yesu kagombeka mbui ida pwiii. Aho Petulo akamdoao Yesu khandani, na kuvoka kumuakia. 33 Akini Yesu akahituka na kuwakauwa wahina wakwe, akamuakia Petulo na akamba, “Hauke hemeso yangu lbiisi wee! Umamakhanyo wako khio wa Muungu iya ni wa kiuntu.” 34 Naho akawetanga zumwezumwe da wantu hamwe na wahina wakwe akawamba, “Inga mntu yoyose akakunda kunitongea nlazima eemee mwenye, enue mhamba wakwe anitongee. 35 Kwaviya mntu yoyose akundae kuohoa ugima

wakwe mwenye enda awaze, akini mntu mwaza ugima wakwe kwaajii ya mie na kwaajii ya Mbui Yedi za Muungu enda ayaohe. 36 Mntu enda ekhigwe mbwai inga akekhiywa vintu vyose vya inusi na kuwaza ugima wakwe? 37 Khahana kintu wendacho ukilavye ili uupate ugima? 38 Mntu yoyose mwenda anionee soni mie na mahinyo yangu, mwe uvyazi unu wa kiana na cha mavigaviga, Mwana wa Mntu enda amuonee soni mntu uyo, kisingi endaho auye he ukuu wa Tati yakwe hamwe na wandima wa Muungu wa uwanga.”

9 Yesu akatendesa kugombeka, “Nawamba kwei, kuna wantu watuhu aha khawana waue na nyuma, hadi wendaho wauone Useuta wa Muungu ukeza kwa udaho.” 2 Yekwembokaho misi mtandatu, Yesu akawadoa Petulo na Yakobo na Yohana, akaita nao uwanga ya muima ulehao kwesaho wantu. Uko Yesu akahituka cheni hemeso yao. 3 Nguo zakwe zikang’aa pee, ung’ao wakwe khahana mnyukuaji yoyose mwe inusi mdaha kunyukuua ngu zing’ae inga izo. 4 Naho Eliya na Musa wakalawia wakatamwiya na Yesu. 5 Petulo akamwamba Yesu, “Mhinyi, ni vitana sie tiwe aha. Ebae tikazenga makumbi matatu, dimwe dako, dimwe da Musa na dimwe da Eliya.” 6 Petulo na weziwe wakaogha muno hata wasekumanya da kugombeka. 7 Naho kukalawia zunde dikawagubika, na mgutio ukategeezeza kulawa mwe dia zunde, “Uyu ne Mwanangu wa kigosi nimkundaye mtegeezeni.” 8 Ahoaho wahina wakakaua vituhu, akini khawekumwona mntu mtuhu iya Yesu ikedu. 9 Aho wekuwaho wakasea kulawa kwe muima, Yesu akawaemeza, wasekumwamba mntu mbui zozose wekuzionazo, adi aho Mwana wa Mntu endaho ayuyuke. 10 Aho wakatoza miagiyo iyo, akini wakauzana, mana ya kuyuyuka ni mbwai? 11 Wahina wakamuza Yesu, “Kwambwai Wahinyi wa Miko wagombeka, Eliya akundigwa avoke kweza?” 12 Yesu akawatambaisa, “Ni kwei, Eliya avoke kweza na kuika mbui zose vitana. Ata ivyo kwambwai iandikwa mwe Maandiko ya Mungu, Mwana wa Mntu enda asumizwe muno na kubewa? 13 Akini nawamba Eliya keza kae naho wakamgosoao wakundavyo inga Maandiko yekugombekavyo kwaajii yakwe.” 14 Naho wekuwabwiahio wada wahina watuhu, ne waona zumwezumwe kuu da wantu diwaikia bunga. Na wamwe wa Wahinyi wa Miko watambaisana nawo. 15 Ahoaho wada wantu wekumwonaho Yesu, wakahondomaa muno, wakamguukia na kumuugusa. 16 Yesu akawauza wahina wakwe, “Mwatambaisana mbwai?” 17 Aho mntu yumwe mwe dia zumwezumwe akagombeka, “Mhinyi khimueta mwanangu kwaviya ana mazaiko yekumgosoayo asekudaha kutamwiya. 18 Naho zaiko ido dikamkwea mwanangu damgwisa asi na kumtenda alawe fuo mwe kanwa, na

akeuma meno naho akakama mwii wose. Kiwamba wahina wako walavye ido zaiko, akini khawekudaha.” 19 Yesu akagombeka, “Nywie kivyazi chesacho kuzumiya! Nenda nekae na nywie hata ini? Nenda niwazimize hata ini? Mweeteni hangu!” 20 Naho wakamweta yuda mbwanga kwa Yesu. Na dia zaiko dekumuonaho Yesu dikamsingisa, yuda mbwanga akagwa asi, akagaagaa ne alawa fuo mwe kanwa. 21 Yesu akamuza tate ya yuda mbwanga, “Mazaiko aya yamvoka ini?” Nee amtambaisa, “Kuvokea udodo wakwe. 22 Maa zose zaiko idi damgwisa mwe moto na mwe mazi, ili dimkome. Inga ukadaha tifiye mbazi na kutiambiza!” 23 Yesu akagombeka, “Ati ukadaha, Mbui zose zadahika kwa yuda azumiaae.” 24 Aho tati yakwe yuda mbwanga akatoa vuzo kwa mgutio mkuu, na akamba “Nakuzumia, niambiza kwesekudaha kuzumiya.” 25 Yesu ekuonaho zumwezumwe da wantu dagenyea hemeso yakwe, ne amwamba dia zaiko, “Wee zaiko umgosoae mwana uyu asekudaha kugombeka na kutenda kiziba, nakwamba mlawe mbwanga uyu usekumuwiya vituhu!” 26 Aho zaiko dia ne dagutia na kumgea ugwa mtwi na kumgwisa yuda mbwanga asi na kumlawa. Yuda mbwanga akekaa inga kimba hata watuhu ne wamba, “Kauya na nyuma!” 27 Akini Yesu akamtoza mkono yuda mbwanga, akamwenua, ne agooka. 28 Aho, Yesu akengia kaya, wahina wakwe wakamuza wekuwaho ikedu, “Kwambwai swie khatokudaha kumlavya yuda zaiko?” 29 Yesu akawamba, “Zaiko inga idi khadidaha kulawa, kwesiho kuvika.” 30 Yesu na wahina wakwe walawa hada, ne waita wakembokea Galilaya, Yesu khakukunda wantu wowose wamanye weiho, 31 kwaviya ne awahinya wahina wakwe, akawamba, “Mwana wa Mntu enda egalwe kwa wantu wendao wamkome. Akini bada ya msi wa ntatu enda ayuyuke.” 32 Akini wahina wakwe khawokumanya mahinyo yada na wakaogoha kumuza. 33 Naho wakabua Kapelinaumu, ekuho kaya, Yesu akawauza wahina wakwe, “Ne mkatambaisana mbwai mwe sia?” 34 Akini khawokuandua, kwaviya ne wakatambaisana wakamba nndai mkuu gatigati yao. 35 Yesu akekaa asi, akawetanga wada wahina wakwe kumi dimwe na waidi na kuwamba, “Mntu akakunda awe mgookezi akundigwa awe wa kisikizi na mndima wa wose.” 36 Naho akamdoa mwana mdodo akamgoosa gatigati yao, akamuumbatia na kuwamba, 37 “Mntu yoyose amhokea mwana inga uyu kwa zina dangu anihokea mie, naho mntu anihokeaye mie, khanihokea miedu iya amhokea yuda mwekuniagiya.” 38 Yohana akamwamba Yesu, “Mhinyi, timuona mntu yumwe akalavya zaiko kwazina dako, nee tageeza kumweemeza kwaviya khayuko hamwe na swie.” 39 Akini Yesu akagombeka, “Msekumweemeza

kwaviya khahana mntu agosoe tangio kwa zina dangu, na ahoaho akagombeka ufayimu wa mbui zangu.” 40 Kwaviya mntu yoyose esaye kuhigana nasi, yu hamwe na swie. 41 Nagombeka kwei mntu yoyose endae amyekhe kikombe cha mazi ya kudomea kwaviya nywie ni wantu wa Klistu, na kwei enda ahokee funge. 42 Mntu yoyose endae amkindie yumwe wa awa wadodo wanizumiiyao agosoe mavigaviga ni ebae kwa mntu uyo azongomezwe he singo yakwe iwe kuu da kubundugia na kutambikwa mwe mazimshindo. 43 Mkono wako ukakutenda kugosoa mavigaviga, uusenge. Ebae wengie mwe ugima kwesaho mkono umwe, kusima na mikono miidi na kwengia mwe moto wa misi yose wesao kukomeka. (Geenna g1067) 44 Umo minyula yakwe khaifa na moto wa misi yose kwesiho kisiikizi. 45 Na muundi wako ukakutenda kugosoa mavigaviga uusenge! Ebae kwengia mwe ugima kwesaho muundi umwe kusima na miundi yose miidi na kutambikwa mwe moto wa kae na kae. (Geenna g1067) 46 Uko mafunyo yakwe khayafa na moto wa misi yose wesao kukomeka. 47 Ziso dako dikakutenda ugoso mavigaviga diuse. Ebae kwengia mwe Uzumbe wa Muungu na ziso dimwe kusima na meso yose maidi na kutambikwa mwe moto wa kae na kae. (Geenna g1067) 48 Minyula yakwe khaifa na moto wa misi yose kwesiho kisiikizi. 49 Kwaviya kiya yumwe enda agewe munyu kwa moto. 50 “Munyu ni mtana akini inga ikabanika inda ikweezwe na mbwai? Muwe na munyu mwe mioyo yenu na kwekaiisa kwevana gatigati yenu.”

10 Yesu akalawa hada na kuita si ya Uyahudi, akadumua zigizigi da mazi da wa Yolodani. Zumwezumwe da wantu dikambasa vituhu, ne awahinya vituhu inga viya agosavyo. 2 Aho Mafalisayo watuhu wakambasa na kumuza kwa kumgeza wakagombeka, “Miko yamuekea mgosi kumbada mkaziwe?” 3 Yesu akawatambaisa kwa kuwauza. “Musa kawekha mwiko wani?” 4 Wowo wakagombeka, “Musa katiagiya kuwa mgosi aluusiwa kuandika bauwa ya kumbada mkaziwe.” 5 Yesu akawamba, “Musa kagonda mwiko uwo, kwaajii ya kutoga kwa mioyo yenu.” 6 Akini kuvokea kugosolwa inusi, Muungu kaumba mgosi na mvyee. 7 Ivyo mgosi enda ambade tati yakwe na mami yakwe, enda awe hamwe na mkaziwe. 8 Na awa waidi wenda wawe mwii umwe. Kwaivyo wowo khio waidi vituhu iya mwii umwe. 9 Naho, ekukintanisacho Muungu, mntu aseukibahua. 10 Wekwengiaho kaya vituhu, wahina wakwe ne wamuza Yesu mbui ida. 11 Akawamba, “Mgosi yoyose ambadae mkaziwe na kutegua mvyee mtuhu, agosoa kianga. 12 Mvyee naye akambada mgosi yakwe na kutegulwa na mgosi mtuhu, yee

nae agosoa kianga.” 13 Wantu wakamwetea Yesu wana wadodo awadonte, akini wahina wakwe wakawaemeza wantu wada. 14 Yesu ekuonaho ivyo akakimwa, akawamba wahina wakwe, “Waekeeni wana wadodo weze hangu, naho msekuwakindia, kwaviya Uzumbe wa Muungu ni kwa wantu inga awa wana wadodo. 15 Nawamba kwei, mntu yoyose mwesekuuhokea Useuta wa Muungu inga mwana mdodo, khana engie umo.” 16 Akawahokea wana wada akawaumbatia na kuwaikia mikono kwa kuwajaiya. 17 Yesu ekuvokaho ntambo yakwe, mntu yumwe nee amguukia, akakin’ta mavindi hemeso yakwe, akamuza, “Mhinyi yedi, nitende viivhi nidahe kuhokea ugima wa misi yose kwesiho kisiikizi?” (aiōnios g166) 18 Yesu akamtambaisa, “Kwambwai wanetanga yedi? Khahana mntu yedi iya Muungu ikedu. 19 Miko waimanya, ‘Usekuwa mkianga, Usekukoma, Usekubawa, Usekugombeka uhonko, Usekutiiya Wategeeze tati yako na mami yako.” 20 Nee amtambaisa, “Mhinyi, ayo yose khiyatozeeza kuvokea udodo wangu.” 21 Yesu akamkauwa akamkundisa akamwamba, “Kuhungukiwa na kintu kimwe. Hita ukatage vyose wenavyo navyo uwekhe hea wakiwa, nawe wenda uwe na utajii mwingi uwanga kwa Muungu naho unibase.” 22 Ekutegeezyayo ayo, ne agumia, na kuhauka kwa usungu, kwaviya ne kawa na mai nyingi. 23 Yesu akamagaza magaza kia phande na kuwamba wahina wakwe, “Yenda iwe vyatoga kwa mwenye mai kwengia mwe Useuta wa Muungu!” 24 Wahina wakwe wakahondomaa kwa ida mbui, akini Yesu akawamba vituhu, “Wanangu, vyatoga muno kwa wenye mai kwengia mwe Useuta wa Muungu! 25 Vyadahika ng’ombe kwengia mwe ntundu ya singano iya khaidaka kwa mntu mwe mai kwengia kwe Useuta wa Muungu.” 26 Wahina ne wahondomaa na kuuzana, “Ndai mwenda adahae kuoholwa?” 27 Yesu akawafuiya meso na kuwamba, “Kwa wantu khavidahika, akini kwa Muungu vintu vyose vyadahika.” 28 Naho Petulo akamwamba, “Kauwa, tibada vyose, tikakutongea weye.” 29 Yesu akagombeka, “Nawamba kwei, kia mntu mwekubada kaya, na wanduguze wa kigosi na maumbu zakwe na mami yakwe na tati yakwe na wanawe na minda yakwe kwaajii ya mie na Mbui Zedi, 30 enda ahokee maa mia kisingi cha isasa, kaya na wanduguze wa kigosi na maumbu na mame na wana na minda hamwe na suuba. Na mwe kisingi chezacho enda ahokee ugima wa kae na kae. (aiōn g165, aiōnios g166) 31 Akini wantu wangi wabosi wenda wawe wa kisikizi, na wakisikizi wenda wawe wabosi.” 32 Naho wawa siai kuita Yelusalemu, na Yesu ne mwekuwaongwea, wahina wakwe wakamema maatu, na wantu wekuwatongea nee waogoha. Yesu akawadoda wada wahina kumi dimwe

na waidi akavoka kuwamba mbui zendazo zimlawie. 33 “Tegeezeni, taita Yelusalemu uko Mwana wa Mntu enda ekhiizwe kwa Waviki Wakuu na Wahinyi wa Miko wendao wamuamwii akomwe na kumwekhiiza kwa wantu wesiho Wayahudi. 34 Naho wenda wambee na kumswiia ovu na kumtoa na koto na kumkoma, akini mwe msi wa ntatu enda ayuyuke.” 35 Naho, Yakobo na Yohana wana wa Zebedayo, ne wambasa Yesu na kumwamba, “Mhinyi, takunda utigosoe kintu tendacho tiombeze.” 36 Yesu akawauza, “Mwonda niwagosoe mbwai?” 37 Ne wantambaisa, “Hada wendaho wekae mwe kigoda chako cha ukuu cha Uzumbe, takunda tekae hamwe nawe, utigosoe kwekaa yumwe phande yako ya kumuso na mtuhu phande yako ya kuume.” 38 Yesu akawamba, “Khamanya ido mdiombeza. Mwadaha kuzimizima kusuubikaa inga nendavyo nisuubike? Naho mwenda muwe tayali kuuya na nyuma inga nendavyo niuye na nyuma?” 39 Wakamtambaisa, “Tadaha” Yesu akawamba, “Suuba nendazo nipate mwendamzimize kusuubika kwei, naho kwei mwenda muuye na nyuma inga nendavyo niuye na nyuma mie. 40 Akini khidaha kusagua ni yuhi endae ekae phande ya kuume hambu kumoso kwangu. Ni Muungu ne ahiganyaye yuhi ekae phande ya kuume hambu kumoso kwa wada ekuwasaguo.” 41 Wada wahina watuhu kumi dimwe wekutegeeza mbui ida wekuombeza Yakobo na Yohana ne wakimwa. 42 Yesu akawetanga wose na kugombeka, “Mwamany kuwa wada wamamakhanywao kuwa waongozi wa si wawagookea wantu wao kwa mdundugo, na wakuu awo wawashutiza wantu wao. 43 Akini kwenu isekuwa ivyo, iya akundae kuwa mkuu gatigati yenu akundigwa awe mndima yenu. 44 Mntu yoyose akundae kuwa mwoongozi wa wantu, akundigwa awe mndima wa wose. 45 Kwaviya Mwana wa Mntu khekweza kugosowa ndima, iya keza kugosoea wantu ndima na kulavya ugima wakwe kwajii ya kuohoa wantu wangi.” 46 Naho wakabua Yeliko, Yesu ekuwaho akahauka mwe mzi uwo na wahina wakwe hamwe na zumwezumwe da wantu, tuntu yumwe etangwaye Batimayo mwana wa Timayo ne kekaa khandakhanda ya sia akaombeza. 47 Batimayo ekusikiaho Yesu Mnazaleti emboka hantu aho, ne avoka kukema, “Yesu! Mwana wa Daudi! Nifii mbazil!” 48 Wantu wangi wakamwakia na kumwamba anyamae, akini ne aendee kukema, “Mwana wa Daudi, nifiiye mbazil!” 49 Yesu nee kagooka na kugombeka, “Mwetangeni.” Wakamwetanga yuda tuntu, nee wamwamba, “Ekhe moyo! Gooka akwetanga.” 50 Akatambika gwanda dakwe, akahauka kinyinyio na kumbasa Yesu. 51 Yesu ne amuza, “Wakunda nikugosoe mbwai?” Uyo tuntu akamwamba, “Mhinyi, nakunda nione.” 52 Yesu akamwamba, “Hita kuzumiiya

kwako kukuhonya." Ahoaho akoona, akamtongea Yesu na kuita nae.

11 Wekuwaho wa hehi na Yelusalemu, hehi ya mizi ya Betifage na Besaniya, kwe muima wa mizaituni. Yesu akawaagiia wahina wakwe waidi. **2** Akawamba, "Hitani mwe mzi wehehi yenu. Mkabua uko mwenda mbwiie mwanaphunda kazengetezwa, naho khazati kugosoewa ndima. Mchopoeni mkamweete. **3** Ati mntu akawauza, 'Kwambwai mwagosa ivi?' Mmwambe, 'Zumbe amkunda na enda amvuze isasa.'" **4** Naho, wakaita, wakambwiia mwanaphunda siai kafungwa he uvi. Wekuwaho wamchopoa, **5** wamwe wa wantu wekuwaho wagooka aho wakawauza, "Kwambwai mwamchopoa uyo mwanaphunda?" **6** Wahina wakawatambaisa inga viya wekwembigwavyo ni Yesu, naho wakawaeka waite. **7** Wakamwegaiia Yesu yuda mwanaphunda, wakatandika nguo uwanga ya yuda mwanaphunda, Yesu ne ekaa uwanga yakwe. **8** Wantu wangi watandaza nguo zao siai, watuhu nao watandaza vihuto vya miti wekusengayo mwe minda kwaajii ya kumtogo. **9** Wantu wose wekuongoao na wada wekuwabasao, wakalavya mgutio wakagombeka, "Zumbe atogolwe! Ajaiwe yuda ezae kwa zina da Zumbe! **10** Ujaiwe Uzumbe wezao wa zumbe Daudi tati yetu! Atogolwe Muungu mwe uko uwanga muno!" **11** Yesu akengia mwe mzi wa Yelusalemu, akaita mwe Nyumba ya Muungu na kukauwa kia kintu. Akini kwaviya ne diswa, akaita mwe mzi wa Besaniya hamwe na wahina wakwe kumi dimwe na waidi. **12** Msi wekutongeo wekuwaho wakauya kulawa Besaniya, Yesu akaumwa nsaa. **13** Aho kwa hae akaona mti umanyikanao kwa zina da mtini wenye mani mangi, ne aubasa aukaue inga enda apate tini. Ekubuah akauwii khauna tini iya manidu, kwaviya kisingi chakwe cha kuvyaa khakizati kubua. **14** Aho Yesu akawamba mtini, "Kuvokea ivyeo hadi misi zose khahana mntu endae ade tini kulawa kwako vituhu." Na wahina wakwe wakaitengeza mbui iyo. (aiōn 9:165) **15** Wakabua mzi wa Yelusalemu, Yesu akengia mwe Nyumba ya Muungu akavoka kuwaguusa wantu wose wekuwaho wakataga na kugua vintu. Akahitua meza za wada wabadiishao hea na kugwisa viti vya wada watagao suwa, **16** khakukunda mntu yoyose kwembokea kwe buha da Nyumba ya Muungu kudoa kintu chochose. **17** Naho ne awahinya, "Igondwa, 'Nyumba yangu yetangwa Nyumba ya kuvikia kwaajii ya wantu wa si zose!' Akini nywie muitenda phanga da wahokaji." **18** Waviki wakuu hamwe na Wahinyi wa Miko, wekutegezavyo mbui izo, wakavoka kuondeza sia ya kumkoma Yesu. Akini wakamuogoha Yesu kwaajii ya wantu wose wekuhondomaa kwa mahinyo yakwe. **19**

Ikubuah guoni, Yesu na wahina wakwe wakahauka mwe mzi uda. **20** Keokeo da mtungaihu, wekuwaho wakemboka ne wauwona uda mtini unyaa wose hadi kwe sina. **21** Petulo akakumbuka akamwamba Yesu, "Mhinyi, kaua uda mtini wekuubadiao lazi, unyaa!" **22** Yesu akatambaisa, "Mzumieni Muungu." **23** Nawamba kwei mntu akawamba muima unu, ng'oka uketambike mwe mazimshindo naye khana matumatu mwe moyo wakwe, akini akazumiia mbui zose agombekazo zagosoka, enda agosoewe mbui iyo. **24** Kwaajii iyo nawagombekani, mvikaho na kuombeza kintu chochose, zumiani kwamba mkihokea, nacho chenda kiwe chenu. **25** Nyie mgookaho kuvika, mwekeeni kia mntu mwekukubanangia chochose, ili Tati yenu mwe uwanga awaakee masa yenu. **26** Akini mwesekuwaekwa watuhu, hata Tati yenu mwe uko uwanga kwa Muungu khana awaakee masa yenu. **27** Naho wakabua Yelusalemu vituhu, Yesu ekuwaho akaita he Nyumba ya Muungu, Waviki wakuu na Wahinyi wa Miko na wadaa waongoezi wakambasa, **28** wakamuza, "Ni kwa udaho uhi wagosoa mbui izi? Naho ndai mwekukwekha udaho wa kugosoa mbui izi?" **29** Yesu akawatambaisa, "Nendaniwauze mbui mwenga, mkanitambaisa nami nendaniwambe nagosoa aya kwa udaho wa ndai. **30** Nigombekani, udaho wa ubatiizo wa Yohana walawa kwa Muungu au walawa kwa wantu?" **31** Wakavoka kuuzana, "Tikamba walawa uko uwanga kwa Muungu endaatuize, 'Kwambwai khamwekumzumia Yohana?" **32** Na tikamba, "Ulawiia kwa wantu." Wakaogoha zumwezumwe da wantu kwaajii wose wamzumia Yohana kwei ni muoni wa Muungu. **33** Aho wakamtambaisa Yesu, "Swie khatimanya." Yesu akawamba, "Mie nami khinaniwambe nagosoa mbui izi kwa udaho wa ndai."

12 Naho Yesu akavoka kugombeka nao kwa misimo, "Mntu yumwe kaima mnda wa mizabibu akazenga ukanto, na gatigati akagosoa hantu ha kukamuiia divai, akazenga mnaa aho. Naho akauzima uda mnda kwa waimi akatamba kuita si ya hae." **2** Kisingi cha ubosi chekubuah, akamwagiia mndima wakwe kwa wada waimi, amwetee fungu dakwe da ubosi da yuda mwenye mnda. **3** Wada waimi wakamwagiia, yuda mndima wakamtoa na kumvuza bua. **4** Mwenye mnda akamwagiia mndima mtuhu, uyu nae wakamtoa mwe mtwi na kumtenda vyesavyo kutama. **5** Yuda mwenye mnda akamwagiia mndima mtuhu, awo waimi wakamkoma na mwenye mnda akawaagiia watuhu wangi, wakatoigwa na wangi wakakomwa. **6** Mwenye mnda akasigaa na mntu yumwe ni mwanawe amkundisae. Nae akamwagiia uyo akagombeka, "Wenda wamtunye mwanangu!" **7** Akini wada

waimi wakaambizana, “Uyo ne mpazi haya timkome, upazi utende wetu.” 8 Kwaiyo wakamgwiya, wakamkoma na kumtambika chongoi ya uda mnda wa mizabibu. 9 Aho Yesu akawauza, “Mwenye mnda endaatende viivih? Endaeze awadagamize awo waimi na kuazimisha mnda uwo wa mizabibu kwa waimi watuhu. 10 Khamzati kusoma Maandiko aya? ‘Iwe dekuemewado na wazengi isasa diwa iwe kuu da khandani. 11 Zumbe ne mwekugosoa mbui inu, nado ni utangio kwetu!’” 12 Waviki wakuu, Wahinyi wa Miko na wadaa wamanya yakuwa msimo uwo wawausu, wakageeza kumgwiya akini wakaogoha zumwezumwe da wantu aho wakambada wakaita. 13 Naho, wamwe wa Mafalisayo na kizumwezumwe cha Helode, wakaagiwa kwa Yesu wamtege kwa mbui zakwe. 14 Wakambasa Yesu wakamwamba, “Mhinyi tamanya wee ni mntu mzumizi, ugombekaye ukwei. Naho khukauwa ukuu wa mntu yoyose, akini wahinya kwei sia ya Muungu. Ni vyedi kuiha kodi kwa Seuta mkuu wa Lumi? Tiihe hambu tesekuiha?” 15 Akini Yesu ne amanya uhokho wao. Akawatambaisa, “Kwa mbwai mwanigeeza? Nekhani sensi niikauwe.” 16 Wakamwegaiya sensi mwenga ne awauza, “Cheni na idi zina ni da ndai?” Ne wantambaisa, “Ni vya Seuta mkuu wa Lumi.” 17 Aho Yesu akawamba, “Ni vyedi mwekheni Seuta mkuu wa Lumi ayo yakwe na Muungu mwekheni yakwe.” Wakahondomazwa muno nae. 18 Naho, wamwe wa Masadukayo wamba khakuna kuyuyuka, wakambasa Yesu na kumuza, 19 “Mhinyi, Musa katiagiya ivi, ‘Mntu akauya na nyuma na kumbada mkaziwe kwesiho kuvyaa. Nduguye akundigwa amdoo yuda mvyee mwekufiwa ni mgosi, adahe kumvyai wana.’” 20 Naho nekuwa na ndugu mfungate, yuda wa bosi kategua, akauya na nyuma kwesiho kubada mwana. 21 Ndugu wakaidi naye akampaa yuda mvyee mwekufiwa ni mgosi, akini yee naye akauya na nyuma kwesiho kubada mwana. Viyaviya ndugu wa ntatu akauya na nyuma. 22 Wose mfungate wakauya na nyuma kwesiho kubada mwana. Ne yuda mvyee naye mwekufiwa ni mgosi akauya na nyuma. 23 Aho, msi wantu wendaho wayuyuke, mvyee uyo endaawe mkaza ndai? Kwaviya wose mfungate ne wamtegea.” 24 Yesu akawatambaisa, “Nye mwaga kwaviya khamanya Maandiko ya Muungu wala udaho wa Muungu. 25 Kwaviya wantu wendaho wayuyuke, khawana wategue wala kutegulwa, iya wendawawe inga wandima wa uwanga wa Muungu. 26 Akini mbui ya kuyuyuka kwa wekufao, khamzati kusoma mwe kitabu cha Musa hantu ambaho kada katundugua kekuwacho chaka moto? Muungu akamwamba Musa, ‘Mie ni Muungu wa Ibulahimu na Muungu wa Isaka na Muungu wa Yakobo.’” 27 Yee ni Muungu wa wantu wagima, na khio Muungu wa wada

wekuuyao na nyuma. Ivyo mbanikiwa muno!” 28 Mhinyi yumwe wa miko akabua hada, akategzeeza wahiganavyo. Ekuonaho Yesu kawatambaisa vitana yuda Sadukayo, ne ambasa Yesu na kumuza, “Mwe amli zose ni ihi ya bosi?” 29 Yesu akamtambaisa, “Mwiko mkuu ni unu, ‘Tegeezani nywie wantu wa Isilaeli! Zumbe Muungu yetu ni yumwe Zumbe ikedu. 30 Mkunde Zumbe Muungu yako kwa moyo wako wose, kwa muye wako wose, na kwa akii zako zose na kwa mdundugo wako wose.’” 31 Ya kaidi ni inu, ‘Mkunde mwenzi inga wekundiavyo mwenye.’ Khahana mwiko mkuu mtuhu kusima inu miidi.” 32 Aho yuda Mhinyi wa Miko akamwamba Yesu, “Kugombeka vyedi Mhinyi! Muungu ni yumwe du na khahana Muungu mtuhu inga yee. 33 Naho yakundigwa mntu amkundise Muungu kwa moyo wose na kwa muye wose na kwa akii zose na kwa udaho wose, na kumkundisa mwenzi inga wekundiavyo mwenye. Mbui inu ni ntana kusima malavyo na ntambiko.” 34 Yesu ekuonaho yuda mntu kamtambaisa kwa kutintimaa akamwamba, “Wee khuho hae na Uzumbe wa Muungu.” Bada ya mbui ida khahana mntu yoyose mwekudaha kumuza vituhu mbui yoyose. 35 Naho kisingi Yesu ekuwaho akahinya kwe Nyumba ya Muungu, akawauza, Wahinyi wa Miko wamba Klistu ni mwana Daudi? 36 “Daudi mwenye akaongoewa na Muye wa Muungu akagombeka. ‘Zumbe akamwamba Zumbe yangu, ekaa mkono wangu wa kudiiya, hadi nendaho niwaike wamasa wako asi he miundi yako.’” 37 Daudi mwenye amwetanga Klistu Zumbe, aho Klistu endaawe viivih mwanawe?” Zumwezumwe da wantu ne wakamtegeza Yesu kwa kinyemi. 38 Yesu ekuwaho awahinya ne awamba, “Ekaani hae na Wahinyi wa Miko, wakundao kwemboka emboka wevaia khanzu zilehazo na kuuguswa ni wantu kwa tunyo mwe gwiyo, wakunda kwekaa hantu ha tunyo he Nyumba ya kukintania Wayahudi, 39 Wakunda kwekaa viti vya hemeso mwe Nyumba ya kuvikia Wayahudi na kwekhigwa phasi ha ntunyo mwe ntafano. 40 Wawakonya wavyee wekufiwao ni wagosi naho wegosa kuvika kisingi kilehacho! Msi wa kuamuiwa wendawekwigwe sugusa khai!” 41 Yesu ekuwaho kekaa hehi na ntezu ya kuikia malavyo. Akawakauwa wantu wangi waavyavyo hea na kuika mwe ntezu ya Nyumba ya Muungu. Wantu wenye mai nyingi walavya hea nyingi. 42 Aho ne eza mmaa yumwe mkiwa mwekufiwa ni mgosi, akalavya sensi mbii za shaba. 43 Aho Yesu akawetanga wahina wakwe akawamba, “Nawamba kwei mmaa uyu mkiwa mwekufiwa ni mgosi kagea hea nyingi mwe ntezu ya malavyo kusima wose wekulavyao. 44 Kwaviya Watuhu wose walavya mai zekuamemeazo, akini

uyu mmaa mwe ukiwa wakwe kalavya vyose ekuwavyonavyo hata kia chakumwambiza mwe ugima wakwe."

13 Yesu ekuwaho akalawa mwe Nyumba ya Muungu, mhina wakwe yumwe akamwamba, "Mhinyi, kauwa maiwe aya na mazengo yekuwavyo matana muno!" **2** Yesu akamwamba, "Wayona mazengo aya makuu? Khahana hata iwe dimwe dendado disigae uwanga ya ntuhu, yose yenda yatulwe." **3** Yesu ekuwaho kekaa kwe muima wa Mizaituni na kukauwa Nyumba ya Muungu, Petulo na Yakobo na Yohana na Andulea wakamuza kwesiho wantu. **4** "Tambie mbui izo zendazilawie ini? Na utangio wakwe ni uhi wendaoutimanyise mbui izi zihahi kubua?" **5** Yesu akavoka kuwamba, "Ekauweni mwesekutiwa ni mntu yoyose." **6** Wangi wendaweze na kwetanga kwa zina dangu, kia yumwe endaagombeke, "Mie nee Klistu!" Naho wendawawatie wantu wangi. **7** Mwendaho mtegeeze mbui ya khondo kwa hae na vuzo da khondo kwa hehi, mweyekuwa na maatu. Mbui izo zakundigwa zilawie, akini mbui iyo khaizati kubua. **8** Wantu wa si mwenga wendawatowane na wantu wa si ntuhu, wantu wa useuta umwe wendawatoane na wantu wa useuta mtuhu, naho kia hantu hendahawe na mizingizo ya inusi na baa da saa. Mbui izi inga usungu wa bosi wa kuvyaa mwana. **9** Akini nywie mwekae meso, kwaviya wendawawegae mwe kifungo na kuwatoa mwe Nyumba ya kuvikia Wayahudi. Mwendamwegalwe hemeso ya wagookezi na maseuta kwaajii yangu, ili muwambe Mbui Yedi. **10** Akini yakundigwa Mbui Yedi ya Muungu ivoke kubiikiwa kwa wantu wa si zose, kabla khakizati kubua kisingi cha kisikizi. **11** Naho wendaho wawagwiye na kuwegaa ha kuamuiwa, msekuogoha mwendamgombeke mbwai, mda wendaho ubue dodose mwendado mwekhiuwe gombekani. Kwaviya khio nywie mgombekao iya ni Muye wa Muungu. **12** Mntu endamhituke nduguye akomwe, na tate endamhituke mwanawe. Wana nao wendawawahituke wavyazi wao na kuwakoma. **13** Wantu wose wendawakimwe na nywie Kwaajii yangu, iya mwendaazimize adi kubua kisikizi ne endaye aoholwe. **14** Muonaho ufyaimu ugooka hantu kwesiho hakwe, mmanyiisi na amanye mana yakwe aho, wada weiho Uyahudi waguukie kwe miima. **15** Yuda mwe uwanga ya nyumba asekuseea asi kwengia mwe nyumba yakwe kudoa kintu chochose. **16** Mntu mwekuwa mwe mnda asekuuya kaya kudoa nguo yakwe. **17** Wendawakione wavyee wekwenuao maifu na wada waokhesao msi uwo! **18** Mwombezeni Muungu mbui izo zesekulawia kisingi cha pheho. **19** Kwaviya kisingi icho chendakiwe cha suuba kuhu na khakizati kulawiiya kuvokea aho Muungu ekugosavyo inusi hadi ivyeo, naho

khayezakulawiiya vituhu. **20** Inga Zumbe khekuwa ahunguzie misi izo khahana mntu mwendayeao holwe, akini kwaajii ya wantu wakwe ekuwasaguao Zumbe kahunguza misi izo. **21** "Naho mntu yoyose akawamba, Kauwani, Klistu yuaha, au yu kuda! Msekuzumiia." **22** Kwaviya wendawalawie maklistu wa utizi na waoni wa utizi, wendawagosoe vihii na viozo, kwaajii ya kuwaza hata wada wekusagulwao ni Muungu, inga vikadahika. **23** Akini nywie mwekae meso! Kwaviya khiwagombekea mbui zose zekuwazo khazizati kulawiiya. **24** "Mwe misi izo, suuba kuhu ikemboka, zua dendadigewe kiza na mweenge khauna ung'ae." **25** Ntoondo zendazigwe kulawa uwanga na mdundugo wa uwanga kwe mazunde wendausingisike. **26** Aho Mwana wa Mntu endaalawie akeza mwe mazunde kwa udaho na ukuu. **27** Naye endaaawagiye wandima wa uwanga kwa Muungu kuwaika hamwe wantu wose wekusagulwao ni Muungu, kulawiiya phande zose nne za inusi, kulawiiya kisikizi cha inusi hadi kisikizi cha mmbingu. **28** "Kauwani msimo wa mti wa mtini na mwehinye. Aho matambi yakwe yavoka kutenda mateke na kulavya mani, mmanye kisingi cha ubosi kihehi." **29** Viyaviya muonaho mbui izo zikalawia, mmanye Mwana wa Mntu yu hehi kwe uvi kweza. **30** Nawamba kwei, kivyazi iki khakinachembeke hadi mbui zose izo zendahozilawie. **31** Mmbingu na inusi zendazembeke, akini mbui zangu khazina zembeke katu. **32** Akini khahana mntu amanyae msi na saa hata wandima wa uwanga kwa Muungu, na Mwana khamanya, iya Tate ikedu ne amanyae. **33** Muwe tayali kwaviya khammanya kisingi icho chenda kibue ini. **34** Yendaiwe inga mntu alawaye kaya na kuita ntambo akawabadia wandima wakwe waikaue na waigooke, kia yumwe akamwekha ndima yakwe yakugosoa, akamwamba yuda semgoja "Asekugona." **35** Mwekae tayali kwaviya khammanya mwenye kaya endaaue ini, yadahika ni guoni, kio kikuu, keokeo da mtungaihu au keo. **36** Mwekae tayali ili akeza vuupu asekweza akawabwiiya mgona. **37** Niwambavyo nywie nawamba wose, mwekae tayali!

14 Nezisigaa misi miidi kabla khaizati kubua sikukhuu ya Pasaka na ya mabumunda yesayokugewa hamila. Waviki wakuu na wahinyi wa miko wakaondeza sia ya kumgwiya Yesu kwa unyanyi na kumkoma. **2** Akini wakamba, "Teseikumgiya kisingi cha sikukhuu ya Pasaka, wantu wesekweza wakatikweea khumbizi." **3** Yesu ne yumwe mzi wa Besaniya, mwe nyumba ya Simoni mntu mwekuwa na utamu wa nyoka. Aho Yesu ekuwaho akada khande ne engia mvyee yumwe mwekuwa na nchupa ya iwe yetangwayo alibasta yenye mavuta yanukhiayo vitana ya hela nyingi. Akaitua ida nchupa na kumwetiia mavuta Yesu mwe mtwi. **4**

Wamwe wa wantu wekuwaho aho wakakimwa na mbui ida wakauzana, "Kwambwai mavuta aya matana yaga buebue?" 5 Mavuta ayo ne yadahika kutangwa kwa sensi nyingi na sensi izo wakekhigwa wakiwa!" Wakamwakia yuda mvyee. 6 Akini Yesu akawamba, "Mweekeni kwambwai mwampisha? Kanigosweea mbui ntana. 7 Wakiwa mnao misi yose, mwadaha kuwaambiza kisingi chochose mkundacho. Akini mie khinaniwe hamwe na nywie misi yose. 8 Mvyee uyu kagoso viya ekudahavyo, kaongoa kuusisa mwii wangu mavuta kwaajii ya kuandaia maziko yangu. 9 Nawambeni kwei, hantu hohose mwe inusi Mbui Yedi yendaho ibikiwe, mbui inu ekugosoayo uyu mvyee yenda itamwiiwe kwa khumbuso da yuda mvyee." 10 Naho Yuda Isikaliote yumwe wa wada wahina kumi dimwe na waidi, akaita kwa waviki wakuu ili kumhituka Yesu. 11 Waviki wakuu wekutegeezaho mbui izo, ne wawa na nyemi, wakamwika kiaga cha kumwekha hela. Aho Yuda akavoka kuondeza phasi ya kumhituka Yesu. 12 Mwe msi wa bosi mwe sikukhuu ya mabumunda yesayokugewa hamila, kisingi ambaho mwanangoto wa Pasaka adumulwa singo, wahina wakwe wakamuza Yesu, "Wakunda tikwikie hahi ntafuno ya Pasaka?" 13 Naho Yesu akawagiiya wahina wakwe waidi, akawamba, "Hitani kwe mzi na umo mwendamkintane na mgosi yumwe kenua biga da mazi. Mtongeeni, 14 hadi mwe kaya endayoengie, mkamwambe mwenye kaya, 'Mhinyi amba, nihahi gati nendaho nidiie khande ya Pasaka hamwe na wahina wangu?' 15 Naye enda awonyeshe gati kuu yeuko uwanga kwe goofa chekuikwacho tayali, tiikieni umo." 16 Wahina wakahauka wakaita kwe mzi, wakabwiiya kia kintu nsawa inga Yesu ekuwagombekeavyo. Ne waiika ntafuno ya sikukhuu ya Pasaka. 17 Yekubuaho guoni Yesu akabua hamwe na wahina wakwe kumi dimwe na waidi. 18 Wekuwaho wakada khande Yesu akawamba, "Kwei nawamba yumwe yenu mda nami, enda anihituke." 19 Wada wahina wakagumia mioyo wakamuza Yesu yumweyumwe, "Hambu, ni mie?" 20 Yesu akawatambaisa, "Ni yumwe gatigati yenu nywie kumi dimwe na waidi, ni yuda agintae bumunda hamwe na mie mwe bakui. 21 Kwei Mwana wa Mntu aita kuuya na nyuma inga yekuandikwavyo mwe Maandiko ya Muungu, akini endaakione mntu yuda amhitukae Mwana wa Mntu! Ebae mntu uyo khekuwa avyaigiwe!" 22 Wekuwaho wakada, Yesu akadoa bumunda akatogoa, akadibendua na kuwekha wahina wakwe, akamba, "Doani unu nee mwii wangu." 23 Naho akadoa kikombe cha divai, akamtogoa Muungu na akawekha wose wakadomea kulawa mwe kikombe icho. 24 Akawamba, "Inu ne phome yangu ya Agane yetikayo kwaajii ya wantu wangi." 25 Nawamba kwei,

"Khinanidomee vituhu divai inu ya mzabibu hadi misi ida nendayo nidomee uhya mwe Uzumbe wa Muungu." 26 Naho wakatoa wiya, wakahauka wakaita kwe Muima wa Mizaituni. 27 Yesu akawamba wahina wakwe, "Nywie nyose mwendamnibade, kwaviya Maandiko ya Muungu yamba 'Nenda nintoe mwiisi, na ngoto zenda ziangadike uko na uko.' 28 Akini nendaho niyuyuke nenda niwaongoe kuda Galilaya." 29 Petulo akawamba Yesu, "Inga wose wendaho wakubade, mie khina nikubade katul!" 30 Yesu akawamba Petulo, "Kwei nakwamba kio iki, zogoo khadizatikukema maa mbii, wendaunimeme maa ntatu." 31 Akini petulo akaendee kugombeka, "Hata inga nikakudigwa niuye na nyuma hamwe nawe, khina nikubade katul." Naho Wahina wose wakagombeka inga ivyo. 32 Aho, wakabua he kamnda wetangwao Gesemane, Yesu akawamba wahina wakwe, "Ekaani aha, kisingi mie navika." 33 Naho akawadoa Petulo, na Yakobo na Yohana. Akavoka kuugumia muno mwe moyo wakwe na kuangadika. 34 Ne awamba, "Nina usungu mno mwe moyo wangu hehi na kunikoma. Mwekae aha na mwekae meso." 35 Akaita mbee kidodo, aketambika asi akagonea ifu, akavika amba, ati ikadahika asekwembokea mda uwo wa suuba. 36 Akagombeka, "Abba, Tate mbui zose kwako zadahika. Uniusie kikombe iki, iya khio inga nikundavyo mie iya ukundavyo weye." 37 Naho akauya na kuwabwiiya wada wahina wakwe watatu wagona, akawamba Petulo, "Simoni, kugona? Khamwekudaha kwekaa meso hata saa mwenga?" 38 Naho akawamba, "Mwekae meso na kuvika mwešekweza kwengia mwe mageezo. Muye wakunda, iya mwii khauna udaho." 39 Akenda kuvika vituhu na kuuiya mbui ziyaziya. 40 Naho akauya vituhu, akawabwiiya wagona kwaviya meso yao ne yamema usisiza, khawokumanya da kumtambaisa. 41 Ekwezaho maa ya ntatu akawamba, "Khamzati kwenuka na kuhumwiiza? Isasa enukani! Mda ubua kauwa, Mwana wa Mntu agewa mwe mikono ya wagosoa mavigaviga. 42 Enukani! Titeni! Kauwani, yuda mntu endaanihituke yuhehi." 43 Yesu ekuwaho agombeka, Yuda, yumwe wa wada wahina kumi dimwe na waidi akabua, keza hamwe na zumwezumwe da wantu wekwenuao mapange na malungu. Wantu awo ne waagiwa na waviki wakuu na wahinyi wa miko hamwe na wadaa wagookezi. 44 Naho Yuda Isikaliote nee kawekha utangio, "Nendaye nimuumbatie uyo mgwiieni na kumwiika asi ya ugoja." 45 Yuda Isikaliote ekubua haka kwa Yesu, akawamba "Mhinyi!" Naho akamuumbatia. 46 Wada wantu wakamgwiya Yesu na kumwiika asi ya ugoja. 47 Yumwe da wada wekuwaho wagooka aho hamwe na Yesu, akasomia paange dakwe akamtoa yumwe wa wandima wa mviki

mkuu, akamsenga gutwi. 48 Naho Yesu akawamba, “Uwo mweza na mapaange na malungu kunigwiya inga mie ni mhokaji? 49 Kia msi ni hamwe nanywi kahinya mwe Nyumba ya Muungu, khamwekunigwiya, akini isasa yakundigwa Maandiko ya Muungu yaiganie.” 50 Aho wahina wakwe wose wakambada na kuguuka. 51 Nekuwa na mbwanga yumwe ekuwaye akambasa Yesu nekavaa shuka ing'aayo. Naho wakageeza kumgwiya. 52 Akini yee akachopoka na kuwabadia shuka ing'aayo, akaguuka kwesaho nguo. 53 Naho Yesu akegalwa mwe kaya ya mviki mkuu, aho akakintana na waviki wakuu wose, wadaa na wahinyi wa miko ne wakintana. 54 Petulo akambasa Yesu kwa hae, akengia mda mwe buha da mviki mkuu, akekaa hamwe na wasemgoja aotea moto. 55 Waviki wakuu na wantu wose wa baaza kuu wakoondeza, mbui zendazo zimtende Yesu akomwe, akini khawekupata. 56 Wantu wangi nee wagooka na kugombeka uhokho, akini mbui zao khazekuhigana. 57 Naho watuhu wakagooka wakagombeka uhokho, 58 “Timtegeeza mntu uyu akagombeka, 'Nenda niibanange Nyumba inu ya Muungu yekuzengwayo na wantu, na kwa misi mitatu nendaniizenga tuhu yesayokuzengwa na wantu.’” 59 Akini ata ivyo mbui zao khazekwevana. 60 Nee Mviki Mkuu akagooka hemeso yao akamuza Yesu, “Wee khutambaisa mbui? Wantu awa waona mbwai kwako?” 61 Akini yee akanyamaa khekuaudia hata mbui mwenga. Mviki Mkuu akamuza vituhu, “Uwo wee nee Klistu, Mwana wa Muungu Mkuu?” 62 Yesu akatambaisa, “Ehe, nee mie, na nywie mwendammwoone Mwana wa Mntu kekaa phande ya kuume ya Muungu mwenye udaho, eza na maangwi ya uwanga.” 63 Aho Mviki Mkuu akatatua khanzu yakwe, akamba, “Taonda mbui yani vituhu za kumkoea masa?” 64 Mtegeezeni amdumuavyo Muungu. Nyie mwaona viwili? Wose wakakunda akomwe. 65 Aho wamwe wa wantu wakavoka kumswiia ovu, wakamfunga buye, wakamtoa na kumwamba, “Otea ni ndai mwekukutoa!” Hata wakinsemgoja wakamdoa, wakamtoa vibao. 66 Petulo ekuwaho yu ahosi kwe buha, yumwe wa wandima wa kivyee wa Mviki Mkuu akeza. 67 Ekumuonaho Petulo aotea moto, akamkauwa akamwamba, “Hata wee nee uhamwe na Yesu Mnazaleti.” 68 Akini Petulo akaamea, “Hangi na khimanya ugombekayo!” Naho Petulo akahauka akaita hantu ha kwengiia, aho zogoo dikakema. 69 Yuda mndima ekumwonaho vituhu Petulo akavoka vituhu kuwamba wantu wekuwao wagooka aho, “Mntu uyu ni yumwe yao.” 70 Petulo akaamea vituhu. Mda mcheche wantu wekuwaho wagooka aho wakamwamba Petulo, “Kwei wee ni yumwe yao, kwaajii wee ni Mgalilaya.” 71 Iya Petulo akavoka kweyapiza na kuaha akamba, “Miye khimanya mntu uyu

mgombekaye mbui zakwe.” 72 Aho zogoo akakema maa ya kaidi, Petulo akakumbuka viya Yesu ekuwavyo kamwamba, “Zogoo khadizati kukema maa mbii, wendauniemee maa ntatu.” Petulo akahomokeza mesozi.

15 Kwekuchaho waviki wakuu na wadaa na wahinyi wa miko na Baaza kuu dose, wakamgea phingu Yesu wakamwegaa na kumwekhiiza kwa Pilato. 2 Pilato akamuza Yesu, “Wee ni Seuta wa Wayahudi?” Yesu akamtambaisa, “Eeh inga ugombekavyo wee!” 3 Waviki wakuu wakamuahia Yesu kwa mbui nyingi. 4 Pilato akamuza vituhu Yesu, “khuna da kutambaisa? Kauwa wakusakiavyo mbui nyingi kwaajii yako.” 5 Akini Yesu khekutambaisa mbui hata Pilato akahondomaa. 6 Kia kisingi cha sikukhuu ya Pasaka, Pilato kawa na mazweea ya kuwavuguiya mfungwa yumwe wamkundaye. 7 Kisingi icho nekuwa na mntu yumwe etangwae Balaba, nee kafungwa hamwe na wantu wekuaho waemea uongooezi, naho nee wagosoa ukomaji kwe khumbizi. 8 Wantu wangi wakaita kwa Pilato wakamwombeza awagosome inga yekuwavyo akawagosome. 9 Pilato akawauza, “Mwakunda niwavuguiye Seuta wa Wayahudi?” 10 Pilato kagombeka ivyo kwaajii kamanya pwii waviki wakuu wamwegaa Yesu kwakwe kwaajii ya kinyuu. 11 Akini waviki wakuu wakawatenda wantu watoe vuzo ili wamwombeze Pilato awavuguiye Balaba. 12 Pilato akawauza wantu vituhu, isasa mwakunda nigosome mbwai mntu uyu mwetangwae Seuta wa Wayahudi? 13 Wantu wose wakatowa mgutio vituhu, “Mgong'ondeni kwe mhamba!” 14 Akini Pilato akawauza, “Kwambwai! Kagosoa ufayimu wani?” Akini wowo wakaendee kutoa mgutio, “Mgong'ondeni he mhamba!” 15 Pilato akakunda kutamiza dia zumwezumwe da wantu. Aho nee amwekea Balaba kulawa mwe kifungo. Akakunda Yesu atoigwe ngoda wakabinda wamgong'ondee he mhamba. 16 Naho asikai wakamwegaa Yesu mwe buha da nyumba ya mkuu wa si ya Yudea, aho wakakintana kikosi kigima cha asikai. 17 Wakamvika gwanda da zambalau, wakagosoa kintu inga khofia ya useuta yekugosolwayo na miwa, wakamwiikia Yesu mwe mtwi wakwe. 18 Wakavoka kumuugusa, “Mwinyi Seuta wa Wayahudi!” 19 Wakamtoa kwa ngoda ya lasi mwe mtwi, wakamswiia ovu, wakamkintia mavindi na kumwenamia. 20 Wekubindaho kumbea, wakamhambua dia gwanda da zambalau, wakamvika nguo zakwe, naho wakamlavya chongoi, wakamwegaa kumgong'ondea mwe mhamba. 21 Wekuwaho siai, wakakintana na mntu yumwe etangwae Simoni, mwenyezi wa Kilene. Yee nee ni tate yao Alekizanda na Lufu na kisingi icho ne akalawa chongoi ya mzi. Nee asikai wamshutiza audoe mhamba wa Yesu. 22

Naho wakamwegaa Yesu adi hantu hetangwaho Goligota, mana yakwe hantu ha Fufu da Mtwi. **23** Wakamwekha divai yekuhanganywayo na mzihi wetangwao manemane, akini yee akaemea kuidomea. **24** Nee wamgong'ondea he mhamba, wakapangana nguo zakwe na kuzitoa kula kia yumwe adoe yakwe. **25** Neiwa saa ntatu da keo wekumgong'ondeavyo he mhamba. **26** Nee yagondwa masa yakwe ni, "Seuta wa Wayahudi." **27** Wamgong'ondea he mhamba na wahokaji waidi kia yumwe mhamba wakwe, yumwe phande ya kudiya na mtuhu phande ya kumoso. **28** Aho Maandiko ya Muungu yakaigania yambayo, "Kaikwa kundi dimwe hamwe na wahokaji." **29** Wantu wekuwao wemboka hantu hada wakamdumua wakasingisa mitwi yao na kugombeka, Ehee! Wee mtua Nyumba ya Muungu na kuizenga kwa misi mitatu. **30** Isasa weohoe mwenye seea he mhamba! **31** Na viyaviya waviki wakuu hamwe na wahinyi wa miko wakammba wakamba, "Kawaohoa wantu watuhu akini khadaha kweohoa mwenye!" **32** Ati yee ni Klistu ekusagulwae ni Muungu, Seuta wa Isilaeli! Na asee kulawa he mhamba tione na kumzumia hata wada wantu wekugong'ondwao wose he mhamba nae wakamdumua. **33** Kuvokea saa mtandatu wa musi adi saa kenda kiza kikuu kikagwa mwe si yose. **34** Saa kenda guoni Yesu akaiya kwa mgutio mkuu, akamba, "Eloi, Eloi, lama, Sabakitani?" Mana yakwe, "Muungu yangu, Muungu yangu mbona kunibada?" **35** Wamwe wa wantu wekugookao hada wekutegezaho ivyo wakamba, "Tegeeza! Amwetanga Elia." **36** Mntu yumwe akamgukia akaginta dodoki mwe divai yekusasayo, akaika uwanga ya lasi akamwekha adomee akamba, "Hembu timkaue ati Elia endaeze amseeze he mhamba!" **37** Yesu akakema kwa mgutio mkuu, akauya na nyuma. **38** Nee pazia kuu da Nyumba ya Muungu dikatatuka ntii mbii kulawa uwanga hadi asi. **39** Mkuu wa maasikai ekuwaye kagooka hemeso ya mhamba wa Yesu, ekuonaho Yesu kauya na nyuma kwa namna iyo, akamba kwei mntu uyu nekawa Mwana wa Muungu. **40** Wawa aho wavyee wekukauwao kwa hae gatigati yao nee ni Maliamu Magidalena na Salome na Maliamu mami yakwe Yakobo mvunawe da Yusufu. **41** Awa ne wambasa Yesu ekuwaho Galilaya na kumwambiza. Nekuwa na wavyee watuhu wangi na wangi wekwezao Yelusalemu hamwe nae. **42** Kisingi cha guoni ne kibua kae, na iyo neiwa msi wa maandaiyo yani msi uongoao Msi wa Kuhumwiiza. **43** Aho akeza Yusufu mwenyezi wa Alimatayo ne ni mntu wa Baaza kuu da Wayahudi, mtunywao muno. Yee pia nee akakauwiya kweza kwa Useuta wa Muungu. Nee aita kwa Pilato kwesiho kumwogohoa, akamwombeza ekhigwe mwii wa Yesu. **44**

Pilato akahondomaa ekusikihao kuwa Yesu kabindiikia kae kuuya na nyuma. Nee akamwetanga mkuu wa maasikai na kumuua ati Yesu kauya kae na nyuma mwandoose. **45** Pilato ekwembigwaho na uyo mkuu wa maasikai Yesu kauya kae na nyuma, akamkunda Yusufu adoe mwii wakwe. **46** Aho Yusufu akagua sanda, akauseeza asi uwo mwii akauvungavunga sanda. Akauwiika mwe mbia dekuwado digosolwa kwe iwe cha ukuu naho akatongoosa iwe kuu hemeso ya uvi. **47** Na Maliamu Magidalena na Maliamu mami yakwe da Yusufu wakahaona aho ekugonezwaho.

16 Msi wa Kuhumwiiza yekwembokayo Maliamu Magidalena na Salome na Maliamu mami yakwe da Yakobo wakagua mavuta matana, ili wakausise mwii wa Yesu. **2** Keo da mtungaihu msi wa bosi wa juma wakabua he mbia zua dekuvokaho kulawa. **3** Naho wekuwaho siai nee watamwiya, "Ndai mwendaatusie dia iwe he uvi wa mbia?" **4** Akini wekukauwaho wakooni iwe diusigwa kae nado nee diwa kuu muno. **5** Wekwengiaho mda mwe mbia wakomwona mbwanga yumwe kavaa khanzu yekung'aayo kekaa phande ya kuume wakahondomaa muno. **6** Akini uyo mbwanga akawamba, "Msekuhondomaa. Mwamwondeza Yesu wa Nazaleti mwekugong'ondewa he mhamba. Kayuyuka, khayuhu aha, kauwani hantu ekugonezwaho. **7** Hitani mkawambe wahina wakwe hamwe na Petulo awaongwea kuita Galilaya. Uko mwendamwone inga ekuwagombekeavyo." **8** Naho wakalawa hada he mbia na uguuko, mana nee wakazingiza kwa maatu na kuhondomaa khawekumgombeke mntu yoyose mbui iyo, kwaajii waogohoa mno. **9** (note: The most reliable and earliest manuscripts do not include Mark 16:9-20.) Yesu ekuyuyukaho msi wa bosi wa juma aho akeonyesha kwa Maliamu Magidalena, ambae Yesu kamlavya mazaiko mfungate. **10** Maliamu Magidalena akaita, akawamanyisa wada wekuwaho wakitongea na Yesu na kisingi icho newawa na bwaimbo na kuiya. **11** Akini wekusikihao Yesu yu mgima ati Maliamu Magidalena kamwoona, khawokumzumiiya. **12** Yekwembokaho ayo Yesu akawalawia wahina waidi kwa cheni kituhu. Wahina awo newawa wakaita chongoi ya mzi. **13** Naho wakaita kuwamba wezwao akini wowo khawokuwazumiiya. **14** Mda mcheche Yesu akawalawia wahina kumi dimwe na mwenga wekuwaho hamwe wakada khande. Akawaakia muno kwaajii ya kwesekuzumiiya kwao na khani zao, mana khawokuwazumiiya wada wekuwao wamwona bada ya kuyuyuka. **15** Aho akawamba, "Hitani mwe inusi yose mkabiike Mbui Yedi kwa wantu wose. **16** Mwendaazumiiye na kubatizwa endaaoholwe. Mwesekuzumiiya endaaamuiwe.

17 Na vihii ivi vyenda vitongeane na wada wazumiiyao kwa zina dangu. Wenda walavye mazaiko na wendawatamwiye kwa vitamwiiwavyo vihya. 18 Wendawatoze nyoka au kudomea kintu chochose cha kukoma khakina kiwakome, wendawawaikie watamu mikono nao wendawahone.” 19 Naho Zumbe Yesu ekubindaho kugombeka nao akadoigwa kwe maangwi akekaa phande ya kuume ya Muungu. 20 Wahina wakaita wakabiikia kia hantu, Zumbe akagoso ndima hamwe nao kuika vitana mbui izo kwa vihii vyekutonganavyo nao.

Luka

1 Mkuu Teofilo. Kwaviya, wantu wangi wekaa na kuandika mbui ziya zekulawiiyazo umu mwetu. **2** Waandika inga tekugombekwavyo na wada wekuonao mbui izo kwa meso yao kuvokea aho bosi mwe ndima ya Yesu. Awo nee wekubiikiyao mbui ya Yesu. **3** Iyvo mkuu Teofilo, tekubindaho kusunguumanya mbui inu kwa akii kuvokea aho bosi, khiona ni vitana na miye nikuandikie mbui izi kwa vitana, **4** nawe udahe kumanya ukwei wa mbui zose wekuhinywazo. **5** Kisingi Helode ekuwaho seuta wa si ya Yudea nekuwa na mviki yumwe zina dakwe Zakalia, wa kizumwezumwe cha uviki cha Abiya. Mkaziwe nee aketangwa Elizabeti, nae nekawa wakolwa da mviki Haluna. **6** Wose waidi wekaa inga viya wekukundigwavyo ni Muungu, wekaa kwa kutongea miko na miagiyo yose ya Zumbe kwesaho waa. **7** Khawokuwa na wana kwaviya Elizabeti nee khana uvyazi, na wose waidi nee ni wadaa. **8** Msi umwe, Zakalia yekuwaho zamu yakwe ya kugosoa ndima ya uviki mwe Nyumba ya Muungu, **9** kulawana na mazweeya ya waviki, Zakalia akasagulwa kwa kutoewa kula kwengiye mwe Nyumba ya Zumbe kufukiza ubani. Iyvo Zakalia akengia mwe Nyumba ya Muungu. **10** Zumwezumwe kuu da wantu nee wakintana chongoi wakavika kisingi icho cha kufukiza ubani. **11** Mndima wa uko uwanga kwa Muungu wa Zumbe akamwawiiya uko gati, akagooka phande ya kuume wa ingo da kufukizia ubani. **12** Zakalia ekumuonaho yuda mndima wa uko uwanga kwa Muungu, akavituka na akaogoha muno. **13** Iya mndima wa uko uwanga kwa Muungu akamwamba, Zakalia, "Usekuogoha Kwaviya Muungu kautegeeza uviki wako, na mkazio Elizabeti endaakuvyaiye mwana kigosi, nawe wendaumwetange zina dakwe Yohana. **14** Nawe wendauwe na kinyemi kikuu na wantu wose wendaawawe na kinyemi kwaajii ya kuvyaiywa kwakwe. **15** Endaawe mkuu hemeso ya Zumbe. Khanaadomee divai wala phombe, naho endaamemeezwe Muye wa Muungu kuvokea mwe ifu da mami yakwe. **16** Endaawavuze wantu wangi wa Isilaeli kwa Zumbe Muungu yao. **17** Endaamwongwee Zumbe, naho endaawe na udaho na muye inga viya Eliya. Endaawaike hamwe vituhu tate na wana wao, endaawagoswee wesaokuzumiiya wawe na umanyi wa wantu wedi, na kumwiikia Zumbe wantu wendaowawe tayali kumhokea." **18** Zakalia akamwamba yuda mndima wa uko uwanga kwa Muungu, "Nendanimanye viivih mbui inu ati nia kwei? Kwaviya miye ni mdaa, naho mkazangu nae ni mdaa." **19** Mndima wa uko uwanga kwa Muungu akamtambaisa, "Miye ni Gablieli, mndima wa Muungu na khiagiwa nitamwiiye nawe

nikwambe mbui yedi. **20** Kwaviya khwekuzumiiya mbui zangu zendazozilawiiye kwa kisingi chakwe. Iyvo khaunaudahe kutamwiiya adi ayo nekugombekayo yendahoyaiganie." **21** Kisingi kiya, wada wantu wekuwao wakamhafiza Zakalia uku wahondomaa kwa kucheewa kulawa kwakwe mwe Nyumba ya Muungu. **22** Ekulawaho chongoi khakudaha kutamwiiya kwaajii nekawa akatamwiiya nao kwa utangio. Wantu wakamanya kinagabaga kuna ekuonado mwe Nyumba ya Muungu. Kwaviya nee atamwiiya nao kwa mikono. **23** Zamu yakwe ya kugosoa ndima yakwe yekusiaho, akauya kaya kwakwe. **24** Kisingi kwemboka, Elizabeti akenua ifu, nae khukulawa kaya kwakwe kwa kisingi cha miongo mishano. **25** Akagombeka, "Zumbe ivi nee ekunigosweeavyo kisingi iki, kanikauwa na kunisia soni yangu ya kwesekuvyaa nekuwayo nayo hemeso ya wantu." **26** Yekubuwa muongo wa mtandatu, mndima wa uko uwanga kwa Muungu etangwaye Gablieli nekaagiwa ni Muungu aite kwe mzi zina dakwe Nazaleti uko si ya Galilaya, **27** kwa mndee yumwe mwenye kiwaa etangwae Malia, mwekuwaye kaombwa na mntu yumwe zina dakwe Yusufu wa kolwa da Daudi. **28** Mndima wa uko uwanga kwa Muungu akamlawiiya Malia akamuugusa, "Ewe mwekujaiwaye wedi na Muungu, Zumbe yu hamwe nawe." **29** Malia ekusikiaho mbui izo neawa na maatu, akamamakhanya mbui izi zina mana yani? **30** Mndima wa uko uwanga kwa Muungu akamwamba Malia, "Usekuogoha kwaviya Muungu kakujaiya wedi wakwe, **31** Wendawenu ifu, naho wendaavyae mwana kigosi, na zina dakwe wendaumwetange Yesu. **32** Uyo endaatende mkuu naho endaetangwe Mwana wa Muungu ekuwaye uko uwanga wa vyose. Zumbe Muungu endaamwekhe kigoda cha useuta cha Daudi tati yake. **33** Endaawe seuta wa kolwa da Yakobo kwa misi yose kwesih kisiikizi, naho useuta wakwe khaunauwe na kisiikizi." (aiōn g165) **34** Malia akamtambaisa yuda mndima wa uko uwanga kwa Muungu, "Yadahika viivih, mbui iyo mana miye nina kiwaa?" **35** Mndima wa uko uwanga kwa Muungu akamtambaisa, "Muye wa Muungu wendaumwezee, na udaho wa Muungu ekuwaye mkuu wa vintu vyose wendaumkugubike inga kizui. Kwaajii iyo mwana endaeavyaigwe endaawe Mng'azi naye endaetangwe Mwana wa Muungu. **36** Naho umanye Elizabeti nduguyo nae kenua ifu etiho ni mdaa, na isasa ni muongo mtandatu kwakwe, yee ambae wantu wammanya kuwa khadaha kuvyaa, **37** kwaviya khahana mbui yesayokudahika kwa Muungu." **38** Naho Malia akagombeka, "Miye ni mndima wa Zumbe, igosoke mbui inga wekugombekavyo." Yuda mndima wa uko uwanga kwa Muungu akaita. **39** Mwe kisingi kiya Malia akafunga ntambo kuita kwa kinyionyio mwe

mzi umwe weuko mwe miima ya Yudea. **40** Aho akengia mwe nyumba ya Zakalia akamuugusa Elizabeti. **41** Ahoaho Elizabeti ekusikiahio uugusi wa Malia mwana mwekuwa mwe ifu dakwe Elizabeti akehituahitua. Naho udaho wa Muye wa Muungu ukamwezea Elizabeti. **42** Naho akagombeka kwa mgutio mkuu, "Wee kujaiwa kusima wavyee wose, na mwana wendayeumvyae kajaiwa. **43** Miye ndai hata mmaa wa Zumbé yangu abue hangu? **44** Nakwamba, vuupu nekutegeezaho uugusi wako mwana mwe ifu dangu akawa nanyemi na kwehитуahitua. **45** Kujaiwa wee mwekuzumiiya kuwa yendayawe kwei yada Zumbé ekugombekayo." **46** Malia akamba, "Muye wangu wantogoa Zumbé, **47** Muye wangu unanyemi kwaajii ya Muungu Mwohozi yangu, **48** Kwaajii kanikumbuka, miye mndima wakwe mdodo! Ivyo kuvokea isasa wantu wose, wendawanetange mwenye kujaiwa, **49** Kwaviya Muungu mwenye udaho, kanigosoeya mbui khuu. Zina dakwe ni ng'azi. **50** Mbazi zakwe kwa wantu wamvikiao, Kwekaa kwa vyekuvyaigwavyo na vyekuvyaigwavyo, **51** Kagosoa mbui khuu kwa mkono wakwe, Kawasambaatisha wenao vibui umamakhanyi ya mioyo yao. **52** Akawaseeza maseuta wakuu kulawa he vigoda vyao vya useuta, Kawenua wekuwao wadodo. **53** Wenaosaa endaaweguse vintu vitana, Na wenye vintu vingi endaawause mikono yebue. **54** Kamwambiza Isilaeli, mndima yakwe, Akakumbuka kuwafiya mbazi. **55** Inga ekuwaikiavyo kiaga baba zetu, Ibulahimu Na vyekuvyaigwavyo vyakwe misi yose kwesiho kisiikizi!" (aiōn g165) **56** Malia akekaa na nduguye Elizabeti kwa kisingi kibuacho miongo mitatu, naho akauya kaya kwakwe. **57** Kisingi cha kwefungua kwakwe Elizabeti kikabua, akefungua mwana kigosi. **58** Wantu wa hehi yakwe na wanduguze wekumanyaho mbui inu ati Zumbé kamfiya mbazi muno, wakawa na kinyemi hamwe naye. **59** Mwana ekubuwaho msi wanane wakeza kumgwisa. Wakakunda kumwetanga Zakalia zina da tati yakwe. **60** Akini mami yakwe akamba, "Khivyo! Zina dakwe endaetangwe Yohana." **61** Wakamwamba, "Khahana yoyose mwe kolwa dako mwe zina inga ido?" **62** Naho wakamwamba kwa ntangio ya mikono tati yakwe, wamanye mwana endaekigwe zina dani. **63** Zakalia akaombeza kibao cha kuandikiya, akaandika ivi, "Zina dakwe ni Yohana." Wose wakahondoma! **64** Ahoaho Zakalia akadaha kutamwiya vituhu, naho akavoka kumtogoia Muungu. **65** Wantu waheli yakwe wose wakaogoha muno, na mbui iyo ikaambazika kiya hantu mwe miima ya si ya Yudea. **66** Na wose wekusikiahio mbui iyo, wakamamakhanya mwe mioyo yao na kweuza, "Mwana uyu endaawe mntu yevii vihi?" Kwaajii udaho wa Zumbé neuwa hamwe naye. **67** Zakalia tati yakwe da Yohana, akezewa na udaho wa Muye wa

Muungu, naye akatamwiya uwoni unu. **68** "Atogolwe Zumbé Muungu wa Isilaeli! Kwaajii kawezea na kuwaohowa wantu wakwe. **69** Katekha mwohozi mwenye udaho, Uvyaigwa wa Daudi mndima wakwe. **70** Katiikia kiaga aho kae, kwa sia ya waoni wang'azi, (aiōn g165) **71** Kamba endaatiohowe kulawa kwa wamasa wetu. Na kulawa kwa wada wose wesaokutikunda. **72** Akagombeka endaawaonee mbazi wadaa wetu Na kukumbuka diyagane dakwe ng'azi. **73** Kiaga ekumwekhacho Ibulahimu baba yetu. **74** Tioholwe mwe mikono ya wamasa wetu, Tidahe kumgosoeya ndima kwesaho kuogoha. **75** Ili tiwe wazumizi kwa Muungu, na kuwa wantu wategeezao miagiyo yakwe. Misi yose ya ugima wetu. **76** Nawe mwanangu, wendawetangwe Muoni wa Muungu ekuwaye uko uwanga wa vintu vyose, Wendaumuongwee Zumbé ukamuikie Vitana sia yakwe. **77** Wendaumwabiikie wantu kuwa wendawaoholwe Kwa kuekewa mavigaviga yao. **78** Ukundiso wa Muungu na mbazi zakwe zating'azia inga zua diawiado kulawa uwanga. **79** Kwetu swie he kiza na kizui cha ufe, na ung'azi unu wendautumwikie na kutuogweeya mwe sia ya uivanisa." **80** Yuda mwana neakuwa kimo na udaho wa muye. Akekaa he kiwawe adi ekweaviizavyo kwa wantu wa Isilaeli.

2 Kisingi kiya Kaisali Agosto, Seuta mkuu wa Walumi kaagiya wantu wose wa inusi wa useuta wa Lumi wataaziwe. **2** Kutaaziwa uko nekuwa kwa bosi, aho Kileniyo ekuwaho mkuu wa mzi wa Siliya. **3** Wantu wose wakaita kutaaziwa, kiya mntu mwe mzi wakwe ekuvyaigwaho. **4** Yusufu naye akahauka kulawa mwe mzi wa Nazaleti si ya Galilaya, kwaviya nekawa wa uvyaigwa wa Daudi akaita Betilehemu mwe mzi wa Yudea ekuvyaigwaho Seuta Daudi. **5** Akaita kwe kutaaziwa hamwe na Malia ekuwaye kamuomba, na Malia mwenye nee anaifu. **6** Wekuwaho uko Betilehemu, msi wakwe Malia wa kuvyaa neibua. **7** Nee avyaa mwanawe wa bosi, mwana kigosi akamvika nguo za kiteke, akamgoneza mwe dewa da kudiya ng'ombe kwaajii khawekupata phasi mwe nyumba zakugona wageni. **8** Mwe si ida neekuwa na waisi wekuwao wacheeza, wakainda matintimo ya ngoto na kiyo. **9** Mndima wa uko uwanga kwa Muungu akalawiiya ahoaho na ukuu wa Zumbé ukawang'azia phande zose, naho wakaogoha muno. **10** Mndima wa uko uwanga kwa Muungu akagombeka, "Msekuogoha, khiwaetea mbui yedi yendayoiwatamize wantu wose. **11** Ivyeo mwe mzi wa Daudi kavyaigwa mwohozi kwaajii yenu, yee nee Zumbé Klistu." **12** Inu ne yendayoiwe utangio kwenu, mwendamumbwiye mwana mteke kazengetezwa magunya na kagonezwa mwe dewa da kudiya ng'ombe. **13**

Ahoaho zumwezumwe kuu da wandima wa uko uwanga kwa Muungu, wakamtogoa Muungu na kugombeka, **14** "Tunyo kwa Muungu uko uwanga kwa Muungu, Na uivanisa mwe inusi kwa wantu awakundao." **15** Wandima wa uko uwanga kwa Muungu wakahauka na kuuya uwanga kwa Muungu, wada waisi wakagombekana mbui, "Titeni mwe mzi wa Betilehemu tikakauwe ido dekulawiado, Zumbe ekutigombekado." **16** Naho wakaita kinyio, wakambwiiya Malia na Yusufu hamwe na yuda mwana mteke kagonezwa mwe dewa da kudiiya ng'ombe. **17** Waisi awo wekumuonaho uyo mwana wakagombeka wavyazi wakwe mbui zose wekwembiwazo na wandima wa uwanga wa Muungu kuusu uyo mwana. **18** Wose wekusikiahoo ayo nee wahondomaa uwanga ya mbui izo wekugombekwazo na waisi. **19** Malia akaika mbui izo mwe moyo wakwe na kumamaakhanya muno. **20** Wada waisi wakauya, wakamtunya na kumtogoaa Muungu kwa yose wekutegeezayo na kuona, kwaviya yose neyawa inga wekuwavyo wembigwa na mndima wa uko uwanga kwa Muungu. **21** Yekubuwahe msi wa nane, kisingi cha kumgwisa mwana chekubuwahe, wakamwekha zina da Yesu, zina ambado kekhiigwa na mndima wa uko uwanga kwa Muungu kisingi Malia khazati kwenuwa ifu. **22** Misi yekubuwahe kwa Yusufu na Malia kusuntwa inga wekukundigwavyo na miagiyo ya Musa ekwekhiigwazo ni Zumbe, wavyazi awo wakamdoa mwana, wakaita naye Yelusalemu na kumwiika hemeso ya Zumbe. **23** Inga viya yekuandikwavyo mwe miagiyo ya Zumbe, "Kiya mvyaiigwa wa bosu wa kigosi endaawe wa Zumbe." **24** Naho viyaviya wakaita wakalavya ntambiko, inga yekugombekwavyo mwe miagiyo ya Zumbe, "Suwa waidi hambu makinda maidi ya njiwa." **25** Kisingi kiya uko Yelusalemu nehawa na mntu yumwe zina dakwe Simoni naye nee ni mntu yedi hemeso ya Muungu. Yee nee akakauwiiya kwa hovu uhozi wa Isilaeli na Muye wa Muungu nee uhamwe naye. **26** Muye wa Muungu nee kamwekha kiaga khana auye na nyuma adi endahoamwone Zumbe Klistu ekusagulwaye ni Muungu. **27** Na wavyazi wakwe Yesu wekumweetaho he Nyumba ya Muungu mwana yao wamgosweeya inga yekukundigwavyo na miagiyo ya Musa. Aho, Muye wa Muungu ukamwoongweeya Simoni akengia he Nyumba ya Muungu. **28** Simoni akamhokea mwana mwe mikono yakwe, uku akamtogoa Muungu akamba. **29** "Isasa Zumbe, kuiganiza kiaga chako, Umwekee mndima yako aite kwa uivanisa. **30** Kwaajii kwa meso yangu khimuona muhozi, **31** Ambae kumsagua kuwa muhozi wa wantu wa si zose. **32** Uyu endaawe ung'azi kwa kuwagubuiya wantu wesaokuwa Wayahudi wammanyee Muungu, Na kwaajii ya ukuu kwa

wantu wako wa Isilaeli." **33** Wavyazi wakwe da Yesu nee wahondomaa kwa mbui ekugombekazo Simoni kwaajii ya mwana. **34** Simoni akawajaiya na kumwamba Malia mami yakwe da Yesu, "Mwana uyu endaawe vokeo da kugwa kwa wantu wangi na watuhu kuoholwa wa si ya Isilaeli, naye endaawe utangio kulawa kwa Muungu na wantu wangi wenda waiemee." **35** Na ivyo umamakhanyo wa wantu wangi yendayaoneke pwii. Nawe mwenye usungu wekuwao inga paange kai wenda uwoke moyo wako. **36** Nee kuwa na Muoni mvyee aketwanga Ana, biti Fanueli, wa mbai wa Asheli mvyee uyo nee ni mdaa muno. Nee kekaa na mgosi yakwe kwa myaka mfungate kuvokea ekutegulwaho. **37** Naho mvyee uyo ekufiiwaho ni mgosi akasigaa ikedu adi kisingi icho ekuwaho mdaa wa myaka makumi mane na nne. Kisingi icho chose nee akekaa he Nyumba ya Muungu, ehiniza kuda na kuvika kiyo na musu. **38** Naho akabua saa idaida, akavoka kumtogoaa Muungu naye akagombeka mbui za mwana uyo kwa wantu wose wekuwao wamgoja kuona ni viivihii Muungu endavyo awaohoe wantu wa mzi wa Yelusalemu. **39** Yusufu na Malia wekubindao kugosoa yose yekukundigwayo na miagiyo ya Zumbe, wakauya Nazaleti, mwe mzi wa Galilaya. **40** Yuda mwana neakuwa, akaendeeya kuwa na udaho, na akamema umanyi, na wedi wa Muungu ukawa hamwe naye. **41** Wavyazi wakwe Yesu nee wawa na mazweeya ya kuita Yelusalemu kiya mwaka kisingi cha sikukhuu ya Pasaka. **42** Yesu ekuwaho na myaka kumi dimwe na mbii, wose wakaita kwe sikukhuu iyo inga yekuwavyo mazweeya. **43** Aho sikukhuu yekusiahoo, wakavoka ntambo ya kuuya kwao, yuda mwana Yesu akasigaa Yelusalemu kwesiho wavyazi wakwe kumanya. **44** Wakamanya kuwa yuumo mwe zumwezumwe da wantambo, wakaita kutwa ngima, nee wavoka kumwondeza mwe wanduguze na wambuya wao. **45** Kwaviya khawekumwona, wakauya Yelusalemu kumwondeza **46** Msi wa ntatu, wakambwiiya he Nyumba ya Muungu, kekaa gatigati ya wahinyi, awategeeza na kuwauza mbui. **47** Wose wekutegeezaho mbui zakwe wakaondomaa kwaajii ya akii yakwe na ntambaisi zakwe nizaumanyi. **48** Wavyazi wakwe wekumuonaho wakahondomaa. Mami yakwe akamuza, "Mwanangu, kwa mbwai kutigosweeya ivyo? Miye na Tati yako nee tikakoondeza kwa usungu." **49** Yesu akawatambaisa, "Kwambwai mwaniondeza? Khamwekumanya nakundigwa nekae mwe nyumba ya Tate yangu?" **50** Akini wavyazi wakwe khawekumanya mana ya mbui ekuwagombekayo. **51** Aho Yesu nee auya hamwe na wavyazi wakwe Nazaleti, akawa awategeeza. Mami yakwe akaika mbui iyo mwe moyo wakwe. **52** Naye Yesu akaendeeya kuwa na umanyi na kimo, na akaendee kukundiswa ni Muungu na wantu.

3 Mwaka wa kumi dimwe na shano wa uongweezi wa seuta mkuu Kaisali Tibelio, Pontio Pilato ne kawa mkuu wa si ya Yudea, na Helode ne kawa seuta wa Galilaya na nduguye Filipo nekawa seuta wa hantu ha Ituleya hamwe na Tilakoniti, na Lusania nekawa seuta wa Abilene, 2 Anasi na Kayafa newawa Waviki Wakuu wa Muungu. Kisingi icho nei mbui ya Muungu yekumwezeaho Yohana mwana wa Zakalia kwe kiwawe. 3 Naho Yohana akaita hantu he mizi yekuhakanayo na zigizigi da mazi Yolodani akabiikia, "Hitukani mkaeke mavigaviga yenu na kubatiizwa, na Muungu endaawaekee mavigaviga yenu." 4 Nee ivyo yekuandikwavyo mwe kitabu cha Isaya Muoni wa Muungu, "Mgutio wa mntu wetanga mwenyika 'Mgosoeyani Zumbe sia yakwe Nyooshani myemboko yakwe.' 5 Kiya koongo dendadimemeewe, Kiya kiima na muima vindavisambazwe, Hekuhotokaho hendahanyooshwe na Sia zesazo kutama zindazigosolve 6 Wantu wose wendawauwone uhozi aetao Muungu." 7 Aho Yohana neawamba diya zumwezumwe da wantu wose wekubuo wabatiizwe, "Nywinywi uvyazi wa mdudu! Nndai mwekuwahaza mguuke sugusa yezayo? 8 Oneshani mbui zenu kuwa mhituka na kubada mavigaviga yenu. Msekuvoka isasa kwegombekea, 'Iblahimu ni tati yetu.' Nawambeni kwei, Muungu adaha kuyagoso maive aya yawe wana wa Ibulahimu. 9 Na hoyu diikwa kae mwe mazindo ya miti, ivyo kiya mti wesaokuvyaa matunda matana wendausengwe na kwasigwa mwe moto." 10 Zumwezumwe da wantu dikamuza, "Titende mbwai?" 11 Yohana akawatambaisa, "Mwenye magwanda maida amwekhe yuda mwesaekuwa na gwanda, mwenye khande atende ivyoivyo." 12 Watoza kodi nao wakeza wabatiizwe wakamuza, "Mhinyi na swiswi titende mbwai?" 13 Yee akawamba, "Msekutoza kodi inga mwekuagiwayo." 14 Nawo maasikali wakamuza, "Swie nasi titende mbwai?" Akawatambaisa, "Msekudoa vintu vya mntu yoyose kwa kumhoka kwesaho kumwahiya masa kwa uhokho, naho toshekani kwa maiho yenu." 15 Wantu wose wekuwao wakauwiya chendachokilawie, newavoka kweuza mwe mioyo yao kuhusu Yohana, kuwa yee ati nee Klistu ekusagulwaye ni Muungu. 16 Aho Yohana akawamba wose, "Miye nawabatiiza kwa mazi, akini eza mwenye udaho kusima, miye uyo khifaa katu kuchopoa sigi za sabana zakwe, uyo enda awabatiize kwa Muye wa Muungu na kwa moto. 17 Ana kiheo cha kuhetea khande mwe mikono yakwe, endaakusanye khande yakwe na kuiika mwe taa, na mahehe ayoke moto wesaokukomeka." 18 Kulawana na mahinyo matuhu mangi, Yohana akawahembeeza na kuwabiikia wantu Mbui Yedi. 19 Yohana akamwakia seuta Helode kwaviya nekamdo

Helodia mvyee wa nduguye na kumtenda mkaziwe na kwajii ya mavigaviga yose ekuwayo agosoa. 20 Naho Helode akaendeeya na ufayimi wakwe kwa kumgea Yohana mwe kifungo. 21 Wantu wose wekubindiizwaho kubatiizwa, na Yesu akabatiizwa, ekuwaho akavika, uwanga kwa Muungu kukavuguka, 22 na Muye wa Muungu ukamwezea nekawa na mwii inga sua. Mgutio ukategzeezeka kulawa uwanga kwa Muungu, "Wee nee mwanangu nikukundisae, nitamiwae naye." 23 Yesu ekuvokaho ndima yakwe nekawa na myaka makumi matatu, na wantu wammamakhanya yee ni mwana wa Yusufu, Yusufu mwana wa Heli. 24 Eli mwekuwa mwana wa Masati, na Masati mwekuwa mwana wa Lawi, na Lawi mwekuwa mwana wa Meleki, na Meleki mwekuwa mwana wa Yanai, na Yanai mwekuwa mwana wa Yusufu, 25 na Yusufu mwe kuwa mwana Matasia, na Matasia mwekuwa mwana wa Amosi, na Amosi mwekuwa mwana wa Nahumu, na Nahumu mwekuwa mwana wa Hesili, na Hesili mwekuwa mwana wa Nagai, 26 na Hagai mwekuwa mwana wa Maati, na Maati mwekuwa mwana wa Matasia, na Matasia mwekuwa mwana wa Semei, na Semei mwekuwa mwana wa Yoseki, na Yoseki mwekuwa mwana wa Yoda, 27 na Yuda mwekuwa mwana wa Yohanani, na Yohanani mwekuwa mwana wa Lesa, na Lesa mwekuwa mwana wa Zelubabeli, na Zelubabeli mwekuwa mwana wa Shealiteli, na Shealiteli mwekuwa mwana wa Neli, 28 na Neli mwekuwa mwana wa Meliki, na Meliki mwekuwa mwana wa Adi, na Adi mwekuwa mwana wa Kosamu, na Kosamu mwekuwa mwana wa Elimadamu, Elimadamu mwekuwa mwana wa Eli, 29 na Eli mwekuwa mwana wa Yoshua, na Yoshua mwekuwa mwana wa Eliezeli, na Eliezeli mwekuwa mwana wa Yotimu, na Yotimu mwekuwa mwana wa Masati, na Masati mwekuwa mwana wa Lawi, 30 na Lawi mwekuwa mwana wa Simoni, na Simoni mwekuwa mwana wa Yuda, na Yuda mwekuwa mwana wa Yusufu, na Yusufu mwekuwa mwana wa Yonamu, na Yonamu mwekuwa mwana wa Eliakimu, 31 na Eliakimu mwekuwa mwana wa Melea, na Melea mwekuwa mwana wa Mena, na Mena mwekuwa mwana wa Matasa, na Matasa mwekuwa mwana wa Nasani, na Nasani mwekuwa mwana wa Daudi, 32 na Daudi mwekuwa mwana wa Yese, na Yese mwekuwa mwana wa Obedi, na Obedi mwekuwa mwana wa Boazi, na Boazi mwekuwa mwana wa Salimoni, na Salimoni mwekuwa mwana wa Nashoni, 33 na Nashoni mwekuwa mwana wa Aminadabu, na Aminadabu mwekuwa mwana wa Adimini, na Adimini mwekuwa mwana wa Alini, na Alini mwekuwa mwana wa Hesiloni, na Hesiloni mwekuwa mwana wa Pelesi, na Pelesi mwekuwa mwana wa Yuda, 34 na Yuda mwekuwa mwana wa Yakobo, na Yakobo mwekuwa

mwana wa Isaka, na Isaka mwekuwa mwana wa Ibulahimu, na Iblahimu mwekuwa mwana wa Tela, na Tela mwekuwa mwana wa Naholi, 35 na Naholi mwekuwa mwana wa Selugi, na Selugi mwekuwa mwana wa Leu, na Leu mwekuwa mwana wa Pelegi, na Pelegi mwekuwa mwana wa Ebeli, na Ebeli mwekuwa mwana wa Sala, 36 na Sala mwekuwa mwana wa Kainamu, na Kainamu mwekuwa mwana wa Alifakisadi, na Alifakisadi mwekuwa mwana wa Shemu, na Shemu mwekuwa mwana wa Nuhu, na Nuhu mwekuwa mwana wa Lameki, 37 na Lameki mwekuwa mwana wa Mesusela, na Mesusela mwekuwa mwana wa Henoki, na Henoki mwekuwa mwana wa Yaledi, na Yaledi mwekuwa mwana wa Mahalaleli, na Mahalaleli mwekuwa mwana wa Kainani, 38 na Kainani mwekuwa mwana wa Enoshi, na Enoshi mwekuwa mwana wa Seti, na Seti mwekuwa mwana wa Adamu, na Adamu mwekuwa wa Muungu.

4 Yesu ekulawaho mwe zigizigi da mazi da Yolodani uku kamema Muye wa Muungu, akaongoewa na Muye wa Muungu adi he kiwawe. 2 Uko nee ageezwa na ibiisi kwa kisingi cha misi makumi mane. Kisingi chose khekuda chochose na bada ya misi iyo akaumwa nsaa. 3 Ibiisi akamwamba, "Ati wee ni Mwana wa Muungu gombekea iwe idi dihituke diwe bumunda." 4 Yesu akamtambaisa, "Iyandikwa, 'Mntu khanaekae kwa kuda bumunda du.'" 5 Naho ibiisi akamdoa akamwegaa hantu hauwanga akamwoonyesha Useuta wose wa inusi. 6 Ibiisi akamwamba, "Nenda nikwehe udaho uwanga ya Useuta wose na vintu vyose, kwaviya vyose nchehigwa, nadaha kumwekha yoyose nimkundae. 7 Ukanikintia mavindi na cheni chako kikadonta asi, ivi vyose vyendaviwe mai yako." 8 Yesu akamtambaisa, "Iyandikwa, 'Wendaumvike na kumkintia mavindi Zumbe Muungu yako na kumgosoeya yee ikedu.'" 9 Ibiisi akamdoa adi Yelusalemu he mnaa wa Nyumba khuu ya Muungu, akamwamba, "Ati wee ni Mwana wa Muungu, etambike asi." 10 Kwaviya Iyandikwa, endaawaagiye Wandima wa uko uwanga kwa Muungu wakuinde, 11 vituhu, "Wendawakudoe mwe mikono yao, usekweza kwekungwaa muundi mwe iwe." 12 Akini Yesu akamtambaisa, "Iyandikwa, 'Usekumgeeza Zumbe Muungu yako.'" 13 Ibiisi ekubindaho kumgeeza kwa kiya sia, akambada kwa kisingi. 14 Aho Yesu akauya Galilaya, kamema udaho wa Muye wa Muungu, na mbui zakwe zikaambazika kiya hantu hehi ya mzi uda. 15 Naye nee akawahinya wantu mwe Nyumba za kukintania Wayahudi, na kiya yumwe akamtogoa. 16 Viyaviya, Yesu akaita Nazaleti hantu ekueewaho, na Msi wa Kuhumwiza akengiia mwe Nyumba ya kukintania Wayahudi inga

yekuwavyo mazweeya yakwe. Akagooka asome Maandiko ya Muungu kwa mgutio. 17 Akahokea kitabu cha Muoni Isaya, akakigubua na akabwiya hantu hekuandikwaho, 18 "Muye wa Zumbe uhamwe nami, Kwaviya kanisagua niwabikiye, wakiwa Mbui Yedi. Kaniagiya niwabikiye wada wekufungwao, mbui ya kuvugwiwa kwao, Na wada mantuntu wadahe kukauwa vituhu Na kaniagiya niwaohoe wasuumizwao, 19 Na kubiikiya kisingi kibua, Zumbe eza kuwaohoa wantu wakwe." 20 Naho akakigubika kiya kitabu, akamwekha mndima, naho akekaa. Wantu wose wekuwao mwe Nyumba ya kukintania Wayahudi nee wamfwiya meso. 21 Naho akavoka kuwamba, "Maandiko ya Muungu aya mwekutegeezayo yaigania ivyeo." 22 Wose wakatamiwa naye, wakahondomaa kwa mbui ntana ekugombekazo. Wakauzana, "Huyu khio mwana wa Yusufu?" 23 Naye akawamba, haika mwendamnigombeke mtamwiyo unu, "Mganga ehonye mwenye. Vituhu mwendamgombeke, 'Yose tekuyategeezayo kuyagosoa kuda Kapelinaumu, yagosome hanuhamu mwe mzi wako.'" 24 Akaendee kutamwiya, "Nawamba kwei, khahana Muoni mzungu mwe mzi wakwe." 25 Akini tegeezani! Kwei, kuwa na wayee wangi wekufiiwao ni wagosi mwe si ya Isilaeli kisingi cha Eliya. Uwanga kwekufungwaho, kisingi icho fua iyeka kunya kwa kisingi cha myaka mitatu na miongo mtandatu, nekuwa na saa khai mwe si yose. 26 Iyoy Eliya khekuagiwa kwa mntu yoyose wa Isilaeli, iya kwa mvyee yumwe ekufiiwaye ni mgosi wa Salepta mwe si ya Sidoni. 27 Naho, mwe si ya Isilaeli kisingi cha Muoni Elisha nekuwa na wenye utamu wa nyoka wangi, akini khahana yoyose ekusuntwaye iya Naamani mwenyezi wa si ya Shamu. 28 Wose wekuwao mwe ida Nyumba ya kukintania Wayahudi wekusikiaho ayo nee wakimwa muno. 29 Wakagooka wakamlavya chongoi ya mzi wao wekuzengwao uwanga ya muima, wakamwegaa hadi mwe kisiikizi cha muima wamwase asi. 30 Akini Yesu akemboka ahoaho gatigati ya zumwezumwe da wantu akaita. 31 Naho Yesu akaseeya Kapelinaumu, mwe mzi wa Galilaya, nee akahinya wantu Msi wa Kuhumwiza. 32 Wakahondomaa muno kwa mahinyo yakwe, kwaviya nee akahinya kwa udaho. 33 Na mwe ida nyumba ya kukintania Wayahudi nekuwa na mntu ekuwaye mwekukwewa na zaiko fyaimi, akatoa vuzo kuu. 34 "Una mbwai na swie, wee Yesu wa Nazaleti? Kweza kutidagamiza? Nakumanya undai. Weye ni Mng'azi wa Muungu." 35 Yesu akadiwakiya ido zaiko fyaimi akadigombeka, "Nyamaa na umlawe mntu uyu!" Yuda zaiko akamgwiswa yuda mntu asi hemeso yao wose, akamlawa kwesao kumuumiza hantu. 36 Wantu wose wakahondomaa, nee waambizana, "Inu ni mbui yevivih, kwaviya kwa udaho

na nguvu agombeka mazaiko walawe, nao walawa!" 37 Mbui zakwe Yesu zikavoka kuambazika kiya hantu mwe si ida. 38 Yesu nealawa mwe ida Nyumba ya kukintania Wayahudi akaita kaya kwa Simoni. Mvye yumwe, mkwewe da Simoni nekawa na bombom khai, wakamwomba amhonye 39 Yesu akeza akagooka hehi naye akawakia diya bombom, nado dikamwekea. Yuda mvye akenuka ahoaho, kuwembikia khande. 40 Zuwa dekuswaho, wose wekuwao na watamu wao mbaimbai nee wegalwa kwakwe, naye akawadonta kwa mikono yakwe, akawahonya. 41 Mazaiko nee yawalawa wantu wangi wakatoa vuzo wakagombeka, "Wee ni Mwana wa Muungu!" Akini Yesu akawawakia, naho khekukunda wagombeke, kwa viya wammanya yee nee Klistu. 42 Kioi dakwe keo, Yesu akahauka akaita hantu heikedu. Wantu wawa wakamwondeza. Awo wantu wekubua hantu ekuwaho, wakageeza kumuemeza asekuhauka kwao. 43 Akini yee akawamba, "Nakundigwa kubiikia Mbui Yedi za Useuta wa Muungu mwe mizi mituhu, kwaviya khiagiwa kwaajii iyo." 44 Nekawa abiikia mwe Nyumba za kukintania Wayahudi mwe mzi wa Yudea.

5 Msi umwe, Yesu ekuwaho kagooka khandakhanda ya tondoo da mazi ya Genesaleti, na wantu wangi newamzunguuka uku wakefintafinta, wategeza mbui ya Muungu. 2 Akoona ngaawa mbii khandakhanda ya tondoo da mazi. Walowa wa samaki newalawa, wasunta nyavu zao. 3 Yesu akengia mwe ngaawa mwenga yekuwayo ya Simoni, nee amuombeza Simoni aisogeze mwe tondoo da mazi kulawa mpwani, Yesu akahinya zumwezumwe da wantu uku kekaa mwe ngaawa. 4 Ekubindaho kuhinya, akamwamba Simoni, "Yegae ngaawa adi mwekiindi, mkazitambike nyavu mdahe kulowa samaki." 5 Simoni akamtambaisa, "Zumbe titenda ivyo kio kigima khatokuambua kintu, akini kwaviya kugombeka, nenda nizitambike nyavu." 6 Ekubindaho kugosoa ivyo, wakalowa samaki wangi, ivyo nyavu zao zikavoka kudumuka. 7 Wakawetanga wezwao wekuwao mwe ngaawa ntuhe weze kuwaambiza. Wakeza, wakamemeeza ngaawa zose mbii samaki, zikawa hehi na kuzama. 8 Simoni Petulo ekuonaho ayo, akakinta mavindi hemeso ya Yesu akamba, "Hauke he meso yangu ee Zumbe, kwaviya mie ni mwenye mavigaviga!" 9 Simoni hamwe na weziwe wose wakahondomaa kwa ugenyezi wa samaki wangi viya. 10 Viyaviya Yakobo na Yohana, wana wa Zebedayo wekuwao walowa wa samaki weziwe Simoni, Yesu akamwamba Simoni, "Usekuogoha kuvokea isasa wendaue mlowa wa wantu." 11 Naho, bada ya kuzieta zia ngaawa mpwani, wakabada vyose wakamtongea. 12 Aho

Yesu ekuwaho mwe mzi umwewao, mntu yumwe mwenye utamu wa nyoka mwii mgima Yesu akamwona. Naho, mntu uyo akagonea ifu akamwomba Yesu, "Zumbe, ukakunda wadaha kuning'aza!" 13 Yesu akenuka mkono, akamdonta na kugombeka, "Nakunda, ng'azika!" Ahoaho akahona utamu wa nyoka. 14 Yesu akamwagiiya akamwamba, "Usekumwamba mntu yoyose mbui izi, iya hita mwenga kwa mwenga kwa Mviki, ukalavye lavyo kwa Mviki inga Musa ekuagiiavyo na kuwa uvuhuzi kwa wantu wose kuwa kusuntwa." 15 Akini mbui za Yesu zikaendeeya kuambazika kiya hantu. Mazumwezumwe mangi ya wantu wakakintana kumtegeza na kuhonywa matamu yao. 16 Akini yee akaita hantu hesahokuwa na wantu uko akavika. 17 Msi umwe, Yesu nekawa akahinya. Mafalisayo na Wahinya wa Miagiiyo kulawa mwe kiya mzi wa Galilaya na Yudea na Yelusalemu, newekaa aho. Udahe wa Zumbe ne uwa hamwe naye kwaajii ya kuhonya watamu. 18 Ahoaho wantu wakeza, wamwenua mntu yumwe mwekuhoowa mwii, kagona mwe usazi wakageza kumwengiza ndani, wamwiike hemeso ya Yesu. 19 Kwaajii ya zumwezumwe da wantu dekumemado, khawokudaha kubua hehi na Yesu. Ivo wakabovoa hantu ha chusi yekuwayo uwanga ya hantu ekuwaho Yesu, nee waseeza javi da yuda mwekuhoowa. 20 Yesu ekuonaho wekuwavyo na uzumizi mkuu, akamwamba mntu uyo, "Mmbuya kuekewa mavigaviga yako." 21 Wahinya wa Miagiiyo na Mafalisayo wakavoka kweza wenye, "Nindai uyu atamwiaye mbui zakufuu? Khahana mntu adahae kuekewa mavigaviga iya Muungu ikedu!" 22 Yesu akawamanyama mamakhanyo zao, akawauza, "Mwamamakhanya mbwai mwe mioyo yenu?" 23 Ni dihi dekuhuhado muno Kugombeka, 'Kuekewa mavigaviga,' hambu kugombeka, 'Gooka, uite?' 24 Naho nakunda mmanye kwaviya Mwana wa Mntu ana udaho wa kuekewa wantu mavigaviga mwe inusi." Aho akamwamba uyo mwekuhoowa, "Gooka, doa javi dako, uite kaya." 25 Ahoaho uyo mntu mwekuhoowa akagooka hemeso ya wose, akadoa usazi wakwe akaita kaya kwake uku amtogoa Muungu. 26 Wose wakatozwa na umako na kwengiwa ni maatu, nee wamtogoa Muungu wakagombeka, "Ivyeo tiona ntangio." 27 Yekwembokaho ayo, Yesu akalawa chongoi akamwona mtoza kodi yumwe etangwaye Lawi, kekaa hantu hakwe hakudoea kodi. Yesu akamwamba, "Nitongea" 28 Naye akavibada vyose akamtongea. 29 Naho Lawi akamgosoea Yesu ntafuno mwe nyumba yakwe, na zumwezumwe kuu dawatoza kodi na wantu wangi wawa wekaa hamwe nae. 30 Akini Mafalisayo na Wahinyi wa miagiiyo wakawa wawang'ung'uzikia wahina wakwe na kuwamba, "Kwa mbwai mwada na kudomea na watozao kodi

na wenao mavigaviga?" 31 Yesu akawatambaisa, "Wenye mii mitana khawakunda mganga, wamkundao ni wada wekuwao watamu. 32 Nchekweza kuwetanga wantu wedi, iya wenye mavigaviga, wadahe kuhituka." 33 Wantu watuhu wakamwamba, "Wandima wa Yohana mbatiiza wehiniza kuda kiya maa na kuvika, na wandima wa Mafalisayo wagosoa ivyoivyo. Akini wahina wako wada na kudomea." 34 Yesu akawatambaisa, "Wada wagonekwao mwe ndoza khawakundigwa kwehiniza kuda kwaviya Zumbe wa ndoza yu hamwe nao?" 35 Akini kisingi chendakibue ambaho Zumbe wa ndoza enda ausigwe gatigati yao, kisingi icho nee wendaho wehinize kuda. 36 Yesu akawamba msimo unu, "Khahana mntu asengae kilaka mwe gwanda dihya na kuika mwe gwanda dekusakaado, inga akatenda ivyo endaawe kasenga ido dihya, na kida kilaka cha gwanda dihya khakina chendane na ido gwanda dekusakaado. 37 Naho wantu khawageya divai mphyia mwe mikwiji ya babu yekusakaayo, inga akatenda ivyo iyo divai mphyia yendaitatue iyo mikwiji ya babu na divai yendayetike na mikwiji iyo yendaibanike. 38 Divai mphyia yagewa mwe mikwiji ya babu mihya. 39 Khahana mntu atamiwaye kudomea divai mphyia bada ya kudomea divai ya kae kwa kugombeka 'Ida ya kae ni ntana muno.'"

6 Msi umwe wa kuhumwiza, Yesu nekawa akemboka mwe minda ya uhemba, na wahina wakwe wakavoka kusenga masuke ya uhemba na kuyahugusua mwe mkono yao na kuda. 2 Wamwe wa Mafalisayo wakawauza wahina, "Kwa mbwai mwagosoa yesayokundigwa Msi wa Kuhumwiza?" 3 Yesu akawatambaisa, "Khamkusoma viya ekugosoavyo Daudi hamwe na wenziwe wekuwaho na saa? 4 Daudi nee engiya mwe Nyumba ya Muungu, akadoa yada mabumunda yekuikwayo hemeso ya Muungu akada na kuwekha wenziwe. Na khayokukundigwa mntu yoyose kuda mabumunda ayo, iya Waviki wowodu." 5 Yesu akawamba, "Miye mwana wa Mntu nee Zumbe wa Msi wa Kuhumwiza." 6 Msi mtuhu wa Kuhumwiza, Yesu neengia mwe Nyumba ya kukintania Wayahudi, nee awahinya. Mwe nyumba iyo, nekuwa na mntu ambae mkono wakwe wa kuume neuwa uho. 7 Wahinya wa miagiyo ya Muungu na Mafalisayo nee wakoondeza kumkoea masa Yesu, ivyo wakamkauwa kwa hehi ati endahonye Msi wa Kuhumwiza. 8 Akini Yesu akamanya mamakhanyi zao, akamwamba yuda mwe mkono wekuho, "Enuka, gooka gatigati yao." Yuda mntu akagooka gatigati yao. 9 Naho Yesu akawamba wada Wahinyi wa miagiyo na Mafalisayo akagombeka, "Nawauza nywie, kulawana na miagiyo yetu ni dihi tana kugosoa msi wa kuhumwiza, kugosoa mbui ntana hambu kugosoa mbui ya ufayimi?"

Kuohoa ugima hambu kuyadagamiza?" 10 Akawafuiya meso phande zose, akamwamba yuda mntu, "Enua mkono wako." Akawenua mkono wakwe ukawa mgima vituhu. 11 Wada wakuu wakakimwa muno, wakeambizana wowo kwa wowo, ni viivhi wendacho wamgoswee Yesu. 12 Msi umwe Yesu akaita kwe muima kuvika, akacheeza uko kiyo kigima akamvikia Muungu. 13 Kwekuchaho akawetanga wahina wakwe, nae akasagua kumi dimwe na waidi nee awetanga wagiwa, 14 Simoni, yuda Yesu ekumwekhaye zina da Petulo na Andulea nduguye na Yakobo na Yohana na Fiipo na Batolomayo, 15 Matayo na Tomaso na Yakobo wana wa Alifayo na Simoni ekwetangwaye Zelote mntu mwekuwa mvunizi wa si yakwe, 16 Yuda mwana Yakobo na Yuda Isikalioti yuda mwe kumhituka Yesu. 17 Yesu ekuseeaho kwe muima hamwe na waagiwa wakwe, Yesu akagooka hantu ekuwaho tambalale. Aho nekuwa na zumwezumwe kuu da wahina wakwe na zumwezumwe da wantu wekulawao phande zose za si ya Yudea na mzi wa Yelusalemu na mpwani ya mizi ya Tilo na Sidoni, 18 Wose wakabua kumtegeeza Yesu na kuhonywa matamu yao. Nee awahonya wose wekuwao na mazaiko. 19 Wantu wose newakunda kumdonta, kwajii ya udaho wekulawao kwakwe na kuwahonya wose. 20 Yesu akawahitukia wahina wakwe, akamba, "Mjaiwa nywie wakiwa, kwaviya Useuta wa Muungu ni wenu! 21 Mjaiwa nywie mwenao saa isasa, Kwa viya msi weza mwendamweguswe, Mjaiwa nywie mwiiyao isasa, Kwaviya misi yezayo mwendamseke kwa kinyemi. 22 "Mjaiwa nywie wantu wendahowawakimwe, na kuwabanuwa, wendawawadumue, na kuwabanangia zina kwaajii ya Mwana wa Mntu. 23 Aho kae wadaa wenu wagosoa ivyoivyo kwa waoni wa Muungu ivyo yendahoyalawie kuwani na nyemi na kuvina kwaviya funge yenu ni khuu huko uwanga kwa Muungu. 24 Akini mmbwii yenu nywie mwenao vintu vingi. Kwaviya mbinda kwekhigwa kae nyemi yenu. 25 Mmbwii yenu nywie mwegutao isasa, Kwaviya misi yeza mwendamuwe nasaa. Mmbwii yenu nywie msekao kwa kinyemi isasa, Kwaviya misi yeza mwendamuomboleze na kuiya. 26 "Mmbwii yenu nywie hada wantu wose wanitogoao, kwaviya wadaa wao wawagosweeya waoni wa uwokho ivyoivyo. 27 "Akini nawagombekea nywie mnitegeezao, wakundiseni wamasa wenu, wagosweeni vyedi wada wamikimao. 28 Wajaiyeni wada wawabadiao lazi, na wavikieni wada wamigosweeyao ufayimi. 29 Mntu akakutoa funda dimwe mhituiye dakaidi. Mntu akakuhoka gwanda dako mbadie na shati dako viyaviya. 30 Mntu akakuombeza kintu mwekhe, na mntu akakuhoka vintu vyako vyose usekukunda akuvuzie. 31 Mkundavyo wantu

wawagoswee nywie, wagosweeni ivyoivyo. 32 "Na mkawa mwawakundisa wada wawakundao nywie, ivi, mwenda mpate funge dani? Kwaviya hata wenye mavigaviga wawakunda wada wawakundao wowo. 33 Naho, inga mkawagosweeya mbui ntana, wada du wawagosweeyao matana, mwenda mpate funge dani kwaviya wenao mavigaviga wagosoa ivyoivyo. 34 Naho inga mkawekha wada du mkauwiyao wendawamiihe, ivi mwenda mpate funge dani? Hata wenao mavigaviga wawekha wenye mavigaviga wezwao ili wawavuzie kihimo kiyakiya. 35 Iya nywie wakundiseni wamasa wenu na kuwagosoea mbui ntana, wekheni msekukauwiyu kuvuziwa. Naho funge yenu yendaiwe kuu, nanywi mwenda muwe wana wa Muungu mwe uko uwanga kwa Muungu. Kwaviya yee ni mng'azi kwa wada wesao ntogoo na wafyaimu. 36 Kuwani na mbazi inga Tate yenu ekuwavyo na mbazi. 37 "Msekuwekha sugusa watuhu, na nywie mwenda mwekhigwe sugusa, msekuwalaumu watuhu, na nywie khamna mlaumiwe, waekeni watuhu, nanyi mwenda mwekewe. 38 Wekheni watuhu vintu, nanyi mwendamwekhigwe. Eehe, mwendamhokee he mikono yenu kihimo chekumemacho, na kuomoewa na kwetika etika. Kwaviya kihimo kiyakiya muhimiacho kwa watuhu nee endachoahimie Muungu kwenu." 39 Yesu akawamba msimo unu akawauza, "Ivi tuntu adaha kumuongweeya tuntu mweziwe? Eehe wose waidi wenda wengie mwe tubwi" 40 Mhina khamwemboka mhinyi wakwe, akini kiya mhina akabinda kuhinywa awa inga mhinyi wakwe. 41 "Kwa mbwai waona kibasi mwe ziso danduguyo na ahoaho khuona basi mwe ziso dako? 42 Wadaha viivih kumwamba nduguyo, 'Ndugu, goja nikuuse kibasi mwe ziso dako,' na uku khuona basi mwe ziso dako mwenye? Mbakha weye! Voka kulavya basi deumo mwe ziso dako, na aho nendiho wendaho uwone vitana na kudaha kuusa basi dekuwado mwe ziso da nduguyo." 43 "Mti mtana khaavyaa matunda yesayo kutama, naho mti wesao kutama khaavyaa matunda yatamayo, 44 kiya mti wamanyika kwa matunda yakwe. Kwaviya wantu khawatunda tini mwe misongoma wala zabibu mwe miwa." 45 Mntu mtana alavya matana kulawa mwe moyo wakwe na mntu mfyaimi hulavya yesayo kutama mwe moyo wakwe, kwaviya mntu ugombeka kulawana na yada yekumemayo mwe moyo wakwe. 46 "Kwambwai mwanetanga, 'Zumbe, Zumbe', na uku khamgosoa yada nigombekayo? 47 Nendaniwaonyeshe ni viivih eivyo mntu yuda ezae kwangu na kutegeeza mbui zangu na kuzigosoa. 48 Uyo aigana na mntu azengaye nyumba, mwekufuka asi na kuika msingi wakwe uwanga ya iwe na yakalawiiya mafuiko ya zigizigi da mazi, mfeeji wa mazi ukaitoa ida nyumba, iya

khaidaha kusingisika, kwaajii nee iwa izengwa vyedi. 49 Akini yoyose ategeezaye mbui zangu na akesekugosoa chochose, uyo aigana na mntu ekuzengaye nyumba uwanga ya msanga kwesiho kuika msingi. Mafuiko ya zigizigi da mazi neyalawiiya, mfeeji wa mazi ukaitoa nyumba ida, ikagwa na kubanika na kubondekabondeka."

7 Yesu ekubindaho kugombeka mbui yedi kwa wantu, akengia mzi wa Kapelinaumu. 2 Uko nekuwa na mkuu yumwe wa asikai wa Kilumi neekawa na mndima wakwe, neakamkundisa muno. Uyu mndima nekawa mtamu hehi na kuuya na nyuma. 3 Mkuu wa asikai wa Lumi ekusikiahio mbui za Yesu, neawaagiiya wadaa wa Kiyahudi, wakamwombeze eze amhonye mndima uyo wa mkuu wa Lumi. 4 Wekubuwaho kwa Yesu, ne wamhembeeza muno, wakamba, "Mntu huyu afaa kuambizwa, 5 kwaajii yee aikundisa si yetu, na nee mwekutizengea ida Nyumba ya kukintania Wayahudi." 6 Naho, Yesu akaita hamwe nao. Ekuwaho hehi na kubua kwe nyumba ya yuda mkuu wa maasikai, yuda mkuu wa masikai wa Lumi akawaagiiya wambuya wakwe wamwambe Yesu, "Zumbe, usekwepisha muno, kwaviya miye khifaa weye wengie mwe nyumba yangu. 7 Naho miye nchekweona inga nafaa kweza kwako. Akini gombeka mbui du, na mndima yangu enda ahone. 8 Kwamana hata miye uwanga yangu kuna wagookezi, na neno asikai asi yangu. Nikamwamba yumwe 'Hita,' naye aita, nikamwamba mtuhu 'Soo,' naye eza. Nikamwamba mndima yangu, 'Gosoa idi' nae agosoa." 9 Yesu ekusikiahio mbui iyo akahondomaa, naho akahitukia diya zumwezumwe da wantu wekuwao wamuondeza akamba, "Nchekuona mwenye uzumizi inga unu mwe wantu wose wa Isilaeli." 10 Naho wada wantu wekuwao waagiiwa kwa Yesu wekuuyaho kaya nee wambwiiya yuda mndima kahona. 11 Kisingi kwemboka, Yesu akaita mwe mzi umwe wetangwao Naini. Na wahina wakwe na zumwezumwe kuu da wantu wakaita hamwe naye. 12 Naho, ekuwaho yu hehi na uvi mkuu wa mzi, wakalawiiya wantu wenua kiimba cha mwana kigosi yumwe, mwana wa ikedu wa mvyee mwekufiwa ni mgosi. Wantu wangi wa mzi uda neswawa hamwe na uyo mvyee. 13 Zumbe Yesu ekumwonaho mvyee uyo akamfiya mbazi, akamwamba, "Usekuiya." 14 Naho akatimia hehi akadidonta diya tusi, na wada wekuwao wadenua wakagooka. Yesu akamba, "Mbwanga, nakwamba enuka." 15 Yuda Mbwanga ekuyae na nyuma akenuka na kwekaa, akavoka kutamwiiya. Na Yesu akamwegaa yuda mwana kwa mami yakwe. 16 Wantu wose wakaogoha muno na kumtogoia Muungu na kugombeka, "Muoni wa Muungu mkuu kalawiiya gatigati yetu. Muungu keza kuwaohowa wantu

wakwe.” 17 Mbui izo ekuzigosoazo Yesu zikaambazika kose mwe si ya Yudea na mizi yose ya hehi. 18 Wahina wa Yohana Mbatiza wakamwamba Yohana mbui izo zose ekugosoazo Yesu. Nee Yohana awetanga wahina wakwe waidi, 19 nee awagiya kwa Zumbe Yesu wamuuze, “Wee nee yuda tekwaye tikamkauwia, hambu tigoje mtuhu?” 20 Wada wahina wekumbwiya Yesu wakamwamba, “Yohana mbatiza katiagiya kwako tikuuze, ‘Wee nee yuda mwekuwa tikamkauwia, hambu tigoje mtuhu?’” 21 Kisingi ichoicho, Yesu nee ahonya wantu wangi wekuwao wasuumizwa ni matamu na wekukwewao na mazaiko na matuntu wangi wakadaha kuona. 22 Ivyo Yesu akawatambaisa, “Hitani mkamwambe Yohana yada yose mwekuyaonayo na kuyategeeza, matuntu waona, wekuviao miundi wenda, wenye utamu wa nyoka wang’azika, viziba wasikiya, wekuuyao na nyuma wayuyuswa, na wakiwa wabiikiwa Mbui Yedi.” 23 Kajaiwa mntu yuda ambae khana matumatu nami. 24 Wahina wa Yohana Mbatiza wekuhaukaho, Yesu akavoka kugombeka na diya zumwezumwe da wantu mbui za Yohana Mbatiza, “Mwekuitaho kwe kiwawe mwona mbwai? Nee ni inde dikasingiswa nkhusi? 25 Hambu mwita kukauwa mbwai? Nee mwita kumkauwa mntu mwe kuvaa gwanda ntana? Manyeni kuwa wavao magwanda ya hea nyingi na kwekaa wekazi wa ntunyo na makwasukwasu wekaa mwe mazumba ya maseuta. 26 Naho nambiani, mwita kooni mbwai? Nee mwita kumwona Muoni wa Muungu? Eehe, nkwei akini yee mwekumuonaye kembokesa Muoni. 27 Mwe Maandiko matana Muungu atamwiya uwanga ya Yohana akamwamba, ‘Yesu kuwa namuagiya mndima yangu Yohana akuongwee na kukuikia vitana sia yako.’” 28 Yesu akabiindiza kwa kugombeka, “Nawamba, mwe wantu wekwekaisao mwe inusi khahana ekuwaye mkuu kusima Yohana Mbatiza. Na ivyo, yuda ekuwaye mdodo mwe Useuta wa Muungu ni mkuu kusima yee.” 29 Wantu wose wekusikiaho ayo na watoza kodi nee watogoa wedi wa Muungu, aho nee wada wekuwao wauhokea ubatiizo wa Yohana. 30 Akini Mafalisayo na wahinyi wa miagiyo newaemea nteganyo ya Muungu yekukundigwayo wakaemea kubatiizwa ni Yohana. 31 Yesu akaendee kugombeka, “Naho, nendaniwaiganize wantu wa kivyazi iki na kintu chani? Ni wantu wa namna yani? 32 Ni inga wabwanga wekwekao gwiyo na kwambizana, kizumwezumwe kimwe na kituhu, ‘Tiwatoea fiimbi wala khamwekuvina, titoa wiya wa bwaimbwo wala kamwekuia’ 33 Kwaviya Yohana mbatiza keza, akehiniza kuda na khakudomea divai, nanywi mkamba, ‘Kakwewa ni mazaiko!’ 34 Mwana wa Mntu keza, ada na kudomea, nanywi mwamba, ‘Mkauweni uyu ni mmeo na mkozi, ni mmbuya wa watoza

kodi na wenye mavigaviga!’ 35 Na ivyo, umanyi wa Muungu yamanyika kuwa ni ntana kwa wantu wose waizumiiyao.” 36 Mfalisayo yumwe nee kamgoneka Yesu kuda khande mwe nyumba yakwe. Na Yesu akengia mwe nyumba ya uyo Mfalisayo, na akekaa kuda khande. 37 Naho mwe mzi uda nekuwa na mvyee yumwe mwekuwa na mavigaviga. Ekusikiaho Yesu yuuko mwe nyumba ya uyo Mfalisayo, akadoa nchupa yekugosolwayo na iwe detegwado alabasta yekumemezwayo mavuta matana ya hea nyingi. 38 Akeza, akagooka hehi ya miundi ya Yesu, akaiya na mesozi yakwe yakamwetikiya Yesu mwe miundi. Uyo mvyee akaihangusa miundi ya Yesu kwa fii zakwe. Naho akaiyumbatia na kuihaka yada mavuta matana. 39 Mfalisayo yuda ekumgonekae Yesu ekuonaho ayo, akamamaakhanya mwe moyo wakwe, “Inga mntu uyu nee ni muoni wa Muungu wa kwei nee kamanya mvyee uyu niwa viivhi, ni mwenye mavigaviga.” 40 Yesu akamwamba uyo Mfalisayo, “Simoni, nna mbui ya kukugombeka.” Naye Simoni akamwamba, “Eehe! Mhinyi, nigombeka.” 41 “Wantu waidi newawa wamkopa mntu hea. Yumwe nee kamwekha vintii vya madini ya feza mia shano, na mtuhu vintii vya madini vya feza elufu shano. 42 Wekuvotwaho kuiha madeni yao. Uyo mntu wakaekewas wose waidi. Isasa ni yuhi gati ya aho waidi enda amkundise muno zumbe?” 43 Simoni akamtambaisa, “Ni kwei yuda ekuekeewaye deni kuu endaamkundise yuda zumbe.” Yesu akamwamba, “Ni kwei.” 44 Naho akamhitukia yuda mvyee na kumwamba Simoni, “Wamwona mvyee uyu? Aho miye nekwengiaho hanu he nyumba yako khwekunekha mazi ya kusunta miundi yangu, akini mvyee uyu kanisunta miundi yangu kwa mesozi yakwe na kunihangusa kwa fii zakwe. 45 Wee khwekuniugusa kwa kuniumbatia, akini mvyee uyu kuvokea nekwengiaho hanu kawa akaumbatia miundi yangu. 46 Wee khwekunionyesha untana wako kwa kunihaka mavuta ya mzaituni mwe mtwi, akini uyu mvyee katenda ivyo kwa kunihaka mavuta matana mwe miundi yangu. 47 Kwa iyo nakwamba kaekewa mavigaviga yakwe kwaviya kaonesha ukundiso mkuu. Mwenye kuekewa vidodo mavigaviga, kakundisa vidodo.” 48 Aho, Yesu akamwamba yuda mvyee, “Kuekewa mavigaviga yako.” 49 Naho wada wekuwaaho wekaa hamwe wakauzana, “Ni ndai uyu adahaye kuekea mavigaviga?” 50 Naye Yesu akamwamba yuda mvyee, “Uzumizi wako ukuohowa, hita kwa uivanisa.”

8 Yekwembokaho ayo, Yesu nee kemboka mwe mizi na mizi akabiikia Mbui Yedi za Useuta wa Muungu. Wada wahina kumi dimwe na waidi wakatongeanaye. 2 Hamwe na wavyee watuhu Yesu ekuwalavyao mazaiko na kuwahonya matamu, wakatongeanaye. Awo nee

wakina Malia mwekwetangwae Magidalene, mwe kuavigwa mazaiko mfungate, 3 Yoana na mkaza Kuza, mndima mkuu wa Helode na Susana na wavyee watuhu. Awo wavyee nee wakamgosweeya ndima kwa vintu vyao vyose Yesu hamwe na wahina wakwe. 4 Kisingi kimwe zumwezumwe kuu da wantu nediwa dakintana, na wantu nee wamwezea Yesu kulawa kwe kiya mzi. Na Yesu akawamba msimo unu. 5 "Mhasi kenda kuhanda mbeyu zakwe. Ekuwaho aketia mbeyu ntuhu zikagwa mwe sia, na wemboka sia wakazijata na wadege wa uwanga wakazida. 6 Ntuhu zikagwa mwe uongo wekuwao na maiwe, na zekuhotao zikanyaa kwaajii ya kwesekuwa na uwisiuwisi. 7 Mbeyu ntuhu zikagwa kwe miti ya misongoma, na ida miti ya miwa yekuhotaho hamwe nazo nakuzifintafinta iyo mitengea ikanyaa. 8 Ntuhu nezigwa mwe sanga wenye khande, zikahota na kuvyaa vitana." Ekubindaho kugombeka ayo, Yesu akalavya mgutio, akamba, "Mwenye magutwi na ategeeze!" 9 Wahina wakwe Yesu wakamuza mana ya msimo uwo. 10 Naye akawatambaisa, "Nywinywi mwekhigwa umanyi wa kumanya ukwei wa Useuta wa Muungu ambao aho kae khawekumanyika akini isasa uikwa pwii, akini awo watuhu wendawembigwe kwa misimo, wakakauwa wasekudaha kuona, na wakategeza wasekumanya." 11 Mana ya msimo unu ni inu, Mbeyu ni mbui ya Muungu. 12 Ziya zekugwazo mwe sia zaonyesha wantu wada wategeezao ida mbui, ikaukaaho ibiisi akeza na kudihusa mwe mioyo yao wasekweza kumzumia na kuoholwa. 13 Ziya zekugwazo mwe maiwe zaonyesha wada wantu wategeezaho ida mbui wakaihokea kwa kinyemi. Akini inga ziya mbeyu, wantu awo khawana mazindo na mbui iyo khayekaa mwe mioyo yao kwaviya wazumiiya kwa kisingi du, na kisingi wageezwaho kubadana na mbui iyo. 14 Ziya mbeyu zekugwazo mwe miti ya miwa ni wantu wada wategeezao ida mbui, akini kisingi si kisingi, wahaukao wafintwafintwa na maatu, na vintu vyao vyose, na wekazi wa kiya msi nao khawakua mwe mbui ya Muungu. 15 Na ziya zekugwazo mwe sanga ntana nee wada wategeezao ida mbui wakaizumiiya kwa moyo mtana na wa kutegeeza. Awo kuzimizima na kuendeeza kugosoa mbui zimkundisazo Muungu. 16 Wantu khawawasha taa na kuigubika kwa nyungu hambu kuiika mzungui. Akini waika uwanga ya kiango ili wantu wengiaho gati wadahe kuona ung'azi. 17 "Ivyoivyo chochose chekufiswacho chenda kigubulwe, na sii yoyose yesayokumanyika na yendaimanyike pwii. 18 "Kwa iyo, muwe meso mtegeezavyo. Kwaajii yoyose mwenacho endaekigwe na ngeeko, akini yuda mwesena, hata kiya afikiicho anacho, chendakidoigwe." 19 Aho mami yakwe da Yesu na wanduguze wakamwezea, akini khawokudaha kumwezea hehi kwaajii ya

zumwezumwe da wantu. 20 Mntu yumwe akamwamba Yesu, "Mami yako na wanduguzo wagooka chongoi, wakunda wakuone." 21 Akini Yesu akawamba wantu wose, "Mmaa yangu na wandugu zangu ni wada wategeezao mbui ya Muungu na kuditoza." 22 Msi umwe, Yesu nekakwea ngaawa hamwe na wahina wakwe, akawamba, "Tidumuwe ntondoo da mazi tiite adi phande ya kaidi." Naho, wakavoka ntambo. 23 Ekuwaho wakatamba kwa ngaawa iyo, Yesu akagona. Ahoaho khushi khai ikavoka kuvuma, mazi yakavoka kwengia mwe ngaawa, newawa hehi na kudagamia. 24 Wada wahina wakamtimia Yesu, wakamwenua wakamwamba, "Zumbe, Zumbe! Tadagamia!" Yesu akenuka akaiwakia ida khushi na mkubwaniso wa mazi, navyo vikatwiiya, nee kwatuiiya. 25 Naho akawamba, "Uzumizi wenu u hahi?" Akini wowo wakatozwa ni umako na kuogoha uku wakagombekana, "Uyu ni ndai, ata agiia khushi na mkubwaniso wa mazi, navyo vyamtegeeza?" 26 Waendeeya na ntambo, wakabua mpwani ya si ya Wagelasi zekuhakanazo na ntondoo da mazi da Galilaya. 27 Ekuwaho aseeya mpwani, mntu yumwe ekuwaye kakwewa na mazaiko akamwezea kulawa he mzi uda. Kwa misi mingi mntu uyo kheekuwa akavaa magwanda, wala khekuwa akekaa mwe nyumba iya mwe mambiya. 28 Ekumuonaho Yesu, aketambika ahosi hemeso yakwe na kugombeka kwa mgutio mkuu, "Wee Yesu Mwana wa Muungu ekuwaye uko uwanga, una mbui yani na miye? Nakuhembeeza usekunisumiiiza!" 29 Nee kamba ivyo kwaviya Yesu nekamwamba uyo zaiko amlawe mntu uyo. Zaiko ido ne dikamkwea mntu uyo maa kwa maa, na etiho wantu wamuika ndani na kumzengeteza kwa minyololo na mphingu, akini kiya maa akazidumua mphingu izo, akegalwa na zaiko ido adi he kiwawe. 30 Naho, Yesu akamuza, "Zina dako ni ndai?" Yee akamtambaisa. "Zina dangu ni 'Hindoo'" kwaajii mazaiko mangi nee yammema. 31 Ayo mazaiko wakamhembeeza Yesu asekuwegaa tubwi dilehado desado kuwa na kisiikizi. (Abyssos g12) 32 Hantu aho nekuwa na tintimo kuu da nguuwe wakaiswa mwe mpolomoko wa muima. Naho ayo mazaiko wakamhembeeza awabade wawengie wada nguuwe. Naye Yesu akawabada wawengie. 33 Kwa iyo mazaiko ayo yakamlawa yuda mntu, yakengia kwa wada nguuwe na wakaseeya kwa kinyionyio mwe uda mpolomoko mkai, wakengia mwe ntondoo da mazi, wakafa. 34 Wada waisi wekuonaho yose yekuawiiyo wakaguuka, wakaita kuwekha wantu mbui mwe mzi na mwe minda. 35 Wantu wakeza kukauwa yekulawiiyo. Wakamtimia Yesu, wakamwona yuda mntu mwe kulavigwa mazaiko kekaa hehi na Yesu kavaa magwanda, na akii zakwe zimuiiya, wakaogoha. 36 Wada wantu wekuonaho ida

mbui wakawagombekea wada wantu wekwezaho hada viya yuda mntu mwekuwae na mazaiko ekuholwavyo. 37 Wantu wa si ya Gelasi wakaogoha muno. Iyoyi wakamuombeza Yesu ahauke. Iyoyi Yesu akakwea vituhu ngaawa ahauke. 38 Yuda mntu mwe kuavigwa yada mazaiko akamhembeeza aite hamwe naye. Yesu akamwemeza, na akamwamba, 39 "Uya kaya ukawambe yose Muungu ekukugosweyavyo." Aho, yuda mntu akaita akabiikia kiya hantu mwe mzi uda mbui zose Yesu ekumgosweyavyo. 40 Yesu ekuuyaho phande ya kaidi ya ntondoo da mazi, zumwezumwe da wantu dikamhokea, kwaviya wose nee wakamgoja. 41 Aho akeza mntu yumwe zina dake Yailo, muongoezi wa Nyumba ya kukintania Wayahudi, nee etambika he meso ya Yesu, akamhembeeza aite kaya kwakwe. 42 Kwaajii ni mwana waikedu wa kivyee, mwenye myaka kumi dimwe na mbii, nekawa yu hehi na kuuya na nyuma. Yesu ekuwaho akaita wantu ne wamfintafinta kiya phande. 43 Kuwa na mvyee yumwe gatigati ya diya zumwezumwe da wantu, nekawa akalawa phome kwaviya nekawa na utamu wa mtuo kwa kisingi cha myaka kumi dimwe na mbii. Naho nekabinda vintu vyakwe vyose kwa waganga, khahana ekudahae kumhonya. 44 Uyo mvyee ne amtongea Yesu nyuma, akadonta msao wa gwanda dakwe. Ahoaho, akahonywa utamu wakwe wakulawa phome. 45 Yesu akauza, "Nndai mwekunidonta?" Wose wakaamea wakamba khahana mntu ekukudontae. Naye Petulo akamba, "Zumbe, zumwezumwe da wantu wakuikia bunga na kukufintafinta!" 46 Akini Yesu akamba, "Kuna mntu kanidonta, mana khimanya kihinya mntu kwa udaho wangu." 47 Yuda mvyee ekuonaho khadaha kwefisa, akeaviiza huku akakama kwa kuogoha aketambika hemeso ya Yesu. Aho akawamba wantu wose chekumwekacho kumdonta Yesu na kwaviya ekuhonywavyo vuu puu. 48 Yesu akamwamba, yuda mwana kivyee, "Hita kwa uivanisa, kuzumiiya kwako kukuhonya." 49 Ekuwaho aendeeya kugombeka, Yailo yuda muongoezi wa nyumba ya kukuntania Wayahudi akaetewa mbui kulawa kaya, "Mwana yako wakivyee kauya kaye na nyuma, usekumpisha Mhinyi." 50 Yesu ekusikiaho ayo akamwamba Yailo, "Usekuogoha zumiiya du, naye endaahone." 51 Ekubuwaho nyumbani kwa Yailo khawekumbada mntu kwengia ndani hamwe naye, iya Petulo, na Yohana, na Yakobo na wavyazi wa mndee uyo. 52 Wantu wose nee wakiiya na kuomboeza kwaajii ya uyo mndee ekuyae na nyuma. Aho Yesu akawamba, "Msekuiya, kwaajii mwana khekuyua na nyuma, kagona du!" 53 Nawo wakamseka Yesu kwaajii nee wamanya kauya kae na nyuma. 54 Akini Yesu akamtoza mkono akamba, "Mwana enuka!" 55 Muye wakwe ukamuuiya, vuu puu akenuka,

Yesu akawamba wamwekhe khande. 56 Wavyazi wakwe nee wahondomaa, aho Yesu akawaemeza wasekumwamba mntu yeyose aya yekugosokayo.

9 Yesu nee awetanga wada wahina kumi dimwe na mbii, akawekha udaho wa kuguusa mazaiko yose, na udaho wa kuhonya matamu. 2 Naho akawagiya waite kubiikia wantu mbui za Useuta wa Muungu na kuhonya wantu matamu. 3 Akawamba, "Mwendahomtambe msekudoa chochose, msekudoa ngoda wala jumu, wala khande, wala hea hata gwanda tuhu." 4 Nyumba yoyose mwendayo mwengie na kuhokewa, ekaani umo hadi mwendaho mhauke mwe mzi uwo. 5 Wantu wendaho wawaamee kuwahokea, lawani mwe mzi uwo, nanywi mlawaho kung'untani sanga mwe miundi yenu, ili kuwa uvuhuzi kwao. 6 Naho wahina awo wakavoka kutamba, wakemboka mwe mizi wabiikia wantu Mbui Yedi na kuhonya watamu kiya hantu. 7 Naye, seuta Helode mgookezi wa si ya Galilaya ekutegeezaho mbui ya yose yekulawiiyo, neawa ni maatu kwaajii wantu watuhu ne wakagombeka kuwa Yohana Mbatiza kayuyuka. 8 Watuhu ne watamwiiya Eliya mwekuwa muoni wa Muungu kalawiiya, na watuhu wakatamwiiya kwamba yumwe wa waoni wa kae kayuyuka. 9 Helode akamba, "Uyo Yohana nekhimsenga mtwi, isasa ndai uyu nitegeezaye mbui zakwe?" Ne awa na hovu ya kumkauwa. 10 Wada wagiwa wekuuyaho, wakamgombeka Yesu yose wekuyagosoayo. Yesu akawadoa, wahina wakwe wakaita hikedu mwe mzi wa Betisaida. 11 Akini wada wantu wekumanyaho ekuitaho, wakamtongea. Yesu akawahokea ne atamwiiya nao kuusu mbui ya Useuta wa Muungu na akawahonya wada wekukundao kuhonywa. 12 Zua dekuswaho, wada wahina kumi dimwe na mbii wakamwiiita na kumwamba, "Wabade wantu waite mwe mizi na mwe minda ya hehi wakaondeze khande na hantu hakugona, kwaviya aha teiho ni mwe nyika." 13 Yesu akawamba, "Wekheni nywinywi khande." Wakamtambaisa, "Khatina chochose iya mabumunda mashano na samaki waidi. Wakunda swie tikawagwiye khande wantu wose hawa?" 14 Wekuwaho hada nee ni wagosidu elufu shano. Naho, Yesu akawamba wahina wakwe, "Wagombekeni wantu wekae kwe mazumwezumwe ya wantu makumi mashano." 15 Wahina wakagosoa inga wekugombekwavyo, wambeni wantu wose wekae. 16 Naho Yesu akayadoa yada mabumunda mashano na wada samaki waidi, akakauwa uwanga kwa Muungu na kumtogoia Muungu, akavijaiya, akabendua, akawekha wahina wakwe wawekhe wantu. 17 Wantu wose wakada na kweguta. Wahina wakadodoa phuguntio za khande, wakamemeeza ngahu kumi dimwe na mbii. 18 Msi umwe,

Yesu ekuwaho avika ikedu, na wahina wakwe ne wawa hehi naye. Naho akawauza, "Wantu wamba miye ni ndai?" **19** Nao wahina wakamtambaisa, "Watuhi wamba kuwa wewe ni Yohana mbatiiza, watuhu wamba ni Eliya muoni wa Muungu, na watuhu wamba ni yumwe wa waoni wa kae ambae kayuyuka." **20** Aho akawauza, "Na nywinywi, mwamba miye ni ndai?" Petulo akamtambaisa, "Wee nee Klistu ekusagulwaye ni Muungu." **21** Yesu akawawakia wasekumwamba mntu yoyose mbui iyo. **22** Yesu nee aendee kugombeka kuwa nlazima Mwana wa Mntu endaasuumizwe na kuemewa na wadaa na waviki wakuu na wahinyi wa miko na kukomwa, akini mwe msi wa ntatu endaayuyuke. **23** Naho akawamba wantu wose, "Mntu yoyose akundaye kunibasa nlazima eemee mwenye, adoe mhamba wakwe kia msi na anibase. **24** Kwaviya, mntu akundaye kuohowa ugima wakwe mwenye, enda awaze, akini awazae ugima wakwe kwaajii yangu, enda auohoe. **25** Mntu endaekhingwe myengizo yani ati akekhigwa vintu vyose vya mwe inusi, akini akawaza ugima wakwe mwenye hambu kwedagamiza mwenye? **26** Mntu akanionea soni miye na mahinyo yangu, Mwana wa Mntu endaamwonee soni mntu uyo kisingi endachoeze mwe Ukuu wakwe na wa Tate na wandima wa uko uwanga kwa Muungu wang'azi. **27** Nawamba kwei, kuna wamwe wenu aha khawana waye na nyuma adi aho wendao wauwone Useuta wa Muungu." **28** Yekubuwa msi wa nane bada ya kutamwiya ayo. Yesu ne awadoa Petulo, na Yohana na Yakobo, akaita nao mwe muima kuvika. **29** Ekuwaho avika, cheni chakwe kikahituka, na magwanda yakwe ne yakang'ang'azika pee. **30** Ahoaho wantu waidi wakaawiiya wakatamwiya nae, nao ne wawa Musa na Eliya, **31** amba walawiiya wakawa wenye ukuu, wakatamwiya nae kuusu kulawa kwakwe endavyo aiganye uko Yelusalemu. **32** Petulo na wenziwe ne wagona fofofu, wekwenukaho, wakoona Ukuu wakwe, na wada waidi wekugokao hamwe nae. **33** Naho wantu awo waidi wekuwaho wakahauka, Petulo akamwamba Yesu, "Zumbe ni vyedi swiswi tiaha. Naho tizenge makumbi matatu, dimwe dako, na dimwe da Musa na dimwe da Eliya." Kwa kwei khekumanya agombeka mbwai. **34** Petulo ekuwaho agombeka ayo, vuu puu zunde dikaawii na kuwagubika na zunde ido dekuwezeaho wada wahina wakaogoha muno. **35** Mgutio ukategzeezeka kulawa mwe ido zunde, "Uyu nee Mwanangu nekumsaguaye, mtegeezeni." **36** Wekwembokaho uwo mgutio kutegeezeka, Yesu nekaoneka yu ikedu. Wahina wakanyamaa myee khawokuiyandua mbui iyo, na kisingi kiya khawokumgombeka mntu yoyose mbui izo wekuonazo. **37** Kioi dakwe Yesu hamwe na wahina wakwe watatu wekuwaho waseeya kuda kwe muima, zumwezumwe

kuu da wantu dikakintana na Yesu. **38** Aho, mntu yumwe mwe diya zumwezumwe akatoa mgutio, akamba, "Mhinyi! Nakuhembeza umhonye mwanangu wa ikedu. **39** Maa kwa maa zaiko damkweya, na kumtenda atoe vuzo, naho damgwa na kumgea ugwa mtwi na kulawa fuo mwe kanwa. Uyo zaiko amsumiiza muno na khadimbada kwa kinyio. **40** Khiwaombeza wahina wako wadiguuse akini khawokudaha." **41** Yesu akamba, "Enyi uvazi wesaho na uzumizi, na chenye mavigaviga nndanekae nanyi na kuwazizimiza adi ini?" Aho akamwamba uyo mntu, "Mwete uyo mwanao hanu." **42** Kisingi uyo mwana ekuwaho amwezea Yesu, yuda zaiko neamgwa asi na kumgea ugwa mtwi. Akini Yesu akamwakia yuda zaiko, na akamhonya yuda mwana na kumwegaa mwana kwa tati yakwe. **43** Wantu wose wakahondoma kwa udaho mkuu wa Muungu. Wada wantu wekuaho watozwa ni umako kwa mbui zose ekugosoazo, Yesu akawamba wahina wakwe. **44** "Tegezani vitana aya niyagombekayo isasa, Mwana wa Mntu endaahitukwe na kugewa mwe mikono ya wantu." **45** Akini wowo khawekumanya mana ya chekutamwiwacho. Mbui iyo iwa ifiswa kwao wasekumanya, nao wakaogoha kumuza kuusu chekugombekwacho iko. **46** Naho wahina wa Yesu wakavoka kuuzana kugombeka ni ndai mkuu gatigati yao. **47** Yesu akamanya mamakhanyi zekuwazo mwe mioyo yao, nee amdoa mwana akamuika hehi naye. **48** Akawamba, "Yoyose amhokeye mwana uyu mdodo kwa zina dangu kwaajii anihokeya miye. Na yoyose anihokeya miye, amhokeya yuda mwekuniagiya. Kwaajii yuda ekuwaye mdodo gatigati yenu, yee ni mkuu kusima wose." **49** Yohana akagombeka, "Zumbe timwoona mntu yumwe alavya mazaiko kwa wantu kwa zina dako ne tamwemeza kwaviya yeye khayuhu hamwe naswi." **50** Akini Yesu akamwamba, "Msekumwemeza, kwaviya yoyose mweyekuhigana nanywi yu hamwe nanywi." **51** Kisingi chekubua hehi Yesu kudoigwa kuita uwanga kwa Muungu, akoona avoke ntambo ya kuita Yelusalemu. **52** Naho akawagiiya wagiwa wamuongoee, nao wakaita wakengia mwe mzi umwe wa wantu Wasamalia wamgoswee kia kintu. **53** Akini wenyezi wa mzi uda ne waemea kumhokeya kwaviya nekawa akaita Yelusalemu. **54** Wahina wakwe, Yohana na Yakobo wekuonaho ayo wakamba, "Zumbe wakunda tiuwagiye moto kulawa uwanga kwa Muungu uwadagamize?" **55** Akini Yesu neawahitukia, na kuwakia. **56** Wakalawa, wakaita mwe mzi mtuhu. **57** Wekuwaho watamba mwe sia, mntu yumwe akamwamba Yesu, "Nendanikubase hohose uitako." **58** Yesu akamba, "Mbweha wana phanga na wadege wa uwanga kwa Muungu wana masasa, akini Mwana wa Mntu khana hantu ha kugona." **59** Naho akamwamba

mntu mtuhu, "Nitongea." Mntu uyo akamba, "Zumbe, nieka nivoke kuita kwe uzisi wa tate." 60 Yesu akamwamba, "Wabade wantu wekuwao wauya na nyuma mwe mioyo yao wazike wekuyao na nyuma wezwao, iya wee hita ukabiikie Useuta wa Muungu." 61 Na mntu mtuhu akamwamba, "Zumbe nendanikubase, akini eka nkaage wada wekuwao mwe kaya yangu." 62 Yesu akamwamba, "Mntu yoyose atozaye gembe na yutayali kuima na uku akauwa nyuma, khafaa kwa Useuta wa Muungu."

10 Yekwembokaho ayo Zumbe akasagua watuhu makumi mfunigate na mbii, akawagiya wandima waidiwaidi wamuongwee mwe kiya mzi ambao yee mwenye ne akakunda kuita. 2 Akawamba, "Ubosi ni mwingi akini wabondaji ni wacheche, kwa iyo mwoombezeni Zumbe wa ubosi agiye wantu wakabonde." 3 Isasa hitani, manyeni kuwa nawagiya nywinywi inga ngoto waitao gatigati ya makui ya mzitui. 4 Msekudoa kifuko cha hea, jumu wala sabana, msekumuugusa mntu yoyose mwe sia. 5 Mkengia mwe kaya yoyose mvoke kuwagusa ivi, "Uivanisa uwe mwe nyumba inu." 6 Akawaaho mntu akundaye uivanisa, ugusi wenu wa uivanisa wenda usigae, ama khivyo ugusi uwo wa utiuvu undauwauwie. 7 Ekaani mwe nyumba iyo mkada na kudomea wendavyo wawekhe, kwaviya mndima afaigwa kwekhigwa kima chake. Msekusama nyumba inu na nyumba ida. 8 Ati mkabua mzi wowose na wantu wakawahokea, daani wendavyo waviete hemeso yenu. 9 Honyani watamu wekuwao uko, wagombekeni wantu, "Useuta wa Muungu u hehi." 10 Akini mkengia mwe mzi wowose, wakesekumihokea, lawani, nanyi mwembokaho mwe sia zao gombekani, 11 Hata sanga za mzi wenu yekutozananyo, na miundi yetu tayakung'uta iwe tangio ya mavigaviga yenu. Akini manyani kuwa, "Useuta wa Muungu uhehi." 12 Kwei nawamba, msi wa kuamuiwa mzi uwo wendawekhwige sugusa khuu kusima yada mavigaviga ya wantu wa mzi wa Sodoma. 13 Mmbui yenu wantu wa Kolazini! Mmbwii yenu wantu wa Betisaida, inga vihii vyekugosokazo kwako ati ne vigosoka kuda Tilo na Sidoni, nee wawa wavaa kae magunia na kwesisa mazeu na ili koonyesha kuhituka na kubada mavigaviga yao. 14 Hata ivyo, msi wakuamuiwa nywinywi mwenda mwekhigwe sugusa khuu kusima ida ya wantu wa Tilo na Sidoni. 15 Nywie wantu wa Kapelinaumu, "Mweona mwenda mwekhigwe ntogoo adi uwanga kwa Muungu? Eehe, mwendamseezwe adi asi kwe si ya wantu wekuuyao na nyuma." (Hadēs g86) 16 Yesu akawamba wahina wakwe, "Endaeawategeeze nywinywi, anitegeeze miye, na endayeawaamee kuwahokea nywinywi, aemeya kunihokea miye. Na yoyose aemeaye

kunihokea, aemea kumhokea yuda ekuniagiaye ambae ni Muungu." 17 Naho wada makumi mfunigate na mbii newauya wamema kinyemi, wakagombeka, "Zumbe hata mazaiko yatutegeeze tekuyawakiaho kwa zina dako." 18 Yee akawatambaisa, "Khimwona ibiisi ekuwavyo akagwa inga umweko wa umbauwa kulawa uwanga kwa Muungu. 19 Kauwa khiwekha udaho wa kujata nyoka na visuse, na udaho wose wakumvota yuda mmasa, wala khahana kintu chochose chendachokimizuu. 20 Naho msekuwa na kinyemi kwaajii mazaiko wamitegeeze, iya kuwani nanyemi kwaajii mazina yenu yaandikwa uwanga kwa Muungu muwe wantu wa Muungu." 21 Saa idaida, Yesu nekawa na nyemi kwa udaho wa Muye wa Muungu, akamba, "Nakutogoa ee Tate, Zumbe wa uwanga kwa Muungu na inusi, kwaajii mbui izi wekuwafisazo wenye akii na umanyi, ukawamanyisa wadodo. Eehe Tate, ne vyekukutamiavyo." 22 Ne agombeka, "Tati yangu kanekha vintu vyose. Khahana ammanyaye Mwana iya Tate, wala ammanyaye Tate iya Mwana, na yoyose yuda ambae Mwana endaakunde kumgubuiya." 23 Naho akawabasa wahina wakwe akawamba he ikedu, "Wajaiwa wada wakauwao mbui izi mkauazo nywinywi! 24 Kwei nawamba, waoni na maseuta watamiwa kukauwa yada muyakauwayo nywinywi akini khawekuyaona na kuyategeeze yada mtegeezezo akini khawadaha." 25 Aho mhinyi wa miagiyo yumwe akagooka, akamuza Yesu, akakunda kumgeeze, "Mhinyi, nigosoe mbwai nidahe kwekaa misi yose kwesaho kisiikizi?" (aiōnios g166) 26 Yesu akamtambaisa, "Yamba mbwai mwe miagiyo? Mwamamakhanya viivhi?" 27 Yuda mntu akamtambaisa Yesu, "Mkundise Zumbe Muungu yako kwa moyo wako wose, kwa muye wako wose, kwa udaho wako wose na kwa akii zako zose. Na mkunde mntu wa hehi nawe inga wekundavyo wee mwenye." 28 Yesu akamwamba, "Kutambaisa vyedi! Gosoa ayo, nawe wendauwe na ugima wa misi yose kwesaho kisiikizi." 29 Akini yuda Mhinyi wa miagiyo neakakunda kweonyesha kuwa ni mtana akamuza Yesu, "Na mntu wa hehi yangu ni ndai?" 30 Yesu akamtambaisa, "Mntu yumwe kawa akaseeya kulawa Yelusalemu kuita Yeliko. Ekuwaho mwe sia, neafuntiwa ni mabagaa, na kumhoka vintu vyake vyose na kumtoa na kumbada kagona hada hehi na kuuya na nyuma." 31 Ahoaho mviki yumwe nekawa akemboka mwe sia idaida, ekumuonaho akemboka khandani. 32 Nee eza Mlawi yumwe, ekubuwaho hada hantu akamwona, naye akemboka khandani. 33 Akini Msamalia yumwe nekawa akatamba, neabuwa hada kwa yuda mntu ekufintwae ekuwaho, naye ekumuonaho akamfiya mbazi. 34 Akambasa, akamfunga vionda vyakwe kwa vibwende na kumsisa

mavuta ya mzaituni na divai, akamkweza uwanga ya phunda wakwe, akamwegaa mwe nyumba ya kuhumuizia wageni akamhumiza. 35 Kioi yakwe akalavya ntii mbii vya madini ya feza akamwekha yuda mwenye nyumba akamwamba, "Mhumize mntu uyu na chochose wendachoutumie, nendanikuihe nendahoniuye." 36 Naho Yesu akauza, "Gatigati ya awo watatu, ni yuhi mweweonyesha kuwa mntu wa hehi yakwe yuda ekufuntiwaye na mabagaa?" 37 Yuda mhinyi wa miko akamtambaisa, "Ni yuda ekumfiaye mbazi." Yesu akamwamba, "Hita ukagosoe ivyoivyo." 38 Yesu na wahina wakwe wekuwaho watamba kuita Yelusalemu, wakengia mwe mzi umwe na mvyee zina dakwe Malita, akamhokea kaya kwakwe. 39 Malita ne kawa na dadiye etangwaye Malia uyu ne kekaa hehi na Zumbe akateggeeza mahinyo yakwe. 40 Akini Malita nekawa akagoso ndima za zikoi na mbui nyingi, nee akamwiita Yesu akamwamba, "Zumbe ivi khupatiiza kwambwai dada yangu kanibada nagosoa ndima za zikoi ikedu? Umgombeke aniambiize." 41 Akini Zumbe akamtambaisa, "Malita, Malita kwambwai wepisha kwa ndima nyingi." 42 Akini kuna mbui mwenga ntana kusima yose, mbui iyo ni kunitegeeza. Malia nee ekusaguado na khahana mntu yoyose adahae kumhoka.

11 Msi umwe, Yesu kawa hantu akavika. Ekubindaho kumvika Muungu, yumwe wa wahina wakwe akamwamba, "Zumbe, takunda utihinye kuvika inga Yohana mbatiiza ekuwahinyavyo wahina wakwe." 2 Yesu akawamba, "Mkavika Muungu, gombekani ivi, 'Tate yetu weuko uwanga kwa Muungu Zina dako ditogolwe, Useuta wako weze. 3 Utekhe khande yetu kiya msi. 4 Utekee mavigaviga yetu, Kwaajii swie tiwaekeavyo wose wekutikoseao, Wala wesekutizinga mwe mageezo." 5 Naho Yesu akawamba wahina wakwe, "Nndai gatigati yenu mwenye mmbuya wakwe akamwezea na kio kikuu akamwamba, 'Mmbuya nekha mabumunda matatu. 6 Kwaajii mmbuya wangu kanezea alawa ntambo, namiye khina khande ya kumwekha.' 7 Naho yuda mwe kuwa gati akamtambaisa, 'Usekunipisha uvi uvugalwa kae, miye na wanangu tigona kae, khidaha kwenuka na kukwekha ukundacho.' 8 Kwei nawagombeka inga uyo mntu khana enuke na kumwekha ayo mabumunda kwaajii ni mmbuya wakwe, akini kwaajii ya uyo mntu kwesekuona soni kuendee kwakwe kumwetanga enda enuke na kumwekha kia ekukikundacho. 9 "Ivyo nawagombakeni, ombezani nanywi mwondamwekhigwe, ondezani na nywie mndampate, kontani uvi nanywi mwenda mvuguiwe. 10 Kwaviya kia aombezaye ekhigwa, na kia aondezaye endaekhigwe na kia akontaye uvi avugwiwa. 11 Hambu kuna yoyose

gatigati mwenu, mwana yakwe akamwombeza samaki, enda amwekhe nyoka na khiyo samaki? 12 Hambu mwana akamwomba tagi, endaamwekhe kisuse? 13 Naho nywinywi wenye mavigaviga mwadaha kuwekha wana wenu vintu vyedi, kwei tati yenu wa uwanga kwa Muungu endaagosoe muno, endaawekhe Muye wa Muungu wada wamuombezaol!" 14 Naho Yesu ekuwaho amlavya zaiko mwe kuwa kwa mntu ekuwaye khadaha kutamwiya. Yuda zaiko ekumlawaho yuda mntu mwekuwa khadaha kutamwiya, nee avoka kutamwiya na zumwezumwe da wantu dikahondomaa. 15 Akini wamwe wa wantu awo wakagombeka, "Aguusa mazaiko kwakwekhigwa udaho wa Belizebuli, yuda muongoezi wa Mazaiko." 16 Wantu watuhu wakamgeeza, wakaonda awaonyeshe utangio kulawa uwanga kwa Muungu. 17 Akini yee, akamanya mamakhanyi zao, akawamba, "Useuta wowose wekuiganyikao vizumwezumwe vihiganavyo khaudaha kwekaisa, naho wandugu wowose wenao khumbizi wadagamia." 18 Inga Ibiisi akahigana yee mwenye, useuta wakwe wendagooke viivih? Isasa mwadaha viivih kugombeka ati nalavya mazaiko kwa udaho wa Belizebuli? 19 Naho, inga miye nkawaguusa mazaiko kwa udaho Belizebuli, hata wahina wenu pia wawaguusa kwa udaho wakwe, kwaajii iyo wahina wenu nee wendaowawamuiye nywinywi. 20 Akini ikawa naguusa mazaiko kwa udaho wa Muungu, manyeni kuwa useuta wa Muungu ubuakae kwenu. 21 "Mntu mwenye muku aindaho nyumba yakwe kwa guha na uta, vintu vyakwe vyose vyendaviwe mwe uivanisa. 22 Akini akeza mwenye muku muno, akamfuntia na kumvota, mntu uyo endaadoe vitoanavyo vyakwe ekutegemeavyo na kudoa vintu vyakwe vyose." 23 "Yoyose mwesekwvana nami ahigana nami, na mntu yoyose mwesekuika hamwe nami, endaamwaganise." 24 "Zaiko dimlawaho mntu daangadika hantu kwesiho na mazi na kuondeza hantu ha kuhumwiiza. Akesekuhapata egombekeya nindaniuuwiye ida nyumba yangu nekulawayo." 25 Auyaho aibwiya ida nyumba ihagiwa na vintu viikwa vitana. 26 Naho aita na kuwadoa mazaiko watuhu mfungate wafyaimi muno kusima yee, wose waita wakamwengia mntu uyo. Ivyo ugima wa mntu uyo undautendese kuwa wa ufyaimi muno kusima aho bosi. 27 Yesu ekuwaho akatamwiya ayo, mvyee yumwe gatigati ya diya zumwezumwe da wantu, akagombeka kwa mgutio mkuu, "Kajaiwa mvyee ekukuvyaae na kukuonkesa." 28 Yesu akamtambaisa, "Akini waijiwa muno wada wategeezao mbui ya Muungu na kuizumiya." 29 Zumwezumwe da wantu wekutendesaho kugenyea, Yesu akaendee kuhinya akagombeka, "Iki ni kivyazi chenye mavigaviga. Chaondeza utangio, akini khakinachekigwe utangio wowose iya utangio wa Yona. 30 Inga viya Yona

ekuwavyo utangio kwa wantu wa Ninawi, nee vyendavyo viwe kwa Mwana wa Mntu kwa kivyazi iki. 31 Seuta wa kivyee wa Sheba endaalawiye kisingi kivyazi iki chendavyo kiamuiwe na Muungu, nae endaatamwiye kivyazi iki kina mavigaviga. Kwaviya yee nee katamba kulawa hae mwe inusi, akeza kutegeeza umanyi wa Seemani na niaha nekuwae mkuu kusima Seemeni.” 32 “Wantu wa Ninawi wendawalawiye kisingi cha kuamuiwa, nao wenda waonyeshe kivyazi iki kina mavigaviga. Kwaviya wantu wa Ninawi newahituka kwa kubada mavigaviga yao kwaajii ya ubiikizi wa Yona, niaha nekuwae mkuu kusima Yona.” 33 “Khahana mntu awashae taa na kuigubika kwa nyungu, iya aiika uwanga ya kiango wantu wengiao mda gati wadahe kuona ung'azi. 34 Taa ya mwii wako ni sizo. Inga meso yako yendyakauwe vitana he ung'azi mwii wako wose wenda uwe vitana, na inga meso yako khayana yakauwe vitana aho mwii wako wenda uwe na kiza. 35 Naho ukauwe, ung'azi weumo mwe mwii wako usekweza kuwa kiza. 36 Naho inga mwii wako wose ukawa na ung'azi, na kwesekuwa na hantu hohose he kiza, mwii uwo wenda ung'ae vyedi muno inga viya taa ikumwiikavyo kwa ung'azi wakwe.” 37 Yesu ekuwaho atamwiya, mntu yumwe Mfalisayo neamgoneka akade khande kaya kwakwe. Yesu nee aita, akekaa kuda khande. 38 Uyo Mfalisayo ne ahondomaa kuona Yesu ada khande kwesao kusunta mikono inga yekuwavyo wagosoa kia msi. 39 Zumbe akamwamba, “Nywinywi Mafalisayo mwasunta via vya kudiiya khande kwa chongoi, akini ndani mmema uhokaji na mavigaviga. 40 Nywie wahezi! Khammanya kuwa Muungu yee nee mwekugosoa chongoi nee uyo mwe kugosoa na ndani? 41 Wekheni wakiwa vintu mwekuwavyo navyo, na kiya kintu mgosoacho kindakiwe vyedi kwenu. 42 “Akini mmbwii yenu Mafalisayo, kwaviya mwamwekha Mungu hantu ha kumi dimwe mnanaa na bwache na kiya mbai za mboga za mani, akini mwajaa haki na ukundiso wa Muungu. Naho iwakunda kulavya malavyo ayo, wala msekujaa kugosoa matuhu. 43 “Mmbwii yenu nywinywi Mafalisayo, kwaajii nywie mwakunda kwekaa mwe vigoda he meso ya wantu mwe Nyumba za kukintania Wayahudi na kuuguswa kwa ishima mwe maguiyo. 44 Mmbwii yenu Mafalisayo kwaajii nywinywi inga mambiya yekwagayo, wantu wayajata kwesihio kumanya.” 45 Yumwe wa wahinyi wa miagiyo akamwamba, “Mhinyi, mbui zako zatidumuwa na swie.” 46 Yesu akamtambaisa, “Na nywinywi wahinyi wa miagiyo, mmbwii yenu, kwaviya mwawatwika wantu fuushi zesazokwenukika, uku nywinywi khamnyoosha hata chaa kuwaambiza. 47 Mmbwii yenu, kwaviya mwazenga mambiya ya waoni wa Muungu wada ambao wadaa wenu

nee wawakoma. 48 Nanywi wenye wavuhuzi na kwevana na mbui ya wadaa wenu, kwaviya wao nee wawakoma waoni wa Muungu, na nywinywi mwazenga mambia yao. 49 Kwa iyo Muungu nee kagombeka kwa umanyi wakwe, ‘Nendaniwegaiye waoni wa Muungu na wagiwa, akini wamwe wao wendawawakome, na kuwasuumiza watuhu.’ 50 Kivyazi iki chendachehigwe sugusa kwaajii ya phome ya waoni yekuyetikayo tangia kuvokea inusi yekugosokaho, 51 tangia phome ya Abeli adi phome ya Zakalia mwe kukomwa gatigati ya ingo na hantu ha Muungu. Eehe, kwei kivyazi chendachehigwe sugusa kwa mbui zakwe. 52 “Mmbwii yenu nywinywi wahinyi wa miagiyo, kwaajii muufisa uda ufunguo wa uvi wa kummanya Muungu nywie wenye khamokwengia na muwakindia wekuwaho wengia wasekwengia.” 53 Yesu ekuwaho alawa hada, wada Mafalisayo na wahinyi wa miko ne wavoka kuhigana nae vikai muno na kumsongeeza kwa kumuza mbui nyingi, 54 wakambengea wategeeze mbui ilawayo kwe miomo yakwe.

12 Kisingi icho zumwezumwe khuu muno da wantu wekuwao wakintana hata wakawa wajatana, Yesu akavoka kutamwiya na wahina wakwe akawamba, “Ekauweni na ugwadu wa Mafalisayo yani ubakha wao. 2 Chochose chekugubikwacho chendakigubulwe, na chochose chekufiswacho chendakimanyike.” 3 Kwa iyo kia mwekugombedo mwe kiza, wantu wendawasikie mwe mweenje, na kia mwekupokosado mwe magutwi yenu mkawa mwe vyumba vya khandani, yenda ibiikiwe uwanga ya chusi. 4 Nawagombekeni nywinywi wambuya wangu, mwese kuwaogoha wada waukomao mwii, na khawadaha kugosoa kintu kituhu. 5 Naho nendaniwambie ndai wa kuogohwa. Muogoheni yuda ambae akabinda kuukoma mwii ana udaho wa kuuwasa mwe moto da tubwi diwakado moto wesao kukomeka. Eehe, nawamba muogoeni uyo. (Geenna g1067) 6 Mwamany kuwa machole washano watagwa kwa senti mbii? Akini hemeso ya Muungu khajaika ata yumwe. 7 Naho ata fii za mitwi yenu zitaaiziwa zose. Msekuogoha, kwaviya nywinywi mwafaa muno kusima machole wangi. 8 Nami nawamba yoyose anizumiaye hemeso ya wantu Mwana wa Mntu naye endamzumiiye he meso ya wandima wa uko uwanga kwa Muungu. 9 Na mntu yoyose aniemeaye he meso ya wantu, naye Mwana wa mntu endamuemee hemeso ya wandima wa uko uwanga kwa Muungu. 10 “Mntu yoyose agombekaye mbui ya kumuemea Mwana wa Mntu Muungu endamuemee, akini endayeaudumuwe Muye wa Muungu khana uyo Muungu khanaamuekee mavigaviga.” 11 “Hada wendaho wawaguiye na kumyengiza nywinywi

hemeso ya Nyumba ya kukintania Wayahudi na hemeso ya wenye udaho na wagookezi, msekuwa na maatumatu uwanga ya mwondavyo kwevunia hambu mwondavyo mtamwiye. 12 Kwaviya Muye wa Muungu endaawahinye kiya mkundigwacho kugombeka.” 13 Naho mntu yumwe mwe diya zumwezumwe da wantu akamwamba, “Mhinyi, mgombeke ndugu yangu tipangane upazi ekutibadiao tate.” 14 Yesu akamtambaisa, “Mmbuya, ndai ekuniikaye miye kuwa muamuia na mpangi gatigati yenu?” 15 Naho Yesu akawamba wose, “Ekauweni na kia mbai ya khwiina ya vintu vingi kwa mana ugima wa mntu khaukauwia wingi wa vintu ekuwavyo navyo.” 16 Naho akawamba msimo unu, “Nekuwa na mntu yumwe mwenye vitu vingi ambae mnda wakwe uvyaa ubosi mwingi. 17 Mntu uyo mwenye vintu vingi akamamakhanya mwe moyo wakwe, ‘Nami khina hantu ha kuika ubosi wangu, nndanitende viihii? 18 Ekegombeka, nndanigosoe ivi, nndaniditue idi taa dangu nakuzenga tuhu kuu muno, namiye nndaniike umo khande zangu hamwe na vintu vyangu vyose. 19 Aho nee nendaho nidahe na kuwamba muye wangu, isasa una vintu vingi wendavyo uvitumie kwa myaka mingi. Humwiiza, na daa khande, na domeea na uwe na nyemi.’ 20 Akini Muungu akamwamba, ‘Wee mhezi! Iveyo na kiyo muye wako wendaudioigwe. Na vintu viya vyose wekuviikavyo vindaviwe vya ndai?” 21 Yesu akabinda kwa kugombeka, “Nee vyeivyo kwa mntu yoyose ememezeae vintu kwaajii yakwe, akini khio mntu mwenye vintu vingi hemeso ya Muungu.” 22 Naho Yesu akawamba wahina wakwe, “Msekuwa na maatumatu uwanga ya khande mwiikundayo ili mwe na ugima, wala uwanga ya magwanda myakundayo kwaajii ya mii yenu. 23 Kwaajii ugima ni yedi kusima khande, na mwii ni wedi kusima magwanda. 24 Wamamakhanyeni kunguu wowo khawahanda wala kawabonda na khawana taa, wala hohose hakuika khande zao akini Muungu awekha khande. Akini nywinywi ni wedi kusima wadege. 25 Nndai yumwe wenu ambae kwa kwepisha adaha kweongezea ugima wakwe hata kwa saa dimwe? 26 Naho inga khamdaha kugosoa mbui ndodo inga iyo, kwa mbwai kuwa na maatumatu uwanga ya yada matuhu? 27 Kauwani mauwa yasukhavyo khayagoso ndima wala khayasuka. Akini nawamba, hata seuta Seemani he vintu vyakwe vyose khekuwahi kuvaa magwanda matana inga uwa dimwe aho. 28 Inga Muungu ayavika ivi mani ya mwe minda ambayo ivyeo yaaho kioi yasigwa mwe moto, ivi nywinywi khana awavike vyedi muno enyi wenye uzumizi mdodo?” 29 “Wala msekwepisha mwe mioyo yenu mwenda mde mbwai hambu mwenda mdomee mbwai msekuwa na maatumatu kuusu mbui iyo. 30 Wantu

wesaokuwa Wayahudi wa inusi waangadikia vintu ivyo. Akini Tati yenu wa uwanga kwa Muungu amanya kuwa mwakunda vintu ivyo. 31 Isasa uwangadikieni Useuta wa Muungu, na vintu ivyo vyose navyo mwenda mwekhigwe.” 32 Msekuogoha, nywinywi zumwezumwe dodo, kwaviya Tati yenu katamiwa kuwekha Useuta. 33 Tageni vintu vyenu mkawekhe wakiwa izo hea. Mwegosoe vifuko vya hea vyesayokusakaa, na uko nee kuika kiikizo uwanga kwa Muungu ambaho taa dakwe khadihungua, uko wabavi khawabua na wala mswa khawabananga. 34 Hada enaho kiikizo chako, nee endaho uwe aho moyo wako. 35 “Ekaani tayali kwa kunigosoea na taa zenu ziwe zaka. 36 Inga wandima wamgojao zumbe yao auye kulawa kwe ntafuno ya ndoza. Na ezaho na kukonta uvi wadahe kumvuguiya maa mwenga. 37 Wajaiwa wada wandima ambao zumbe yao endaawabwiye wameso endahoeze. Kwei, nawamba endaeike tayali na kuwetanga mwe ude na kuwegosoea ndima. 38 Wajaiwa kwa wandima awo mkuu yao endahoeze na kuwabwiya wacheeza hata akeza kio kikuu, hambu hehi na kucha. 39 Manyeni kuwa inga mwenye nyumba ati nee kamanya saa ambayo mbavi endaeze, nee kawa meso ili amkindie mbavi, na khekuwa aibadie nyumba yakwe itulwe. 40 Nywie nanywi mwakundigwa mwekae tayali saa zose, kwaviya Mwana wa Mntu enda eze saa ambayo khamuimanya.” 41 Petulo akamwamba, “Zumbe, msimo uwo watambia swiswi, hambu wawamba wantu wose?” 42 Zumbe akamtambaisa, “Nndai, mndima mzumiwa na mwenye umanyi, ambae Zumbe wakwe endamwiike uwanga ya wandima wakwe awekhe khande kisingi kifaacho. 43 Kajaiwa mndima uyo, hada zumbe wakwe endaho auye nakumbwiya atenda ivyo. 44 Nawamba kwei kuwa endamwekhe ugookezi wa vintu vyakwe vyose. 45 Akini inga mndima uyo akegombeka mwenye mwe moyo wakwe zumbe yangu kawa kacheewa muno kuuya, naho akavoka kuwatoa wandima wa wakivyee hambu wakigosi wada wenziwe, viyaviya endaade na kudomeea na kukolwa, 46 zumbe wakwe yuda mndima endaauye msi esao kukauwia na mda esao kumanya. Endamwekhe sugusa mndima uyo ya ufyai na kumwiika hamwe na wantu wesaokuzumiya.” 47 “Yuda mndima amanyaye vitana akundacho zumbe wakwe, akini khayuhoo tayali wala kugosoa yakundigwayo mkuu wakwe endaatigwe muno. 48 Akini mndima yuda mweesekumanya mkuu yakwe akunda mbwai akagoso ya ufyai, uyo endaatigwe kidodo. Yoyose yuda mwekhegwa kugosoa ndima khuu, endakundigwe kulavya vingi muno.” 49 “Ncheza kueta moto mwe inusi, natamiwa inga uwe tayali ugimbwa!” 50 Akini neno ubatiizo ambao nlazima

nibatiizwe, suuba yangu ni kuu hadi ubatiizo uwiganie. 51 Mwamamakhanya ncheza kueta uivanisa mwe inusi? Nawamba khivyo, ncheza kueta mabadano. 52 Kuvokea isasa, kundakuwe na wantu wa kaya mwenga washano, watatu kwa waidi na waidi kwa watatu. 53 Tate khanaevane na wanawe wa kigosi, na wana wa kigosi khawanawevane na tati yao, na mmaa khanaevane na wanawe wa kivyee, wana wa kivyee khawanawevane na mami yao, naye mame vyaa khanaevane na mkaza mwana, nae mkaza mwana khanaevane na mami yakwe vyaa. 54 Yesu akagombeka vituhu mwe dia zumwezumwe da wantu, "Muonaho mazunde yakalawiya phande ya engiyo da zuwa, aho mwagombeka, fua indainye na kwei yanya." 55 Muonaho pheho ya khusi yavuma, mwagombeka, "Kunda kuwe na zuguto, na vyawa ivyo. 56 Enywi wabakha! Mwamany kooni msimu kwa kukauwa inusi na uwanga kwa Muungu vyeivyo. Kwa mbwai, khamdaha kusosoa mana ya mbui zigosokazo isasa? 57 "Na kwambwai khamdaha kweamuiya wenye mbui yedi za kugosoa? 58 Kwaviya inga mmasa wako akakwegaa he mkonga, yedi wevane nae mkesiai ili asekwaza kukwegaa hemeso ya mntu muamuwa, na uyo muamuwa akakwekhiiza kwa asikai, nawo wakakugea mwe kifungo. 59 Nakwamba Kwei khunaulawe umo, hadi wendaho ubindiize kuihaa senti ya kisiikizi."

13 Kisingi icho wantu watuhu ne weza, wakamwamba Yesu kuusu mbui ya wantu wa Galilaya ambao Pilato akawakoma na phome ya wantu awo ikahanganyikana na phome ya ntambiko izo wekuavyo walavya. 2 Yesu akawamba, "Mwamamakhanya Wagalilaya awo wekugosoewa ivyo neewawa wagosoa mavigaviga muno kusima Wagalilaya watuhu? 3 Nawamba kwei khivyo ivyo, akini nanywi mwesaho kuhituka na kubada mavigaviga mwendamdagamie inga wowo. 4 Mwamamakhanya wada kumi dimwe na nane wekugwiwao na mnaa kuda Siloamu wakauya na nyuma, ivi mwamamakhanya wao neewawa na makwasukwasu kusima watuhu wose wekaao Yelusalemu? 5 Nawamba khivyo ivyo akini nanywi mkese kuhituka na kubada mavigaviga na kumuuiya Muungu, mwenda mdagamie inga wowo." 6 Aho Yesu akawamba msimu unu, "Mntu yumwe nekawa na mti wetangwao mtini mwe mnda wakwe wa mizabibu, mntu uyo akaita kutunda matunda yakwe, akini nee aubwiya khauzati kuvyaa hata tunda dimwe. 7 Naho akamwamba mndima wakwe, 'Kwa myaka mitatu nee nikeza nitunde matunda ya mtini unu, iya chekumbwiia chochose. Usenge! Kwaviya wabananga sanga bue.' 8 Akini yee akamtambaisa, 'Zumbe, tiubade

vituhu mwaka unu, nenda nindaniutifuie uhongo na kuugea mbolea. 9 Inga wendaavyae matunda mwaka wezao nivitana, hambu ukesekuvyaa tadaha kuusenga." 10 Msi umwe wa Kuhumwiza Yesu ne kawa akahinya mwe Nyumba ya kukintania Wayahudi. 11 Na aho ne awa na mvyee yumwe ekuwaye mtamu kwa myaka kumi dimwe na minane, nekawa na zaiko dilimtenda mwii wakwe ne wenama muno hata asekdaha kugooka vitana. 12 Yesu ekumuonaho, akamwetanga akamwamba, "Mmaa, kuhonywa utamu wako!" 13 Nee amuikea mkono na aho akagooka vituhu, akawa amtogoa Muungu. 14 Akini muongoezi wa nyumba ya kukintania Wayahudi akakimwa kwaajii Yesu kamhonya uyo mmaa msi wa kuhumwiza. Ivyo mkuu uyo akawamba wada wantu wekuwao hada, "Mna misi mtandatu za kugosoa ndima. Buwani misi iyo mkahonywe matamu yenu, akini msekweza Msi wa Kuhumuiza!" 15 Aho Zumbe akamtambaisa, "Enywi wabakha! Nndai gatigati yenu khamfungua ng'ombe wakwe hambu phunda wakwe kulawa mwe dewa amwegaye kwe kunywa mazi, hata inga msi uwo ni wa kuhumuiza. 16 Isasa yuaho mwana wa uvyaigwa wa Ibulahimu ambaye ibiisi kamgosoa avie kwa kisingi cha myaka kumi dimwe na minane, khayokuwa vitana kuvuguiwa kulawa kifungo iko msi wa kuhumuiza?" 17 Yesu ekubindaho kutamwiya ayo, wada wahiganee naye wakengiwa nsoni, akini wantu wose wakamema nyemi kwaajii ya mbui yose yekugosokanayo. 18 Naho Yesu akauza, "Useuta wa Muungu waigana na mbwai? Nendaniuwiganize na mbwai? 19 Waigana na mbeyu ya haladali ambayo ni ndodo muno, ambayo mntu akaidoa na kuihanda mwe mnda wakwe. Naho ikahota na kukua na kuwa mti na wadege wa uwanga wakazenga masasa yao mwe matambi yakwe." 20 Yesu akawauza vituhu, "Nndaniuwiganize Useuta wa Muungu na mbwai? 21 Waigana na hamila ambayo mvyee ne kaidoa na kuihanganya mwe madebe matatu ya unga ne wose ukawa uumuka." 22 Yesu akemboka mwe mzi na mizi midodo akahinya ekuwaho mwe ntambo yakwe yakuita Yelusalemu. 23 Mntu yumwe akamuza, "Ivi Zumbe, wendaowaoholwe ni wantu wachechedu?" 24 Yesu akawamba, "Jiimeni kwengia kwa kwembokea uvi msisii, kwaviya nawagombekani, wangi wendawageeze kwengia, akini khawana wadahe. 25 Kisingi cheza ambao mwenye kaya enda enuke na kuvugaa uvi nywinywi mwenda mgooke chongoi na kukonta uvi na kugombeka, 'Zumbe, tivuguiye uvi!' Akini yee enda awatambaise, 'Khiwamany mwaawako!' 26 Nanywi mwenda mvoke kumwamba, 'Swiswi nee wada tekudao na kudomeea hamwe nawe na wee kutihinya mwe mizi yetu!' 27 Akini yee atawatambaisa, 'Khiwamany

nywinywi mwaawako. Haukeni hemeso yangu nywinywi nyose mkugosoa mavigaviga! 28 Aho nee wendaho muiye muno na kuuma meno, kisingi mwendaho muwaone lbulahimu na Isaka na Yakobo na Waoni wose wa Muungu waaho mwe Useuta wa Muungu, akini nywinywi wenye mwasigwa chongoi. 29 Wantu wendaweze kulawa phande zose za inusi, awio da zua na engiyo da zua na kasikazini na kusini, na kwekaa kwe ntafuno mwe Useuta wa Muungu. 30 Kauwa wada wa kisiikizi wenda wawe wa bosi, nawo wa bosi wenda wawe wa kisiikizi.” 31 Kisingi ichoicho wamwe wa Mafalisayo wakamwiitia Yesu na kumwamba, “Hauke hanu uite hantu hatuhu kwaviya Helode aondeza kukukoma.” 32 Yesu akawatambaisa, “Hitani mkamwambe yuda mbweha, ‘Nndaniwaguuse mazaiko na kuhonya watamu ivyeeo na kioi, nami msi wa tatu nndanibindiize ndima yangu.’ 33 Hata ivyo ivyeeo na kioi na kisinda kioi, nlazima niendee na ntambo yangu kwaajii khiyo vitana muoni wa Muungu akomwe chongoi ya mzi wa Yelusalemu.” 34 “Ewe wantu wa Yelusalemu, wantu wa Yelusalemu, wee uwakomaye waoni wa Muungu na kuwatoa maiwe wada wekuagiwao na Muungu kwako! ‘Maa nyingahi khitamiwa kuwaika wanao hamwe inga mdege aikavyo vifaanga vyakwe ili awa inde asi ya mawawa yakwe akini wee khwekukunda! 35 Kauwa Nyumba yenu ya Muungu ya badwa, nawagombeka khamna mnione vituhu hadi kisingi kia mwendaho mgombeke, kajaia yee mwekuagiwa na kwekhigwa udaho kwa zina da Zumbe.”

14 Msi umwe wa kuhumwiiza, Yesu nee kaita kuda khande nyumbai kwa muongoezi yumwe wa Mafalisayo na wantu wekuwao aho wakawa wamsunguuma. 2 Hemeso ya Yesu nee hawa na mntu yumwe mwekuwa na utamu wa kumema mwii. 3 Yesu akawauza wahinyi wa miagiyo na Mafalisayo, “Ivi miagiyo ya Musa yawakunda kuhonya wantu msi wa Kuhumuiza hambu khivyo?” 4 Akini wowo wakanyamaa. Yesu akamtoza uyo mtamu, akamhonya, akambada aite. 5 Naho Yesu akawamba, “Nndai gatigati yetu ambae mwanawe hambu ng’ombe wakwe akengia mwe tubwi, khana amuavye kwaviya ni Msi wa Kuhumwiiza?” 6 Na wantu awo khawokudaha kumtambaisa mbui iyo. 7 Yesu akakauwa wada wantu wekugonekwao wekuavyo wesaguiya viti vya hemeso hantu ha ishima, akawamba msimo unu, 8 “Inga mntu akakugoneka mwe ndoza, usekwekaa viti vya hemeso hantu ha ishima, isikweza kukawa kagonekwa mntu mtuhu wa ishima kusima wee, 9 akeza yuda mwekuwagoneka nywinywi waidi na kukugombeka, ‘Mhakanye uyu.’ Ndiho wendaho uvoke

kwa soni kuita kwekaa nyuma. 10 Naho ukagonekwa kwe ntafuno, ekaa hantu ha nyuma, na mwenyezi yako endaho eze akwambe, ‘Mmbuya, soo hanu hemeso, hantu hatana muno.’ Aho wendauwe wa kutunywa hemeso ya wantu wose wekwekaa hamwe nawe. 11 Kwaviya mntu yoyose etendae mkuu enda atendwe mdogo na atendae mdogo enda atendwe mkuu.” 12 Yesu akamwamba yuda ekumgonekaye, “Inga ukawaikia wantu ntafuno ya musu hambu guoni, usekuwagoneka wambuya wako hambu nduguzo hambu wantu wa hehi yako wekuwao wenye vintu vingi. Wasekweza nao wakakugoneka, nawe ukawa kuihwa kia wekuwagosomeacho. 13 Naho ugosoa ntafuno, wagoneke wakiwa na wantu wekuviao na wekuviao miundi na matuntu, 14 nawe wenda ujaiwe kwaajii awo khawadaha kukuiha, Muungu enda akuihe funge kisingi cha uyuyuko cha wantu wedi.” 15 Yumwe wa wada wekuwao wekaa hamwe na Yesu akamba, “Kajaiwa mntu yuda endae ade khande mwe Useuta wa Muungu!” 16 Yesu akamtambaisa, “Mntu yumwe kagosa ntafuno khuu, akawagoneka wantu wangi 17 Kisingi cha khande chekubuwaho akamwagiya mndima wakwe, akawambe wada wekugonekwao, ‘Soonni kwaviya kia kintu kitayali!’ 18 Akini wose kia yumwe akavoka kuomba lazi, wa bosi akamba ‘khigua kae mnda nlazima niite nikaukauwe khina neze.’ 19 Mntu mtuhu akamwamba, ‘Khigua ng’ombe mbai shano wa kuima, isasa ni siai nenda kuwageza ivyo nakuombeza uniuusu.’ 20 Na mtuhu akamwamba, ‘Isasa khitegua kwa iyo khidaha kweza.’ 21 Mndima uyo ekuuyaho akamwamba mkuu yakwe mbui iyo. Mkuu nee akimwa, akamwamba mndima wakwe, ‘Hita kinyionyio mwe baabaa na sia za mizi, ukawaete hanu gati wakiwa, na wekuviao miundi, na matuntu na wekuviao.’ 22 Badae mndima uyo akamba, ‘Zumbe, mbui zigosoka inga wekuniagiavyo, akini ikeaho phasi.’ 23 Yuda zumbe akamwamba mndima uyo, ‘Hita mwe baabaa na sia za mizi uwahembeze wantu wengie mwe nyumba yangu imeme. 24 Kwaviya nawamba, khahana hata yumwe wa wada wekugonekwao mwenda aonje khande yangu.” 25 Aho mazumwezumwe mangi nee yawa yaita hamwe na Yesu, naho akawahitukia wantu akawamba, 26 “Mntu yoyose akeza kwangu, khana adae kuwa mhina wangu akeke kunikunda mie muno kusima tati yakwe na mami yakwe na mkaziwe na wanawe, na nduguze na dadize na ata ugima wakwe yee mwenye. 27 Mntu yoyose mwekuuudoa mhamba wakwe na kunibasa khadaha kuwa mhina wangu. 28 Goja nisosoe vitana, nndai gatigati yenu akakunda kuzenga mnaa khana avoke kwekaa ahime galama zakwe amanye anakima cha kugenyea na cha kubindiiza? 29 Inga akesekugosoa ivyo, endaadahe kugosoa msingi na

kuvotwa kubinda mnaa uwo, aho wantu wendawamseke. 30 Wakagombeka, 'Mntu uyu nee kavoka kuzenga, akini khana udaho kubindiizia.' 31 Hambu ni seuta yuhi mkunda kuita kutoana na seuta mtuhu, khana avoke kwekaa na kumamaakhanya inga enda adahe kutoana na mwenye asikai elufu ishiini na yee ana asikai elufu kumi dimwe? 32 Inga akoona khana adahe kutoana nae, endaawaagiye wandima wakwe kuwaomba wawe na mwevano wa uivanisa, kisingi seuta uyo mtuhu yuke hae. 33 Ivyoivyo, khahana hata yumwe gatigati yenu endaye awe mhina wangu inga akesa kuka kintu ekuwacho nacho." 34 "Munyu ni kintu kitana, akini ukabanika, khaidaika kugosoa chochose kuwa munyu vituhu? 35 Khaifaa kintu wala kwa msanga wala kwa mboleya. Wantu wayasa hae, mwenye magutwi ya kutegeeza na ategzeeze!"

15 Msi umwe, watoza kodi na wenye mavigaviga wangi nee waita kumtegeeza Yesu. 2 Mafalisayo na wahinyi wa miko wakavoka kupokosana, "Mkauweni mntu huyu awahokea wenao mavigaviga, naho ada nao!" 3 Ndiho Yesu akawatambaisa kwa msimo unu. 4 "Inga, yumwe yenu akawa na ngoto makumi kumi, akamanywa kuwa yumwe yao kaga, enda agosoe mbwai? Enda awabade wada makumi kenda na kenda uisi na kuita kumuondeza yuda ekwagaye hadi amuwone." 5 Naye akabinda kumuwona, enda amwenue kwa nyemi mwe mawega yakwe. 6 Endaoabue kaya, enda awetange wambuya na wantu wa hehi yakwe na kuwamba, "Muwe na nyemi hamwe na mie kwaajii khimuwona yuda ngoto yangu ekwagaye." 7 Nawambeni ivyoivyo, kundakuwe na nyemi muno uko uwanga kwa Muungu kwaajii ya mwenye mavigaviga yumwe kuhituka, kusima kwa wada wedi makumi kenda na kenda ambao khawakunda kubada mavigaviga. 8 Yesu akawamba msimo mtuhu akamba, "Tambe mvyee yumwe ana senti kumi dimwe, akaza mwenga, enda atende mbwai? Enda awashe taa, enda aihagie ida nyumba phahoephahoe hadi aiyone. 9 Akaipata, enda awetange wambuya na wantu wa hehi yakwe na kuwamba, 'Kuwani na nyemi hamwe nami, kwaajii khipata ida senti yangu yekuwayo yaga.' 10 Nawambeni, Nee wendavyo wawe na nyemi wandima wa uko uwanga kwa Muungu kwaajii ya mwenye mavigaviga yumwe haitukae na kumuuiya Muungu." 11 Yesu akaendee kugombeka, "Kuwa na mntu yumwe mwekuwa na wana waidi wa kigosi. 12 Yuda mdodo akamwamba tati yakwe, 'Tate nekha hantu hangu ha upazi.' Naye akamwekha hantu hakwe. 13 Bada ya misi micheche, yuda mdodo akataga vintu vyake, akatamba na hea ekupatazo akaita si ya hae na hea zose akazibananga

kwa wekazi wa mavigaviga. 14 Ekubindaho kutumia kintu kukalawiya saa khai mwe si ida, naye akavoka kuangadika. 15 Akaombeza ndima kwa mntu yumwe wa si ida, nae akamwegaa mwe mnda wakwe awaise nguuwe. 16 Mbwanga yuda nee ana nsaa muno, akatamiwa kuda makoa wekudayo wada nguuwe, iya khahana mntu ekumwekha khande. 17 Badae akamamakhanya mwe moyo wakwe, 'Kaya kuna wandima wangi wa tate yangu wadao khande na kubada phugutio, na miye nafa na saa?' 18 Nenda niuye kwa tate yangu na kumwamba, 'Tate, khingosoea mavigaviga Muungu ekuwaye uwanga na khikukoa masa na weye. 19 Khifaa hata kwetangwa mwanao, nigosoe inga yumwe wa wandima wako.' 20 Ndiho akavoka kutamba kuuya kwa tati yakwe." "Ekuwaho yuke hae, tati yakwe ekumuonaho, na kwa moyo wa mbazi akanguukia, na kumuumbatia kwa ukundiso. 21 Mwanawe akamwamba, 'Tate, khingosoea mavigaviga Muungu ekuwaye uwanga, na khikukoa masa na wee, khifaa kwetangwa mwanao.' 22 Akini tati yakwe akawetanga wandima wakwe akawamba, 'Etani gwanda tana mkamvike kinyio! Mvikeni phete mwe chaa chakwe na sabana mwe miundi yakwe. 23 Mdumueni singo ng'ombe mwe kunona, tide na kuwa na nyemi! 24 Kwaajii uyu mwanangu inga nee kauya na nyuma na isasa yu mgima, nee kaga, akini isasa khaoneka' wakavoka kuwa na nyemi." 25 "Kisingi icho kakiye neyuke tanga. Ekuwaho auya na kubua hehi na nyumbani, akateggeeza migutio ya wantu wakitoa vigegee na ngoma. 26 Akamwetanga mndima yumwe, na kumuiza, 'Kuna mbwai hanu?' 27 Uyo mndima akamtambaisa, 'Nduguyo kauya kaya na tati yako kamdumuiya ng'ombe mwe kunona kwaviya kampata yuke mgima.' 28 Uyo mwana mkuu akakimwa muno akaemea kwengia gati, ndiho tati yakwe akaawa chongoi na kumhembeeza engiye gati. 29 Akini yee akamtambaisa tati yakwe, 'Kauwa myaka yose inu nee nikakugosoea ndima na hata msi umwe shekubada kukutegeeza mwiko, akini khuzati kunekha hata mbuzi nitamiwe na wambuya wangu. 30 Akini mwanao uyu mwekutumia vintu vyako hamwe na wakianga, ekwezaho du kamdumuiya singo ng'ombe mwe kunona.' 31 Tati yakwe akamtambaisa, 'Mwanangu, wee uhamwe nami misi yose, na kia nenacho ni chako. 32 Ifaigwa kugosoa nyemi kuu muno kwaajii uyu nduguyo nee inga kauya na nyuma, na kumbe yuke mgima, nee kaga, akini isasa timuona.'"

16 Yesu akawamba wahina wakwe, "Nee kuwa na mwenye vintu vingi yumwe nee kawa na mgookezi yakwe mwekuwa mgookezi wa vintu vyake, uyo mwenye vintu vingi akagombekwa mgookezi wakwe anatomia kwa ufayimi vintu vyakwe, 2 yuda mwenye vintu vingi akamwetanga na

kumuiza, 'Ni mbui zani izi nekuzisikiazoo kuusu weye? Avya taazia za vintu vyangu kwaviya khauna udae kuendeeza kuwa mgookezi.' 3 Yuda mgookezi akemamakhanya, 'Zumbe yangu kaniguusa ndima yangu. Nndanitende mbwai? Ati ni kuima khina nguvu za kuima. Naho naona soni kuombezaombeza. 4 Isasa, namanya nendado nigosoe, ili nendaho niguuswe ndima ya ugookezi, wantu wadahe kunihokea mwe nyumba zao.' 5 Naho yuda mgookezi akawetanga wada wose wekuwaho wakadaiwa na zumbe yakwe, akamuiza wa bosi, 'Una daiwa kima chani na mkuu yangu?' 6 Yee akamtambaisa, 'Mapipa makumi kumi ya mavuta ya mzaituni,' yuda mgookezi akamwamba, 'Doa maandiko yako ya deni, ekaa asi, gonda makumi mashano.' 7 Naho akamuiza mdaiwa mtuhu, 'Wee wadaiwa kima chani?' Yee akamtambaisa, 'Magunia mia mwenga ya ngano.' Yuda mgookezi akamwamba, doa kaatasi yako ya deni gonda semanini." 8 "Naho yuda zumbe akamtogoa yuda mgookezi mfyaimi, kwaviya nee katumia unyanyi kwaaji wantu ambao khawazumiya Muungu wa inusi wana akii muno na mbui zao kusima wantu wa Muungu." (aiōn g165) 9 Naye Yesu akaendeeza kutamwiya, "Nami nawamba, waambizeni wambuya wenu kwa mai za mavigaviga ili zendaho zisie muhokewe mwe chekao cha misi yose kwesaho kisiikizi. (aiōnios g166) 10 Mntu yoyose azumiwae mwe mbui ndodo enda azumiwe mwe mbui kuu na yoyose mwezekuzumiika mwe mbui ndodo khadaha kuzumiwa kwe mbui kuu. 11 Inga mkese kuzumiika kwa mai za inusi, ndai endae wazumiwe mwe mai za kwei? 12 Nanywi inga khamokuwa wazumiika wa mai ya mntu mtuhu, ndai endae awekhe yekuwayo yenu wenye? 13 "Khahana mndima adahaye kuwagosoeya ndima mazumbe waidi, kwaviya endaamkime yumwe na kumkundisa mtuhu, hambu endaatozane na yumwe na kumbea mtuhu. Khamdaha kumgosoeya Muungu hamwe na mai." 14 Mafalisayo wekusikiaho ayo, kwaviya neewawa wakunda hea muno nee wambeya Yesu. 15 Yesu akawamba, "Nywie mwegosoa wedi hemeso ya wantu. Akini Muungu aimanya mioyo yenu kwaviya kha kionekacho ni chedi hemeso ya wantu, Muungu ayakima. 16 "Miagiyo ya Musa na magondo ya waoni wa Muungu nee yakawaongoeya hadi kisingi cha Yohana mbatiiza. Kuvokea kisingi icho, Mbui Yedi ya Useuta wa Muungu yabikiwa na wantu wose washuutizwa wengie he Useuta wa Muungu. 17 Akini ni vihufu muno uwanga kwa Muungu na inusi kwaga, kusima hata helufi mwenga ya miagiyo ya Musa kuusigwa. 18 "Mntu yoyose amwekha mkaziwe talaka na kutegua mtuhu, agosoa ukianga na yoyose amteguaye mvyee mwekwehigwaye talaka, agosoa ukianga." 19 Yesu

akaendeeza kugombeka, "Nee kuwa na mntu yumwe mwenye vintu vingi, ambae neakavaa magwanda ya hea nyigi muno ya langi ya zambalau na gwanda dekung'aado na kugosoa sikukhuu ya ntafuno kia msi. 20 Aho he uvi wa mwenye vintu vingi nee kuwa na mkiwa yumwe, mwekuwa akaetwa aho zina dakwe Lazalo, ambae nee kamema vionda mwe mwii mgima. 21 Lazalo nee akakauwiya kua phuguntio zekugwazo kulawa he meza ya uyo mwenye vintu vingi, na makui nee yakeza kumsona vionda vyakwe. 22 "Naho, uyo mkiwa akauya na nyuma, nao wandima wa uko uwanga kwa Muungu wakamdoa, wakamwiika hehi na Ibulahimu. Na yuda mwenye vintu vingi naye akauya na nyuma, akagewa mwe mbia. 23 Uyo mwenye vintu vingi akawa na usumiizi mkai uko mwe si ya wantu wekuuyao na nyuma, akenua meso yakwe, akamwona Ibulahimu kwa hae na Lazalo hehi yakwe. (Hadēs g86) 24 Naho aketanga kwa mgutio, 'Tate Ibulahimu nifiye mbazi, umuagiye Lazalo aginte ncha ya chaa chakwe mwe mazi, kutamiza ulimi wangu, kwaviya nasimiizwa muno mwe moto unu.' 25 Akini Ibulahimu akamtambaisa, 'Kumbuka mwanangu nee kuvoka kupata matana wekuwaho ukekaisa, nae Lazalo nee ahokea ufyaimi. Akini isasa yee ana nyemi, nawe wekhigwa usuumizo. 26 Ukaekeya ayo, gatigati mwetu na nywinywi kuikwa tubwi kuu, ili wakundaho kweza kwenu kulawa uku wasekudaha, na wakundaho kulawa kwenu kweza kwetu wasekudaha.' 27 Uyo ekuwaye mwenye vintu vingi naho akamba, 'Tate, nakuombeza umuagiye mntu aite kwe nyumba ya tati yangu, 28 kwaviya ninao wandugu washano awahaze, wasekweza uku kwe kusumiizwa.' 29 Akini Ibulahimu akamwamba, 'Wandugu zako wana Magondo ya Musa na waoni wa Muungu waeke wawategeeze wowo.' 30 Akini mwenye vintu vingi akamba, 'Khivyo Tate Ibulahimu, inga mntu enda ayuyuke kulawa he si ya wekuuyao na nyuma na kuwaitia, wenda wabade mavigaviga na kumhitukia Muungu.' 31 Naye Ibulahimu akamba, 'Inga khawanawawategeeze Musa na waoni wa Muungu kwanawapatiize hata inga mntu ayuyuke kulawa kwe si ya wekuuyao na nyuma.'"

17 Yesu akawamba wahina wakwe, "Mbui ziekazo wantu watende mavigaviga ziaho misi zose. Akini mmbwii yakwe mntu aetae mbui izo. 2 Nee ni ebae mntu uyo ati nee kazongomezwa iwe kuu da kubundugia mwe singo na kutambikwa kwe mazimshindo, kusima kumgosoeya yumwe wa wantu wanitongeo atende mavigaviga. 3 Ekauweni!" "Inga nduguyo akagosoa mavigaviga, muwakie, inga akamhitukia Muungu, mwekee. 4 Inga endaho akugosoe mavigaviga maa mfungate kwa msi umwe na maa mfungate akeza kwako akamba, 'Nahituka.' Muwekee."

5 Wagiwa wakamwamba Zumbé, "Utiomee kuzumiya muno." 6 Naye Zumbé akawatambaisa, "Inga kuzumiya kwenu nee kuwa kudodo inga mbeyu ndodo ya haladali, nee mdaha kuugombeka mti unu wa mkuyu, ng'oka uketwiize mwe mazimshindo nao nee uzumiya." 7 "Tambe yumwe yenu ana mndima aima tanga hambu aisa ngoto. Ivi auyaho kulawa tanga, enda amwambe uyo mndima, Soo ude khande kinyio? 8 Khivyo! Enda amwambe, 'Niikia khande, uvae magwanda yako yakundigwayo unigosome ndima na weze ugooke hanu hadi nendaho nibinde kuda na kudomea, ndiho nawe ude na kudomea.' 9 Ivi mntu uyo endaamwekhe ntogoo uyo mndima kwaajii kayagosa yada ekwembigwayo ayagosome? 10 Iviyoivo na nywinywi mbindiizaho kugosa yose mwekwembigwayo kugosa, tamwiiani ivi, 'Swiswi ni wandima tesao kuwa na maiho, tigenyeza yadadu tekukundigwayo kuyagosa.' 11 Yesu nee atamba kuita mwe mzi wa Yelusalemu hadi kwe mhaka wa gatigati ya Samalia na Galilaya. 12 Ekuwaho engia mwe mzi umwe wantu kumi dimwe wenye utamu wa nyoka nee wakintana naye, wakagooka kwa hae. 13 Nee wakakema na kugombeka, "Yesu mhinyi, tifiye mbazii!" 14 Ekuwaonaho akawamba, "Hitani mkeonyeshe kwa waviki." Naho wekuwaho waita, wakang'azika. 15 Yumwe wao ekuonaho kahonywa, nee auya kwa Yesu uku amtogoa Muungu kwa mgutio mkuu. 16 Nee etambika asi hemeso ya miundi ya Yesu uku amtogoa Muungu. Na mntu uyo nee ni Msamalia. 17 Aho Yesu akauza, "Kihyo wantu kumi dimwe wekung'azwao? Wada kenda wa hahi? 18 Ivi khekueoneka mntu mtuhu ekuuyae kumwekha ntunyo Muungu iya uyu mgeni ikedu?" 19 Yesu akamwamba uyo mntu, "Gooka uite, kuzumiya kwako kukuhonya." 20 Kisingi kimwe, Mafalisayo wakamuza Yesu, "Useuta wa Muungu wenda weze ini?" Naye akawatambaisa, "Useuta wa Muungu khaweza inga kintu cha kusungumanya kwa meso. 21 Khahana mntu adahae kugombeka, 'Uuku', hambu 'Uhada,' kwaajii Useuta wa Muungu uuko gatigati yenu." 22 Yesu nee awamba wahina wakwe, "Misi yeza ambayo mwendamkunde kuona msi umwe gati msi wa Mwana wa Mntu, akini khamna muiyone. 23 Na wantu wenda wawambe, 'Kauwani, yu hada!' Hambu 'Kauweni yu aho!' Akini nywinywi msekulawa na kuwabasa. 24 Mmanyé kuwa Mwana wa Mntu endaoaye, endaeze inga umbauwa umuikavyo vuupu na kumuiika phande zose za uwanga. 25 Akini kabla ya ayo, enda asumiizwe muno na kuemewa na wantu wa misi izi. 26 Inga yekuwavyo kisingi cha Nuhu, nee vyeivyo vyendavyo viwe mwe msi wa kuuya kwa Mwana wa Mntu. 27 Misi za Nuhu wantu nee waendee kuda na kudomea, kutegua na kutegulwa hadi kisingi kia cha

Nuhu ekweingiaho mwe Safina, mafuiko makuu yakeza yakaimemeza mazi inusi na kudagamiza wose. 28 Indaiwe inga yekulawiavyo kisingi cha Lutu wantu nee waendee kuda na kudomea, kugua na kutaga, kuhanda mbeyu na kuzenga. 29 Akini msi uda Lutu ekuhaukaho Sodoma, moto mkai nee useeya kulawa uwanga inga fua na kuwadagamiza wantu wose. 30 Nee ivyo vyendavyoviwe msi uda Mwana wa Mntu endaho agubulwe." 31 "Misi iyo, mntu yoyose endae awe uwanga ya chusi asekusea kuita nyumbani kudoa vintu vyakwe. Iviyo, nae mwendae awe tanga asekuuya kaya kudoa chochose. 32 Mkumbukani yada yekumpatayo mkaza Lutu. 33 Mntu yoyose endae akunde kuuohowa ugima wakwe, endaawaze na mntu yoyose awazaye ugima wakwe enda auohowe. 34 Nawamba, kio cha msi uwo wantu waidi wendawawe wagona hamwe mwe usazi, yumwe endaadoigwe na yuda mtuhu endaabadwe. 35 Wavyee waidi wenda wawe wabunduga, yumwe endaadoigwe na mtuhu enda abadwe. 36 Wantu waidi wenda wawe mwe mnda waima, yumwe endaadoigwe na mtuhu enda abadwe." 37 Wahina wakwe wakamuza, "Zumbé, ayo wekugombekayo yendalawiiye hahi?" Naye Yesu akawatambaisa kwa msimo akagombeka, "Henaho mwii wekuuyo na nyuma, aho ndiho mbizi wendaowakintane."

18 Yesu akawamba wahina wakwe msimo ili awahinye kuwa wakundigwa kuvika kia maa na wasekufa maya. 2 Nee amba, "Mwe mzi umwe kuwa na muamuwa ambae nee khamvika Muungu wala kupatiiza mntu yoyose. 3 Mwe mzi wouwo nee kuwa na mvyee yumwe mwekufiwa nimgosi ekuwaye kambasa uyo muamuwa maa nyingi, akoonda amfiye mbazi ekhigwe vintu vyakwe kulawa kwa mmasa wakwe. 4 Kwa kisingi kilehacho uyo muamuwa nee khakukunda kumfiya mbazi uyo mwekufiwa na mgosi, akini kisiikizi akamba, 'Etiho mie khimuogoha Muungu wala khipatiiza mntu, 5 akini kwaviya uyu mvyee mwekufiwa ni mgosi anipisha, nendanigosome dodose adi ekhigwe vintu vyakwe, ama khivyo endaaendee kubua hanu, na kisiikizi endaanisokeze muno!" 6 Naho Zumbé nee aendee kutamwiya, "Tegeezani ekugombekavyo uyo muamuwa mfyaimi. 7 Ivi Muungu khana awagosome vitana wantu wakwe ekuwasaguwao wada ambao wamwiya kio na musi? Ivi enda acheewe kuwaambiza? 8 Nawamba endaawaambize kinyio. Akini ivi Mwana wa Mntu endaho auye mwe inusi endaawaone wantu wamzumiao?" 9 Yesu akawamba msimo unu kwa wada weonao ni wedi na kuwabeya watuhu. 10 "Wantu waidi nee waita he Nyumba ya Muungu kuvika, yumwe ne kawa Mafalisayo na mtuhu mtoza kodi. 11 Uyo Mafalisayo nee agooka, akavika mwe moyo wakwe, 'Ee

Muungu, nakutogoa kwaviya mie khiyo inga wantu watuhu, Wameo, watiizi na wakianga. Nakutogoa mie khio inga mntu uyu mtoza kodi. **12** Mie nehiniza kuda maa mbii kwa kia juma, nalavya malavyo hantu ha kumi dimwe ya myengizo yangu yose.' **13** Akini yuda mtoza kodi, akawa kagooka kwa hae uku aogoha hata kwenu meso yakwe uwanga kwa Muungu, yee akenamia kwa huzuni na kutoza kifua chakwe nee amba, 'Ee Muungu, unifiye mbazi mie mwenye mavigaviga.' **14** Nawamba, uyo mtoza ushuu akauya nyumbai akawa kafiiwa mbazi. Akini yuda mtuhu, khivyo. Yuda etendae kuwa mkuu enda atendwe mdogo, na kia etendae mdodo enda atendwe kuwa mkuu." **15** Msi umwe wantu wakamwetea Yesu wana wadodo awaikie mikono yakwe ili awajaie. Wahina wakwe wekuwaonaho, wakamuwakia. **16** Akini Yesu akawetanga hakwe akamba, "Wabadeni awa wana weze kwangu, wala msekuwaemeza, kwaviya Useuta wa Muungu ni kwaajii ya wantu inga awa. **17** Nawamba kwei, mntu yoyose esaekuuhokea Useuta wa Muungu inga mwana mdodo, khana engie mwe Useuta uwo." **18** Mkuu yumwe Myahudi nee amuuza Yesu, "Mhinyi yedi, nigosoe mbwai nidahe kuupata ugima wa misi yose kwesaho kisiikizi?" (aiōnios g166) **19** Yesu akamtambaisa, "Mbona wanetanga yedi? Khahana ekuwaye yedi iya Muungu ikedu. **20** Wazimanya mwiko za Musa, 'Usekuwa mkianga, usekukoma, usekubawa, usekumkoa mntu masa kwa uhokho, watunye tati yako na mami yako.'" **21** Yee akamba, "Ayo yose khiyatoza kuvokea udodo wangu." **22** Yesu ekutegeezaho ayo, akamwamba, "Wakundigwa kugosoa mbui mwenga. Taga kia kintu wenacho, uwapangie wakiwa iyo hea, nawe wendauwe na kiikizo uko uwanga kwa Muungu na khiyo vintu inga vya inusi ukabinda soo unibase." **23** Akini uyo mntu ekutegeezaho ayo, ne akaona usungu muno kwaajii nee kawa mntu mwenye vintu vingi muno. **24** Yesu ekumuonaho anausungu, ivyo akamba "Mntu mwenye vintu vingi khadaha kwengia kihufu kwe Useuta wa Muungu! **25** Nivihufu muno kwa ngamia kwemboka mwe poota da singano kusima, mwenye vintu vingi kwengia mwe Useuta wa Muungu." **26** Wada wantu wekutegeezaho ayo, wakamuza Yesu, "Nndai naho adahae kuoholwa?" **27** Yesu akawatambaisa, "Yesayokudahika kwa wantu, kwa Muungu yadahikana." **28** Naye Petulo akamuza, "Kauwa, tibada vyose tekuwavyo navyo tikakubasa!" **29** Yesu akamwamba, "Kwei nawagombeka khahana hata yumwe ekubadae nyumba yakwe na mkaziwe hambu wanduguze hambu wavyazi wakwe hambu wana wakwe kwaajii ya Useuta wa Muungu, **30** endaahokee vingi muno mwe inusi inu na ugima wa misi yose kwesaho kisiikizi mwe Useuta wa Muungu." (aiōn g165, aiōnios g166) **31** Yesu ne awadoa khandai wada wahina

wakwe kumi dimwe na waidi, akawamba, "Nitegeezani! Taita Yelusalemu na uko kia kintu chekundikwacho na Waoni wa Muungu kuusu Mwana wa Mntu kindakigosolwe. **32** Naye wendawamwegae na kuguiwa na wantu wesaokuwa Wayahudi, nao wendawambee, wenda wamdumuwe na kusuiwa ovu. **33** Wenda wamtoe makoto na kumkoma. Akini msi wa ntatu endaayuyuke." **34** Iya wahina wakwe khawekumanya mana yakwe mbui izi, kwaviya nee ifiswa kwao, nao khawokumanya Yesu nee akagombeka mbwai. **35** Kisingi Yesu ekuwabuwaho hehi na mzi wa Yeliko, neekuwa na mntu yumwe tuntu kekaa khandai ya sia aombeza. **36** Yuda mntu tuntu ekusikiaho mgutio wa zumwezumwe da wantu dikemboka akauza, "Kunani?" **37** Wakamwamba, "Yesu kulawa Nazaleti emboka." **38** Nee alavya mgutio akamba, "Yesu, Mwana wa Daudi, nifiye mbazi!" **39** Wada wantu wekuwao waongoa hemeso wakamuwakia anyamae. Akini yee akaendee kulavya mgutio muno, "Mwana wa Daudi, nifiye mbazi!" **40** Yesu akagooka, akawagiya wada wantu wamwegae hemeso yakwe. Yuda tuntu ekubuwaho hehi, Yesu akamuza, **41** "Wakunda nikugoswee mbwai?" Naye akatambaisa, "Zumbe, nakunda kukauwa." **42** Yesu akamwamba, "Kauwa! Kuzumiiya kwako kukuhonya." **43** Ahoaho uyo mntu tuntu akadaha kukauwa, akambasa Yesu akamtogoa Muungu. Wantu wose wekuonaho ayo, wakamtogoa Muungu.

19 Yesu akengia mwe mzi wa Yeliko, nae nekawa akemboka gatigati ya sia ya mzi uwo. **2** Mwe mzi uwo neekuwa na mntu yumwe zina dakwe Zakayo. Mntu huyo neekawa mwenye vintu vingi na nekawa mkuu wa watoza kodi. **3** Yee nee akakunda kumkauwa Yesu kuwa ni mntu wa namna yani. Akini kwaajii ya zumwezumwe kuu da wantu khakudaha kumkauwa kwaviya nee ni mjihi. **4** Ivyo akaongoa hemeso ya zumwezumwe da wantu, akafida uwanga ya mkuyu adahe kumwona Yesu, kwaajii enda embokee sia ida. **5** Naho Yesu ekubuwaho hantu hada, akakauwa uwanga akamwamba, "Zakayo, seeya kinyio kwaajii ivyeeo nlazima nisinde kaya hako." **6** Zakayo ne aseeya kinyio, akamhokea Yesu mwe nyumba yakwe kwa kinyemi kikuu. **7** Wantu wose wekuonaho ayo, wakavoka kung'ung'uzika wakamba, "Kaita kuwa mgeni kwa mntu mwenye mavigaviga." **8** Akini Zakayo akagooka, akamwamba Yesu, "Tegeezani, Zumbe! Miye nendaniwekhe wakiwa ntii ya vintu vyangu, na inga khimhoka mntu yoyose kintu, nendanimvuzie maa kane." **9** Yesu akamwamba, "Ivyeeo uhozi ubua mwe nyumba inu, kwaviya uyu ni uvyagwa wa Ibulahimu." **10** Kwamana Mwana wa Mntu keza kuondeza na kuohowa wantu wekwagao. **11** Wantu

wekuwaho wakategzeeza Yesu, nee Yesu akawamba msimo uwo. Aho nekawa hehi na kubuwa mzi wa Yelusalemu, na wantu wada nee wamamakhanya kuwa Useuta wa Muungu weza saa iyo iyo. 12 Ivyo akawamba, "Nee kuwa na mntu yumwe mtunywa muno akafunga ntambo ya kuita si ya hae asimikwe kutendwa Seuta, akabinda auye mwe si yakwe. 13 Ivyo ekuwaho khazati kuhauka, akawetanga wandima wakwe kumi dimwe, akawekha fungu da hea kwakiya yumwe na kuwamba, 'Mzigoswee biashaa izi hea hadi nendaho niuye.' 14 Akini wantu wa si yakwe mwenye, nee wakamkima ivyo wakawagiya wantu nyuma yakwe wakambe, 'Khatimkunda uyu awe Seuta wetu.'" 15 "Hata ivyo ekuuyaho mwe si yakwe kawakae Seuta, ahoaho akawetanga wada wandima wakwe wekuwao kawabadai hea, amanye myengizo niya kima chani kwakiya yumwe ekupatacho. 16 Mndima ya bosi akaawiya akamba, 'Zumbe fungu dako dieta maa kumi dimwe.' 17 Nae akamwamba, 'Ni vyedi, wee ni mndima yedi kwaviya umzumiiwa mwe mbui ndodo, na wendauwe mgookezi mwe mizi kumi dimwe.' 18 Mndima wa kaidi akeza akamba, 'Zumbe fungu dako wekunekhado dieta mafungu mashano.' 19 Nae akamwamba, 'Nawe wendauwe mgookezi mwe mizi mishano.' 20 Mndima wa ntatu nae akeza nakumwamba, 'Zumbe doa fungu dako, kwaviya ne khidiika he mkwiji desekwaga.' 21 Kwajii nee khiogoha kwaviya wee ni mntu mkai. Wadoa wesacho kuika kintu na wabonda hantu wesaho kuhanda kintu. 22 Nae akamwamba, 'Wee mndima mfyaimi! Nenda nikuamuiye kulawana na mbui zako wekugombekazo, nee ukamanya kuwa mie ni mntu mkai, nadoa vintu vyesavyokuwa vyangu na kubonda kwesiho kuhanda. 23 Ni vyedi, akini kwa mbwai khwekuika hea zangu kwa wada walavyao nyongeza, nami ne khiidoo hamwe na mwengizo aho nendaho niuye kwangu?' 24 Aho akawamba wada wekuwao hada, 'Mhokeni ido fungu da hea, mkamwekhe yuda mwekuwa na mafungu kumi dimwe.' 25 Naho wakamwamba, 'Akini Zumbe, tayali ana mafungu kumi dimwe.' 26 Nae akawatambaisa, 'Kia ekuwaye na kintu endaekhigwe na kumemeezewa. Akini yuda mwesena, hata kia ekuwacho nacho chenda kidoigwe, 27 akini wada wamasa wangu wesao kukunda mie niwe Seuta wao, waeteni hanu mkawakome hemeso yangu.'" 28 Yesu ekubindaho kugombeka ayo, akawaongweeya kuita Yelusalemu. 29 Ekuwaho hehi kubua mzi wa Betifage na mzi wa Besaniya hehi na muima wa Mizaituni, akawagiya wahina wakwe waidi, 30 akawamba, "Hitani mwe mzi uda weiho hemeso yenu, mwendaho mwengia mwe mzi, mwenda mubwii mwana phunda kazengetezwa sigi khazati kumwenua mntu. Mchopoeni mmwete hanu. 31 Mntu

akawauza kwambwai mwamchopoa mmwambe, 'Zumbe amkunda.'" 32 Naho wakaita, wakabwiiia kia kintu inga Yesu ekuwambavyo. 33 Wekuwaho wamchopoa yuda mwana phunda, mwenye wakawauza, "Kwa mbwai mwamchopoa mwana phunda uyu?" 34 Wahina wakwe wakawatambaisa, "Zumbe amkunda." 35 Nee wamwegaiya Yesu yuda mwana phunda, wakatandika magwanda yao uwanga yakwe, Yesu akakwea uwanga ya mwana phunda. 36 Yesu akaendee na ntambo, na wantu wakatandaza magwanda yao mwe sia. 37 Ekuwaho hehi na mzi wa Yelusalemu, mwe mpolomoko wa muima wa Mizaituni, zumwezumwe kuu da wantu na wahina wakwe wakavoka kutoa kheegee na kuwa nyemi na kumtogoia Muungu kwa mgutio mkuu, kwaajii ya mbui khuu wekuonayo, 38 uku wagombeka, "Ajaiwe Seuta ezae kwa udaho wa zina da Zumbe. Uivanisa uwanga kwa Muungu, na Ukuu kwa Muungu!" 39 Aho wamwe wa Mafalisayo wekuwaaho mwe diya zumwezumwe da wantu wakamwamba Yesu, "Mhinyi, wawakie wahina wako wanyamae!" 40 Yesu akawatambaisa, "Nawamba inga awa wakanyamaa, maiwe yenda yatoe vuzo." 41 Yesu ekuwaho hehi na mzi wa Yelusalemu, na ekuonaho uwo mzi Yesu akauiia, 42 akagombeka kuusu wantu wa mzi uwo, "Nee nikakunda hata ivyeo ii mmanye mbui zietazo uivanisa. Akini isasa yafiswa na khamdaha kuiona uwo utuivu. 43 Kwaviya misi yeza ambaho wamasa wako wendawazenge ukanto mntintimavu kuika buha mzi wose, na aho wendawakutoe kulawa phande zose. 44 Wenda wakuhondehonde wee hamwe na wana wako ndani ya viambaza vyako, nao khawana wakuekee hata iwe dimwe uwanga ya tuhu, kwaajii kwekumanya kisingi Muungu ekwezaho kukuohoa." 45 Naho, Yesu akengia he buha da Nyumba ya Muungu, akavoka kuwalavya chongoi wata biashaa, 46 Muungu agombeka, "Iyandikwa, 'Nyumba yangu indaiwe nyumba ya kuvika.' Akini nywinywi muigoso hantu ha kufisa wahokaji." 47 Kia msi Yesu neekawa he Nyumba ya Muungu. Waviki wakuu na wahinyi wa miko na waongoezi wa wantu ne wakakunda kumkoma, 48 akini ne khawakuwa na dakugosoa, kwaviya wantu wose wawa wamtegeeza kwa vitana muno.

20 Msi umwe, Yesu ekuwaho awahinya wantu he Nyumba ya Muungu na kuwabiikia Mbui yedi, Waviki Wakuu na Wahinyi wa miko hamwe na wadaa wakabua, 2 Wakamba, "Tigombekee! Wagosoa mbui izi kwa udaho wa ndai? Ni ndai mwekukwekha udaho unu?" 3 Yesu akawauza, "Na mie nendaniwauze mbui. Nambiani, 4 udaho wa Yohana wa kubatiiza uwanga kwa Muungu hambu kwa wantu?" 5 Akini wowo wakauzana ivi, "Inga tikamba, 'Ulawu uwanga kwa

Muungu,' yee enda atiuze, 'Mbona khamwekumzumiiya?' 6 Akini tikamba, 'Yaawa kwa wantu,' wantu wose wendawatitoe kwa maiwe kwaajii wazumiiya kuwa Yohana ne kawa muoni wa Muungu." 7 Nao wakamtambaisa, "Khatimanya udaho uwo wekuawako." 8 Yesu akawamba, "Hata mie khina niwambe nagosoa mbui izi kwa udaho wa ndai." 9 Yesu akaendee kugombeka na wantu msimo unu, "Mntu yumwe nee kaima mnda wa mizabibu, akadikodisha kwa waimi, naho akatamba kwa kisingi kileacho. 10 Kisingi cha kubonda, mntu uyo nee akamuagiya mndima wakwe kwa wada waimi, akadoe fungu dakwe da ubosi wa mnda wa mizabibu. Akini wada waimi wakamtoa mndima uyo, wakamguusa kwesaho kumwekha kintu. 11 Yuda mwenye mnda akamuagiya vituhu mndima mtuhu, akini wowo wakamtoa uyo viyaviya na kumgosoea ufyaimi, wakamguusa kwesaho kumwekha kintu. 12 Akamuagiya mndima wa ntatu vituhu, uyo naye wakamsuimiza, wakamguusa kwesaho kintu. 13 Yuda zumbi mwenye mnda wa mizabibu akamamakhanya, 'Nendanigosoe mbwai? Nendanimuagiye mwanangu nimkundisae, inga wendawamtunye.' 14 Wada waimi wekumuonahodu, wakamba, 'Uyu ne mpazi. Ivyo timkome upazi wakwe utende wetu.' 15 Ndiho wakamlavya chongoi mwe uda mnda wa mizabibu, wakamkoma." Yesu akawauza, "Yuda zumbi mwenye mnda endaawatende mbwai awo waimi? 16 Endaeze kuwakoma waimi awo, na kuwekha waimi watuhu uwo mnda wa mizabibu." Wantu wekusikiaho mbui ziya. Wakamba, "Khivyo! Yasekulawiiya katul!" 17 Akini Yesu akawafuiya meso akawamba, "Maandiko aya Muungu yana mana yani? 'Iwe wekuemeado wazengi, Isasa diwa iwe kuu da msingi' 18 Mntu yoyose akagwa uwanga ya iwe ido, endaabondeke bondeke, dikamguiya mntu yoyose, dendadimbonde nyang'anyang'a." 19 Wahinyi wa miko na waviki wakuu wekumanyaho kuwa msimo uwo neuwa wawausu, ivyo wakakunda kumgwiya hadahada, akini wakawaogoha wantu. 20 Kwaivyo wakuu awo wakawa wanambengea Yesu wamgwiie. Aho wakawekha wantu mlungula, na kuwagiya waite kumuza mbui, wantu awo waketenda kuwa ni wedi, kumbe nee wakaondeza sia ya kumgwiya Yesu kwa mbui zakwe ili waite kumuahiya masa kwa wagookezi wa Kilumi. 21 Aho wantu wekuagiwao wakamwamba, "Mhinyi, tamanya kuwa wee wagombeka na kuhinya mbui za kwei, tamanya kuwa wee khuna ubahuzi, wahinya kwei wantu wakundigwavyo kwekaa inga akundavyo Muungu. 22 Naho, tambie kulawana na miagiyo yetu ivi yakundigwa kuiha kodi kwa Kaisali, hambu khivyo?" 23 Akini Yesu ne abukhua unyanyi wao, akawamba, 24 Nioneshani iyo senti. Cheni na zina idi ni da ndai? Nawo wakamtambaisa,

"Ni ya Mkuu wa Lumi." 25 Yesu akawamba, "Yekuwayo ya Kaisali mwekheni kaisali, na yekuwayo ya Muungu mwekheni Muungu." 26 Naho wantu wada khawekudaha kumgwiya kwa yada ekuwayo kagombeka hemeso ya wantu. Nao wakahondomaa muno na mitambaiso yakwe, wakanyamaa myee. 27 Naho wamwe wa Masadukayo, ambao wagombeka kuwa wekuuyao na nyuma khawayuyuka, wakamwezea Yesu na kumuza, 28 "Mhinyi, Musa katiandikia kuwa inga ndugu ya mntu yumwe akauya na nyuma na kumbada mvyee yakwe kwesaho wana, yakundigwa kakie ampae uyo mvyee, na amvyaie nduguye wana. 29 Nekuwa na ndugu mfungate, yuda wa bosi ne kategua na kisingi kwemboka akauya na nyuma kwesaho kubada mwana. 30 Yuda ndugu wakaidi akampaa yuda mvyee mwekufiwa ni mgosi, kisingi kwemboka akauya na nyuma kwesaho kubada mwana, 31 na ndugu wa ntatu akampaa yuda mvyee kisingi kwemboka akauya na nyuma. Na mbui zikawa ziyaziya kwa wose mfungate ne wauya na nyuma kwesaho kubada wana. 32 Kisiikizi yuda mvyee akauya na nyuma. 33 Ivi msi wantu kuyuyuswa, mmaa uyo endaawe mvyee wa ndai? Kwaviya wose mfungate nee wamtega." 34 Yesu akawamba, "Wantu wekaisao mwe inusi isasa wategua na kutegulwa, (aiōn g165) 35 akini wada wantu ambao Mungu anaona kuwa wafaa kwepata hantu mwe inusi kuyuyuswa, khawategua wala kutegulwa. (aiōn g165) 36 Awa khawadaha kuuya na nyuma vituhu, kwaajii wendawawe inga wandima wa uwanga kwa Muungu. Wao ni wana Muungu kwaviya wayuyuswa. 37 Akini mbui inu ya kuyuyuka kulawa kwa wekufao, hata Musa kagombeka kuwa wantu wekuuyao na nyuma wenda wayuyuswe, kagombeka ayo mwe Maandiko ya Muungu. Hada yekugombekayo uwanga ya mbui za kisaka chekuwacho chaka moto, nee kagombeka kuwa yee nee Zumbi 'Muungu wa Ibulahimu na Muungu wa Isaka na Muungu wa Yakobo.' 38 Yee Muungu khio Muungu wa wekuuyao na nyuma iya kwa wekuwao na ugima, kwaajii wose ambao ni wagima." 39 Wamwe wa wada Wahinyi wa miko wakamba, "Mhinyi, kutamwiya vyedi muno." 40 Wakamba ivyo kwaajii khawekuandua kumuza vituhu mbui ntuhu. 41 Yesu akawauza, "Yadahika viivhi wantu wambe kuwa Klistu ni mwana wa Daudi? 42 Daudi mwenye nee kaandika mwe kitabu cha Zabui, 'Zumbi Muungu nekamwamba Zumbi wangu, ekaa phande yangu ya kuume, 43 Adi nikugosoe uwavote wamasa wako na kuwagookea wawe asi yako.' 44 Ikawa Daudi amwetanga Klistu, 'Zumbi,' naho yendaiwe viivhi awe mwanawe?" 45 Wantu wose wekuwaho wakamtegeeza, Yesu akawamba wahina wakwe, 46 "Ekaeni hae na wahinyi wa miko ambao wakunda kwenda

wevaiya khazu zilehazo, wakunda kuuguswa na wantu kwa kutunywa kwe magwiiyo. Kwekaa hantu ha kutunywa mwe Nyumba ya kukintania Wayahudi na kudoa hantu hakutunywa mwe ntafuno, 47 wao uda nyumba za wekufiwiwo ni wagosi, ili waoneke kuwa ni wedi kwa kuvika mda uleaho. Awo wenda wekhigwe sugusa khai muno!”

21 Naho Yesu akakauwa phande zose, akawaona wenye vintu vingi wekuwavyo wagea malavyo yao kwe ntezu za kiikizo he Nyumba ya Muungu. 2 Akamwona pia mvyee yumwe mwekufiwa ni mgosi akagea umo sensi mbii ndodo. 3 Naho, akamba, “Nawamba ukwei, mvyee uyu mwekufiwa ni mgosi na mkiwa kagea mwe ntezu kima kikuu kusima wekulavyao wose. 4 Kwa viya, watuhu wose walavya malavyo kidodo mwe vintu vyao vingi, akini uyu mvyee mwekufiwa ni mgosi etiho ni mkiwa kalavya vyose ekuwavyo navyo, ekutegemeavyo kwa kwekaa kwakwe.” 5 Wamwe wa wahina wakwe nee wamwonyesha Nyumba ya Muungu yekuhambavyo vitana kwa maiwe na kwa vintu vyekulavigwavyo kuwa malavyo kwa Muungu. Akini Yesu akawamba, 6 “Aya yose muonayo misu yenda yeze ambaho khahana hata iwe dimwe dindado disigae uwanga ya ntuhu, kiya kintu chenda kibomolwe.” 7 Naho, wahina awo wakamuza, “Mhinyi, mbui izi zendazilawiye ini? Ni utangio wani wendao uwonyeshe ati mbui izo zihahi kulawiya?” 8 Yesu akawatambaisa, “Ekaani hae, msekweza mkatiwa. Kwaviya wangi wendawalawiye he zina dangu, kiya yumwe enda etenda kuwa yee ni miye nee Klistu, vituhu wenda watamwiye kisiikizi cha inusi kihehi. Akini nywinywi msekuwabasa. 9 Naho mwendaho msikie mbui za khondo na misuumizo msekugoha, kwaviya nlazima ayo yavo ke kulawiya, akini kisiikizi cha inusi khauzati.” 10 Nee aendee kugombeka, “Si mwenga yendaitowane na si ntuhu, na useuta umwe wendautoane na useuta mtuhu. 11 Kia hantu hendahawe na mizingizo mikuu ya mweinusi, saa khai na matamu mafyaini muno. Wantu wenda waone vintu vya kutisa inga utangio kulawa uwanga. 12 Akini kisingi khayazati kulawiya ayo, wenda wawagwie, wenda wawasumiize na kuwagea kwe kifungo, mwendamwagalwe hemeso ya maseuta na wagookezi kwaajii ya zina dangu, 13 inu indaiwe phasi yenu kuvuhuzia. 14 Akini msekuwa na matumatu mwe mioyo yenu kuwa mwendamtamwiye mbwai uko 15 Kwaviya nendaniwekhe mbui za kutamwiya na umanyi ambaho khahana mmasa wenu yumwe endaeadahe kuhigana nayo wala kuyaemea. 16 Wavyazi wenu na ndugu na wambuya wenu wendawawahituke nywinywi, na wamwe

wenu wenda wacomwe. 17 Wantu wose wendawawakime kwaajii ya zina dangu. 18 Akini, hata fii mwenga ya mtwi wenu khaunawage. 19 Kwa kuzimizima kwenu, mwendamuhoe ugima wenu. 20 “Mwendaho muone mzi wa Yelusalemu uikwa bunga na maasikai, manyeni kuwa kisingi kibua ambaho mzi uwo undaubanangwe. 21 Aho, wekuwako mwe mzi wa Yudea waguukie miimani, wada weaho mwe mzi nlazima walawe, na wada weaho mwe munda wasekuuya mwe mzi. 22 Kwaviya misu iyo ni misu za sugusa, ili yose yekugondwayo yaiganie. 23 Mmbwii yao wekwenu ndaa na waokhesao misu iyo! Kwaviya kundakuwe na masuumizo makuu mwe inusi, na sugusa ya Muungu indaisee kwa wantu awa. 24 Watuhu wenda wawacomwe kwa paange, na watuhu wenda wegalwe wandima mwe si ntuhu. Nao mzi wa Yelusalemu wendaujatwe na wantu wesaokuwa Wayahudi wenda wanguokea mzi uwo kwa nguvu, na kuwasuumiza wantu wakwe. 25 “Kundakuwe na utangio mwe zua na mweenge na ntoondo. Na aha mwe inusi na si wantu wenda wawe na suuba na maatu kulawana na mkubwaniso mkuu muno wa mazimshindo. 26 Wantu wendawazumiye kwaajii ya kuogoha, wakimamakhanya ni kiji chendachokilawie mwe inusi, kwaviya udaho wa vintu vya uwanga kwa Muungu vyendavisingsike. 27 Naho wendawamwone Mwana wa Mntu akeza mwe zunde, mwenye udaho na Ukuu mwingi. 28 Kisingi mbui izo yendaho yavo ke kulawiya, gookeni na kwenua mitwi yenu uwanga, kwaviya uhozi wenu uhehi.” 29 Naho akawamba msimo unu, “Kauwani mtini na miti mituhu yose.” 30 Mwendaho muone kuwa ivoka kuhota mani, mwamany kuwa miongo ya kubonda ihehi. 31 Ivyoivyo, mwendaho muone mbui izo zagosoka, mwenda mmany kuwa Useuta wa Muungu uhehi. 32 Kwei nawamba wantu wa kivyazi iki cha isasa khakina chemboke adi ya ayo yose kugosoka. 33 Uwanga kwa Muungu na inusi zenda zemboka akini mbui zangu khazina zemboka. 34 “Muwe meso, mioyo yenu isekweza ikatozwa na mbui za makwasukwasu, ukozi na ndima za ugima. Ama khivyo, msi uda undauwezee vuupu. 35 Kwaviya undaumezee inga mtego wantu wose wekaao mwe inusi yose. 36 Muwe meso kisingi chose, na vikani misu yose ili Mungu awambize kuvuka yose yendayolawiye mdahe kuwa na udaho wa kwemboka kwesio suuba mwe mbui izi zose yendayolawiye, na kugooka hemeso ya Mwana wa Mntu.” 37 Kia msi wa musu Yesu ne kawa akahinya wantu he Nyumba ya Muungu, akini kio ne kawa akaita he muima wa Mizaituni na kwekaa uko. 38 Wantu wose ne waita he Nyumba ya Muungu keo da mtungaihu wadahe kumtegeeza Yesu.

22 Sikukhuu ya mabumunda yesayo kugewa hamila, yetangwayo sikukhuu ya Pasaka, nee iwa ihehi. **2** Waviki wakuu na wahinyi wa miko nee wawa waondeza sia ya kumkoma Yesu, akini nee wakawaogoha wantu. **3** Naho, ibiisi nee amwengiia Yuda etangwaye Isikalioti, yumwe wa wada wahina kumi dimwe na waidi. **4** Yuda Isikalioti akaita, akagombeka na waviki wakuu na wagoja wa Nyumba ya Muungu akatamwiia nao namna wendavyo wamgwiye Yesu. **5** Nao nee wawa na kinyemi na kwevana naye kumuiha hea. **6** Yuda Isikalioti akazumiia, nee ahaondeza hantu hatana hakumwekhiiza Yesu kwesaho wantu kumanya. **7** Naho, msi wa mabumunda yesayo kugewa hamila ikabua. Iyo nee msi ambaho Mwanangoto wa Pasaka alavigwa ntambiko. **8** Iyvo Yesu akawagiia Petulo na Yohana, akawamba, "Hitani mkatiikie khande tidahe kuda Pasaka." **9** Naho wakamuiza, "Wakunda tikuikie hahi?" **10** Akawamba, "Tegeezani! Mwendaho muwe mwaita mwe uwo mzi, mwenda mkintane na mgosi kenua biga da mazi. Mtongeeni hadi mwe nyumba endayo engie. **11** Mmwambe mwenye nyumba, 'Mhinyi akuiza, ki hahi kiya chumba ambaho nendanide Pasaka hamwe na wahina wangu?' **12** Naye enda awaonyeshe chumba kikuu kwe goofa ambacho kiikwa tayali, ikani umo". **13** Naho wakaita, wakabwiia kia kintu nsawa inga Yesu ekuwavyo kawamba, waika ntafuno ya Pasaka. **14** Mda wekubuwaho, Yesu akekaa ade khande hamwe na wagiwa wakwe. **15** Akawamba, "Nee khitamiwa muno kuda Pasaka inu hamwe nanywi kabla ya kusumiizwa kwangu. **16** Isasa nawamba, khina niide vituhu ntafuno ya Pasaka adi hada yendahoiigania mwe useuta wa Muungu." **17** Naho akakidoa kikombe cha divai, akatogoa, akavika, "Hokeani, mpangane. **18** Kwa viya nawamba, khina nidomee vituhu divai ya mzabibu hadi Useuta wa Muungu wendaho weze". **19** Akadoa bumunda, akatogoa Muungu, akaubendua, akawekha akamba, "Unu nee mwii wangu ulavigwao kwaajii yenu. Gosoani ivi kwa khumbuso yangu." **20** Akagoso ivyoivyo na kikombe cha divai ekubindaho kuda akagombeka, "Kikombe iki cha divai nee Diyagane dihya dionyeshwado kuwa ni kwei ni phome yangu yetikayo kwaajii yenu. **21** "Akini, kauwani! Yuda Isikalioti endaye anihituke yu hamwe nami hanu he khande. **22** Kwei Mwana wa Mntu aita kukomwa inga yekupangwavyo, akini mmbwii yakwe mntu yuda amhitukae." **23** Aho wakavoka kuuzana wenye kwa wenye ni ndai gati yao endaye agosoe mbui iyo. **24** Kukalawiia mahigano gati ya awo wagiwa kuusu ni ndai gati yao amamakhanywae kuwa mkuu kusima watuhu. **25** Yesu akawamba, "Maseuta wa si ntuhu wawagookea wantu wesaokuwa Wayahudi kwa nguvu, akini kisingi ichoicho

wetanga wambuya wa wantu. **26** Akini isekuwa ivyo gati yenu, naye yuda mkuu gati yenu nlazima awe mdodo wa wose, na ekuwaye muongoezi nlazima awe inga mndima awagosoaye watuhu. **27** Kwa viya, ni ndai mkuu gati ya yuda ekaaye he meza kuda khande, ama yuda aetae khande? Inga miye neivyo hanu ni mndima gatigati yenu. **28** "Nywinywi nee mwekusigao nami kisingi chose cha kugeezwa kwangu, **29** na inga viya Tate yangu ekunekhavyo Useuta, ivyoivyo nami nawekha nywinywi Useuta. **30** Kusudi mdahe kuda na kudomea hamwe nami mwe Useuta wangu na kwekaa he vigoda vya Useuta na kuwaamua mbai kumi dimwe na waidi ya wantu wa Isilaeli. **31** "Simoni, Simoni! Tegeeza, ibiisi kamwomba Muungu uhusa adahe kuwabahuwa inga mntu mheta ngano. **32** Akini mimi nakuombeza wee Simoni ili uzumizi wako usekuhungua. Nawe wendaho uniuwiye, wagee moyo wanduguzo." **33** Naye Petulo akamtambaisa, "Zumbe, miye ntayali kuita hamwe nawe mwe kifungo, na hata kuuya na nyuma hamwe nawe." **34** Yesu akamtambaisa, "Nakwamba wee Petulo, kabla zogoo khadizati kukema ivyeo wenda unimee maa ntatu." **35** Naho Yesu akawauza wahina wakwe, "Kisingi nekuwaagihao kwesaho kifuko cha hea wala jumu wala sabana, ne mhungukiwa na chochose?" Wakatambaisa, "Khivyo." **36** Naye Yesu akawamba, "Akini isasa, yuda mwe kuwa na kifuko cha hea audoe, na mwe kuwa na jumu naye adidoe. Na yoyose mweyekuwa na paange, atage gwanda dakwe ague dimwe. **37** Kwaviya iyandikwa mwe Maandiko ya Muungu, 'Kataaziwa hamwe na mabagaa,' mbui izi zandikwa kwaajii yangu nawamba nlazima mbui izi zigosoke." **38** Naho wakamba, "Zumbe, kauwa, hanu kuna mapaange maidi." Naye akamba, "Eka!" **39** Yesu akalawa, na inga yekuwavyo mazweeya yakwe, akaita he muima wa Mizaituni, wahina wakwe wakambasa. **40** Ekubuwaho uko akawamba, "Vikani, msekweza kwengia mwe mageezo." **41** Naho akawabada, akaita uhae wa mntu kudaha kutambika iwe, akakinta mavindi, akavika kwa Muungu. **42** "Tate, inga ikadahika uuse kwangu kikombe iki cha usumiizi, hata ivyo ukundavyo wee na viwe, akini khio nikundavyo mie." **43** Aho mndima wa uko uwanga kwa Muungu akamlawiia kumwekha udaho. **44** Akawa mwe usungu mkuu, akavika, na kizugoto kikamlawa inga madodwe ya mphome, na kujuzika kubua asi. **45** Ekubindaho kuvika, akawauia wahina wakwe, akawabwiia wagona, ne awamba kwa usungu, **46** Akawamba "Kwa mbwai mwagona? Erukani mviwe, msekweza kwengia mwe mageezo." **47** Ekuwaho atamwiia, zumwezumwe da wantu dikeza diongoewa na Yuda, yumwe wa wada wahina kumi dimwe na waidi. Yuda akaita kumuugusa Yesu kwa kumuumbatia kwa ukundiso? **48**

Akini Yesu akamwamba, "Yuda! Wamhituka Mwana wa Mntu kwa kumuumbatia?" **49** Wada wahina wakwe wekuonaho ayo wakamba, "Zumbe, tiwasengesenge na mapaange yetu?" **50** Na yumwe wada wahina akamsenga paange mndima wa mviki mkuu, gutwi dakwe da kuume. **51** Aho, Yesu akamba, "Eka!" Akadidonta diya gutwi da yuda mntu uyo, akamhonya. **52** Naho Yesu akamwamba waviki wakuu, na wakuu wa wagoja wa Nyumba ya Muungu na wagookezi watuhu wa Isilaeli hamwe na wadaa wekwezao kumgwiya, "Mweza na mapaange na malungu kunigwiya inga miye ni mbavi. **53** Nekuwaho hamwe nanywi kia misu he Nyumba ya Muungu khamwekugeeza kunigwiya. Akini, unu nee kisingi chenu, ndicho kisingi cha ugookezi wa kiza." **54** Naho wakamgwiya Yesu, wakamdoa na kuita naye he nyumba ya mviki mkuu. Petulo ne kawa ambasa nyuma kwa hae. **55** Wantu wada wekubuwaho kwe nyumba ya mviki mkuu wakagimba moto gatigati buha, petulo akasogea akekaa hamwe nao. **56** Mndima yumwe wa kivyee ekumuonaho Petulo kekaa hehi na moto, akamfuiya meso, akamba. "Mntu uyu nee kawa hamwe na Yesu." **57** Akini Petulo akaemea akamba, "Wee! Khimanya." **58** Wekwembokaho mda mcheche, mntu mtuhu akamwona Petulo, akamba, "Wee ni yumwe yao." Akini Petulo akamtambaisa, "Wee mntu, mie khie." **59** Yekwembokaho saa dimwe, mntu mtuhu akagombeka vituhu, "Kwei uyu ne kawa hamwe naye Yesu, kwaviya kalawa Galilaya." **60** Akini Petulo akamba, "Zumbe wee, khimanya hata ugombekacho." Na ahoaho, ekuwaho agombeka, zogoo dikakema. **61** Zumbe akahituka na kumkauwa Petulo naye Petulo ne akumbuka yada ekwegombekwayo ni Zumbe, "Ivyee zogoo khadizati kukema, wenda unimee maa ntatu." **62** Aho Petulo akalawa chongoi, akavoka kuiya muno. **63** Wada wantu wekuwaho wamuinda Yesu, wakavoka kumbea na kumtoa, **64** wakamfunga buye hemeso, wakawa wamuua, "Lavya uwoni! Tigombeke ndai ekukutoaye." **65** Wakagombeka mbui nyingi za kumdumuwa. **66** Kwekuchaho, chekao cha wadaa wa wagookezi wa wantu wa Isilaeli kikagosoka, waviki wakuu na wahinyi wa miagiyo newabua. Yesu akaetigwa hemeso ya mkonga. **67** Naho wakamwamba, "Tigombeke! Wee nee Klistu?" Akini Yesu akawamba, "Hata inga nikawagombeka, khamna mnizumiie, **68** na hata inga nikiwauzani mbui, khamna mnitambaise. **69** Akini kuvokea isasa, Mwana wa Mntu endaekae phande ya kuume ya Muungu mwenye udaho." **70** Aho wose wakamuua, "Wenda ugombeke wee ni Mwana wa Muungu?" Naye akamba, "Nywinywi mwagombeka kwaviya mie ndie." **71** Naho wakamba, "Ivi, takunda uvuhuizi mtuhu? Swiswi wose wenye timtegeeza ekugombekacho."

23 Naho wantu wose wakagooka, wakamwegaa Yesu hemeso ya Pilato. **2** Wakavoka kumuhaiya masa wakagombeka, "Timbwiiya akitiya wantu na kuwaemeza wasekuiha kodi kwa mkuu wa kilumi na kwetanga ati yee ni Klistu, Seuta." **3** Pilato akamuua Yesu, "Wee nee Seuta wa Wayahudi?" Yesu akamtambaisa, "Wee wagombeka." **4** Pilato akawamba waviki wakuu na zumwezumwe da wantu, "Nchekuona masa yoyose kwa mntu huyu." **5** Akini wowo wakahembeeza na kugombeka, "Awachonchea wantu kwa mahinyo yakwe mwe si yose ya Uyahudi, kavoka Galilaya na isasa yu hanu." **6** Pilato ekutegeezayo ayo, akauza, "Ivi mntu huyu ni mwenyezi wa Galilaya?" **7** Ekumanyaho kuwa Yesu alawa he hantu ha ugookezi wa Helode, akamwegaa kwa Helode, kisingi icho neekawa Yelusalemu. **8** Helode kawa na kinyemi muno ekumuonaho Yesu. Kwaviya kabinda kae kutegeeza mbui zakwe, na ivyo nekawa akauwiya kwa kisingi kilehacho kumuona kwa meso yakwe mwenye. Naho akakunda kuona ntangio zekugosolwazo ni Yesu, **9** Ivyo Helode akamuua Yesu mbui nyingi, akini Yesu khukumtambaisa. **10** Waviki wakuu na wahinyi wa miko wakalawiiya hemeso, wakamlavyia masa kwa ukai muno. **11** Naho Helode hamwe na asikai wakwe, wakambea Yesu na kumgosweeya mahoka, newamvika gwanda da kiseuta, wakamvuza kwa Pilato. **12** Kisingi icho Helode na Pilato, nee ni wambuya akini aho kae nee ni wamasa. **13** Naho, Pilato akawetanga hamwe waviki wakuu, wakuu na wantu, **14** akawamba, "Mmweeta mntu huyu kwangu mkagombeka kuwa ne kawa awasongeeza wantu waamee ugookezi. Isasa tegeezani! Bada ya kumuua mbui iyo hemeso yenu, nchekupata dodose da ufayimi kuusu masa mwekuyaetayo hangu. **15** Wala khio miye ikedu, iya hata Helode khekuaona mbui ya ufayimi yoyose, ivyo akamvuza vituhu kwetu. Mntu huyu khekugose mbui yoyose ya ufayimi ambayo dendado dimtende akomwe. **16** Ivyo, nendaniwambe atigwe makoto, mkabinda nimuwekee." **17** Kia sikukhuu ya Pasaka Pilato nee akundigwa kuwavuguiya wantu mfungwa yumwe. **18** Akini zumwezumwe dose dikatoa vuzo wakamba, "Mkome uyo, utivuguiye Balaba!" **19** Balaba nee kagewa mwe kifungo kwaajii ya kugosoa khumbizi mwe mzi na kwaajii ya kukoma. **20** Pilato nee kakunda kumuekea Yesu, Ivyo akamba vituhu, na zumwezumwe da wantu. **21** Akini wowo wakatoa vuzo, "Mgong'ondee he mhamba! Mgong'ondee he mhamba!" **22** Pilato akawamba maa ya ntatu, "Kagosoa masa yani yakumtenda akomwe? Khiona ufayimi wowose kwakwe akundigwao akomwe, kwa iyo nenda nimbade mumtoe makoto, mkabinda mwamuekea." **23** Akini wowo wakatendesa kutoa vuzo kwa mgutio mkuu, kuwa Yesu

nlazima agong'ondewe he mhamba. Kisiikizi, wakavota. 24 Naho, Pilato akaamua kiya wantu wekukundacho. 25 Akamvuguiya yuda mntu wekumkundaye kulawa mwe kifungo, ambaye nee kagewa mwe kifungo kwaajii ya kuemea ugookezi wa seekai ya kilumi, na akamwekhiiza Yesu kwao, wamgoswee viya wekukundavyo. 26 Wekuwaho wamwegaa, nee wakintana na mntu yumwe etagwaye Simoni wa Kulene, ekuwaye alawa chongoi ya mzi. Naho wakamgwiya, wakamtwika uda mhamba audoe nyuma ya Yesu. 27 Zumwezumwe kuu da wantu wakamtongea, gati yao awa neekuwa na wavyee wekuwao wakamwiya na kutoa mbwaimbo. 28 Yesu akawahitukia, akamba, "Nywie wavyee wa Yelusalem! Msekuniya mie, akini iyani kwaajii yenu wenye na kwaajii ya wana wenu." 29 Kwaviya, kwei misi zendazeze ambaho wenda wagombeke, "Wajaiwa wavyee wesaho kuwa na wana na wesao kuvyaa na kuokhesa wana!" 30 Kisingi icho, ndiho wantu wenda wavoke kugombeka miima mikuu, "Tiguieni! Na viima vidodo, 'Tigubikeni!'" 31 Kwaviya wantu waugosweeya mti muisi namna inu, indaiwe viivihiki kwa mti wekunyaa? 32 Masikai wakawadoa wantu watuhu waidi mabagaa, wakomwe hamwe naye. 33 Wekubuwaho hantu hetwangwao, "Fufu da Mtwi," naho wakamgong'ondea Yesu he mhamba. Wada mabagaa waidi wakagong'endewa kia yumwe he mhamba wakwe, yumwe phande ya kuume na mtuhu phande ya kumoso. 34 Yesu akamba, "Tate, waekee kwa viya khawamanya wagosoado." Naho wakapangana magwanda yakwe kwa kuyatoeya kula. 35 Wantu ne wawa wagooka hada wakakauwa. Nawo waongoezi wa Kiyahudi wakambeya na kumsizigia wakagombeka, "Kawaohowa watuhu, isasa na eohoe mwenye, inga yee ne Klistu, mwekusagulwa ni Muungu!" 36 Asikai nao nee wambea, wakamtimia wakamwekha divai yekusasayo 37 naho wakamba, "Inga kwei wee nee Seuta wa Wayahudi eohoe mwenye." 38 Nee waika kibao chekundikwacho, "Uyu nee Seuta wa Wayahudi." 39 Yumwe wa wada mabagaa wekugong'ondwae he mhamba, akamdumuwa akamba, "Ati wee nee Klistu? Eohoe mwenye, utuohoe na swiswi." 40 Akini yuda bagaa mtuhu akamwakia mweziwe akagombeka, "Wee khumuogoha Muungu? Wee kwekhigwa sugusa iyoioyo? 41 Wee na miye niamuiwa kwa haki, kwaviya haya ni maiho ya yada tekugosoayo. Akini mntu uyu khekugosoa dodose da ufyaimu." 42 Naho akagombeka, "Ee Yesu! Unikumbuke kisingi wendaho wengie mwe Useuta wako." 43 Yesu akamtambaisa, "Nakwamba kwa kwei, ivyeeo wendauwe hamwe hantu ha Muungu." 44 Nee yapata saa mtandatu wa musu, zua dikabada kumwiika, kiza kikagubika si wose yose hadi saa kenda, 45 na pazia dekuwado dikepanga sehemu

mbii he Nyumba ya Muungu dikatatuka kuvoka uwanga hadi asi. 46 Yesu akaiya kwa mgutio mkuu, "Tate, he mikono yako naika muye wangu." Ekubindaho kutamwiya ayo, akauya na nyuma. 47 Aho, yuda mkuu wa maasikai ekuonaho yekulawiiyo akamtogoa Muungu akamba, "Kwei uyu ne kawa mntu yedi." 48 Wantu wada wose wekuitaho kwaajii ya mbui iyo, wekuonaho ayo yekulawiiyo wakauya mwe nyumba zao waketoa vifua kwa usungu. 49 Wantu wose wekumnyao vitana hamwe na wada wavyee wekutongeanana naye kulawa Galilaya, ne wakagooka kwa hae kukauwa mbui iyo. 50 Naho kuwa na mntu yumwe zina dakwe Yusufu, mwenyezi wa mzi umwe wa Wayahudi wetagwao Alimataya. Nee kawa mntu yedi atunywae. 51 Nee kawa akakauwiya kweza kwa Useuta wa Muungu. Etiho nekawa mwenyezi wa Alimataya, yumwe wa wagookezi wakuu wa mkonga wa Wayahudi, nee khayekumtamia ida mbui yao ya kumkoma Yesu. 52 Naho yee Yusufu akaita kwa Pilato akaombeza ekhigwe mwii wa Yesu. 53 Nee auseeza mwii uwo kulawa he mhamba akauzengeteza sanda ntana, akauwika mwe mbiya dekuwado disongolwa mwe iwe, ambado khadizati kugewa mntu yoyose. 54 Msi uwo nee maandaio ya Msi wa Kuhumuiza nee iwa yavoka. 55 Wada wavyee wekutongeanana na Yesu kulawa Galilaya wakambasa Yusufu wakoona diya mbiya na mwii wakwe Yesu wekuikwavyo. 56 Nee wauya kaya, wakayagosoa manukato na mavuta matana ya malashi kwaajii ya kuusisa mwii wa Yesu. Msi wa Kuhumuiza wakahumuiza inga miko ya Musa yekugombekavyo.

24 Msi wa bosi wa juma, keo da mtungaihu, wada wavyee nee waita kwe mbiya wakayadoa yada manukato wekuyagosoayo. 2 Wakabwiiya diya iwe dekuwado dikubika mbiya diusigwa hae na mbia. 3 Wekweingiaho mda ndani, khawokuona mwii wa Zumbe Yesu. 4 Wekuwaho wahondomaa kuusu ida mbui iyo, ahoaho wantu waidi wekuvaao magwanda yang'aayo pee, wakagooka hehi nao. 5 Awo wavyee wakengiwa ni matumatu, wakenama asi. Naho wada wantu wakawamba, "Kwa mbwai mwamuondeza ekuwaye mgima gatigati ya wekuyao na nyuma? 6 Khayuho hanu, kayuyuka. Kumbukani ekuwagombekavyo ekuwaho kuda Galilaya, 7 'Nlazima Mwana wa Mntu alavigwe kwa wantu wenao mavigaviga, nao wenda wamgong'onde he mhamba na msi wa ntatu enda ayuyuke.'" 8 Aho awo wavyee nee wakumbuka mbui izo wekugombekwazo ni Yesu, 9 wakauya kulawa mwe mbiya, wakawamba wada wagiwa kumi dimwe na mwenga na wandima watuhu mbui izo zose. 10 Wavyee wekutamwiao mbui izo kwa waagiwa ne ni Malia Magidalene, Yoana na Malia mami

yakwe da Yakobo, hamwe na wavyee watuhu wekutongeanana. 11 Akini wada waagiwa wa Yesu wekutegeezaho mbui izo khawokuzumiya. 12 Petulo akalawa, akaita kinyio hadi mwe mbiya. Ekusungiaho mda ndani, akoona ida sanda du. Akauya kaya uku akawa kahondomaa kuusu ayo yekulawiiayo. 13 Msi wouwo, wantu waidi gati ya wahina wakwe Yesu newawa wakaita mwe mzi umwe wetangwao Emau, uhae wakwe nee ntambo ya masaa maidi kulawa Yelusalemu. 14 Nee wakagombeka kuusu ayo yose yekulawiiayo. 15 Wekuwaho siai wakatamwiiya, Yesu mwenye akalawiiya hehi yao, na akaita hamwe nawo. 16 Wamuona kwa meso yao, akini khawokumanya. 17 Yesu Akawauza, "Mwagombeka mbwai uku mkenda?" Wakagooka uku wakawa na usungu. 18 Umwe etangwaye Kileopa, akamtambaisa, "Ivi wee nee mgeni ikedu aha Yelusalemu wesae kumanya mbui zose zekulawiiazo misi micheche yekwembokayo?" 19 Naye akawatambaisa, "Mmbui zani?" Wowo wakamtambaisa. "Mbui zekumpatazo Yesu wa Nazaleti. Yee ne kawa muoni wa Muungu mwenye udaho wa kuhonya wantu na kuhinya hemeso ya Muungu na hemeso ya wantu wose. 20 Waviki wakuu na wagookezi wetu newamlavya aamuiwe ufe, na wakamgong'ondea he mhamba. 21 Akini swie ne tikauwiya kuwa yee neendae awaohowe wantu wa Isilaeli. Isasa ivyeo ni msi wa ntatu kuvokea mbui izo zekugosokaho. 22 Naho wavyee watuhu wa kwetu nee wativitua. Wowo nee waita mwe mbiya keo da mtungaihu, 23 nao khawokumbwiiya mwii wakwe. Wakauya wakamba kuwa walawiiwa na wandima wa uko uwanga kwa Muungu wekuwaambiao kuwa Yesu ni mgima. 24 Watuhu wetu nee waita mwe mbiya wakaona yada yekugombekwayo na wada wavyee, iya yee khawokumuona." 25 Yesu akawamba, "Nywie mahezi kiasi icho na mioyo yenu itoga ivyo kuzumiya yose yekutamwiiwayo na waoni wa Muungu! 26 Ivi khaikudaika Klistu kusumiizwa inga viya, na engie mwe Ukuu wakwe?" 27 Naho yesu akawamba mbui zose zekuandikwazo kwaajii yakwe mwenye mwe Maandiko ya Muungu kuvokea kitabu cha Musa hadi mwe Magondo ya waoni wose wa Muungu. 28 Wekuwaho hehi na uda mzi wekuwao wakautia, Yesu akagosa inga aendee na ntambo. 29 Akini wowo wakamhembeza wakagombeka, "Ekaa hamwe naswi, kwaviya zua diswa, na kio kihehi." Naho akengia mwe mzi, akekaa hamwe nawo. 30 Ekwekaaho kuda khande hamwe nao, akadoa bumunda, akamtogoa Muungu, akabendua akawekha. 31 Ahoaho meso yao yakagumbulwa wakamanya kuwa yee ni Yesu, akini yee akaga gatigati yao. 32 Naho, wakagombeka, "Mioyo yetu khayokuwa yaka moto kisingi ekuwaho akatamwiiya naswi siai na kugombeka

Maandiko ya Muungu." 33 Wakahauka kisingi kiyakiya, wakauya Yelusalemu, nee wawabwiiya wada wagiwa kumi dimwe na mwenga na wada watuhu wekuwaho hamwe nao wakintana 34 wakawamba wahina wada waidi wakagombeka, "Kwei Zumbe kayuyuka kamlawiiya Simoni." 35 Naho, awo wahina waidi wakawamanyisa yada yekuwapatayo wekuwaho siai na wekumanyavyo ekubenduaho bumunda. 36 Wekuwaho wakawamba ayo, Yesu mwenye akagooka gati yao, akawamba, "Uivanisa uwe naywi." 37 Wakahondomaa na kutozwa ni matumatu wakamanya waona mzimu. 38 Akini yee akawamba, "Kwambwai mwaogoha mwe mioyo yenu. Kwambwai khamnizumiya? 39 Kauweni mikono yangu na miundi yangu, ni mii mwenye. Nitozani mwe mwii wangu wose, kwaviya mzimu khauna mwii na mavuha inga mnikauavyo." 40 Ekubindaho kugombeka ayo, akawaonesha mikono na miundi yakwe. 41 Wakavotwa kwezumiya kwaajii ya nyemi muno uku wahondomaa mpaka ikawatenda kumamakhanya inga khio kwei, uku wahondomaa, akawauza, "Mna khande yoyose hanu?" 42 Wakamwekha ntii ya samaki yekubanikwayo. 43 Nee akakidoo, akada, hemeso yao. 44 Ekubindaho akawamba, "Inu nee mana ya mbui nekugombekayo nekuwaho hamwe nanywi, kuwa mbui zose zekuandikwazo kuusu mie mwe miagiyo ya Musa na mwe Maandiko ya Muungu ya waoni na mwe kitabu cha zabui yaiganizwe." 45 Naho akavugua akii zao wadahe kumanya Maandiko ya Muungu. 46 Akawamba, "Nee ivyo yekugondwavyo kuwa Klistu enda asumiizwe na msi wa ntatu enda ayuyuke kulawa mwe wekufao, 47 naho kwa udaho wa Yesu, wantu wa si zose kuvokea Yelusalemu wenda wabiikiwe kuwa wahituke na kuekewa mavigaviga. 48 Nywie wose nee wavuhuzi wa mbui izi. 49 Mie nenda nimwagiie kwenu Muye wa Muungu ambaye Tate nee kaika kiaga kuwekha, akini nlazima mgoje mwe mzi hadi udaho kulawa uwanga kwa Muungu wendaho umezee." 50 Naho akawaongoeya wahina wakwe kuita chongoi ya mzi hadi Besaniya, uko akenua mikono yakwe uwanga, na kuwajaiya. 51 Ekuwaho awajaiya, akawabada, akadoigwa uwanga kwa Muungu. 52 Wowo wakakinta mavindi na kumvikia, naho wakauya Yelusalemu wakawa na kinyemi kikuu. 53 Wakekaa kisingi chose he Nyumba ya Muungu na wakamtogoa Muungu.

Yohana

1 Aho bosi inusi khaizati kuubwa, nee kuwa na Mbui, naye Mbui nee akawa kwa Muungu, naye Mbui ni Muungu. **2** Kuvokea aho bosi uyo Mbui nee kawa hamwe na Muungu. **3** Kwembokea yee vintu vyose viumbwa, khahana ata kintu kimwe chekugosokacho kwesiho yee. **4** Na Mbui nekawa vokeo da ugima na ugima unu ueta ung'azi kwa wantu. **5** Ung'azi uwo waangaza mwe kiza, naho kiza khachekudaha kuuvota. **6** Muungu akamwaagiya mntu yumwe etangwaye Yohana. **7** Uyo keza kuwavuhuzia wantu kuusu uwo ung'azi kuwa kia mtu adahe kutegeeza mbui iyo na kuzumiia. **8** Yohana khekuwa uwo ung'azi, iya keza kuwavuhuzia wantu kuusu uwo ung'azi. **9** Unu nee ung'azi wa kwei, ung'azi wezao mwe inusi na kuwaangaza wantu wose. **10** Naho iyo Mbui ekuwaho mwe inusi, kwembokea yee inusi igosolwa, akini wantu wa inusi khawekummanya. **11** Yee keza he si yakwe mwenye, akini wantu wekuawo wa kwakwe khawekumhokea. **12** Akini wada wekumhokeao, na kumzumiia, akawekha udaho wa kuwa wana wa Muungu. **13** Awa nee wekuvuyaigwao khio kwa phome nawala kwa mwii hambu akundavyo mntu iya kwaakundavyo Muungu. **14** Naye uyo Mbui kawa mntu akekaa hamwe na swie, swie tiona ukuu wakwe, ukuu ekuuhokeao inga mwana wa ikedu, ekulawaye kwa Tate kamema wedi na ukwei. **15** Yohana kawavuhuzia wantu mbui zakwe, akagombeka kwa mgutio, "Uyu nee yuda nekumtamwiiaye mbui zakwe nikigombeka, 'Yee ezae hemgongo wangu ni mkuu kusima mie, kwaviya kawa aho kisingi khizati kuvuyaigwa.'" **16** Kulwana na wingi wa wedi wakwe swie wose, tihokea majaiwa uwanga ya majaiwa. **17** Muungu katekha miagiyo kwembokea Musa, akini wedi na kwei vitezee kwembokea kwa Yesu Klistu. **18** Khahana mntu mwekumuona Muungu katu iya Mwana ikedu mwekuigana na Muungu, yee ekuwae hehi na Tate, nee mwe kutigubuiya mbui za Muungu. **19** Ivi nee ekuvuhuziavyo Yohana kisingi waongoezi wa Kiyahudi kuda Yelusalemu wekuwagiiyaho waviki, na Walawi, wamuuzee Yohana Wee u ndai? **20** Yohana khekuekea kutambaisa mbui iyo, akini akatamwiiya pwii akamba, "Miye khio Klistu mwekusagulwaye ni Muungu." **21** Wakamuuzaa, "Wee u ndai? Wee ni Eliya?" Yee akawatambaisa, "Aaha miye khiye." Wakamuuzaa vituhu, "Wee ni yuda muoni?" Yohana akawatambaisa, aaha miye khiye. **22** Nawo wakamwamba, asa wee u ndai? Takundigwa tivuze ntambaisi kwa wada wekutiagiyo, isasa tambie wee u ndai? **23** Yohana akawatambaisa miye ni yuda ambae Muoni Isaya kagombeka mbui zakwe. "Mgutio wa mntu wetanga mwenyika 'Mgosoeanyi Zumbe sia yakwe

Nyooshani myemboko yakwe." **24** Awo wantu nee waagiwa ni Mafalisayo, **25** naho wakamuuzaa Yohana, "Ati wee khiwe Klistu, wala khiyo Eliya, wala khiyo yumwe wa muoni, kwa mbwai wabatiiza?" **26** Yohana akawatambaisa, "Miye nabatiiza kwa mazi, akini gatigati yenu hana yumwe mwesae kummanya. **27** Miye khiongoa iya endaye eze miye khifaa katu kumchopoa sigi za sabana yakwe." **28** Vintu ivi vyose vigosoka uko Besaniya he phande za awiyo da zua he zigizigi da mazi ya Yolodani aho ekuwaho Yohana nee abatiizaho. **29** Kioi yakwe Yohana kamuona Yesu akimwezea akagombeka, "Kauwani, uyu nee mwanangoto wa Muungu, adoaye mavigaviga ya wantu wa mweinusi. **30** Uyu ni yuda nekumtamwiiaye nekugombekaho, 'Kuna mntu mwezee he mgongo wangu, akini ni mkuu kusima miye kwaviya kawa aho kisingi miye khizati kuvuyaigwa.'" **31** Miye ncheekummanya eivyo, akini ncheza kubatiiza kwa mazi ili wantu wa Isilaeli wadahe kummanya." **32** Naho Yohana akawekha uvuhuzi na kugombeka, "Kimwona Muye ukaseeya inga sua kulawa uwanga kwa Muungu na kwekaa uwanga yakwe." **33** Miye ncheekummanya kuwa ni yee, akini Muungu ekuniagiya kubatiiza wantu kwa mazi nekanamba, "Mntu yuda wendaemwone Muye wa Muungu akaseeya kulawa uwanga kwa Muungu na kwekaa uwanga yakwe uyo nee endaeabatize kwa Muye wangu miye Muungu." **34** Yohana akaendee kugombeka, "Miye khivuhuzia na nawamba kwei uyu ni Mwana wa Muungu." **35** Kioi dakwe, Yohana kagooka hada vituhu hamwe na wahina wakwe waidi. **36** Ekumuonaho Yesu emboka akamba, "Kauwani! Uyu ni Mwanangoto wa Muungu." **37** Wada wahina waidi wekutegezaho akigombeka ayo wakambasa Yesu. **38** Yesu ekuhitukaho, na kuwaona wada wahina wambasa, akawauza, "Mwaondeza mbwai?" Wakamtambaisa, "Labbi" mana yakwe Mhinyi, wekaa kuhi. **39** Nee iwa inga saa kumi guoni Yesu akawamba "Sooni mkauwe." Aho wahina wakambasa, wakoona hantu ekuwaho akekaa wakasinda naye msi uwo wose. **40** Yumwe yao nee kawa Andulea nduguye Simoni Petulo, nee kawa wao wa wada waidi wekumtegeeza Yohana akagombeka ivyo na wakamtongea Yesu. **41** Ahoaho Andulea akaita kumwamba nduguye Simoni, "Timuona Masiya mana yakwe Yesu Klistu." **42** Naye akamwegaa Simoni kwa Yesu. Yesu akamkauwa Simoni akamwamba, "Wee zina dako ni Simoni mwana wa Yohana. Isasa wendawetangwe Kefa" Kigiiki ni Petulo mana yakwe "Iwe." **43** Msi wekutongeo Yesu akaamua kuita si ya Galilaya, akamwona Fiipo na akamwamba "Nitongee." **44** Fiipo nee akawa akalawa Betisaida, mzi wekuwao wakekaa Andulea na Petulo. **45** Na Fiipo akambwiiya Nasanaeli akamwamba, Timuona mntu ambae Musa kaandika mbui

zakwe mwe kitabu cha miagiiyo, na ambae waoni waandika mbui zakwe. Yee ni Yesu Mwana wa Yusufu kulawa mzi wa Nazaleti. 46 Nasanaeli akauza, "Yadahika viivih vihi kintu chedi kilawe mzi wa Nazaleti?" Fiipo akatambaisa, "Soo na ukauwe". 47 Yesu ekumuonaho Nasanaeli amwezeya akamba, "Kauwani uyo ni Muisilaeli wa kwei khana dosali umo mwakwe." 48 Nasanaeli akamuza kudaha viivih kunimanya? Yesu akatambaisa khikuona wekuwaho asi ya mti wetagwaho mtini, kisingi Fiipo khazati kukwetanga. 49 Nasanaeli akamtambaisa, "Labbi wee nee Mwana wa Muungu, wee nee Seuta wa Isilaeli." 50 Yesu akamwamba, "Kuzumiiya kwa kuwa kikwamba khikuona asi ya mtini? Wendauone mbui kuhu kusima izi." 51 Yesu akawamba, "Nawamba ukwei mwendamuone uwanga kwa Muungu kuvuguka na wandima wa uwanga kwa Muungu wakakwea na kuseeya heuwanga ya Mwana wa Mntu."

2 Msi wa ntatu hawa na wiya mwe mzi wa Kana, uko Galilaya, mami yakwe da Yesu naye kawa aho. 2 Yesu hamwe na wahina wakwe wagonekwa mwe wiya uwo. 3 Divai yekusiaho, mami yakwe da Yesu akamwamba, "Khawana divai." 4 Yesu akamtambaisa, "Mmaa usekunamba nigosoe chochose, kisingi changu khakizati kubua." 5 Mami yakwe da Yesu akawamba wandima, "Dodose endadoawambe gosoni." 6 Aho hawa na mabiga mtandatu yekugosolwayo kwa maiwe, kia dimwe didahado kwengia ndoo shano za mazi. Nee yaikwa aho kutongeanana na mazweeya ya Wayahudi ya kwezingua. 7 Yesu akawamba wada wandima, memeezani ayo mabiga mazi, nao wakayamemeeza adi uwanga. 8 Naho akawamba, "Isasa tekani mazi mwe ayo mabiga mmwegaiye Mkuu wa wiya." Wakadoa yada mazi na kumwegaiya. 9 Mkuu wa wiya ekusonaho ayo mazi, kumbe nee yahituka kae kutenda divai. Yee khukumanya yekulawiiako, akini wada wandima wekutekao mazi nee wakamanya. Mkuu wa wiya akamwetanga zumbwa wa wiya, 10 na akamwamba, "Kia mntu avoka kuika divai ntana wantu wakabinda kutosheka nee awekha yesayokuwa ntana muno, akini wee kuiika divai ntana adi isasa!" 11 Unu ni utangio wa boshi wa Yesu ekugosoa uko Kana mzi wa Galilaya, na kugubua Ukuu wakwe, na wahina wakwe wakamzumiiya. 12 Yekwembokaho ayo Yesu na mami yakwe, hamwe na wanduguze, na wahina wakwe wakaseeya mwe mzi wa Kapelinaumu na wakekaa uko misi micheche. 13 Sikukhuu ya Wayahudi yetangwayo Pasaka yekuwaho hehi, Yesu akaita Yelusalemu. 14 He ida Nyumba ya Muungu akawabwiiya wantu wataga ng'ombe, na ngoto, na sua na watuhu wekuwao wekaa na kuvunja hea. 15 Ilyo akagosoa mkoto wa uzigi, na

kuwaguusa wanyama chongoi he ida Nyumba ya Muungu. Wanyama wose ngoto, na ng'ombe na kuzigwisa meza za wavunja hea na kuzigwisa hea zao. 16 Akawamba wada wekuawo wakataga sua, "Usani vintu ivi aha, ekani kugosoa Nyumba ya Tate yangu inga gwiyo." 17 Wahina wakwe wakayakumbuka yada Maandiko yagombekayo "Ukundiso wangu kwa nyumba yako, Ee Muungu yangu yanoka inga moto." 18 Waongoezi wa Kiyahudi wakamuza, "Utangio wani wendao uugosoe kutionyesha ati una udaho wani wakugosoa ivi?" 19 Yesu akawamba, "Bomoani inu Nyumba ya Muungu, nami nendanizenge kwa misi mitatu." 20 Wada Wayahudi wakamuza, "Nyumba inu ya Muungu izengwa kwa kisingi cha myaka magana mane na mtandatu, nawe wamba wenda uzenge kwa misi mitatu?" 21 Akini, Nyumba ya Muungu ekuayo akatamwiiya Yesu ni mwii wakwe. 22 Kisingi Yesu ekuyuyukaho, wahina wakwe nee wakumbuka ida Mbui ekutamwiiyo, wakayazumiiya Maandiko ya Muungu, na mbui zose ekugombekazo Yesu. 23 Akini Yesu ekuaho mwe mzi wa Yelusalemu kwe sikukhuu ya Pasaka wantu wangi wakazumiiya wekuonaho utangio ekugosoa. 24 Akini Yesu khekua na uzumizi nao, kwaajii kamanya mbui zekuwazo mwe mioyo yao. 25 Khekukunda kuvuhuzia mbui yoyose uwanga ya wantu, kwa viya azimanya mbui zose zeumo ndani ya mioyo yao.

3 Hawa na muongoezi yumwe wa Kiyahudi zina dakwe Nikodemo, mwekuwa yumwe wamkonga da Mafalisayo. 2 Kio kimwe Nikodemo akaita kwa Yesu na kumwamba, "Labbi, tamanya ati wee ni mhinyi mwekuagiwa ni Muungu, khahana mntu mdaha kugosoa ntangio uvigosoavyo kwesahokuwa Muungu yu hamwe nae." 3 Yesu akamtambaisa, "Nakugombeka kwei, khahana mwenda adahe kwengia mwe useuta wa Muungu, akese kuvyaigwa maa ya kaidi." 4 Nikodemo akamuza, "Mntu mgima adaha viivih kuvyaigwa vituhu? Ivi adaha kwengia mwe ifu da mamiakwe na kuvyaigwa maa ya kaidi?" 5 Yesu akatambaisa, "Nawamba kwei, khahana mntu endae engie mwe Useuta wa Muungu kwesaho kuvyaigwa kwa mazi na kwa Muye wa Muungu." 6 Mntu avyaigwa kimwii kwa tate na mmaa, akini ugosolwa kuwa Mwana wa Muungu na Muye wa Muungu. 7 Usekuhondomaa, kwaajii kikwamba kuwa yakundigwa uvyagwe maa ya kaidi. 8 Khusi yavuma hohose ikundaho, wategeeza mgutio wakwe, akini khumanya yalawiiya kuhi, na kuhi uitako, nee vyeivyo kwa mntu mwekuvyaigwa kwa Muye wa Muungu. 9 Nikodemo akauza, "Mbui izi zadahika viivih?" 10 Yesu akamtambaisa, "Wee ni mhinyi mkuu mwe si ya Isilaeli, yadahika viivih khuzimanya Mbui

izi? **11** Nakwamba ukwei tatamwiia mbui tizimanyazo na tavuhuzia tekukionacho, akini khahana ata yumwe wenu ambaye azumiiyae kuhokea mahinyo yetu. **12** Inga miye khamkunizumiiya niwagombekaho mbui zigosokazo mwe inusi, ivi mwenda mnizumie nendaho nigombeke mbui za uwanga kwa Muungu? **13** Khahana mwekubua uko uwanga kwa Muungu, iya Mwana wa mntu nee mwekuseeyae kulawa uwanga kwa Muungu.” **14** Inga viya Musa ekumwenuavyo uwanga nyoka wa shaba he kiwawe, nae Mwana wa Mntu endaenulwe uwanga ivyoivyo. **15** Ili kiya mntu amzumiiaye endaawe na ugima wa misi yose kwesiho kisiikizi. (aiōnios g166) **16** Kwaviya Muungu kaikundisa inusi ata akamlavya mwanawe wa ikedu, ili kia mntu endae amzumiiye asekwaga, iya awe na ugima wa misi yose kwesiho kisiikizi. (aiōnios g166) **17** Kwaviya Muungu khekumwaagiya Mwanawe mwe inusi ili awaamuiye wantu, iya wantu waoholwe kwembokea yee. **18** Wantu wose wanzumiiho Mwana khawana waamuiwe, akini wose wesao kumzumii Mwana, waamuiwa kae, kwaajii khawekumzumiiya Mwana wa ikedu wa Muungu. **19** Na uwamuiyo wenye ni unu, ung'azi weza mwe inusi, akini wantu wakakunda kiza kwesima ung'azi, kwaajii ya ntendwa zao ni za ufyaumi. **20** Wose wagosoao yesayokutama, waemea ung'azi, naho khawakunda kweza he ung'azi, kwaviya khawakunda ntendwa zao za fyaumi zioneke pwii. **21** Akini yoyose mwenye kutoza kwei eza he ung'azi, ili waonyeshe yada wagosoayo kwa kuwa yamtamiza Muungu. **22** Bada ya aho Yesu na wahina wakwe wakaita mwe si ya Yudea, na kwekaa uko kwa misi micheche na kubatiiza wantu. **23** Yohana nae nee akabatiiza huko Ainoni, hehi na mzi wa Salimu kwaviya kuwa na mazi mangi, wantu wakamtimia na kuita kubatizwa. **24** Aya yalawiiya kisingi Yohana nee khazati kwengizwa mwe kifungo. **25** Msi umwe wamwe wa wahina wa Yohana wakavoka kuhigana na Myahudi yumwe kwaajii ya kwezingua inga igombekavyo miko kisingi mntu khazati kuvika. **26** Awo wahina wakambasa Yohana na kumwamba, “Labbi wambukhua mntu yuda wekuae naye phande ya awiyo da zua da Yolodani yuda wekutivuhuziae Mbui zakwe? Isasa naye abatiiza na kiya mntu amtongea.” **27** Yohana akawatambaisa, “Khahana mntu yoyose adahae kuhokea kintu chochose kwesiho kulawa uwanga uko kwa Muungu. **28** Nywie nyose ni wavuhuzi wangu kwakuwa kigombeka, ‘Miye khie Klistu, akini khiagiwa nimuonwee.’ **29** Mwai ya kivyee nimai ya mteguzi, akini mbuyaye damteguzi, ambae agooka na kumtegeeza uwa na nyemi muno, ategeezaho mgutio wa mteguzi akamba mbui inu, kwaajii inu nyemi yangu yekuiganiayo. **30** Yee akundigwa atende mkuu nami nitende mdodo.” **31** Mwana wa Muungu kulawa uwanga

kwa Muungu ni mkuu wa wose, alawaye mwe inusi ni wa inusi, na utamwiya mbui za mwe inusi. Akini ezaye kulawa uwanga kwa Muungu yu uwanga wa wose. **32** Yee avuhuzia yada ekuonayo na ekutegeezayo kulawa uwanga uko kwa Muungu, khio wantu wangi wazumiiyao mbui zakwe. **33** Akini yoyose avuhuziae mbui zakwe amanya kuwa agombekayo Muungu ni kwei. **34** Yoyose mwekuagiwa ni Muungu agombeka mbui za Muungu kwaviya Muungu amwekha Muye wakwe ili amuongee kwa kia kintu. **35** Tate amkundisa Mwanawe na kamwekha vintu vyose ili avigooke. **36** Yoyose amzumiiaye Mwana ana ugima wa misi yose kwesiho kisiikizi, yoyose mwesaye kumzumii Mwana khana awe na ugima wa misi yose kwesiho kisiikizi, akini endaekhigwe suuba ni Muungu misi yose kwesiho kisiikizi. (aiōnios g166)

4 Mafalisayo nee wakategeeza kuwa Yesu abatiiza nakupata wahina wangi kusima Yohana. **2** Akini ukwei ni kuwa Yesu khekumbatiza yoyose iya wahina wakwe nee wekuwao wakabatiiza. **3** Yesu ekutegeezayo ayo, akalawa Uyahudi, akauya mwe si ya Galilaya. **4** Na mwe ntambo iyo, imkunda embokee mwe si ya Samalia. **5** Nee abuwa mwe mzi umwe wa Samalia wetangwao Sikali, hehi ya uda mnda ambaho Yakobo nee kamwekha mwanawe Yusufu. **6** Hantu hada hawa na kisima cha Yakobo, nae Yesu kwa msokeo wa ntambo, akekaa khandakhanda ya kisima, nee iwa musi saa mtandatu. **7** Keza mvyee yumwe kulawa mwe si ya Samalia keza kuteka mazi, Yesu akamwamba, “Nekha mazi nidomee.” **8** Kisingi icho wahina wakwe nee waita kwe mzi kugua khande. **9** Akini yuda mvyee akamwamba, weye u Myahudi na miye Msamalia wadaha viivhi kuniombeza mazi? Kwaviya Wayahudi na Wasamalia khawaugusana na khawagoso chochose kia hamwe. **10** Yesu akamtambaisa, “Ati nee ukamany kiya ambacho Muungu adaha kukwekha na ndai akwambae, nekha mazi nidomee, wee nee ukamuombeza, naye akakwekha mazi ugima.” **11** Yuda mvyee akamba, “Zumbe wee khuna ugata na kisima ni kileha, ayo mazi ambayo yawekha wantu ugima wenda uyapate hahi?” **12** Hambu, wee wetenda mkuu kusima tati yetu Yakobo? Yee mwekutekha swie kisima iki, na yee mwenye, wana wakwe, na mantintimo yakwe, nee wadomea mazi ya kisima iki. **13** Yesu akatambaisa, “Kiya mntu endae adomee mazi aya enda atozwe ni khiu vituhu.” **14** Akini mwendae adomee mazi nendayo nimwekhe miye, khana atozwe ni khiu vituhu, mazi nendayo nimwekhe yenda yawe ni soko da mazi ya ugima, na yendayoyamwekhe ugima wa misi yose kwesiho kisiikizi. (aiōn g165, aiōnios g166) **15** Yuda mvyee akamwamba, “Zumbe

nekha mazi ayo nisekweza kutozwa ni khiu vituhu, naho nisekweza aha vituhu kuteka mazi." 16 Yesu akamwamba yuda mvyee, hita ukamwetange muumeo, weze naye aha. 17 Mvyee yuda akamwamba, miye khina mgosi. Yesu akamwamba, "Kugombeka kwei kuwa khuna mgosi. 18 Kwaviya nee kutegulwa na wagosi washano, na uyu wekae naye isasa khio muumeo, aho kugombeka kwei." 19 Yuda mvyee akamwamba, "Zumbe naona kuwa wee u muoni." 20 Akaendee kugombeka, "Baba zetu nee wakamvikia Muungu uwanga ya muima unu, akini nywie Wayahudi mwagombeka hantu ha kumvikia Muungu ni uko Yelusalemu." 21 Yesu akamwamba, "Nizumiya wee mvyee, kisingi cheza khamna mumvikie Tate uwanga mwe muima unu, hambu kuda Yelusalemu." 22 Nywie Wasamalia, mwamvikia yuda mwesae kumanya, akini swie Wayahudi tamvikia yuda timmanyae, kwaviya uhozi walawiiya kwa Wayahudi 23 Kisingi cheza, naho kibua, ambao wantu wakundao kumvikia Muungu mwe ukwei, wendawamvikie Tate inga Muye wakwe endavyo awaonyeshe, kumvika yee eiyo kwei. Tate Muungu awakunda ambao wamvika kwa sia iyo. 24 Muungu ni Muye, na wantu wamvikiao wakundigwa wamvikie kwa Muye na kwei. 25 Uyo mvyee akamwamba, "Namanya eza Masiya yani Klistu, umo akeza enda atigubwiiye kia kintu." 26 Yesu akamwamba, "Miye nitamwiiaye nawe ndie." 27 Aho wahina wakwe wakauya, wakamaka koonaa atamwiiya na mvyee, akini khahana yumwe yao ekumuzae yuda mvyee, "Waondeza mbwai?" Wala khahana ekumuzae Yesu, "Kwa mbwai watamwiiya na mvyee?" 28 Yuda mvyee akabada biga dakwe hada, akaita mwe mzi na kuwamba wantu. 29 "Soonni mumkauwe mntu mwekunamba mbui zangu zose nigosoazo. Ivi, adahika yee nee Klistu." 30 Wantu wakalawa mwe si ya Samalia wakambasa Yesu. 31 Kisingi icho wahina wakwe wamuombeza Yesu, "Mhinyi, daa khande." 32 Akini Yesu akawamba, "Miye nina khande mwesayo kuimanya nywie." 33 Wahina wakwe wakauzana, "Ivi kuna mntu mwekumweetea khande?" 34 Yesu akamba, khande yangu ni kugosoa akundavyo yuda mwekuniagiya na kubindiiza ndima ekunekhayo kuigoso. 35 Nywie mwagombeka, "Isigaa miongo minne kisingi cha ubosi kibua." Akini miye nawamba, kauwani minda, khande zidaha na zihehi kubondwa. 36 Mbosi ekhigwa maiho yakwe, na akusanya khande kwaajii ya ugima wa misi yose kwesiho kisiikizi, ivyo mhasi na mbosi, wendawawe na nyemi hamwe. (aiōnios g166) 37 Msimo unu ni kwei, "Yumwe ahanda mtuhu abonda." 38 Miye khiwagiya mkabonde ubosi mwe minda ambayo khamwekuiima, watuhu nee wakagoso ndima uko, akini nywinywi mwapata myengizo kwembokea ndima yao. 39

Wasamalia wangi wa mzi uda wakamzumiiya Yesu kwaajii ya mbui ekugombekazo yuda mvyee kuwa, "Kanivuhuzia mbui zose nekuzigosoazo." 40 Wasamalia wakambasa Yesu wakamuombeza ekae nawo, akekaa mwe mzi uwo misi miidi. 41 Wantu wangi wamzumiiya Yesu kwaajii ya mbui zakwe 42 Wakamwamba yuda mvyee, "Khatizumiya du kwaajii ya mbui zako, akini swie wenye timtegeeza na timmanyaa kuwa uyu nee kwei Mwohozi wa inusi." 43 Yekwembokaho misi miidi, Yesu akahauka hada akaita mwe si ya Galilaya. 44 Kwaviya Yesu mwenye kavuhuzia pwii, "Muoni khana atunywe mwe mzi wakwe mwenye." 45 Ekubua mwe si ya Galilaya, wantu wa Wagalilaya wangi wakamhokea, kwaajii nao nee waita kwe sikukhuu ya Pasaka Yelusalemu, nako nee wawa wayaona yose ambayo Yesu kayagoso. 46 Yesu akabua vituhu mzi wa Kana uko Galilaya, hantu ekuhituaho mazi na kuwa divai. Nee kuwa na mgookezi yumwe ekuwae na mwana mtamu uko Kapelinaumu. 47 Muongoezi uyo ekusikiaho Yesu kalawa Uyahudi na kubua Galilaya akambasa akamwoombeza aite akamhonye mwanawe mwekuwa mtamu wa kukauwiiwa. 48 Yesu akamwamba, "Mkesekuona utangio na vihii khamna mzumiye." 49 Uyo Mwoongoezi akamwamba, "Zumbe chondechonde tite mwanangu asekweza kuuya na nyuma." 50 Yesu akamwamba, "Hita mwanao ni mgima." Uyo muongoezi nee azumiya mbui za Yesu, akaita zakwe. 51 Ekuaho yu siai, akakintana na wandima wakwe wakamwamba, "Yuda Mwana kindee kahona." 52 Naye akawauza neeiwa saa nyingahi mwana ekuhoneaho, wakamwamba, "Zana saa mfungate wa musi, utamu ukamuweeke." 53 Uyo tati yakwe akakumbuka iwa saa idaida Yesu ekumwambaho, "Mwanao ni mgima." Aho akazumiya hamwe na nyumba yakwe yose. 54 Unu nee utangio wa kaidi ekugosoao Yesu ekuaho akaawa Uyahudi kuita Galilaya.

5 Yekwembokaho ayo, Yesu akaita Yelusalemu kwe sikukhuu ya Wayahudi. 2 Uko Yelusalemu, hehi na uvi wetangwao uvi wa ngoto, nehawa na tondoo da mazi detangwado kwa kiebulania Betisaza ambado nee dizunguukwa na mabaaza mashano. 3 Aho nehawa na watamu wangi wekaa, matuntu, na wesao kudaha kwenda, na wekuhooawo. Newawa wakagoja mazi yatibulwe. 4 Kwaviya mndima wa uwanga wa Muungu kuna kisingi aseeya na kuyavuuga mazi mwe tindiziwa ido, mtamu yoyose avokae kwengia mwe mazi aho mazi yakatibulwa, ahona utamu wakwe wowose ekuwao nao. 5 Aho, hana mgosi mwekuwa mtamu kwa kisingi cha myaka makumi matatu na minane. 6 Yesu ekumuonaho kagona aho na kumanya kuwa

kawa mtamu kwa misu mingi, akamwamba, “Ivi, wakunda kuhona?” 7 Yuda mtamu akamtambaisa, “Zumbe khina mntu wa kunegaa mwe tondoo da mazi kisingi yakatibulwa, kia nikageeza kwengia mntu mtuhu aniongweeya.” 8 Yesu akamwamba “Gooka, na doa javi dako wende.” 9 Vuupuu uyo mntu akahona, akadoa javi dakwe. Akavoka kwenda, mbui inu igosoka Msi wa Kuhumwiiza. 10 Wamwe wa waongoezi wa Wayahudi wakamwamba yuda mwe kuhonywa, “Ivyeeo ni Msi wa Kuhumwiiza kwa miko yetu khukundigwa wenue javi dako.” 11 Yee akawatambaisa, “Yuda mntu mwekunihonya nee mwekunamba udoo javi dako wende.” 12 Nawo wakamuiza, “Uyo mntu mwekukwamba udoo javi dako wende ni ndai?” 13 Iya yuda mntu khekumanya mntu mwekumhonya, Yesu nee kahauka kae hantu hada, kwaajii nee hana zumwezumwe kuu da wantu. 14 Naho bada ya ayo, Yesu akambwiya yuda mntu mwekumhonya mwe Nyumba ya Muungu akamwamba, “Isasa kuhona, wesekugosoa navigaviga vituhu, usekweza kubwiwa ni mbui fyaimi muno.” 15 Yuda mntu akaita, akawamba wakuu wa Kiyahudi, Yesu nee mwekunihonya. 16 Kwaviya Yesu ida mbui kaigosoa Msi wa Kuhumwiiza, Wayahudi wakavoka kumkefyakefya Yesu. 17 Yesu akawamba, “Tate yangu agosoa ndima misu yose, na miye nagosoa ndima kwesihu kueka.” 18 Kwa mbui izi waongoezi wa Kiyahudi wakoondeza sia ya kumkoma Yesu, khio kwaviya kabananga miko ya Msi wa Kuhumwiiza du, akini kamba Muungu ni Tati yakwe ivyo ketenda aigana na Muungu. 19 Yesu akawamba, “Kwei nawamba, Mwana khadaha kugosoa kintu ikedu, adaha kugosoa kia amuonacho Tate agosoacho, kwaviya agosoacho Tate, Mwana nae akigosoa viyaviya.” 20 Kwaviya Tate amkundisa Mwana, na kumuonyesha kia kintu agosoacho mwenye. Naho endaamuonyeshe mbui khuu kusima izi, nanywi mwendamhondomae. 21 Inga viya Tate ayuyusavyo wekuuyao na nyuma, na kuwekha ugima, ivyovyoy Mwana naye awekha ugima wada awakundisao. 22 Tate khamuamuiya mntu yoyose, iya kamtenda mwana awaamwiye wantu wose. 23 Ili wantu wamtegeeze Mwana inga wamtegeezavyo Tate, yoyose esaikumtegeeze Mwana khamtegeeze Tate wekumwaagiye Mwana. 24 “Nawamba kwei, wada wategeeza mbui zangu na kumzumia yuda mwekuniagiya wana ugima wa misu yose kwesihu kisiikizi, khana aamuiwe katu, kwaviya wavota kae ufe na kwengia mwe ugima misu yose kwesihu kisiikizi.” (aiōnios g166) 25 Nawamba kwei, kisingi cheza, naho kibwa kae, na wada wekuwao hae na Muungu, wenda wategeeze mgutio wa Mwana wa Muungu, awo wenda wahokee ugima wa misu yose kwesihu kisiikizi. 26 Inga viya Tate awekhavyo wantu ugima,

viyaviya kamtenda Mwana awekhe wantu ugima wa misu yose kwesihu kisiikizi. 27 Naho kamwekha Mwana udaho wa kuamuiya, kwaviya ni Mwana wa Mntu. 28 Msekuhondomaa kwaajii ya mbui inu, kisingi cheza ambacho wose wekuuyao na nyuma wenda wategeeze mgutio ambao wose wekuwao mwe mambiya. 29 Nawo wendawalawe mwe mambiya wada wekugosoa matana, wenda wayuyuke na kwekaa, wada wekugosoa yesayokutama wenda wayuyuswe na kuamuiwa. 30 Yesu akaendee kugombeka, “Khidaha kugosoa kintu kwa udaho wangu mwenye, miye neamuiya inga nitegeezavyo kulawa kwa Tate na uwo wedi wangu ni wa kwei, kwaviya khigosoa nikundavyo mwenye, iya akundavyo yuda mwekuniagiya.” 31 “Inga nawagombeka nywie mbui zangu mwenye, naho yada nigombekayo khamyavuhuzia kuwa ni ya kwei. 32 Akini hana mntu mtuhu avuhuziae mbui zangu kwenu, na namanya agombeka kwei. 33 Nywie nee muagiya wantu kwa Yohana wamuize mbui zangu, nae akawavuhuzia ni kwei. 34 Khio inga nakauwiya wantu wanivuhuzie, akini nayagombeka aya ili mdahe kuoholwa. 35 Yohana nee kawa inga taa yekuwayo ikaka na kulavya ung’azi, nanywi muwa na nyemi na ung’azi uwo kwa kisingi kijihi. 36 Akini kuna mbui khuu muno iyonyeshayo miye ni ndai kusima yada ekugombekayo Yohana mbatiiza. Mbui yenye ni zia ndima ekunekhazo Tate nizigosoe, ayo yose yanivuhuzia miye ni ndai na yaonyesha Tate nee mwekuniagiya. 37 Naye tate mwekuniagiya kanivuhuzia miye ni ndai, akini khamzati kutegeeze mgutio wakwe, naho kumwona yee eivyo, 38 na mbui yakwe khayekwekaa mwe mioyo yenu, kwaviya khamwekumzumuiya yuda mwekumuagiya. 39 Nywie mwayasungumanya muno Maandiko ya Muungu kwaviya mwamamaakhanya mwe ayo mwendampate ugima wa misu yose kwesihu kisiikizi, na Maandiko ayo yanivuhuzia miye! (aiōnios g166) 40 Ata ivyo khamkunda kweza kwangu ili mhokee ugima. 41 “Miye khiondeza kutunywa na wantu. 42 Akini nawamany nywie ni wantu wa namna yani, na viyaviya khamna ukundiso wa Muungu mwe mioyo yenu. 43 Miye ncheza kwa udaho wa Tate, akini khamnihokea, akini akeza mntu mtuhu kwa udaho wakwe mwenye, mwenda mumhokee. 44 Mwakunda kuhokea ntunyo kulawa kwenu nywie wenye, akini khamkunda kuhokea ntunyo kulawa kwa Muungu mwenye, kwaajii iyo mwadaha viivhi kunizumuiya? 45 Akini wesekufanyanya kuwa miye nenendae niwaahie masa kwa Tate, Musa ambae mwamkauwiya neendae awaahie masa. 46 Ati kwei nee mkamzumuiya Musa, nee mkanizumuiya na miye, kwaviya Musa kaandika mbui zangu. 47 Akini kwaviya khamyazumuiya yada ekuyaandikayo Musa, mwadaha viivhi kuzumia kiya nigombekacho?”

6 Yekwembokaho ayo, Yesu akadumua tindiziwa da mazi da Galilaya. Kwa zina tuhu detangwa ziwa da Tibelia. **2** Zumwezumwe kuu da wantu dikatendesa kumbasa kwaajii waona ntangio nyingi na vihii ekugosoazo kwa watamu. **3** Yesu akakwea kwe muima, akekaa hamwe na wahina wakwe. **4** Na Sikukhuu ya Wayahudi yetangwayo Pasaka iwa hehi. **5** Naho Yesu ekukauwaho, na kuona zumwezumwe da wantu dikeza kwakwe, akamwamba Fiipo, "Tendatigue hahi mabumunda, wantu awa wadahe kuda?" **6** Nee kauza mbui iyo kumgeeza Fiipo kwaviya kamanya endachoagosoe. **7** Fiipo akamtambaisa, "Ata inga tikawa na hea dinali mia mbii nee khatokudaha kugua mabumunda ya kuwekha wantu awa." **8** Mhina yakwe yumwe mwetangwa Andulea uyo nee kawa nduguye Simoni Petulo akamwamba Yesu, **9** "Yuhanu mbwanga yumwe ana mabumunda mashano ya shaili na samaki vidodo viidi, akini vyendavitoshe mbwai kwa wantu wangi inga awa?" **10** Yesu akamba, "Waikeni wantu," hantu hada nehawa na ulondo mtana, wantu wakekaa, na wagosi du nee wawa elufu shano. **11** Naho Yesu akadoa yada mabumunda akamtogoa Muungu, akawapangia wantu wekuawo wekaa, akagoso viyaviya na wada samaki, kia mntu akahokea na akada inga akundavyo kuda. **12** Wantu wekwegutaho Yesu akawamba wahina wakwe, "Dodoani phuguntio zekusigazoo kisekwaga chochose." **13** Wakadodoa phuguntio zia za mabumunda ya shaili vyekusigazwavyo na wada wantu wekudao, wakamemeeza ngahu kumi dimwe na mbii. **14** Wantu wekuonaho ntangio icho ekugosoacho Yesu wakamba, "Kwei uyu nee muoni tekumkauwiye endaeze mwe inusi." **15** Yesu akamanya kuwa wantu waondeza kumdoa wantende Seuta, akahauka vituhu akaita kwe muima yee ikedu. **16** Yekubuaho guoni wahina wakwe Yesu wakaseeya mwe mazimshindo, **17** wakakwea ngaawa ili wemboke waite Kapelinaumu. Kiza nee chengia kae, na Yesu nee khazati kuseeya mwe muima ili awe nawo. **18** Tindiziwa da mazi dikavoka kuvuugika kwaajii khusi khai neiwa yavuma. **19** Wahina wakwe Yesu newawa wakatoa makasia kuita inga uhae wa kilomita shano hambu mtandatu, wakamwona Yesu akenda uwanga ya mazi, akaitimia ngaawa wakaogoha muno. **20** Akini Yesu akawamba, "Ni miye msekugoha." **21** Nee wakoondeza kumwegaa Yesu he mpwani ahoaho ngaawa ibuwa mwe si khavu wekuwayo waita. **22** Kioi dakwe zumwezumwe da wantu wada wekuwao wekaa phande ya kaidi ya tindiziwa da mazi nee wakabukhua kuwa hawa na ngaawa mwengadu hantu hada, Yesu khekwegia mwe ida ngaawa hamwe na wahina wakwe, iya wahina awo nee waita kae ikedu. **23** Wantu watuhu kulawa Tibelia wakabuwa na ngaawa, hantu

hada wantu wekudaho mabumunda, Zumbe ekumtogoaho Muungu. **24** Naho wantu wekumanyaho ati Yesu na wahina wakwe khawekuwaaho hantu hada, wakakwea mwe ngaawa izo na wakaita Kapelinaumu kumuondeza Yesu. **25** Wada wantu wekumbwiiaho Yesu phande ya kaidi ya tondoo da mazi wakamuza, "Mhinyi, kubuwa ini aha?" **26** Yesu akawatambaisa, "Nawamba kwei mwaniondeza khio kwa viya muona ntangio nekugosoavyo, iya kwaajii nee mda yada mabumunda mkeguta. **27** Msekugosoa ndima kwaajii ya kwepata khande ibanikayo, iya gosoani ndima kwaajii ya khande yesayo kubanika vyekaa misi yose kwesiho kisiikizi. Khande izo zendaziwekhe ugima wa misi yose kwesiho kisiikizi kulawa kwa Muungu. Mwana wa Mntu nee endayeawekhe khande iyo, kwaajii Tate Muungu khamwekha udaho wa kugosoa ivyo." (aiōnios g166) **28** Wowo wakauza, "Titende mbwai tidahe kugosoa ndima za Muungu?" **29** Yesu akawatambaisa, akawamba, "Ndima ambayo Muungu akunda mwiigosoe nikunizumiya mie, ambae kiagiwa nae." **30** Aho wakamwamba, "Wendaugosoe ntangio yani ili tiikauwe tidahe kukuzumiya?" **31** Mababa zetu wada khande yekwetangwayo mana kuda kwe kiwawe, inga yagombekavyo Maandiko ya Muungu, 'Kawaisa mabumunda kulawa uwanga.'" **32** Yesu akagombeka, "Nawamba kwei, Musa khekwekha mabumunda kulawa uwanga kwa Muungu, iya Tate yangu nee awekhae nywie bumunda da kwei, kulawa uwanga kwa Muungu. **33** Kwaviya bumunda da Muungu ni yuda ekuseeaye kulawa uwanga kwa Muungu, ili awekhae wantu wa inusi inu ugima wa misi yose kwesiho kisiikizi." **34** Aho wakamwamba, "Zumbe, kuvoka isasa tekhe bumunda ido misi yose." **35** Yesu akawamba, "Miye nee bumunda da ugima." Na mntu yoyose ezae kwangu na kunizumiya khanaawe na saa wala khiu katu. **36** Akini nawamba kuwa, mniiona akini khamnizumiya. **37** Wose anekhau Tate, wendaweze hangu na mie katu khina nimwase chongoi yoyose mwendaeeze hangu, **38** Kwaviya khiseeya kulawa uwanga kwa Muungu, khio kwaajii ya kugosoa yada niyakundayo mie, iya kugenyeya yada akundayo Muungu mwekuniagiya. **39** Na yada akundayo Muungu mwekuniagiya nee aya, nesekumwaza ata yumwe gatigati ya wada ekunekhau, iya niwayuyuse wose msi wa kisiikizi. **40** Kwaviya akundavyo Tate, nee iki kia mntu amkauwaye Mwana na kumzumiya, awe na ugima wa misi yose kwesiho kisiikizi, naho nenda nimyuyuse msi wa kisiikizi. (aiōnios g166) **41** Aho Wayahudi wakavoka kung'ung'uzika kwaviya kagombeka, "Miye ni bumunda dekuseeyado kulawa uwanga." **42** Wakamba, "Uyu khi Yesu mwana wa Yusufu? Tammanya tati yakwe na mami yakwe naho, adaha vihihi kugombeka ati kaseeya kulawa uwanga kwa Muungu?"

43 Yesu akawatambaisa, “Ekani kunung'unika nywinywi kwa nywie. 44 Khahana mntu adahae kweza kwangu, inga Tate mwekuniagiya khakumuongoa kwangu, na miye nendanimyuyuse mntu uyo msi wa kisiikizi. 45 Muoni yumwe wa Muungu nee kaandika mwe kitabu cha Muungu, 'Wantu wose wenda wahinywe ni Muungu.' Kia mntu amtegeezaye na kumzumia Tate, eza kwangu. 46 Inu khaina mana kuwa, yuuko mntu yee ikedu mwekumuona Tate, iya ni yuda ekulawae kwa Muungu, uyo nee mwekumuona Tate. 47 Kwei nawamba, mnizumiya ana ugima wa misi yose kwesiho kisiikizi. (aiōnios g166) 48 Miye ni bumunda da ugima. 49 Mababa zenu nee wada khande yekwetangwayo mana kuda kwe kiwawe, akini wauya na nyuma. 50 Akini idi ni bumunda diseeyado kulawa uwanga kwa Muungu, mntu yoyose adae khadaha kuuya na nyuma. 51 Miye ni bumunda da ugima wekuseeao kulawa uwanga kwa Muungu, mntu yoyose mwendaye ade bumunda idi endaekae misi yose kwesiho kisiikizi, na bumunda nendado nimwekhe ni mwii wangu naulavya kwa ugima wa inusi.” (aiōn g165) 52 Aho Wayahudi wakavoka kuhigana wowo wenye wakauzana, “Adaha viivih kutekha mwii wakwe tiude?” 53 Yesu akawamba, “Nawamba ukwei, mkesekuuda mwii wa Mwana wa Mntu na kudomea phome yakwe khamnamuwe na ugima mwe mii yenu. 54 Adae mwii wangu na kudomea phome yangu anawo ugima wa misi yose kwesiho kisiikizi, na miye nenda nimityuyuse msi wa kisiikizi. (aiōnios g166) 55 Kwaviya mwii wangu ni khande ya kwei na phome yangu ni kidomewacho cha kwei. 56 Yoyose adae mwii wangu na kudomea phome yangu ekaa umu mwangu na miye nekaa kwakwe. 57 Tate wa ugima kaniagiya nigoso ndima na miye nekaa kwaajii yakwe, ivyo anidae miye naye endaekae kwaajii yangu. 58 Naho idi nee bumunda dekuseeyado kulawa uwanga, khio inga bumunda wekudayo mababa zenu, ata ivyo wakauya na nyuma, adae bumunda idi endaawe na ugima wa misi yose kwesiho kisiikizi.” (aiōn g165) 59 Yesu kagombeka ayo ekuaho akahinya he Nyumba ya kukintania Wayahudi uko Kapelinaumu. 60 Ivyo, wahina wakwe wekutegeezaho mbui inu wakamba, “Mahinyo aya khayava ni ndai adahae kuyahokea?” 61 Yesu akamanya kwesiho kugombekwa ni mntu kuwa wahina wakwe nee wang'ung'uzika kwa mbui iyo akawauza, “Ivi mbui inu yawatenda muwe na maatu? 62 Yendaiwe viivih mwendaho mmuone Mwana wa Mntu akakwea na kuita uwanga kwa Muungu kuda ekulawako? 63 Muye wa Muungu nee uetao ugima, mwii khauna udaho wakugosoa kintu. Mbui nekuwagombekazo zalawa kwa Muye wa Muungu na yaeta ugima. 64 Akini, wantu watuhu gatigati yenu khawazumiya.” Yesu kagombeka ivyo kwaviya kamanya kuvokea aho

bosi, wada ambao khawana wamzumiye gatigati yao na yuda ambae enda amhituke. 65 Akatendesa kugombeka, “Kwaajii inu, nee nekuwambavyo kuwa khahana mntu adahae kweza hangu kwesiho kuongoewa na Tate yangu.” 66 Kwaajii ya ayo, wahina wakwe wangi wekumtongeo Yesu, wakauya mgeeka, wasekutongean na vituhu. 67 Ivyo Yesu akawauza wada kumi dimwe na mbii, “Nanywi mwakunda kuhauka?” 68 Simoni Petulo akamtambaisa, “Zumbe tendatiite kwa ndai? Wee una mbui za ugima wa misi yose kwesiho kisiikizi. (aiōnios g166) 69 Swie tazumiya na kumanya kuwa wee nee Klistu mwekusagulwae kulawa kwa Muungu.” 70 Yesu akawauza, “Ivi ncheekwasagua nywie kumi dimwe na mbii? Na yumwe aongoewa na Ibiisi.” 71 Yesu kagombeka ayo kwaajii ya Yuda, mwana wa Simoni Iskaliote kwaviya uyu nee endeamhituke, etihoni ni yumwe da wada kumi dimwe na mbii.

7 Yekwembokaho ayo, Yesu nee avoka kuzunguka kia hantu mwe mizi ya Galilaya, khakukunda kuita si ya Yudea kwaajii waongweezi wa Kiyahudi nee wakaondeza kumkoma. 2 Kisingi cha sikukhuu mwenga ya Wayahudi yetangwayo sikukhuu ya vikumbi nee iwa hehi. 3 Naho nduguze da Yesu wakamwamba, “Hauke aho uite si ya Yudea ili wahina wako wakaone ndima uzigosoazo. 4 Mntu khagosoa mbui kwa sii inga akakunda kumanyika kwa wantu, kwaviya wagosoa mbui izi, naho eambaze mwe inusi wantu ili wakumanye.” 5 Naho ata wanduguze wagombeka ivyo kwaviya khawekumzumiya. 6 Yesu akawamba, “Kisingi changu cha kuita uko Yelusalemu khakizati kubuwa, akini nywie mwadaha kuita kisingi chochose. 7 Wantu wa mwe inusi inu khawamiemea nywie, akini miye waniemea kwaajii nawavuhuzia kuwa wagosoa mafyaimi. 8 Nywie hitani kwe sikukhuu iyo, miye khina niite kwe sikukhuu iyo, kwaviya mda wangu ukundigwao khauzati kubuwa.” 9 Yesu ekubindiizaho kugombeka ivyo, akasigaa uko Galilaya. 10 Wanduguze nee waongowa kuita kwe sikukhuu Yelusalemu, Yesu naye akaita, akini kwa sii. 11 Naho Waongoezi wa Kiyahudi kisingi waaho mwe sikukhuu na kuwauza wantu, “Yu hahi mtu uyu?” 12 Hawa na mipokoso mingi mwe zumwezumwe da wantu, wamwe wakamba, “Ni mntu yedi.” Watuhu wakamba, “Khivyo kwaviya awaza wantu.” 13 Na ivyo khahana mntu mwekugeza kugombeka mbui zakwe hewazo kwa kuogoha waongoezi wa Kiyahudi. 14 Sikukhuu iyo yekubuahoni gatigati, Yesu nee aita he Nyumba ya Muungu, akavoka kuhinya. 15 Naho Wayahudi wakahondoma na kugombeka, “Mntu uyu kamanya viivih mbui izi kwesiho kuhinywa?” 16 Yesu akawatambaisa, “Mahinyo nihinyayo khio yangu, iya yalawa

kwa Muungu mwekuniagiya. 17 Mntu mkunda kugosoa yada akundayo Muungu, endaamanye mahinyo yangu yalawa kwa Muungu, hambu negombekea ni yamie mwenye. 18 Yee egombekeaye mwenye aondeza Ukuu mwenye, akini aondezae ukuu kwa yuda mwekuniagiya, uyo agombeka yekuwayo kwei na khagombeka uhokho. 19 Ivi Musa khekukwika miagiyo ambayo kekhigwa ni Muungu? Na ivyo khahana katu mntu yumwe mtoza miko kwa mbwai mwaonda kunikoma?" 20 Aho wantu wakamtambaisa, "Wee una zaiko, nindai muondeza kukukoma?" 21 Yesu akawatambaisa, "Kuna mbui mwenga nekugosoa nanywi yawahondomaza. 22 Musa nee kawaagiya nywie kugwisa wana wenu wakigosi. Kugombeka kwei mbui iyo ivoka kwa mababa zenu, akini nywie mwawagwisa wana wenu ata Msi wa Kuhumwiiza. 23 Ikawa mntu adaha kugwiswa ata Msi wa Kuhumwiiza ili kuitoza miagiyo ya Musa, kwambwai mwanikima kwaviya kkihonya mntu Msi wa Kuhumwiiza? 24 Mwešekumamuiya mntu kwa mbui zionekazo kwa chongoi, iya mumuamuiye mntu kwa wedi na ikundigwavyo." 25 Wamwe wa wantu wa Yelusalemu nee wagombeka, "Ivi, uyu khio yuda mntu ambae waongweezi wakunda kumkoma? 26 Mbona yuaha atamwiya hemeso ya wantu, naho khahana mntu agombekae mbui yoyose! Ivi yadahika waongweezi wamanya kwei inga uyu nee Klistu? 27 Endahoeze Klistu Mwohozi, khahana mntu endayeamanye hantu ekulawiako, akini swie tamanya alawiako." 28 Aho Yesu ekuwaho akahinya he Nyumba ya Muungu, akagombeka kwa mgutio mkuu, "Inga mwanimanya, uko nilawiako mwakumanya na ivyo ncheekweza kwa udaho wangu iya ni yuda mwekuniagiya miye ni wa kwei, nywie khamumanya, 29 akini miye namanya kwaviya kilawiya kwakwe na yee nee mwekuniagiya." 30 Naho, wantu nee wakaondeza kumgwiya akini khahana mwekudaha kumgwiya kwaviya mda wakwe nee khauzati kubua. 31 Wantu wangi mwe dia zumwezumwe da wantu nee wamzumiiya na kugombeka, "Ivi, Klistu akeza endaagosoe ntangio vikuu kusima ekugosaozo uyu?" 32 Mafalisayo wawategeeza wantu wakapokosa mbui izo za Yesu, aho wowo hamwe na waviki wakuu wakawaagiya wagoji wamgwiye. 33 Yesu akamba, "Nikeaho na nywie kwa kisingi kijihi, nikabinda nendaniuye kwa yuda mwekuniagiya. 34 Mwenda mniondeze akini khamna mnione na hada nendahoniwe, nywie kwamdaha kubua." 35 Waongweezi wa Kiyahudi wakauzana wowo kwa wowo, "Mntu uyu enda aite kuhi ambaho khatina tidahe kumuona? Endaite kwa Wayahudi wekuambazikao gatigati ya Wagiiiki na kuwahinya Wagiiiki? 36 Ivi akunda kugombeka mbwai agombekaho, mwenda mniondeze akini khamna mnione na hada nendaho niwe nywie khamdaha kubua."

37 Msi wa kisiikizi wa sikukhuu iyo nee ni msi maalum, Yesu akagooka, akagombeka kwa mgutio mkuu, "Mtozwa ni khiu na eze kwangu adomee mazi, 38 inga yagombekavyo Maandiko ya Muungu, 'Mnizumiya miye, vizigizigi vya mazi ya ugima vyenda vimwamwaike kulawa mwe moyo wakwe.'" 39 Kagombeka ayo kuusu Muye kwa wada wamzumiiyo yee wendawamhokee, kisingi icho Muye khazati kweza, kwa ivyo Yesu nee khazati atogolwe. 40 Wantu watuhu he dia zumwezumwe wategeeza mbui izo, "Kwei mntu uyu Muoni." 41 Watuhu wamba, "Uyu nee Klistu." Akini watuhu wamba, "Yadahika viivhi Klistu akalawiya mwe si ya Galilaya! 42 Maandiko ya Muungu yamba kuwa, Klistu endaalawiye he muango wa Seuta Daudi, na endaavyaigwe Betilehemu mzi ekuwao akekaa Daudi." 43 Nee kwalawiya kwapanga kwaajii yakwe he dia zumwezumwe da wantu. 44 Wantu watuhu nee wakoondeza kumgwiya Yesu, akini khahana mntu mwekugeza kumgwiya. 45 Naho wada wagoji wakauya kwa waviki wakuu na Mafalisayo na wakauza, "Kwa mbwai khamwekumweeta Yesu?" 46 Wagoji wakawatambaisa, "Khahana mntu ekulawiyae na kugombeka mbui kuu inga mntu uyu!" 47 Mafalisayo wakawauza, "Ivi nywie nanywi mtiwa?" 48 "Ivi, mwamannya mwoongoezi yoyose, hambu yumwe wa Mafalisayo mwekumzumiiya mntu uyu? 49 Akini zumwezumwe da wantu wamzumiiyo, khawamannya miagiyo ya Musa, kubadiwa lazi na Muungu." 50 Yumwe yao kawa Nikodemo uyo nee mwekumbasa Yesu na kio, naho nee mwekugombeka. 51 "Miagiyo tekwekhigwayo na Muungu kwembekea Musa yatiemeza kumuamuiya mntu kabla ya kumtegeeza na kumanya kia ekugosaocho." 52 Nawo wakamtambaisa, "Wee nawe kulawa si ya Galilaya? Ni vyedi, kayasunguamanye Maandiko ya Muungu nawe wendaone kuwa Galilaya khakulawa katu muoni." 53 Naho wose wakahauka, kiya mntu akaita kwakwe.

8 Akini Yesu akaita he muima wa Mizaituni. 2 Kioi dakwe keokeo, Yesu nee aita vituhu kwe Nyumba ya Muungu, wantu wose wakambasa, nae akekaa akahinya. 3 Naho Wahinya wa miagiyo na Mafalisayo wakamweetea myeye yumwe mwekutozwa heugoni, wakamgoosa gatigati yawo. 4 Nee wamuza, "Mhinyi!" "Myeye uyu timbwiya he ugoni. 5 Mwe miagiyo yetu Musa katiagiya myeye inga uyu atoigwe maiwe adi auye na nyuma, tambe nawe wambaze?" 6 Wowo wagombeka ivyo, ili wapate mbui yendayoiwatende wamuahiye masa. Akini Yesu akenama na kuaandika asi kwa chaa. 7 Wekutendesaho kumuza, Yesu akenuka akawamba, "Yumwe yenu mwešekukuwa na mavigaviga na avoke kumtambikia iwe." 8 Naho akenama vituhu, na

kuandika ahosi kwa chaa chakwe. **9** Wekutegeezaho ayo, wakavoka kuhauka yumweyumwe, wakaongoa wadaa, Yesu akasigaa ikedu kidege na yuda mvyee kagooka hadahada. **10** Yesu ekwenukaho akamuza yuda mvyee, "Wahahi wada wantu? Ivi khahana katu ata yumwe mwekukuamuiya?" **11** Uyo mvyee akamtambaisa, "Zumbe khahana ata yumwe!" Na Yesu akamwamba, "Miye nami khinanikuamuiye, hita na usekugosoa mavigaviga vituhu." **12** Yesu akatamwiiya nao vituhu, akawamba, "Mie nee ung'azi wa inusi, yoyose anibasae endaawe na ung'azi umuongoeae mwe ugima wa misi yose kwesiho kisiikizi, naho khanaende mwe kiza katu." **13** Mafalisayo wakamwamba kwei Yesu, "Mbui zako wegombekea mwenye, ivyo khahana mntu akuvuhuziae mbui zako." **14** Yesu akawatambaisa, "Ata inga nevuhuzia mwenye, yada nigombekayo ni ya kwei, kwaviya namanya nilawako na niitako, akini nywie khammanya nilawako wala niitako. **15** Nywinywi mwaamuiya wantu kwakuwakauwa viya wagoosavyo, akini mie khiamuiya mntu. **16** Etiho nikaamuiya, uwamuiyo wangu ni kwei, kwa ivyo miye khio ikedu, Tate mwekuniagiya yu hamwe na miye. **17** Iyandikwa mwe miagiyo yenu, kuwa uvuhuzi wa wantu waidi, mbui iyo ni kwei. **18** Miye nevuhuzia mwenye na Tate mwekuniagiya nae anivuhuzia." **19** Aho wakamuza Yesu, "Tati yako yu hahi." Yesu akawatambaisa, "Nywie khamnimanya miye naho khamummanya Tate, ati nee mkanimanya nee mkammanya na Tate." **20** Yesu kagombeka mbui izo mwe chumba cha kiikizo, ekuwaho akahinya kwe Nyumba ya Muungu, naho khahana mntu mwekumgwiya, kwaviya mda wakwe khauzati kubua. **21** Yesu akawamba vituhu, "Miye naita na nywie mwenda mniondeze, akini mwenda muuye na nyuma kwa mavigaviga yenu, niitako miye, nywie khamdaha kweza." **22** Waongeezi wa Kiyahudi wakauzana, "Ivi endaekome mwenye? Kwambwai amba, niitako khamna mbue." **23** Yesu akawamba, "Nywie mlawa ahaaha asi, miye nalawa uwanga kwa Muungu, nywie ni wa mwe inusi inu, miye khio wa mwe inusi inu. **24** Nee mana nikawamba, 'mwenda muuye na nyuma he mavigaviga yenu mkesekuzumuiya kuwa miye nee mweaho ambae niaho mwenda muuye na nyuma kwa mavigaviga yenu.'" **25** Wowo wakamuza Yesu, "Wee ni ndai?" Yesu akawatambaisa, "Miye nee yuda nekuwagombekae aho bosi. **26** Ninayo mangi ya kugombeka na kuwamuiya uwanga yenu, akini yuda mwekuniagiya ni kwei nami nawamba wantu wainusi mbui ziyadu nekuzitegeezazo kulawa kwakwe." **27** Khawekuwa ati Yesu kagombeka nawo kuusu Tati yakwe wa uwanga kwa Muungu. **28** Yesu akawamba, "Mwendaho mmwenue Mwana wa Mntu aho ndiho mwendaho mmanye, 'Mie

nee uyo' na kuwa khigosochochose mie kwa udaho wangu akini nagombekadu yada Tate ekunihinyayo. **29** Yuda mwekuniagiya yuhamwe namiye, yee khekunibada ikedu kwaviya nagosoa yada yamtamiayo misi yose." **30** Ekubindaho kugombeka ayo wantu wangi wakamzumia. **31** Yesu akawamba wada Wayahudi wamzumiaao, "Ati mkayatozeeza mahinyo yangu, mwendamuwe wahina wangu kwei. **32** Naho Mwenda mmanye kwei, kwasia ya ukwei uwo Muungu eza kuwaekea kulawa mwe utumwa." **33** Wowo wakamuza, "Swie tiuvyazi wa Ibulahimu na khatizati katu kuwa watumwa wa mntu yawa viivhi ukamba tenda tiekewe?" **34** Yesu akawatambaisa, "Nawamba kwei kia mntu mgosoa mavigaviga ni mtumwa wa mavigaviga. **35** Mtumwa khana chekao cha kwekaa mwe nyumba, akini Mwana anacho chekao kisingi chose. (aiōn 9:165) **36** Inga Mwana akawaekea kulawa mwe utumwa wa mavigaviga, mwenda muwe muekewa kweikwei. **37** Namanya nywie ni muango wa Ibulahimu, na ivyo mwaondeza kunikoma kwaviya muyaemea mahinyo yangu. **38** Miye nagombeka ekunionyeshayo Tate, akini nywie mwagosoa yada yekugombekwayo na Tati yenu." **39** Wowo wakamtambaisa, "Swie tiwana wa Ibulahimu." Yesu akawamba, "Inga nywie ni wana wa Abulahamu, nee mkagosoa inga yada ekugosoayo Abulahamu. **40** Nawamba ukwei, nekuutegeezao kwa Muungu, na ivyo nywie mwaondeza kunikoma, Ibulahimu khekugosoa ivyo. **41** Nywie mwagosoa mbui ziyaziya ekugosoazo tati yenu." Wowo wakamwamba, "Swie khio wanahalamu na tiniae Tate yumwedu na nee Muungu yetu!" **42** Yesu akawamba, "Inga Muungu nee tati yenu nee mkanikundisa, kwaviya miye nalawa kwa Muungu isasa niaha, ncheekweza kwa udaho wangu mwenye, iya yee Muungu mwekuniagiya. **43** Kwa mbwai khamva ayo nigombekayo? Kwaviya muemea kutegeeza mbui yangu. **44** Nywie ni wana wa tati yenu Ibiisi mwaondeza kugosoa mbui akundazo tati yenu. Yee kawa mkomaji kuvokea aho bosi, wala khekugooka mwe ukwei, kwaviya kwei khaimo umo mwakwe. Kia agombekaho uhokho, agombeka uhokho kwaajii nee eivyo, kwaviya yee ni mhokho na tate wa uwo uhokho. **45** Akini mie nagombeka ukwei, nee kiekacho nywie msekunizumuiya. **46** Yuhi gatigati yenu adahae kumanya ati mie nina mavigaviga? Ati nagombeka ukwei kwa mbwai khamnizumuiya? **47** Mntu wa Muungu ateegeza mbui za Muungu akini nywie khamtegeeza, ivyo nywie khio wantu wa Muungu." **48** Wayahudi wakamtambaisa Yesu, "Uwo khathekugombeka ukwei ati wee umsamalia naho una zaiko?" **49** Yesu akawatambaisa, "Mie khina mazaiko, mie namtegeeza Tate, iya nywie khamnitegeeza mie. **50** Miye khiondeza

wantu wanitunye akini yuaho akundae wantu wanitunye na yee nee mwaamua inga nagosoa ikundigwavyo. **51** Kwei nawamba, mwekutozeeza mbui zangu khana auye na nyuma kisingi chose.” (aiōn g165) **52** Aho Wayahudi wakamba, “Isasa tamanya kwei kuwa wee una zaiko! Ibulahimu kauya na nyuma, Waoni nawo wauya na nyuma, wee wamba mtozeeza mbui zangu khana auye na nyuma kisingi chose. (aiōn g165) **53** Ivi wetenda umkuu kusima tati yetu Ibulahimu mwe kuuya na nyuma? Na waoni nawo wauya na nyuma, asa wee wetenda kuwa undai?” **54** Yesu akawatambaisa, “Inga nikefena mwenye, kwetogoa kwangu ni bue. Akini tate yangu uyo mgombekaye nee Muungu yenu, nee anitogoe. **55** Nywie khamzati kumanya akini mie namanya, nikamba khimanya nendaniwe mhokho inga nywinywi, mie namanya na natoza mbui yakwe. **56** Baba yenu Ibulahimu kawa na nyemi muno kumanya kuwa miye nendaneze. Neekawa inga kaniona, nee kawa na nyemi muno.” **57** Aho Wayahudi wakamwamba, “Wee khuzati kubuza myaka makumi mashano nawe kumwona kuhi Ibulahimu?” **58** Yesu akawamba, “Kwei nawamba kisingi Ibulahimu khazati kuvyaigwa, ‘Mie nee Niuko.’” **59** Aho wakadoa maiwe ili wantambikie, akini Yesu akefisa akalawa kwe Nyumba ya Muungu.

9 Yesu ekuaho akemboka, akamuona mntu yumwe mwekuvyaigwa tuntu. **2** Aho, wahina wakwe wakamuza, “Mhinya! Ni yuhi mwekugosoa mavigaviga, mntu uyu hambu wavyazi wakwe ata avyaigwe tuntu?” **3** Yesu akawatambaisa, “Mbui inu khayokulawiya kwaajii ya mavigaviga yakwe wala mavigaviga ya wavyazi wakwe, iya kavyaigwa tuntu ili udaho wa Muungu uoneke ukagosoa ndima umo mwakwe. **4** Kukawa kuke musi takundigwa titendese kugosoa ndima za yuda mwekuniagiya, mana kio cheza mntu khadaha kugosoa ndima. **5** Kisingi nike mwe inusi, mie ni ung’azi wa inusi.” **6** Ekubindaho kugombeka ayo, akaswa ovu ahosi, akagosoa ntope kwa dia ovu, akamsisa yuda tuntu he meso. **7** Akamwamba, “Hita ukesunte cheni he tondoo da mazi da siloamu” mana ya zina idi ni mwekuagiwa, aho yuda tuntu akaita, akesunta akauya uku aona. **8** Naho wahahi yakwe, na wada wekuwao wakamanya aho boshi kawa mkiwa mwekuwa akaombeza, wakamba, “Ivi, uyu khie yuda mkiwa mwekuwa akekaa na kuombeza?” **9** Wamwe wao wakamba, “Ndie.” Watuhu wakamba, “Khio iya waigana nae.” Akini yuda ekuae khaona akamba “Ni miye.” **10** Nae wakamuza “Isasa meso yako yadaha viihi kugubuka?” **11** Naye akawatambaisa, “Yuda mntu etangwae Yesu, kagosoa ntope akanisisa mwe meso na kunamba, hita ukesunte he tondoo da siloamu, aho nee

naita nikesunta nikadaha kuona.” **12** Wakamuza, “Yee yu hahi?” Akawatambaisa, “Mie khimanya.” **13** Nee wamwegaa yuda mntu mwekuwae tuntu kwa mafalisayo. **14** Msi uwo Yesu ekugosoa ntope na kumgubua meso mntu uyo iwa Msi wa Kuhumwiiza. **15** Naho mafalisayo wakamuza mntu uyo, “Kudaha viihi kuona? Akawamba kanisisa ntope mwe meso, nami nikesunta, na isasa naona.” **16** Wamwe wa Mafalisayo wakamba, “Mntu uyu khee kulawa kwa Muungu mana khatoka miagiyo ya Msi wa Kuhumwiiza.” Akini watuhu wakamba, “Mntu mwenye mavigaviga adaha kugosoa viihi utangio inga unu?” Iyo Mafalisayo khawekwevana wowo wenye. **17** Wakamuza vituhu yuda mwekuwa tuntu, “Kwa kuwa kakugubua meso wambaze uwanga ya mntu uyo?” Nae akawamba, “Yee ni Muoni wa Muungu.” **18** Waongoezi wa Kiyahudi khawekumzumiiya ati mntu uyo nee kawa tuntu aho boshi, na isasa aona, adi wekuwetangaho wavyazi wakwe. **19** Aho, wakawauza, awo wavyazi, “Uyu ni yuda mwana yenu mwekugombekae kavyaigwa tuntu? Kadaha viihi kuona?” **20** Wavyazi wakwe wakatambaisa, “Tamanya uyu ni mwana yetu na kavyaigwa tuntu. **21** Akini kadaha viihi kuona, khatimanya, nahodu khatimanya yuda mwekumgubwiiya meso, muuzeni yee mwenye ni mntu mgima adaha kugombeka yee mwenye.” **22** Wavyazi wakwe wamba ivyo kwa kuwaogoha waongoezi wa Kiyahudi, kwa kuwa waongoezi awo wevana kae, kuwa mntu yoyose agombeke Yesu nee Klistu, endaaguuswe he Nyumba ya kukintania Wayahudi. **23** Nee mana wavyazi wakwe wakamba, “Yee ni mntu mgima muuzeni.” **24** Naho wakamwetanga vituhu yuda mwekuwa tuntu, wakamwamba, “Gombeka ukwei mwekhe Muungu Ukuu swie tamanya ati mntu uyu ni mwenye mavigaviga.” **25** Yee akatambaisa, “Ati ni mwenye mavigaviga miye khimanya, akini kintu kimwe nakimanya, cheekuwa nikaona, na isasa naona!” **26** Aho wakamuza, “Kakugoswea mbwai? Ayo meso yako kayagubua viihi?” **27** Uyo mntu akawatambaisa, “Khiwamba kae na nywie khamwekunitageeza, kwa mbwai mwakunda kutegeeza vituhu? Ivi, mwakunda na nywie mtende wahina wakwe?” **28** Akini wowo waongoezi wa Wayahudi wakamdumua, wakamba, “Wee nawe ni mhina wakwe, akini swie ni wahina wa Musa. **29** Swie tamanya kuwa Muungu kagombeka na Musa, akini mntu uyu khatimanya kalawiiya kuhi.” **30** Naye akatambaisa, “Inu ni mbui ya kuhondomaza! Nywie khamanya kalawiiya kuhi, akini kanigubua meso yangu! **31** Tamanya kuwa Muungu khawategeeza wantu wenye mavigaviga, iya amtegeeza yoyose, mwenye hofu ya kumwogoha Muungu na kugosoa viya akundayo. **32** Kuvokea aho boshi wa inusi, khatizati

kutegeeza kuwa mntu kamhonya yoyose ekuwae tuntu. (aïōn g165) 33 Inga mntu uyu kheelulawa kwa Muungu kheeluwa adahe kugosoa chochose.” 34 Wowo wakamtambaisa, “Wee kuvyagwa na kweewa he mavigaviga wadaha viivih kutihinya swie?” Aho wakamguusa he Nyumba ya kukintania Wayahudi. 35 Yesu ekusikiaho kuwa wamguusa mntu uyo he Nyumba ya kukintania Wayahudi, akaita kumuondeza. Kisingi ekumbwiiaho akamuua, akamba “Ivi wee wamzumiiya Mwana wa Mntu?” 36 Uyo mntu akamtambaisa, “Mkuu nambiya ni ndai, nidahe kumzumiiya.” 37 Yesu akamwamba, “Kumwona kae na nee agombekae nawe isasa.” 38 Aho uyo mntu akamba, “Zumbe, Nazumiiya” akamkintia mavindi na kumvikia. 39 Yesu akamba, “Miye ncheza mwe inusi kwaajii ya kuwekha sugusa wantu, ili wantu wada wesaokuona wadahe kuona na wamamaakhanyao waona, wese kudaha kuona.” 40 Wamwe wa Mafalisayo wekuwao hamwe nae, nee wasikia mbui izo wakamuua, “Tambie swie ni matuntu?” 41 Yesu akawatambaisa, “Ati nee nimatuntu, neekhamwekuwa na mavigaviga, akini isasa nywie mwamba, ‘Swie taona,’ na iyo yaonyesha ati mke na masa.”

10 Yesu akawamba, “Nawamba ukwei, yoyose yuda mwesaekwengia mwe dewa da ngoto kwa kwembokea he uvi, iya ahenya na kwengia sia ntuhu, uyo ni mbavi na mhokaji. 2 Akini mwengia kwa kwembokea he uvi wa dewa, uyo nee muisi wa ngoto. 3 Mgoji wa dewa amvugwiya, na ngoto ava mgutio wakwe, na awetanga ngoto zakwe kia yumwe kwa zina dakwe, na kuwalavya chongoi. 4 Akabinda kuwalavya chongoi, aziongweeya na awo ngoto wamtongea, kwaviya waumanya mgutio wakwe. 5 Ngoto izo khazidaha kutongea muisi mgeni, iya wendawamguuke kwaviya khawamanyia mgutio wakwe.” 6 Yesu akawamba msimo uwo akini wowo khawekumanya ekukundavyo kuwamba. 7 Yesu akagombeka vituhu, “Kwei nawamba, miye ni uvi wa ngoto. 8 Wada watuhu wose wekuniongweeao miye ni wabavi na wahokaji, akini ngoto khawekuwatergeeza. 9 Miye ni inga uvi, mntu yoyose mwengia kwembokea kwangu endaaoholwe, endaengiye na kulawa chongoi na endaapate kia akundacho. 10 Mbavi eza kwa kuondeza kubawa na kukoma, na kubananga. Miye ncheza ili muwe na ugima, naho wawe nao mwingi. 11 “Miye ni muisi yedi. Muisi yedi ni yuda azumiiyae kuulavya ugima wakwe kwaajii ya ngoto zakwe. 12 Mntu agosoe ndima ya kibauwa cha kuisa ngoto ili ekhigwe hea naho ngoto khio mai yakwe, aonaho kui da mzituni dikeza, abada ngoto na kuguuka, naho kui da mzituni dawagwiya na kuwamwaganisa. 13 Yee khapatiiza kintu kuusu ngoto,

kwaviya yee ni mkibauwa apatiiza kuihwa hea. 14 Miye ni muisi yedi wada wakwangu nawamanyia, na wakwangu wanimanyia. 15 Inga Tate animanyavyo, ivyoivyo na miye nammanyia Tate, miye nazumiiya ata kuulavya ugima wangu ili ngoto wasekwaga. 16 Naho ninao ngoto watuhu, awo khawamo mwe dewa dangu, awo nakundigwa kuwaeta, naho wenda wategeeze mgutio wangu, kwenda kuwe na tintimo dimwe na muisi yumwe. 17 “Tate anikundisa kwaviya miye mwenye naulavya ugima wangu, ili nidahe kuwa na ugima vituhu. 18 Khahana mntu mnihoka ugima wangu, miye naulavya kwa kukunda kwangu mwenye. Ninao udaho wa kuulavya na udaho wa kuudoa vituhu, mwiko unu nee Tate ekunigombekavyo nigosoe.” 19 Wekusikiaho mbui izo kukalawiiya kwepanga vituhu gatigati ya Wayahudi. 20 Wangi wao wakamba, “Ana zaiko uyu, naho ni mkiau! Kwa mbwai kumtegeeza?” 21 Wantu watuhu wakamba, “Izi khizo mbui za mntu mwenye zaiko, kwaani zaiko dadaha kugubua meso ya matuntu?” 22 Uko Yelusalemu nee kuwa na sikukhuu ya kuvugua Nyumba ya Muungu, kisingi icho kiwa cha pheho. 23 Yesu nae kawa akenda he Nyumba ya Muungu he ukumbi wa Selemani. 24 Wayahudi wakamuikia bunga wakamuua, “Watibada mwemamaakhanyia adi ini? Ati wee ni Klistu isasa tambie ukwei.” 25 Yesu akawatambaisa, “Khiwagombeka kae akini khamwekuzumiiya, ndima nizigosoazo ni kwa udaho wa zina da Tate yangu zaniuvuhuzia. 26 Akini nywie khamzumiiya, kwaivyo nywie khio ngoto zangu. 27 Ngoto zangu zategeeza mgutio wangu, miye nawamanyia, nawo wanitongea. 28 Miye nawekha ugima wa misi yose kwesiho kisiikizi, naho khawana wage kisingi chose, wala khahana mntu mdaha kuwadoa kulawa hangu. (aïōn g165, aïōnios g166) 29 Tate yangu nee mwekunekha awo, ni mkuu kusima wose, naho khahana mntu mdaha kuwadoa he mikono ya Tate. 30 Miye na Tate ni kintu kimwe.” 31 Wayahudi wakadoa maiwe wamtambikie ili wamkome. 32 Yesu akawamba, “Khiwaonyesha ndima nyingi zilawazo kwa Tate, ni kiji icho kimiekacho mnitoe maiwe?” 33 Wayahudi wakamtambaisa, “Khatikutoa maiwe kwaajii ya ndima ntana, iya ni kwa kumkufuu Muungu! Kwaviya wetenda u Muungu ikawa wee ni mntu du inga wantu watuhu.” 34 Yesu akawatambaisa, “Iyandikwa mwe miagiyo yenu kuwa, Muungu kagombeka, ‘Nywie ni miuungu.’ 35 Muungu kawetanga miuungu wada wekwekhigwao mbui zakwe, tamanya kuwa Maandiko ya Muungu yagombeka ukwei misi yose. 36 Ivi, mwadaha viivih kumwamba yuda ambae Tate akamuika kwaajii ya ndima yakwe na kumwagiiya mwe inusi adumuwa? Ivi ni kwaviya khigombeka miye ni Mwana wa Muungu? 37 Inga khigoso ndima za Tate yangu, msekunizumiiya. 38 Akini ati

nazigosoa ndima za Tate yangu, ata inga khamnizumiiya, naho zizumiieni ndima izo, ili mdahe kummanya kuwa Tate yuumu mwangu na miye niumo mwakwe.” 39 Wakageeza vituhu kumgwiya, akini akahauka gatigati yao. 40 Yesu akaita khandakhanda ya zigizigi da mazi ya Yolodani, hantu Yohana ekubatiizaho, akekaa uko. 41 Wantu wangi wakambasa wakamba, “Yohana kheekugosoa ntangio yoyose, akini mbui zose za Yesu zia ekugombekazo Yohana neziwa za kwei.” 42 Wantu wangi wekuwaho hantu hada, wakamzumiiya Yesu.

11 Mntu yumwe etangwae Lazalo, mwenyezi wa Besania, nekawa mtamu. Mntu uyo neakekaa mwe phaamo ya Besania ekuwayo akekaa Maliamu na umbude da Yesu. 2 Maliamu nee yuda mwekumsisa Zumbe mavuta ya mzingo mtana na kumhangusa kwa fii zakwe, Lazalo, kakie nee mwekua mtamu. 3 Ivyo awo waumbude Lazalo, Malia na Masa wakaagiiya mbui inu kwa Yesu “Zumbe, mbuyayo umkundisae ni mtamu.” 4 Yesu ekusikiahoo ivyo akamba, “Utamu unu khio wa ufe iya wendauwatende wantu wantogoe Muungu na kwa sia iyo, Mwana wa Muungu viyaviya endaatogolwe.” 5 Yesu kawakundisa muno Masa na Malia maumbude da na Lazalo. 6 Yesu ekwembigwaho Lazalo ni mtamu, Yesu akaendee kwakaa hantu aho ekuaho kwa misi miidi. 7 Naho akawamba wahina wakwe, “Titeni vituhu mwe si ya Yudea.” 8 Wahina wakwe wakamwamba, “Mhinyi! Kisingi kijihi chekwembokacho tangia Wayahudi wekukundaho kukukoma kwa maiwe, nawe waonda ukuite uko vituhu?” 9 Yesu akawamba, “Ivi saa za musi khio kumi dimwe na mbi? Naho mntu akenda musi khadaha kwekungwaa kwaviya aona ung’azi wa zua mwe inusi. 10 Akini mntu akenda na kio, ekungwaa kwaviya ung’azi khaumo umo mwakwe.” 11 Yesu ekubindaho kugombeka mbui izo, akawamba, “Mmbuya wetu Lazalo kagona akini miye naita nikamwene.” 12 Wahina wakwe wakamwamba, “Zumbe, inga kagona usisiza, endaenuke.” 13 Wowo wamamakhanya kuwa kagona usisiza, akini Yesu kamanya kae ati Lazalo kauya na nyuma. 14 Yesu akawamba pwii, “Lazalo kauya na nyuma, 15 akini natamiwa kwaviya nchekuwa uko ekuuyaho na nyuma Lazalo, ili mdahe kunizumiiya, aya titeni kwakwe.” 16 Tomaso yuda mwetangwa phasa akawamba wahina weziwe “Titeni na swie tiuye na nyuma hamwe nae!” 17 Yesu ekubuaho uko, akabwiiya Lazalo kagewa kae mwe mbiya kwa misi mine. 18 Phaamo ya Besania neiwa hehi, na Yelusalemu uhae ubuwao kilomita ntatu. 19 Wayahudi wangi waita kwa Masa na Malia kuwahongeza kwa ufe wa kaka yao. 20 Naho Masa ekusikiahoo Yesu eza, akenda kumhachiiza, akini Malia kasigaa kaya. 21 Masa akamwamba Yesu, “Zumbe ati nekuwa aha, kaka yangu kheekuwa auye

na nyuma. 22 Akini namanya isasa chochose wendacho umuombeze Muungu, endaakwekhe.” 23 Yesu akamwamba, “Kakio endaa yuyuke na kuwa mgima vituhu.” 24 Masa akatambaisa “Namanya endaa yuyuke kisingi wantu wendaho wayuyuswe, msi wa kisiikizi.” 25 Yesu akamwamba, “Miye nee niwayuyusae wantu na kuwekha ugima na mntu yoyose anizumiiyae ata inga kauya na nyuma, endaawe na ugima. 26 Na mntu yoyose ekaae na kunizumiiya kisingi chose khana auye na nyuma katu, ivi wayazumiiya ayo?” (aiōn g165) 27 Masa akamtambaisa, “Eehe Zumbe miye nazumiiya ati wee nee Klistu Mwana wa Muungu yuda ezae mwe inusi.” 28 Ekugombekayo ayo, Masa akenda kumwetanga Malia umbude, akampokosa he ikedu, “Mhinyi yuaha akwetanga.” 29 Maliamu ekusikiahoo ayo, akenuka kinyio akambasa Yesu. 30 Yesu nee khazati kwengia mwe phaamo akini kawa hadahada Masa ekumhokeaho. 31 Aho, Wayahudi wekuwao hamwe na Malia kwa kumhongoza wamwona enuka na kulawa chongoi kinyio wakambasa, wakimamaakhanya kuwa enda kuiya kwe mbiya. 32 Naho Malia ekubuaho hantu Yesu ekuaho nakumuona, akakinta mavindi akamwamba “Zumbe inga nekuwa aha kaka yangu kheekuwa akauya na nyuma.” 33 Yesu ekumuonaho aiya, wada wayahudi wekwezao hamwe naye wose wakaiya, akengiwa ni mbazi na kugwidukwa moyo. 34 Yesu akawauza “Mmwika hahi?” Wakamtambaisa, “Zumbe soo ukauwe.” 35 Yesu nee aiya. 36 Wayahudi wakamba, “Kauwani ekumkundisavyo Lazalo!” 37 Wantu watuhu wakamba, “Ivi nee yuda mwekumgubua meso yuda tuntu? Isasa khekudaha kumtenda Lazalo asekuuya na nyuma?” 38 Naho Yesu akawa na usungu vituhu mwe moyo wakwe, akaita he mbiya. Mbiya denye nediwa phanga, nado digubikwa kwa iwe kuu. 39 Yesu akawamba, “Usani ido iwe!” Masa umbude da uyo mwekuuya na nyuma akamtambaisa Zumbe, “Kwaviya kekaa mwe mbiya misi mine isasa kavoka kae kunukha!” 40 Yesu akawamba, “Ivi ncheekukwamba inga ukanizumiiya wendauuone ukuu wa Muungu?” 41 Wakadiusa dia iwe, Yesu akakauwa uwanga kwa Muungu akamba, “Nakutogoa Tate kwaviya wanitegeeza uviki wangu. 42 Namanya inga wanitegeeza kia msi, akini nagombeka aya kwaajii ya wantu awa weaha wadahe kuzumia ati wee nee mwekuniagiiya” 43 Ekubindaho kugombeka ayo, aketanga kwa mgutio mkuu “Lazalo, lawa chongoi!” 44 Lazalo akalawa chongoi, uku kazengetezwa sanda mwe mwii wakwe, miundi na mikono ifungwa na cheni chakwe kigubikwa lesa, Yesu akamba, “Mchopoeni mmweeke aite.” 45 Ivyo wayahudi wangi wekwezaho kwa Malia yekuonaho mbui ida ekugosoayo Yesu wakamzumiiya. 46 Akini watuhu wakaita kwa Mafalisayo na kuwagombeka

mbui ida ekugosoayo Yesu. 47 Kwa ivyo, waviki wakuu na mafalisayo wakawetanga waongoezi wakuu wa Wayahudi wa mkonga na kugombeka "Titende viivhi? Mntu uyu agosoa ntangio nyingi. 48 Inga tikamwekea aendee, wantu wose wendawamzumiye, na awo Walumi wendaweze waibanange Nyumba ya Muungu na kuwakoma wantu wa si yetu!" 49 Yumwe yawo etangwae Kayafa, yuda mwekuwa Mviki Mkuu kwa mwaka uda, akawagombeka "Nywie khamanya kintu! 50 Khamanya ati ni vyedi kumkoma mntu yumwe kwaajii ya wantu, kusima wantu wose wa si ngima wadagamiye?" 51 Kheekugombeka akundavyo mwenye, kwaviya kawa Mviki Mkuu kisingi icho, nee kamanya Yesu endaaue na nyuma kwaajii ya si yawo, 52 na khio kwaajii ya si iyo ya Wayahudi iya ni kwaajii ya wantu wa Muungu wekumwaganikao ili kuwaeta hamwe na kuwatenda kuwa kintu kimwe. 53 Nee kuvokea msi uwo, waongoezi wa Kiyahudi wakaondeza kintu chendacho kiwatende wamkome Yesu. 54 Ivyo Yesu khekuita vituhu hemeso ya Wayahudi iya akalawa aho, akaita hehi na kiwawe, he mzi wetangwao Eflaimu, akekaa uko hamwe na wahina wakwe. 55 Sikukhuu ya Wayahudi ya pasaka iwa hehi na wantu wangi wakaita Yelusalemu wadahe wezingue hemeso ya Muungu kabla ya sikukhuu iyo. 56 Wantu nee wakamuondeza Yesu, nawo wekukintanaho hantu he Nyumba ya Muungu wakauzana, "Ivi mntu uyu khanaeze he sikukhuu?" 57 Waviki wakuu na Mafalisayo nee walavya miko kuwa mntu akamanya hantu Yesu eiho, awatonye wadahe kumgwiya.

12 Misi mtandatu nee khaizati sikukhuu ya Pasaka, Yesu akaita Besania ekuwako akekaa Lazalo, yuda ambae Yesu ekumyuyusaye. 2 Uko wakamuiikia khande ya guoni, Masa nee mwekuwa akawagosweea ndima, na Lazalo kawa yumwe wa wada wekuwao wekaa hamwe na Yesu. 3 Aho, Malia akadoa hindi ya mavuta ya mzingo mtana yekugosolwayo na nalido na ya yombe kuu, akamwetiya Yesu mwe miundi na kumhangusa kwa fii zakwe, nyumba yose ikamema mzingo mtana wa mavuta. 4 Yuda wa Isikaliote, yumwe wa wada wahina kumi dimwe na mbii nauyo nee mwenda amhituke Yesu akamba, 5 "Kwa mbwai ayo mavuta yenye mzingo mtana yasekutagwa kwaviya nee tikadaha kupata hea za kuiha mtu maiho yakwe ya mwaka mgima na hea iyo tikawekha wakiwa?" 6 Kagombeka ivyo, khio kwa kuwaonea mbazi wakiwa, iya kwaajii yee nekawa na mkwiji wa hea na nee mbavi. Maa kwa maa nee akadoa hea na kuzida ikedu. 7 Naho Yesu akagombeka, "Mwesekumpisha mvyee uyul Kwaviya kanetiya mavuta aya kwaajii ya msi wangu wa kugewa mwe

mbiya. 8 Wakiwa mnawo misi yose, akini miye khamna muwe nami misi yose." 9 Wayahudi wangi wasikia Yesu kawa Besania, ivyo wakaita uko khio kwaajii ya Yesu iya kumuona Lazalo yuda ekuyuyuswae na Yesu. 10 Viyaviya waviki wakuu wakagosoa ntegangi ya kumkoma Lazalo, 11 kwaajii ya kuyuyuswa kwa Lazalo, Wayahudi wangi wakawahituka waongoezi wao, wakamzumia Yesu. 12 Kioi dakwe zumwezumwe kuu da wantu wakeza kwe sikukhuu, wasikia Yesu kawa siai eza Yelusalemu. 13 Nee wadoa matambi ya mitende madodo dodo, wakalawa kwa kumhachiiza, wakatoa mgutio wakamba, "Ntunyo! Ajaiwe uyo mweza kwa udaho wa zina da Zumbe, ajaiwe Seuta wa Isilaeli!" 14 Yesu nekapata mwanaphunda akamkwea uwanga inga viya yekuandikwavyo mwe Maandiko ya Muungu, 15 "Mwesekuogoha ee wantu wa mzi wa Sayuni! Kauwa Seuta wenu eza, Kakwea mwana phunda." 16 Kisingi icho wahina wakwe khawekuzimanya mbui izo, akini Yesu ekutogolwaho, nee wakumbuka Maandiko yekuandikwayo uwanga yakwe na wantu wamgosweeya ivyo. 17 Zumwezumwe da wantu wekuwao hamwe na Yesu kisingi ekumwetangaho Lazalo kulawa mwe mbiya, na kamyuyusa kulawa kwa wekufao nee wa mvuhuzia. 18 Kwa ivyo zumwezumwe ido da wantu, wakamhachiiza kwaviya wose wasikia ntangio iyo, kuwa Yesu kamyuyusa Lazalo. 19 Mafalisayo wakaambizana "Mwaona khatidaha kugosoa chochose vituhu! Kauwani inusi ngima wantu wose wamtongea yee!" 20 Nekuwa na Wagiki wekuawo wabua Yelusalemu kuvika kisingi cha sikukhuu ya pasaka. 21 Awo wakamtimia Fiipo mwenyezi wa Betisaida wa mzi wa Galilaya, wakamba, "Mkuu taombeza kumwona Yesu." 22 Fiipo akaita akamwamba Andulea, aho wose waidi wakaita kumwamba Yesu. 23 Yesu akawamba, "Saa ya kutogolwa muno miye Mwana wa Mntu ibua. 24 Nawamba ukwei, mbeyu ya ngano yasigaa mbeyu ikesekugwa, akini ikagwa ahosi na kufa, ati ikafa, aho yavyaa matunda mangi. 25 Mntu yoyose akundisae ugima wakwe endaawaze, akimae ugima wakwe mwe inusi, endaauike kwaajii ya ugima wa misi yose kwesiho kisiikizi. (aiōnios g166) 26 Mntu akundae kunigosweeya ndima akundigwa anitongee, ili awe na miye kia hantu niitako, viyaviya mntu akanigosoea ndima, Tate yangu endaamwekhe ntunyo. 27 "Isasa moyo wangu wasuumia muno, nigombeke mbwai? Ivi nigombeke, 'Tate, nakuombeza unihonye kisingi iki cha masuumizo?' Khivyo khidaha kugombeka akini ni kwaajii ya ayo nee kiekacho nibwiye mda unu. 28 Tate, uditogoe zina dako!" Aho ukalawa mgutio kulawa uwanga kwa Muungu ukamba, "Khiditogoa zina dako na nendaniditogoe vituhu." 29 Akini zumwezumwe da wantu wekuwao hantu hada wasikia mgutio uwo, nawo

wakagombeka, uwo ni mgutio wa tuntumo, na wantu watuhu wakamba, "Mndima wa uwanga kwa Muungu katamwiya na Yesu!" 30 Yesu akawamba, "Mgutio uwo utegeezeka khio kwaajii yangu, iya ni kwaajii nywie mumzumiiye Muungu. 31 Isasa ni kisingi cha inusi kuamuiwa, mkuu wa mwe inusi endaasigwe chongoi. 32 Nendaho nenulwe uwanga kulawa mwe inusi, nendaniwetange kia yumwe eze kwangu." 33 Kwa kugombeka ivyo, Yesu kamanya endaauye na nyuma viivih. 34 Naho zumwezumwe ido dikamtambaisa, "Swie tisoma mwe Miagiyo kuwa uyo Klistu endaekae kisingi chose kwesiho kisiikizi, wadaha viivih kugombeka Mwana wa Mntu akundigwa enulwe? Uyo Mwana wa Mntu ni ndai?" (aiōn g165) 35 Yesu akawamba, "Un'gazi wendauwe na nywie kwa mda mjihi, endani mke na uwo un'gazi ili kiza kisekuwavota, kwaviya endae na kiza khamanya aitako. 36 Kisingi mke na uwo ung'azi, uzumiiye ili mdahe kuwa wantu wa ung'azi." Yesu ekugombekaho mbui izo akenda kwefisa hae nawo. 37 Etiho Yesu kagoso ntangio vyose hemeso yawo, wowo khawekumzumiiya, 38 Inu neiwa ili kuiganiza ida mbui yekugombekwayo na Muoni wa Muungu Isaya, "Zumbe ni ndai mwekuzumii mbui zetu? Naho Zumbe kumgubuiya ndai udaho wakwe?" 39 Ivyo khawekudaha kumzumii Yesu, kwaviya Muungu kagombeka hantu hatuhu kwembokea muoni yakwe Isaya, 40 "Muungu kawatenda wasekuona, Kawatenda wasekuva kwa mioyo yao, Wasekukauwa kwa meso yawo, Wasekumanya kwa akii zawo, Naho wasekunihitukia, Ili nidahe kuwahonya, agombeka Zumbe." 41 Isaya kagombeka mbui izi kwaajii ya ukuu uwo wa Yesu, akamba mbui zakwe. 42 Na ivyo waongoezi wangi wa kiyahudi wamzumiiya Yesu, akini khawekugombeka pwii kuwa wamzumiiya kwa kuogoha kuguuswa mwe Nyumba ya kukintania Wayahudi. 43 Waongoezi awo wa Wayahudi nee wakakundisa muno kutunywa ni wantu kusima kutunywa na Muungu. 44 Naho Yesu akagombeka kwa mgutio mkuu, "Mntu mnizumiiya miye, khanizumiiya miye du, iya amzumiiya viyaviya yuda mwekunigiya. 45 Mwekuniona miye kamuona yuda mwekunigiya. 46 Miye ni ung'azi, nami ncheza mwe inusi, ili wose wamzumiiawo wasekusigaa mwe kiza. 47 Mntu yoyose ategeezae mbui zangu akini khazitozeeza, miye khinanimuamwiye, mana ncheekweza kwaajii ya kuamuiya inusi iya kuiho. 48 Akini wose wekuniemeao miye na kuemea mbui yangu, wendawaamuiwe mwe msi uda wa kisiikizi, kwa mbui ya kwei nekugombekayo. 49 Miye ncheekugombeka kwa mwiko wangu mwenye iya khigombeka yada ekunekhaya Tate. 50 Miye namanya miko yakwe yaeta ugima wa misi yose kwesiho kisiikizi. Miye

nagombeka du yada Tate ekuniagiyaoy niyagombeke." (aiōnios g166)

13 Neiwa msi nee khaizati kubua sikukhuu ya Pasaka. Yesu akamanya mda wakwe wa kuhauka mwe inusi kuita kwa Tate nee ubua kae. Nee kawakundisa misi yose wantu wakwe wekaa mwe inusi, naho nee kawakundisa muno kwesiho mihaka. 2 Nee Yesu na wahina wakwe wawa wekaa kuda khande ya guoni, Ibiisi kamgeya kae Yuda mwana wa Simoni Isikaliote moyo wa kumhituka Yesu. 3 Yesu akamanya kuwa Tate kaika vintu vyose asi ya udaho wakwe, na kuwa nee kalawa kwa Muungu na endaagotoke kwa Muungu. 4 Aho Yesu akagooka, akaika khandai gwanda dakwe da chongoi, akadoa ntii kitambaa na kwefunga mwe kigudi. 5 Naho, akagea mazi mwe wiga, akavoka kuwasunta wahina wakwe miundi na kuihangusa kwa kitambaa ekwefungacho mwe kigudi. 6 Aho, akamtimia Simoni Petulo, nae Petulo akamba, "Zumbe wee wendaunisunte miundi miye?" 7 Yesu akamtambaisa, "Khumanya nigosoacho isasa, akini wendaumanye kisingi chezaho." 8 Petulo akamwamba Yesu, "Wee khunaunisunte miundi katu." Yesu akamtambaisa, "Nikesekukusunta khaunauwe yumwe wa wantu wangu kisingi chose." (aiōn g165) 9 Simoni Petulo akamtambaisa, "Zumbe nisunta, khio miundi du, ata na mikono yangu na viyaviya mtwi." 10 Yesu akamwamba, "Mwekwehaka kae mazi khakundigwa kwehaka vituhu, iya akundigwa kusunta miundi du kwaviya kang'aa mwii wose, nywie mng'aa akini khio nyose." 11 Yesu akamanya yuda endaeamhituke nee mana kagombeka, "Nywie msuntika, akini khio nyose." 12 Ekubindaho kuwasunta miundi na kwehasika vituhu gwanda dakwe, akekaa he meza hantu hakwe, akawauza, "Ivi mniva ivyo nekuwagosomeacho?" 13 "Nywie mwanetanga Mhinyi na Zumbe, nanywi mwagombeka vyedi, kwaajii ni miye. 14 Naho, ikawa miye Zumbe na mhinyi khimisunta miundi, nywie nanywi mwakundigwa mgosomeane ivyo. 15 Khiwekha msimo unu, ili nanywi mgosoe inga nekuwagosomeavyo. 16 Nawagombeka ukwei, mndima khio mkuu kusima mkuu yakwe, wala mwagiwa khio mkuu kusima yuda mwekumuaigiya. 17 Naho, ikawa mwayamany ayo, mwendamjaiwe. 18 "Aya nigombekayo ni kwa nywie nyose, miye nawamany wada nekuwasaguwao. Akini yakundigwa yaiganie Maandiko ya Muungu yagombekavyo, 'Yuda mwekuda khande hamwe na miye kanihituka.' 19 Miye nawamba mbui izi isasa umo khayazati kulawiiya, ili yalawiaho mdahe kuzumii kuwa, 'Miye Nee Uyo.' 20 Nawamba ukwei, amuhokeae yuda nimuagiye anihokea miye, na anihokeae miye amhokea yuda mwekunigiya." 21 Yesu ekugombekaho ayo, moyo

ukamuuma, akagombeka pwii, “Nawamba kwei, yumwe yenu endanihituke.” 22 Wahina wakwe wakakauwana, kwaviya khawekumanya amgombeka ndai. 23 Mhina yumwe yuda Yesu ekuue amkundisa muno, nee kekaa hehi na Yesu. 24 Simoni Petulo akamhungia mkono na kumwonyesha utangio, na kugombeka, “Muuzame amgombeka ni ndai.” 25 Mhina uyo akesogeza hehi na Yesu akamuuzi, “Zumbe ni ndai?” 26 Yesu akamtambaisa, “Yuda nendaenimwekhe kibendu cha bumunda, nekukigintacho mwe wiga, nee uyo.” Akadoa kibendu cha bumunda, akakiginta mwe wiga, akamwekha Yuda mwana wa Simoni wa Isikaliote. 27 Yuda wa Isikaliote ekubindaho kuhokea kia kibendu cha bumunda lilibili akamwengiia. Aho Yesu akamwamba, “Ukundacho kukigoso kigoso kinyio.” 28 Akini khakuna katu yumwe wa wada wekwekaao he meza mwekumanya kwa mbwai kagombeka ivyo. 29 Kwaviya Yuda kawa mwiika hea, watuhu wakamamakhanya, Yesu kamwamba ague vyekundigwavyo mwe sikukhuu, hambu kamwamba alavye chochose kwa wakiwa. 30 Yuda wa Isikaliote ekuhokeaho kia kibendu cha bumunda, akalawa chongoi kinyio, neiwa kiza. 31 Naho Yuda kisingi kalawa chongoi, Yesu akawamba wahina wakwe akagombeka, “Isasa ukuu wangu miye Mwana wa Mntu uhehi kuoneka pwii. Naho wendauneke pwii ukuu wa Muungu kwembokea mwe ntendwa zangu. 32 Mwana endaawaonyeshe wantu, Muungu ekuwavyo mkuu, naho Muungu endaawaonyeshe wantu viya Mwana ekuwavyo mkuu. 33 Wanangu nikaheho na nywie kwa mda mijihi du. Mwendamiondeze akini isasa nawamba yada nekuwagombekayo waongozi wa Kiyahudi, ‘Niitako nywie khamdaha kuita.’ 34 Nawekha mwiko mhya, kundisaneni inga viya niwakundisavyo nywie, na nywie kundisaneni. 35 Mkakundisana, wantu wose wendawamanye nywie ni wahina wangu.” 36 Simoni Petulo akamuuzi, “Waita kuhi?” Yesu akatambaisa, “Niitako khudaha kunitongea isasa, akini wendaunitongee kisingi chezacho.” 37 Petulo akamwamba, “Kwambwai isasa khidaha kukutongea? Ntayali kuuya na nyuma kwaajii yako.” 38 Yesu akamtambaisa, “Ivi kwei wadaha kuuya na nyuma kwaajii yangu? Nakwamba zogoo khadizati kukema, wendauniemee maa ntatu.”

14 Yesu akawamba, “Mwesekugwidukwa mwe mioyo yenu, mwamzumiiya Muungu, mnizumie na miye viyaviya. 2 Kaya mwa Tate yangu mna vyekao vingi, ati nee khayekuwa ivyo nee khiwamba kae, isasa naita kuwaikia hakwekaa. 3 Na nikaita kuwaikia hantu ha kwekaa, nendaniuye niwadoe na nywie muwe hada neiho. 4 Sia ya kuita uko, nywie mwaimanya.” 5 Tomaso akamuuzi,

“Zumbe uitako khatikumanya, tadaha viihi kuimanya iyo sia?” 6 Yesu akatambaisa, “Miye ni sia na kwei na ugima, khahana mntu adahae kuita kwa Tate kwesihio kwembokea kwa miye. 7 Ati nee mwanimanya miye nee mkampanya na Tate yangu, kuvokea isasa mwampanya naho mmuona kae.” 8 Filipo akamwamba, “Zumbe Tionyeshe Tate du, na swie nee tikundacho!” 9 Yesu akamtambaisa, “Nchekaa na nywie kisingi chose iki, nawe Filipo khauzati kunimanya? Mwekuniona miye kamuona Tate, wadaha viihi kugombeka, ‘Tionyeshe Tate?’” 10 Ivi, khaunizumiiya ati miye niumo mwa Tate, nae Tate yuumu mwangu? Mbui niwagombekeazo khizigombeka inga nikundavyo miye, iya Tate mweumo mwangu agosoa ndima yakwe. 11 Mwakundigwa mnizumie nigombekayo miye niumo ndani ya Tate na Tate yuumu mwangu, inga khivyo, zumiiyani kwa ndima nizigosoazo. 12 Nawamba ukwei, anizumie endaagosoe mbui nizigosoazo miye, naho endaagosoe makuu muno kwaviya naita kwa Tate. 13 Chochose muombeza chochose kwa zina dangu ido nendanigosoe, ili Tate atogolwe ekuwavyo mkuu kwembokea Mwanawe. 14 Chochose mniombeza chochose kwa udaho wa zina dangu nendanigosoe. 15 “Inga nee mkanikundisa mwenda mtoze miko yangu. 16 Nendanimuombeze Tate, nae endaawekhe mwaambiza mtuhu endaeekae na nywie kisingi chose. (aiōn g165) 17 Muye unu endaawagubue wantu ukwei. Wantu wa inusi ambao wamuemea Muungu khawadaha kumhokea Muye uyo, kwaajii khawamuona naho khawampanya, akini nywie mwampanya Muye wa Muungu, kwaajii ekaa hamwe na nywie naho endawe ndani yenu.” 18 “Khinanimibade nywie ikedu, nendaneze vituhu kwenu. 19 Hasigaa hadodo wantu wa mwe inusi khawana wanione vituhu, akini nywie mwendamnionye kwaviya miye ni mgima, na nywie nanywi mwendamuwe wagima.” 20 Msi uda wendaho ubue, mwendamanye miye niumo mwa Tate, na nywie muumo mwangu na miye viyaviya niumo mwenu. 21 “Yuda ahokeao miko yangu na kuitongea, yee nee mnikundisa. Anikundisae miye endaakundwe ni Tate yangu, na miye nendanimkundise na nendanimtende animanye.” 22 Yuda, akini khio Yuda Isikaliote akamwamba, “Zumbe yendaidahike viihi kutitenda swie tikumanye na khio wantu wa inusi wesaokukuzumiiya wee, wakumanye?” 23 Yesu akatambaisa, “Mntu yoyose anikundisae endatoze mbui yangu na Tate yangu endaamkundise, miye na Tate tendateze kwakwe na kwekaa nae. 24 Mwesaekunikunda khatoya mbui yangu. Na mbui mwekutegeezayo khio yangu, iya ni yakwe Tate mwekuniagiya.” 25 “Nawamba mbui izi, nika hamwe na nywie. 26 Akini uyo Mwaambizi, nee Muye wa Muungu ambae Tate endaamuagiye kwenu kwa udaho wa

zina dangu, endaawahinye kia kintu na kuwakumbusa yose nekugombekayo.” 27 “Nawabadia uivanisi, ni uivanisi ulawao kwangu, khio uivanisi inga uda ulawao kwa wantu wa inusi, ivyo mwesekwepisha mwe mioyo yenu, naho mwesekuogoha kintu chochose. 28 Mtegeeza kae, nikawamba, ‘Naita nikaukaaho nagotoka vituhu.’” Inga nee mkanikundisa, nee mkatamiwa kwaviya naita kwa Tate kwaviya yee ni mkuu kusima miye. 29 Nawamba aya isasa khayazati kulawiya, aho yendaho yalawiye, mdahe kuzumiia. 30 Khinanigombeke na nywie vituhu, mbui nyingi mana mkuu wa inusi atimia kwangu, iya khana udaho kwangu. 31 Akini wantu wa inusi wakundigwa kumanya inga namkundisa Tate, nee vyeekavyo nagosoa kia kintu inga Tate ekuniagiivavyo. “Gookani tihauke aha.”

15 Yesu akagombeka “Miye ni mzabibu wa kwei, na Tate yangu nee muimi. 2 Kia tambi desado kuvyaa matunda yee adiusa, na kia tambi divyaado adisengeasengea didahe kuvyaa vitana. 3 Nywie msuntwa kae na msuntwa kwaajii ya mzumiya mbui zangu. 4 Ekaani ndani yangu, nami nekae ndani yenu inga viya tambi desavyo kudaha ikedu kuvyaa matunda dikesekusigaa he mzabibu, ivyoivyo khamdaha kugosoa yada akundayo Muungu kwesiho kusigaa umu mwangu.” 5 “Miye ni mzabibu, na nywie ni matambi, ekaaye umu mwangu, na miye nekaa umo mwake, uyo avyaa matunda mangi, kwaviya kwesiho miye khamdaha kugosoa chochose. 6 Mntu yoyose mwesaekwekaa ndani yangu, atambikwa chongoi inga tambi ditambikwavyo chongoi, adi dinyae. Wantu wadidodoo tambi inga ido na kuditambika mwe moto dihye. 7 Mkekaa umu mwangu na mbui zangu zikekaa mwenu, ombezani chochose mkundacho nanywi mwendamwekhigwe. 8 Wantu wendawammanyane Tate yangu endaatogolwe ekuwavyo mkuu inga mkagosoa mbui nyingi akundazo Muungu na mwendamuwe wahina wangu. 9 Inga viya Tate ekunikundisavyo miye, ivyo ndiho miye nekuwakundavyo nywie, ekaeni kwa kuongoewa na ukundiso wangu. 10 Mkatoza miko yangu nendaniendee kuwakundisa, inga viya miye nekutozeezavyo miko ya Tate yangu ambae aendee kunikundisa. 11 “Nawamba mbui izi, nakunda nywie muwe na nyemi na miye, inga viya miye niwavyo na nyemi na nywie. 12 Inu nee miko yangu, kundisaneni inga nekumikundisavyo miye. 13 Sia khuu muno ya kuonyesha wawakundisa wambuya zako, ni kuuya na nyuma ili wowo wekae. 14 Nywie ni wambuya wangu mkagosoa niwaagiivavyo. 15 Nywie khinaniwetange wandima wangu vituhu, kwaviya mindima khamanya agosoado Zumbe yakwe, akini miye nawetanga nywie wambuya, kwaajii nawamba yose nekutegeezayo kulawa kwa Tate yangu. 16

Nywie khamwekunisagua miye, iya miye khiwasagua na kuwaagiya muite mkavyae matunda yekaayo, naye Tate adahe kuwekha chochose mkiombeza chocho kwa zina dangu. 17 Naho nawagiya kia mntu na amkundise mwezie. 18 “Inga wantu wa mwe inusi wakawakima nywie, akini msekujaa idi, wowo wavoka kunikima miye. 19 Inga nemuwa wantu wa inusi, inusi nee ikamikunda nywie inga wantu wakwe, Akini kwaviya nywie khio wa mwe inusi, iya miye khiwasagua kulawa mwe inusi inu, kwaajii inu wantu wa inusi wawakima. 20 Kumbukani nekuwambiavyo, ‘Mtumwa khio mkuu kusima mkuu yakwe.’ Ikawa wanisuumiza miye wenda wamisuumize nywie naywi ati watoza mbui zangu, wendawatoze na da kwenu. 21 Akini ayo yose wenda wamigoswee nywie kwaajii ya kunizumiya miye, kwaviya khawammanyane mwekuniagiya. 22 Inga nchekweza na kugombeka nawo nee khawekuwa na mavigaviga, akini isasa khawadaha kwevunia inga khawana mavigaviga. 23 Mnikima miye, viyaviya amkima Tate yangu. 24 Wesekuwa na mavigaviga inga nchekugosoa vihii gatigati yao, yada ambayo khahana mntu yoyose adahae kuyagosoa akini wowo waona yada nekuyagosao na wakanikima miye hamwe na Tate yangu. 25 Nee mana yada yekuandikwayo mwe miagiyo yao ni kwei, ‘Wanikima buebue.’ 26 “Nendanimwagiye Muye wa Muungu alawaye kwa Tate, endaeawaonyeshe ukwei. Muye uyo wa Muungu endaawambize na kuwagombeka miye neivyo. 27 Na nywie nanywi mwenda mnigombekee, kwaviya muwa na miye kuvokea aho bosi.

16 “Kiwamba ayo kwaviya msekueka kunizumiya. 2 Wantu wendawamiguuse nywie he nyumba zawo za kukintania Wayahudi. Naho kisingi cheza kia endaeawakome nywie endaamamakhanyu kuwa amgosoea ndima Muungu. 3 Wenda wamigoswee mbui izo kwaviya khawekumanyane Tate naho khawekunimanyane miye.” 4 Akini khiwamba mbui izo ili mda wendahoubue kwa wowo kuwagosoea ayo, mwendamkumbuke kuwa khiwamba. Nchekuwamba mbui izo, kuvokea aho bosi, kwaviya khiwa hamwe na nywie. 5 Akini isasa naita kwa yuda mwekuniagiya na khahana katu mntu yumwe aniuzae, waita hahi? 6 Kwaviya khiwamba mbui izo mmema usungu mwe mioyo yenu. 7 Akini nawamba ukwei, ni vyedi kwenu miye nihauke, kwaviya nikesekuita mwambizi khanaeze kwenu, akini nikaita uko nendanimwaagiye kwenu. 8 Nae endahoeze endaawaonyeshe wantu wa mwe inusi mbui ya mavigaviga, na kwa mbui ziya zimmtiazio Muungu na kwa mbui ya uwamuiyo wa Muungu. 9 Waga kwa mbui za mavigaviga kwaajii khawanizumiya miye, 10 Mwe mbui ya kumtamiza

Muungu, miye khigoso ya yamtamizayo Muungu nee mana naita kwa Tate, nanywi khamna mnione vituhu. **11** Aonyesha pwii kuwa Muungu endaawaamuiye kwaajii kamuamuiya kae Shetani ambae ni muongoezi wa inusi. **12** "Nina mangi ya kuwamba iya kwa isasa khamdaha kuyamanya yose. **13** Akini endaho auye uyo Muye wa kwei endaawatende muimanye kwei yose ya Muungu, naho khana agombeke mbui zakwe mwenye, iya enda agombeke ekuyategeezayo na kugombeka yendayoyeze. **14** Yee endaawatende mnitunye, kwaajii endaawambe yada yose endayo apate kulawa kwangu. **15** Vyose enavyo Tate ni vyangu, nee vyekweekacho khigombeka kuwa Muye endaawambe yada yose yalawayo kwangu. **16** "Kisingi kidodo khamnamnion, na bada ya kisingi kidodo vituhu mwendamnion." **17** Aho wamwe wa wahina wakwe wakauzana, "Ambaze? Atambiaho, kusigaa kisingi kidodo khamna mnione na ikemboka kisingi kidodo vituhu mwendamnion? Naho amba, 'kwaviya naita kwa Tate.'" **18** Aho wakaendee kuuzana, ana mana yani, agombekaho, 'Kusigaa kisingi kidodo?' Khatimanya amba mbwai!" **19** Yesu kamanya ati nee wakoondaza kumuza, aho akawamba, "Ivi mwauzana kwa yada nekugombekayo, 'Kusigaa kisingi kidodo nywie khamna mnion.' Na ikemboka kisingi kidodo vituhu mwendamnion? **20** Nawamba ukwei, nywinywi mwendamwiye na kuwa na bwaimbo, akini wantu wa inusi wendawawe na nyemi, mwendamuone usungu, akini usungu wenu wendauhituke uwe nyemi. **21** Inga mvyee aita kuvyaa mwana, ana usungu kwaajii amanya kisingi chakwe cha maumevu makai kibuwa, akini akabinda kuvyaa mwana, khakumbuka vituhu maumevu ayo, kwaajii ya nyemi ya kuvyagwa mwana mteke mwe inusi ibua. **22** Nanywi, isasa mna usungu, akini nendaniwezee vituhu, naho mwendammmeme nyemi he miyoyo yenu na nyemi iyo khahana mntu mwendae aiyuse kwenu. **23** "Msi uwo khamna mniombeze chochose. Nawamba ukwei, chochose mwendacho mumuombeze Tate, kwa udaho wangu mwendamwekhigwe. **24** Adi isasa khamzati kuombeza chochose kwa udaho wangu. Akini isasa ombezani nanywi mwenda mwekhigwe, ili muwe na nyemi muno. **25** "Khiwamba mbui izo kwa misimo, akini kisingi cheza ambaho khina nigombeke na nywie vituhu kwa misimo iya nendaniwambe pwii mbui za Tate. **26** Msi uwo, mwendamuombeze kwa udaho wangu na khinaniwambe ati nendanimuombeze Tate kwaajii yenu, **27** yee mwenye Tate awakundisa nywie, kwaviya nywie mwanikundisa miye, na kunizumiiya kuwa nalawa kwa Tate. **28** Miye nalawa kwa Tate ncheza mwe inusi, isasa nahauka mwe inusi inu na kuuya kwa Tate." **29** Aho wahina wakwe wakamwamba, "Isasa wagombeka

pwii kwesiho kugea misimo. **30** Isasa tamanya kuwa wee wamanya kiya kintu, khahana haja ya kuuzigwa mbui na mntu yoyose, ivyo tazumiiya ati kulawa kwa Muungu." **31** Yesu akawatambaisa, "Ivi isasa twazumii? **32** Kisingi cheza, naho kibua kae, ambaho nywie nyose mwendahomumwaganike kiya mntu kwakwe, namiye nabadwa ikedu, aaha akini miye khiko ikedu, mana Tate yu hamwe na mie. **33** Nawamba mbui izi mdahe kuwa na uivanisi he kuwa hamwe na miye, mwe inusi mwenda mkubwaniswe, akini togwani ni moyo miye khivota inusi."

17 Yesu ekubindaho kugombeka ayo, akenua meso uwanga kwa Muungu, akamba, "Tate ida saa ibuwa! Mtogoe Mwanao na Mwana nae adahe kukutogoa. **2** Kwaviya kumwekha udaho Mwanao mwa wantu wose, ili awekhe ugima wa misi yose kwesiho kisiikizi, wose wekumwekhao. (aiōnios g166) **3** Na ugima wa misi yose kwesiho kisiikizi nee unu, kukumanya wee ikedu Muungu wa kwei na kumanya Yesu Klistu wekumwaagiaye. (aiōnios g166) **4** Miye kikutogoa mwe inusi nakuwaonyesha wantu ukuu wako, kwembokea ndima wekuniagiizo nizigosoe. **5** Isasa Tate unitogoe uwaonyeshe wantu nekuwavyo mkuu kwa uda Ukuu nekuwao nao, kabla ya kuumbigwa inusi. **6** "Khikutenda umanyike kwa wantu wekunekhao kulawa mwe inusi, nee wawa wantu wako, nawe ukanekha wawe wangu naho wagosoa yose wekuwaagiayo, **7** isasa wamanya kuwa kia wekunekhacho kilawa kwako. **8** Kwaajii khiwamba yose wekunigombekayo, nawo wakahokea, wamanya kwei kilawa kwako na wazumiiya wee nee mwekuniagiya. **9** "Nawaombezea awo, nawala khiwaombezea wantu wa inusi, iya nawaombezea wada wekunekhao kwaviya ni wako. **10** Wantu wose nekuwao nao ni wako naho wantu wose ambao ni wako ni wangu na miye kitogolwa na waoneka mwe wada wekunekhao. **11** Na isasa neza kwako, khimo vituhu mwe inusi, akini wowo wendawaendee kuwa mwe inusi, Tate Muungu! Kwa udaho wa zina dako wekunekhado uwaikhe pheho wawe kintu kimwe inga swie teivyo hamwe. **12** Nekuaho nawo, miye kiwaika pheho kwa udaho wa zina dako wekunekhado Miye khiwainda naho khahana katu yumwe yawo mwekwaga iya ni yuda mwana mwekwaga, ili Maandiko ya Muungu yaigania inga yekuandikwavyo. **13** Isasa neza kwako na kigombeka mbui izo mwe inusi, ili wawe na nyemi muno mioyo yao inga ambavyo miye nekuwavyo na nyemi. **14** Miye kiwekha mbui yako, naho wantu wa inusi wakawakima, akini wowo wekukuzumiiho khio wantu wa inusi inu, inga viya mie nesivyo wa mwe inusi inu. **15** Khiombeza uwalavye mwe inusi iya naombeza uwa inde na yuda mbanasi. **16**

Wowo khiwo wa mwe inusi, inga viya nesivyo wa mwe inusi. 17 Eee Tate nakuombeza uwazingue kuwa wantu wako wa kwei, kwa sia ya ukwei wako, kwaajii mbui yako nee ukwei. 18 Inga viya wekuniagiavyo mwe inusi na miye kiwaagiya wowo mwe inusi. 19 Miye mwenye nchezingua kukugosoea ndima kwaajii yawo ili wowo nawo wezingue kukugosoea ndima mwe ukwei. 20 "Khiwavikia wowo du, iya nawavikia wose wendao wakuzumiye kwaawiana na mbui zao. 21 Naombeza ili wose wawe kintu kimwe, Tate naombeza wawe ndani yetu inga viya wee weivyo ndani yangu miye ndani yako, naombeza wawe kintu kimwe ili wantu wa inusi wakuzumiye inga wee nee mwekuniagiya. 22 Miye khiwekha ukuu udauda wekunekhao miye, wawe kintu kimwe inga viya swie teivyo hamwe. 23 Miye niwe ndani yawo nawe uwe ndani yangu, naombeza watendwe wawe kintu kimwe, kwaivyo wantu wa inusi wamanye wee nee mwekuniagiya naho wawakundisa wowo inga unikundisavyo mie. 24 "Tate naondeza awo wekunekhao wawe hamwe na miye hada neiho, waone Ukuu wangu wekunekhao, kwaviya nee kunikunda, kabla inusi khaizati kuumbigwa. 25 Tate Yedi! Wantu wa mwe inusi khawakumanya, akini miye nakumanya, awa nawo wamanye wee kuniagiya. 26 Khikutenda zina dimanyike kwao, na nendanitendese kugosoa ivyo, ili ukundiso wenao kwangu uwe umo mwao na miye umo mwao."

18 Yesu ekubindaho kugombeka ayo, akaita phande ya kaidi ya ngodi ya mazi ya Kedloni, hamwe na wahina wakwe, hantu hada hawa na kamnda. Nae Yesu akengiya umo hamwe na wahina wakwe. 2 Yuda, mwekumhituka Yesu, kahamanya hantu hada, kwa viya kia maa Yesu nee wakakintana hamwe na wahina wakwe. 3 Yuda akadoa wakhondo wa Kilumi na wagoji kulawa kwa waviki wakuu na mafalisayo, akeza nawo he kamnda, uku watoza mienge, na chemli na vitoanavyo. 4 Yesu, kwaviya kavimanya vyose vyendavyo vimbwiye, akalawa akawauza, "Mwamwondeza ndai?" 5 Nawo wakamtambaisa, "Yesu wa mzi wa Nazaleti." Yesu akawamba, "Nee Miye." Yuda mwe kumhituka kagooka aho hamwe nawo. 6 Yesu ekuwambaho, "Nee Miye," wowo wakauya mgeeka, na wakagwa asi. 7 Yesu akawauza vituhu, "Mwamwondeza ndai?" Wowo wakamtambaisa, "Yesu wa Nazaleti." 8 Yesu akawamba, "Khiwamba kae kuwa nee miye, naho inga mwaniondeza miye, waeken iwa waite." 9 Yesu kagombeka ayo, ili yalawiye yada ekugombekayo aho bosi, "Wada wekunekhao ncheukumwaza ata yumwe." 10 Simoni Petulo kawa na paange, nee adisoomoa, akamsenga gutwi da kuume mndima wa Mviki Mkuu. Mndima uyo nee

aketangwa Maliko. 11 Aho Yesu akamwamba Petulo, "Vuza paange dako mwe safuo dako, ivi nisekudomeya kikombe cha usuumizi ekunekhacho Tate?" 12 Wada wakhondo wa Kilumi na mgookezi yawo na wagoji wa Wayahudi nee wamgwiya Yesu wakamzengeteza sigi, 13 na wakamwegaa kwa Anasi, Anasi ni mkwewe da Kayafa yuda mwekuwa Mviki Mkuu wa kisingi icho. 14 Uyo Kayafa nee mwekuwamba Wayahudi kuwa, yendaive vitana mntu yumwe auye na nyuma, kwaajii ya wantu wose. 15 Simoni Petulo hamwe na mhina mtuhu wakamtongea Yesu. Uyo mhina mtuhu nee akamanyika kwa Mviki Mkuu, ivyo akengia na Yesu heukumbi wa Mviki Mkuu. 16 Akini Petulo, nee kagooka chongoi hehi na uvi. Naho uyo mhina mtuhu mwekumanyika kwa Mviki Mkuu akalawa chongoi, na akagombeka na mndima wa kivyee mgoji wauvi akamwengiza Petulo ndani. 17 Mtumwa uyo ya kivyee mgoji wauvi akamuza Petulo, nawe wee ni yumwe wa wahina wa mntu uyu? Petulo akamtambaisa, "Khio miye." 18 Msi uwo nekuwa na pheho na wandima na wagoji nee wagimba moto, naye Petulo akagooka hamwe nawo wakaotea moto. 19 Naho Mviki Mkuu akamuza Yesu mbui ya wahina wakwe na mahinyo yakwe. 20 Yesu akamtambaisa, "Miye khigombeka na inusi pwii, kia maa nahinya he Nyumba ya kukintania Wayahudi, na kwe Nyumba ya Muungu na hantu wakintanaho Wayahudi wose, naho ncheekugombeka dodose kwa sii. 21 Kwa mbwai waniuza miye? Wauze wada wekunitengeezao khiwambaze, wowo wamanya nekuwambiavyo." 22 Ekubindaho kugombeka ayo, mgoji yumwe mwekua kagooka hada akamtoa Yesu kofi akamba, ivi wee nee umtambaisavyo Mviki Mkuu? 23 Yesu akamtambaisa, ati khigombeka yesayo kutama vuhuzia ivyo vyesavyo kutama, akini ati kigombeka vyedi wanitoeyani? 24 Nee Anasi amwegaa Yesu uku kazengetezwa sigi, kwa Mviki Mkuu Kayafa. 25 Na Simoni Petulo kawa aho aotea moto, umo wakamuza, "Ivi, wee ni yumwe wa wahina wakwe?" Petulo akaemea na kwamba, "Khiyo miye." 26 Yumwe da wandima wa Mviki Mkuu akamba, ni nduguye da yuda mntu mwe kusengwa gutwi ni Petulo, akamuza, "Ivi miye nchekukuona he kamnda hamwe naye?" 27 Petulo akaemea vituhu, akagombeka khio miye, vuupu zogoo dikakema. 28 Keokeo da mtungaihu wakamdoa Yesu kulawa kwa Kayafa, na kumwegaa kwe nyumba khuu ya mkuu wa Walumi, nawo wadahe kuida sikukhuu ya Pasaka, khawe kwengia mwe nyumba ya mkuu wa Walumi, nee waogoha kwaviya wakengia kwendakuwatende wesekuzumiwa kwe kumvikia Muungu, ivyo newavotwa kugosoa sikukhuu ya Pasaka. 29 Ivyo Pilato akawabasa chongoi akawauza, "Ivi mntu uyu kagosoa masa yani adi mumwete kwangu?" 30

Wakamtambaisa, “Inga uyu kheeukuwa mkoa masa khatukuwa timwete kwako.” **31** Pilato akawamba, “Hayani, mdoeni nywinywi wenye mkamuamwiye kutongea na miagiyo yenu.” Wayahudi wakamtambaisa, “Miagiyo yetu yatimeza kumkoma mntu yoyose.” **32** Wagombeka ivyo, ili vidade kuigania mbui ekugombekayo Yesu kumanya enda afe vihihi. **33** Pilato akengia vituhu mwe nyumba ya mkuu wa Walumi akamwetanga Yesu na kumuza, “Ivi wee nee Seuta wa Wayahudi?” **34** Yesu akamtambaisa, izo ni mbui zako mwenye, hambu wantu watuhu wakwamba mbui zangu? **35** Pilato akamtambaisa, “Ivi miye ni Myahudi? Wantu wa si yako na waviki nee wekukuetao kwangu. Kugosoa masa yani?” **36** Yesu akamtambaisa, “Useuta wangu khio wa mwe inusi, ati useuta wangu nee ni wa mwe inusi, wandima wangu nee wakanivunia nisekweza kugwiwa na Wayahudi, akini isasa useuta wangu khio wa aha.” **37** Aho Pilato akamwamba, “Ivi wee u Seuta?” Yesu akamtambaisa, “Weye wamba miye ni Seuta, miye khivyaigwa kwaajii iyo, na kwaajii iyo ncheza mwe inusi kuwamba wantu ukwei na kia mntu azumiiye ukwei, uyo anitegeeza.” **38** Pilato akamuza Yesu, “Ukwei ni mbwai?” Pilato ekubindaho kugombeka ayo, akawabasa Wayahudi vituhu chongoi akawamba, “Miye khiona masa yoyose kwakwe.” **39** Akini mna mazweeya ya kuniombeza miye kuwavuguiya mfungwa yumwe kisingi cha sikukhuu ya pasaka, Ivi mwakunda niwavugwiye Seuta wa Wayahudi? **40** Aho wakatoa vuzo, “Aah! Khio mntu uyu iya Balaba!” Na yuda Balaba nee kawa mhokaji.

19 Naho Pilato akaagiya Yesu adoigwe, atoigwe makoto. **2** Na awo maasikali wakagosoa kintu inga khofia ya useuta yekugosolwayo na miwa, wakambadika mwe mtwi, wakamvikia gwanda da langi ya zambalau. **3** Wakeza hemeso yakwe na kugombeka “Togoa, Seuta wa Wayahudi!” Wakamtoa vibao. **4** Pilato akalawa vituhu chongoi, akawamba wada wekukintanao, “Kauwani, namwekhiiza Yesu henu na kuwamanyisha miye khiona masa yoyose ya mntu huyu.” **5** Umo Yesu akalavigwa chongoi kevaia kiya kintu inga khofia ya useuta yekugosolwayo na miwa, na gwanda da langi ya zambalau, Pilato akawamba, “kauwani mntu mwenye nee uyo.” **6** Waviki wakuu na wagoji wekumuonaho wakakweza mgutio, “Agong'ondewe he mhamba! Agong'ondewe he mhamba.” Pilato, akawamba, “Mdoeni nywinywi wenye mkamsuuniize, mana miye khiona masa yoyose kwakwe.” **7** Wayahudi wakatambaisa, “Swiye tina Miko, na kutongea na miko iyo akundigwa auye na nyuma kwaviya ketanga Mwana Muungu.” **8** Pilato ekusikiaho mbui iyo akaogoha. **9** Akengiye mwe nyumba kuu ya kiseuta vituhu akamuza

Yesu, “kulawiiya kuhi?” Akini Yesu khee kumwaandua mbui yoyose. **10** Pilato akamwamba, “Wee khukunda kutamwiya na miye? Khumanya kuwa miye ninaudaho wakukuekea naho ninaudaho wa kukugong'ondea he mhamba.” **11** Yesu akatambaisa, “Wee una udaho uwanga yangu, kwaajii du kwekhigwa ni Muungu, ivyo yuda mwekunekhiiza kwako kagosoa kintu kifayimi muno.” **12** Kuvokeya aho, Pilato akaondeza sia ya kumwekeya, akini wayahudi wakatoa vuzo, “Ukamwekeya mntu uyu, wee khiwe mmbuya wa zumbe mkuu wa Walumi, kiya mntu atendaye kuwa seuta ahigana na seuta wa Wakilumi.” **13** Naho Pilato ekutegeezaho mbui izo akamlavya Yesu chongoi akekaa he kigoda cha uamwiyo hantu hetangwaho “Hantu hekupangwaho maiwe.” Kwa kieblania “Gabasa” **14** Yekubuwa saa mtandatu wa musu, msi wa kweika tayali kwaajii ya Pasaka. Pilato akawamba Wayahudi, “Mkauweni Seuta yenu.” **15** Wowo wakakweza mgutio, “Mkome! Mkome! Agong'ondewe he mhamba.” Pilato akawauza, “uwo nimgong'onde he mhamba seuta yenu?” Waviki wakuu wakatambaisa, “Swie khatina seuta iya seuta mkuu wa kilumi!” **16** Aho pilato akamgeya Yesu mwe mikono yao agong'ondewe he mhamba. Ivyo wakamdoa Yesu. **17** Yesu ekwenuwaho mhamba wakwe, akalawa kuita hantu he kwetangwaho, “Fufu da mtwi” kwa Kieblania ni Goligota. **18** Aho nee agong'ondewa he mhamba, hamwe nae wawagong'ondea he mhamba wantu watuhu waidi, kia yumwe he mhamba wakwe, yumwe phande ya kuume na mtuhu phande yakwe ya kumoso, na Yesu gatigati. **19** Pilato akaandika kibao akakiika uwanga ya mti wa mhamba nee kiandikwa ivi, “Yesu Mnazaleti Seuta wa Wayahudi” **20** Wayahudi wangi wasoma kibao icho, mana hada ekugong'ondewaho Yesu hawa hehi na mzi. Naho kibao icho kiwa kiandikwa kwa Kieblania na Kilatini na Kigiki. **21** Waviki Wakuu wa Wayahudi wakaemea wakamwamba Pilato, “Usekuandika, ‘Seuta wa Wayahudi,’ iya andika, mntu huyu nee kamba, ‘Miye ni Seuta wa Wayahudi.’” **22** Pilato akawatambaisa, “Nekuandikayo khiyaandika.” **23** Maasikai wekubindaho kumgong'ondea Yesu he mhamba, wakadoa magwanda yakwe wakayapanga mafungu mane, fungu dimwe kwa kia asikai, wakadoa viyaviya na gwanda dakwe, gwanda ido diwa difumwa na kuwa kintu kimwe kulawa uwanga adi asi. **24** Awo masikai wakamamakhanya, “Tisekuitatua iya tiitwee kula yendaawe ya ndai.” Mbui iyo igosoka ili Maandiko ya Muungu yaigania, yagombekayo, “Wapangana magwanda yangu Na gwanda dangu wakaditwee kula.” Ivyo nee wekugosoavyo wada maasikai. **25** Hehi ya mti wa mhamba wa Yesu nee wagooka mami yakwe da Yesu, na mami yakwe mdodo da Yesu na

Maliamu mkaza Kileopa na Maliamu wa mzi wa Magidala. 26 Yesu ekumunahoh mami yakwe, na hehi naye kagooka yuda mhina ekumkundisae, akamwamba mami yakwe, "Mmaa uyo nee mwanao." 27 Akabinda akamwamba yuda mhina, "Kauwa uyo nee mami yako." Na kuvokeya mda uda mhina akahauka nae kaya kwakwe. 28 Yesu akamanya kabindiiza ndima yakwe ya uhozi, naho akagombeka ili Maandiko ya Muungu yadahe kuigania, "Naona khiu." 29 Aho nee hana wiga wekumemao divai yekusasayo, akadoa dodoki akadiginta mwe divai yekusasayo, wakaigea uwanga ya lasi, wakamwiikiya mwe muomo. 30 Yesu ekusonaho iyo divai yekusasayo akamba, "Yaigania!" Naho akenamiza mtwi wakwe, akauya na nyuma. 31 Iwa Ijumaa msi wa mwaandao, kwaivyo mii isekwekaa mwe mti wa mhamba, kwaajii Msi uwo wa Kuhumwiiza iwa msi mkuu kwa Wayahudi, wakamwoombeza Pilato miundi ya awo wekugong'ondewao he mhamba ibondwe na mii yawo iusigwe. 32 Ivyo maasikai wakaita, wakaibonda miundi ya yuda mntu wa bosu na yuda wakaidi wekugong'ondewa he mhamba hamwe na Yesu. 33 Akini wekumbwiihah Yesu waona kauya kae na nyuma, ivyo khawekumbonda miundi yakwe. 34 Akini asikai yumwe akamtunga ubavu kwa guha na vuupuu ikalawa phome na mazi. 35 Yuda mwekuona mbui iyo, akawamba wantu ili nywie mdahe kuzumii, na yada ekugombekayo ni kwei naho amanya kuwa agombeka ukwei. 36 Mbui iyo igosoka ili Maandiko ya Muungu yaigania "Khahana katu vuhah dakwe dimwe dendado dibondwe." 37 Naho Maandiko ya Muungu matuhu yamba, "Wendawamkauwe yuda wekumtungae." 38 Yekusiahoh ayo, Yusufu mwenyezi wa mzi wa Alimataya, mwekuwaye mndima wa Yesu etiho kwa sii kwaajii ya kuwaogoha Wayahudi, akaita kwa Pilato na kumuombeza uhusa wa kuudoh mwii wa Yesu, Pilato akamzumiiya, ivyo Yusufu akaita akaudoh mwii wa Yesu. 39 Naho Nikodemo, ambae aho bosu kawa kambasa Yesu na kio, akaita hamwe na Yusufu wakadoa mhanganyo wa manemane na ubani yabua kilo makumi matatu. 40 Wantu waidi awo, wakaudoh mwii wa Yesu wakauzengeteza sanda hamwe na yada malashi inga yeivyo mazweeya ya Wayahudi he uzisi. 41 Hada hakugong'ondewa Yesu hawa na kamnda, na mwe kamnda ako hawa na mbia diha dekusongwado he iwe kuu, ambado khadizati kugewa mntu yoyose. 42 Kwa ngijangija za Wayahudi za mwaandao wa Msi wa Kuhumwiiza, kwaviya mbia ido diwa hehi, wakaika mwii wa Yesu umo.


20 Keokeo da mtungaihu, msi wa bosu wa juma kukekuwa na kakiza, Maliamu wa kulawa Magidala akaita kwe mbia, akadiona dia iwe diusigwa he uvi wa mbia. 2 Aho

akaguuka kuita kwa Simoni Petulo na yuda mhina mtuhu Yesu ekuaye kamkundisa muno akawamba, "Wamuusa Zumbe he mbia na aho khatimanya wamwiikia kuhi." 3 Ahoaho, Petulo hamwe na yuda mhina mtuhu wakahauka na kuita kwe mbia. 4 Wose waidi wakaguuka akini yuda mhina mtuhu kaguuka kinyio kusima Petulo, akaongoa kubua he mbia. 5 Ekwenamahoh na kusungia ndani ya mbia akoona sanda, akini kheekwengia ndani. 6 Simoni Petulo akeza akamtimia, akengia he mbia, umo akaona sanda, 7 na kia kitambaa ekuzengetewazo Yesu kwe mtwi. Kitambaa icho khachekuikwa hamwe na sanda, kikunjwa na kuikwa hantu ha ikedu. 8 Naho yuda mhina mtuhu mwekuongoa kubua he mbia, akengia viyaviya ndani akoona na akazumiiya. 9 Nee khawazati kuwa Maandiko ya Muungu yekwambayo kuwa, nee yakundigwa ayuyuke kulawa he ufe. 10 Naho awo wahina wakauya kaya. 11 Maliamu kawa kagooka chongoi ya mbia aiya, uku akekwiya nee enama na kusungia he mbia, 12 akaona wandima wa uwanga wa Muungu waidi, wekuvaawo magwanda yekung'aayo muno, wekaa hada wekuwaho mwii wa Yesu ugonezwa yumwe he mtwi, wa kaidi he miundi. 13 Awo wandima wa uwanga wa Muungu wakamuuzah, "Mmaa kwa mbwai waiya?" Nae akawatambaisa, "Wamuusa Zumbe yangu na khimanya wekumwiikako!" 14 Ekugombekahoh ayo, akahituka mgeeka akamuona Yesu kagooka aho, akini kheekumtanga inga ni Yesu. 15 Yesu akamuuzah, "Mmaa waiya mbwai? Wamwoondeza ndai?" Maliamu akamamakhanaya uyo nee mgookezi wa kamnda akamwamba, "Mkuu inga ni weye mwekumuusa, nambia wekumwiikako, nami ninda nimdoe." 16 Yesu akamwetangah, "Maliamu!" Nae Maliamu akamhitukia Yesu na kumwamba kwa Kiebulania, "Laboni" mana yakwe, "Mhinyi." 17 Yesu akamwambah, "Usekunitozah khizati kuita uwanga kwa Tate, akini uite kwa wandugu zangu ukawambe, naita uwanga kwa Tate yangu na Tate yenu, Muungu yangu na Muungu yenu." 18 Ivyo Maliamu wa mzi wa Magidala akaita kuwambah wada wahina kuwa kamuona Zumbe na kuwa nee kamwambah ivyo. 19 Nee iwa guoni wa msi uwo wa bosu wa juma, wahina wa Yesu, wakakintana hamwe mwe nyumba, na nyuvi nee zivugalwa kwaajii ya kuwaogoha waongoezi wa Kiyahudi. Aho Yesu akeza akagooka gati yawo akawambah, "Uivanisi uwe kwenu." 20 Ekugombekahoh ivyo, akawaonyesha mikono yakwe na mbavu zakwe, aho wahina wakwe wakawa na nyemi muno kwaviya wamuona Zumbe. 21 Yesu akawambah vituhu, "Uivanisi uwe hamwe nanywi, inga viya Tate ekuniagiavyo miye, na miye nawaagiya nywinywi." 22 Ekugombekahoh ayo, akawavuziayah muye na kuwambah, "Hokeani Muye wa Muungu." 23 Inga

mwawaekea wantu mavigaviga yao Muungu endaawaekee na inga mkese kuwaekea wantu mavigaviga yao, Muungu khana awaekee mavigaviga yao. **24** Tomaso, yumwe wa wada kumi dimwe na waidi etangwae zina tuhu mpasa kheekuwa hamwe nae kisingi Yesu ekwezaho. **25** Aho wada wahina watuhu wakamwamba, "Timwoona Zumbe." Akini Tomaso akawamba, "Nikese kuona alama za misumai mwe mikono yakwe na kugeya chaa changu he khovu izo na kugeya mkono wangu he ubavu wakwe, khinanizumiye." **26** Yekwembokaho misi nane, wahina wakwe wawa hamwe umo ndani, na Tomaso kawa hamwe nawo, akeza Yesu akagooka gatigati yawo, uku nyuvi ziwa zivugalwa akamba, "Uivanisi uwe nanywi." **27** Naho akamwamba Tomaso, "Ete chaa chako aha uikauwe mikono yangu, ete mkono wako wembose he ubavu wangu usekuwa na maatu iya zumiya." **28** Tomaso akamtambaisa, "Weye ni Zumbe yangu naho weye ni Muungu yangu!" **29** Yesu akamwamba, "Ivi kuzumiia kwaajii kuniona? Ebae wada wesaokuona akini wazumiya." **30** Yesu kagoso a hemeso ya wahina wakwe ntangio ntuhi nyingi khazekuandikwa mwe kitabu iki. **31** Akini izi zandikwa mdahe kuzumiia inga Yesu ni Klistu Mwana wa Muungu na kwa kuzumiya mdahe kuwa na ugima wa misi yose kwesiho kisiikizi.

21 Yekwembokaho ayo, Yesu akawalawiya vituhu wahina wakwe, khandakhanda ya tondoo da mazi da Tibelia na idoido nado nee tondondoo da mazi da Galilaya na nee yekuwavyo, **2** Simoni Petulo na Tomaso etangwae phasa na Nasanaeli mwenyezi wa mzi wa Kana ya Galilaya, na wana waidi wa Zebedayo, na wahina watuhu waidi wawa hamwe wose. **3** Simoni Petulo akawamba weziwe, "Naita kwekuloo samaki." Nawo wakamwamba, "Tenda tiite hamwe nawe." Naho wakalawa, wakengia mwe ngaawa, akini kio icho khawekwaambua chochose. **4** Wekuvokaho kucha, Yesu nee agooka khandakhanda ya tondoo da mazi, akini wahina khawekumanya ati ni yee nee Yesu. **5** Aho Yesu akawauza, "Wambuya wangu, khamzati kupata samaki wowose?" Wowo wakamtambaisa, "Bue! Khatizati kwaambua kintu." **6** Yesu akawamba, "Tambikani nyavu zenu phande ya kuume ya ngaawa nanywi mwenda mpate samaki." Nee wazitambika nyavu akini isasa khawekudaha kubuuta vituhu kwa wingi wa samaki. **7** Aho yuda mhina mwekuwa akakundiswa ni Yesu akamwamba Petulo, "Uyu ni Zumbe!" Simoni Petulo ekusikiaho ni Zumbe, akevika gwanda da uwanga, mana kheekuwa kadivaa akasooka mwe mazi. **8** Akini wada wahina watuhu watimiya phwani kwa ngaawa uku wabuuta wavu wekumemao samaki, khawekuwa hae na si khavu, iya neeiwa yapata mita mia mwenga kubua khandakhanda ya mazi.

9 Wekubuahho si khavu waona moto wa makaa ugimbwa, uwanga yakwe kuikwa samaki na bumunda. **10** Yesu akawamba, "Eteni aha izo samaki wacheche mwekuloazo." **11** Simoni Petulo akakwea ngaawa na kuubuuta uda wavu adi si khavu. Nee umema samaki wakuu mia mwenga hamsini na ntatu na etiho wawa wangi, akini wavu khawekudumuka. **12** Yesu akawamba, "Soonie mde." Khahana katu yumwe wa wahina mwekugeeza kumuza wee undai? Kwaviya wamannya ni Zumbe. **13** Yesu akeza, akadoa bumunda akawekha, akagoso a ivoyiyo na wada samaki. **14** Inu nee iwa maa ya ntatu Yesu kuwaawiya wahina wakwe bada ya kuyuyuka. **15** Wekubindaho kuda, Yesu akamuza Simoni Petulo, "Simoni mwana wa Yohana, Ivi wanikundisa kusima awa?" Naye akatambaisa, "Eehe, Zumbe wamanya ati mie nakukundisa." Yesu akamwamba, "Wakauwe wanangoto wangu." **16** Naho akamwamba kakaidi, Simoni mwana wa Yohana, "Ivi wanikundisa?" Petulo akamtambaisa, "Eehe Zumbe wamanya kuwa nakukundisa." Yesu akamwamba, "Wakauwe ngoto zangu." **17** Akamuza maa ya ntatu, "Simoni mwana wa Yohana! Ivi wanikundisa?" Aho Petulo akasuumia mwe moyo wakwe, kwaajii ekumuuzavyo maa ntatu, "Wanikundisa?" Akamwamba, "Zumbe, wee wamanya yose ati miye nakukundisa." Yesu akamwamba, "Wakauwe ngoto zangu. **18** Nakwamba ukwei, wekuaho mbwanga, kwezoweya kweika mwenye tayali na kuita kokose wekukundako. Akini wendaho uwe mdaa wenda wenu mikono yako na mntu mtuhu endaakufunge na kukwegaa wesakokukunda uite." **19** Kwa kugombeka ivyo, koonyesha Petulo ufe wakwe wendavyouete ukuu kwa Muungu. Naho akamwamba, "Nitongea." **20** Aho Petulo akahituka, akamuona mhina mtuhu yuda ekukundiswae muno na Yesu ambasa, uyu mhina ni yuda kisingi cha khande ya guoni kekaa hehi na Yesu na kumuza "Zumbe ni yuhi endae akuhituke?" **21** Petulo ekumuonaho yuda mhina akamuza Yesu, "Zumbe, na uyu vihi?" **22** Yesu akamtambaisa, "Ati nakunda asigae adi nendaho niuye, yakuu mbwai? Weye yakundigwa unitongea." **23** Nee mbui iyo ikazagaa gatigati mwa wantu wekumzumiya Yesu kuwa mhina uyo khana auye na nyuma, akini Yesu kheekumwamba inga mhina uyo khana auye na nyuma, akini kagombeka, "Inga nikakunda asigae adi msi nendaho neze, wakunda mbwai?" **24** Uyo ni yuda mhina mwekuvuhuzia mbui izi na kuziandika, naswi tamanya uvuhuzi wakwe ni kwei. **25** Naho kuna mbui nyingi ekugosoazo Yesu, ayo inga nee yaandikwa yose dimwe kutongea ntuhi, namamakhanya mwe inusi yenye khavyekuwa vikaiganiya kuviika vitabu ambavyo nee viandikwa.



The New Jerusalem

"I saw the holy city, New Jerusalem, coming down out of heaven from God, prepared like a bride adorned for her husband. I heard a loud voice out of heaven saying, 'Behold, God's dwelling is with people, and he will dwell with them, and they will be his people, and God himself will be with them as their God.'"

Revelation 21:2-3

Reader's Guide

Bondei at AionianBible.org/Readers-Guide

The Aionian Bible republishes public domain and Creative Common Bible texts that are 100% free to copy and print. The original translation is unaltered and notes are added to help your study. The notes show the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of afterlife destinies.

Who has the authority to interpret the Bible and examine the underlying Hebrew and Greek words? That is a good question! We read in 1 John 2:27, *"As for you, the anointing which you received from him remains in you, and you do not need for anyone to teach you. But as his anointing teaches you concerning all things, and is true, and is no lie, and even as it taught you, you remain in him."* Every Christian is qualified to interpret the Bible! Now that does not mean we will all agree. Each of us is still growing in our understanding of the truth. However, it does mean that there is no infallible human or tradition to answer all our questions. Instead the Holy Spirit helps each of us to know the truth and grow closer to God and each other.

The Bible is a library with 66 books in the Protestant Canon. The best way to learn God's word is to read entire books. Read the book of Genesis. Read the book of John. Read the entire Bible library. Topical studies and cross-referencing can be good. However, the safest way to understand context and meaning is to read whole Bible books. Chapter and verse numbers were added for convenience in the 16th century, but unfortunately they can cause the Bible to seem like an encyclopedia. The Aionian Bible is formatted with simple verse numbering, minimal notes, and no cross-referencing in order to encourage the reading of Bible books.

Bible reading must also begin with prayer. Any Christian is qualified to interpret the Bible with God's help. However, this freedom is also a responsibility because without the Holy Spirit we cannot interpret accurately. We read in 1 Corinthians 2:13-14, *"And we speak of these things, not with words taught by human wisdom, but with those taught by the Spirit, comparing spiritual things with spiritual things. Now the natural person does not receive the things of the Spirit of God, for they are foolishness to him, and he cannot understand them, because they are spiritually discerned."* So we cannot understand in our natural self, but we can with God's help through prayer.

The Holy Spirit is the best writer and he uses literary devices such as introductions, conclusions, paragraphs, and metaphors. He also writes various genres including historical narrative, prose, and poetry. So Bible study must spiritually discern and understand literature. Pray, read, observe, interpret, and apply. Finally, *"Do your best to present yourself approved by God, a worker who does not need to be ashamed, properly handling the word of truth."* 2 Timothy 2:15. *"God has granted to us his precious and exceedingly great promises; that through these you may become partakers of the divine nature, having escaped from the corruption that is in the world by lust. Yes, and for this very cause adding on your part all diligence, in your faith supply moral excellence; and in moral excellence, knowledge; and in knowledge, self-control; and in self-control patience; and in patience godliness; and in godliness brotherly affection; and in brotherly affection, love. For if these things are yours and abound, they make you to be not idle nor unfruitful to the knowledge of our Lord Jesus Christ,"* 2 Peter 1:4-8.

Glossary

Bondei at AionianBible.org/Glossary

The Aionian Bible un-translates and instead transliterates eleven special words to help us better understand the extent of God's love for individuals and all mankind, and the nature of afterlife destinies. The original translation is unaltered and a note is added to 64 Old Testament and 200 New Testament verses. Compare the meanings below to the Strong's Concordance and Glossary definitions.

Abyssos g12

Greek: proper noun, place

Usage: 9 times in 3 books, 6 chapters, and 9 verses

Meaning:

Temporary prison for special fallen angels such as Apollyon, the Beast, and Satan.

aidios g126

Greek: adjective

Usage: 2 times in Romans 1:20 and Jude 6

Meaning:

Lasting, enduring forever, eternal.

aiōn g165

Greek: noun

Usage: 127 times in 22 books, 75 chapters, and 102 verses

Meaning:

A lifetime or time period with a beginning and end, an era, an age, the completion of which is beyond human perception, but known only to God the creator of the aiōns, Hebrews 1:2. Never meaning simple endless or infinite chronological time in Greek usage. Read Dr. Heleen Keizer and Ramelli and Konstan for proofs.

aiōnios g166

Greek: adjective

Usage: 71 times in 19 books, 44 chapters, and 69 verses

Meaning:

From start to finish, pertaining to the age, lifetime, entirety, complete, or even consummate. Never meaning simple endless or infinite chronological time in Koine Greek usage. Read Dr. Heleen Keizer and Ramelli and Konstan for proofs.

eleēsē g1653

Greek: verb, aorist tense, active voice, subjunctive mood, 3rd person singular

Usage: 1 time in this conjugation, Romans 11:32

Meaning:

To have pity on, to show mercy. Typically, the subjunctive mood indicates possibility, not certainty. However, a subjunctive in a purpose clause is a resulting action as certain as the causal action. The subjunctive in a purpose clause functions as an indicative, not an optative. Thus, the grand conclusion of grace theology in Romans 11:32 must be clarified. God's mercy on all is not a possibility, but a certainty. See ntgreek.org.

Geenna g1067

Greek: proper noun, place

Usage: 12 times in 4 books, 7 chapters, and 12 verses

Meaning:

Valley of Hinnom, Jerusalem's trash dump, a place of ruin, destruction, and judgment in this life, or the next, though not eternal to Jesus' audience.

Hadēs g86

Greek: proper noun, place

Usage: 11 times in 5 books, 9 chapters, and 11 verses

Meaning:

Synonymous with Sheol, though in New Testament usage Hades is the temporal place of punishment for deceased unbelieving mankind, distinct from Paradise for deceased believers.

Limnē Pyr g3041 g4442

Greek: proper noun, place

Usage: Phrase 5 times in the New Testament

Meaning:

Lake of Fire, final punishment for those not named in the Book of Life, prepared for the Devil and his angels, Matthew 25:41.

Sheol h7585

Hebrew: proper noun, place

Usage: 66 times in 17 books, 50 chapters, and 64 verses

Meaning:

The grave or temporal afterlife world of both the righteous and unrighteous, believing and unbelieving, until the general resurrection.

Tartaroō g5020

Greek: proper noun, place

Usage: 1 time in 2 Peter 2:4

Meaning:

Temporary prison for particular fallen angels awaiting final judgment.

Glossary +

AionianBible.org/Bibles/Bondei---Bondei-Bible/Noted

Aionian Glossary references are below. Strong's Hebrew and Greek number notes are added to 64 Old Testament and 200 New Testament verses. Questioned verse translations do not contain Aionian Glossary words but may wrongly imply *eternal* or *Hell*. Note placement is skipped or adjusted for verses with non-standard numbering.

Abyssos

Luka 8:31
Romans 10:7
Revelation 9:1
Revelation 9:2
Revelation 9:11
Revelation 11:7
Revelation 17:8
Revelation 20:1
Revelation 20:3

aidios

Romans 1:20
Jude 1:6

aiōn

Matayo 12:32
Matayo 13:22
Matayo 13:39
Matayo 13:40
Matayo 13:49
Matayo 21:19
Matayo 24:3
Matayo 28:20
Maliko 3:29
Maliko 4:19
Maliko 10:30
Maliko 11:14
Luka 1:33
Luka 1:55
Luka 1:70
Luka 16:8
Luka 18:30
Luka 20:34
Luka 20:35
Yohana 4:14
Yohana 6:51
Yohana 6:58
Yohana 8:35
Yohana 8:51
Yohana 8:52
Yohana 9:32
Yohana 10:28
Yohana 11:26
Yohana 12:34
Yohana 13:8
Yohana 14:16

Acts 3:21
Acts 15:18
Romans 1:25
Romans 9:5
Romans 11:36
Romans 12:2
Romans 16:27
1 Corinthians 1:20
1 Corinthians 2:6
1 Corinthians 2:7
1 Corinthians 2:8
1 Corinthians 3:18
1 Corinthians 8:13
1 Corinthians 10:11
2 Corinthians 4:4
2 Corinthians 9:9
2 Corinthians 11:31
Galatians 1:4
Galatians 1:5
Ephesians 1:21
Ephesians 2:2
Ephesians 2:7
Ephesians 3:9
Ephesians 3:11
Ephesians 3:21
Ephesians 6:12
Philippians 4:20
Colossians 1:26
1 Timothy 1:17
1 Timothy 6:17
2 Timothy 4:10
2 Timothy 4:18
Titus 2:12
Hebrews 1:2
Hebrews 1:8
Hebrews 5:6
Hebrews 6:5
Hebrews 6:20
Hebrews 7:17
Hebrews 7:21
Hebrews 7:24
Hebrews 7:28
Hebrews 9:26
Hebrews 11:3
Hebrews 13:8
Hebrews 13:21
1 Peter 1:23

1 Peter 1:25
1 Peter 4:11
1 Peter 5:11
2 Peter 3:18
1 John 2:17
2 John 1:2
Jude 1:13
Jude 1:25
Revelation 1:6
Revelation 1:18
Revelation 4:9
Revelation 4:10
Revelation 5:13
Revelation 7:12
Revelation 10:6
Revelation 11:15
Revelation 14:11
Revelation 15:7
Revelation 19:3
Revelation 20:10
Revelation 22:5

aiōnios

Matayo 18:8
Matayo 19:16
Matayo 19:29
Matayo 25:41
Matayo 25:46
Maliko 3:29
Maliko 10:17
Maliko 10:30
Luka 10:25
Luka 16:9
Luka 18:18
Luka 18:30
Yohana 3:15
Yohana 3:16
Yohana 3:36
Yohana 4:14
Yohana 4:36
Yohana 5:24
Yohana 5:39
Yohana 6:27
Yohana 6:40
Yohana 6:47
Yohana 6:54
Yohana 6:68

Yohana 10:28
Yohana 12:25
Yohana 12:50
Yohana 17:2
Yohana 17:3
Acts 13:46
Acts 13:48
Romans 2:7
Romans 5:21
Romans 6:22
Romans 6:23
Romans 16:25
Romans 16:26
2 Corinthians 4:17
2 Corinthians 4:18
2 Corinthians 5:1
Galatians 6:8
2 Thessalonians 1:9
2 Thessalonians 2:16
1 Timothy 1:16
1 Timothy 6:12
1 Timothy 6:16
2 Timothy 1:9
2 Timothy 2:10
Titus 1:2
Titus 3:7
Philemon 1:15
Hebrews 5:9
Hebrews 6:2
Hebrews 9:12
Hebrews 9:14
Hebrews 9:15
Hebrews 13:20
1 Peter 5:10
2 Peter 1:11
1 John 1:2
1 John 2:25
1 John 3:15
1 John 5:11
1 John 5:13
1 John 5:20
Jude 1:7
Jude 1:21
Revelation 14:6

eleēsē

Romans 11:32

Geenna

Matayo 5:22
Matayo 5:29
Matayo 5:30
Matayo 10:28
Matayo 18:9
Matayo 23:15
Matayo 23:33
Matayo 23:33
Maliko 9:43

Maliko 9:45
Maliko 9:47
Luka 12:5
James 3:6
Hadēs
Matayo 11:23
Matayo 16:18
Luka 10:15
Luka 16:23
Acts 2:27
Acts 2:31
1 Corinthians 15:55
Revelation 1:18
Revelation 6:8
Revelation 20:13
Revelation 20:14

Limnē Pyr

Revelation 19:20
Revelation 20:10
Revelation 20:14
Revelation 20:15
Revelation 21:8

Sheol

Genesis 37:35
Genesis 42:38
Genesis 44:29
Genesis 44:31
Numbers 16:30
Numbers 16:33
Deuteronomy 32:22
1 Samuel 2:6
2 Samuel 22:6
1 Kings 2:6
1 Kings 2:9
Job 7:9
Job 11:8
Job 14:13
Job 17:13
Job 17:16
Job 21:13
Job 24:19
Job 26:6
Psalms 6:5
Psalms 9:17
Psalms 16:10
Psalms 18:5
Psalms 30:3
Psalms 31:17
Psalms 49:14
Psalms 49:15
Psalms 55:15
Psalms 86:13
Psalms 88:3
Psalms 89:48


Psalms 116:3
Psalms 139:8
Psalms 141:7
Proverbs 1:12
Proverbs 5:5
Proverbs 7:27
Proverbs 9:18
Proverbs 15:11
Proverbs 15:24
Proverbs 23:14
Proverbs 27:20
Proverbs 30:16
Ecclesiastes 9:10
Song of Solomon 8:6
Isaiah 5:14
Isaiah 7:11
Isaiah 14:9
Isaiah 14:11
Isaiah 14:15
Isaiah 28:15
Isaiah 28:18
Isaiah 38:10
Isaiah 38:18
Isaiah 57:9
Ezekiel 31:15
Ezekiel 31:16
Ezekiel 31:17
Ezekiel 32:21
Ezekiel 32:27
Hosea 13:14
Amos 9:2
Jonah 2:2
Habakkuk 2:5

Tartaroō

2 Peter 2:4

Questioned


None yet noted



"By faith, Abraham, when he was called, obeyed to go out to the place which he was to receive for an inheritance. He went out, not knowing where he went"
Hebrews 11:8



"When Pharaoh had let the people go, God didn't lead them by the way of the land of the Philistines, although that was near; for God said, 'Lest perhaps the people change their minds when they see war, and they return to Egypt'" Exodus 13:17



Kwaviya Mwana wa Mntu khhekweza kugosoewa ndima, iya keza kugosea wantu ndima na kulavya ugima wakwe kwaji ya kuhoia wantu wangi. - Mark 10:45



"Paul, a servant of Jesus Christ, called to be an apostle, set apart for the Good News of God"

Romans 1:1

Creation 4004 B.C.

Adam and Eve created	4004
Tubal-cain forges metal	3300
Enoch walks with God	3017
Methuselah dies at age 969	2349
God floods the Earth	2349
Tower of Babel thwarted	2247
Abraham sojourns to Canaan	1922
Jacob moves to Egypt	1706
Moses leads Exodus from Egypt	1491
Gideon judges Israel	1245
Ruth embraces the God of Israel	1168
David installed as King	1055
King Solomon builds the Temple	1018
Elijah defeats Baal's prophets	896
Jonah preaches to Nineveh	800
Assyrians conquer Israelites	721
King Josiah reforms Judah	630
Babylonians capture Judah	605
Persians conquer Babylonians	539
Cyrus frees Jews, rebuilds Temple	537
Nehemiah rebuilds the wall	454
Malachi prophecies the Messiah	416
Greeks conquer Persians	331
Seleucids conquer Greeks	312
Hebrew Bible translated to Greek	250
Maccabees defeat Seleucids	165
Romans subject Judea	63
Herod the Great rules Judea	37

(The Annals of the World, James Uusher)

Jesus Christ born 4 B.C.

New Heavens and Earth

1956	Christ returns for his people
1830	Jim Elliot martyrd in Ecuador
1731	John Williams reaches Polynesia
1614	Zinzendorf leads Moravian mission
1572	Japanese kill 40,000 Christians
1517	Jesuits reach Mexico
1455	Martin Luther leads Reformation
1323	Gutenberg prints first Bible
1276	Franciscans reach Sumatra
1100	Ramon Llull trains missionaries
1054	Crusades tarnish the church
997	The Great Schism
864	Adalbert martyrd in Prussia
716	Bulgarian Prince Boris converts
635	Boniface reaches Germany
569	Alopen reaches China
432	Longinus reaches Alodia / Sudan
397	Saint Patrick reaches Ireland
341	Carthage ratifies Bible Canon
325	Ulfilas reaches Goth / Romania
250	Niceae proclaims God is Trinity
197	Denis reaches Paris, France
70	Tertullian writes Christian literature
61	Titus destroys the Jewish Temple
52	Paul imprisoned in Rome, Italy
39	Thomas reaches Malabar, India
33	Peter reaches Gentile Cornelius
	Holy Spirit empowers the Church

(Wikipedia, Timeline of Christian missions)

Resurrected 33 A.D.

Where?			When?							
			Innocence		Fallen			Glory		
			Eternity Past	4000 BC Creation	Fall to Sin No Law	1500 BC Moses' Law	Advent of Christ 0-33 AD	Church Age Kingdom Age	Great White Throne	New Heaven and Earth
Who?	God	Father	God's Perfect Fellowship	God's Perfect Fellowship with Adam in the Garden of Eden	Living in Unapproachable Light, 1 Timothy 6:16			God's Perfectly Restored Fellowship with All Mankind in the Holy City	All Restored Acts 3:21	
		Son			Pre-Incarnate, John 8:58		Incarnate, John 1:14			Paradise, Luke 23:43
		Holy Spirit			John 10:30		Everywhere, Psalm 139:7			Indwelling Believers, John 14:17
	Mankind	Living Mankind	Serving the Savior or Satan on Earth, Ephesians 2:1-5							
		Deceased Believing Mankind	Blessed in Paradise, Luke 16:22							
		Deceased Unbelieving Mankind	Punished in Hades until the final judgment, Luke 16:23 and Rev 20:13							
	Angels	Holy Angels	No Creation	No Fall No Death Gen 1:31	Serving Mankind at God's Command, Hebrews 1:14			No Hades No Dead Rev 20:3		
		Imprisoned Angels	No people							
		Fugitive Angels	Gen 1:1	No Fall	Imprisoned in Tartarus, 2 Peter 2:4 and Jude 6			Lake of Fire Prepared for the Devil and his Angels Mat 25:41 Rev 20:10	Fallen Angels Forgiven? Col 1:20 Yes? Heb 2:16 No?	
		First Beast Demon			No Unholy Angels Gen 1:31	Rebelling Against Christ				Thalaasa, Rev 20:13
		False Prophet Demon				Accusing Mankind				Lake of Fire Revelation 19:20
		Satan		1 Peter 5:8 and Revelation 12:10		Abyss Revelation 20:2				

Destiny

Bondei at AionianBible.org/Destiny

The Aionian Bible shows the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of after-life destinies. The underlying Hebrew and Greek words typically translated as *Hell* show us that there are not just two after-life destinies, Heaven or Hell. Instead, there are a number of different locations, each with different purposes, different durations, and different inhabitants. Locations include 1) Old Testament *Sheol* and New Testament *Hadēs*, 2) *Geenna*, 3) *Tartaroō*, 4) *Abyssos*, 5) *Limnē Pyr*, 6) *Paradise*, 7) *The New Heaven*, and 8) *The New Earth*. So there is reason to review our conclusions about the destinies of redeemed mankind and fallen angels.

The key observation is that fallen angels will be present at the final judgment, 2 Peter 2:4 and Jude 6. Traditionally, we understand the separation of the Sheep and the Goats at the final judgment to divide believing from unbelieving mankind, Matthew 25:31-46 and Revelation 20:11-15. However, the presence of fallen angels alternatively suggests that Jesus is separating redeemed mankind from the fallen angels. We do know that Jesus is the helper of mankind and not the helper of the Devil, Hebrews 2. We also know that Jesus has atoned for the sins of all mankind, both believer and unbeliever alike, 1 John 2:1-2. Deceased believers are rewarded in Paradise, Luke 23:43, while unbelievers are punished in Hades as the story of Lazarus makes plain, Luke 16:19-31. Yet less commonly known, the punishment of this selfish man and all unbelievers is before the final judgment, is temporal, and is punctuated when Hades is evacuated, Revelation 20:13. So is there hope beyond Hades for unbelieving mankind? Jesus promised, "*the gates of Hades will not prevail*," Matthew 16:18. Paul asks, "*Hades where is your victory?*" 1 Corinthians 15:55. John wrote, "*Hades gives up*," Revelation 20:13.

Jesus comforts us saying, "*Do not be afraid*," because he holds the keys to *unlock* death and Hades, Revelation 1:18. Yet too often our *Good News* sounds like a warning to "*be afraid*" because Jesus holds the keys to *lock* Hades! Wow, we have it backwards! Hades will be evacuated! And to guarantee hope, once emptied, Hades is thrown into the Lake of Fire, never needed again, Revelation 20:14.

Finally, we read that anyone whose name is not written in the Book of Life is thrown into the Lake of Fire, the second death, with no exit ever mentioned or promised, Revelation 21:1-8. So are those evacuated from Hades then, "*out of the frying pan, into the fire?*" Certainly, the Lake of Fire is the destiny of the Goats. But, do not be afraid. Instead, read the Bible's explicit mention of the purpose of the Lake of Fire and the identity of the Goats, "*Then he will say also to those on the left hand, 'Depart from me, you cursed, into the consummate fire which is prepared for... the devil and his angels,'"* Matthew 25:41. Bad news for the Devil. Good news for all mankind!

Faith is not a pen to write your own name in the Book of Life. Instead, faith is the glasses to see that the love of Christ for all mankind has already written our names in Heaven. "*If the first fruit is holy, so is the whole*," Romans 11:16. Though unbelievers will suffer regrettable punishment in Hades, redeemed mankind will never enter the Lake of Fire, prepared for the devil and his angels. And as God promised, all mankind will worship Christ together forever, Philippians 2:9-11.



Disciple All Nations

Hitani mkawagosoe wantu wa si zose wawe wahina wangu, mkawabatiiza kwa zina da Tate na da Mwana na Muye wa Muungu. - Matthew 28:19